

✓

I A C O B I  
**RÆVARDI**  
B R V G E N S I S  
**I V R I S C O N S V L T I**

egregij & Antecessoris  
Duacæni Opera

**QVÆ REPERIRI POTVERVNT**  
omnia in Tomos II. digesta,

NVNC PRIMVM IN GALLIIS EXCVSA.

Cum Indice Rerum, Verborum & Authorum  
locupletissimo.

IN VIRTUTE,



ET FORTUNA.



**L V G D V N I,**

Sumptibus LVDOVICI PROST  
Hæredis Rouille.

*M. DC. XXIII.*







AMPLISS. AC NOBILISSIMO D.D.

PETRO DE SEVE,  
D. DE MONTELLIER,  
Regis Consiliario, Præsidi integerrimo,  
vrbisque Lugdunensis mercatorum Præ-  
posito vigilantissimo,

LVDOVICVS PROST *Heres Rouille*  
S. P. D.



ORAM Pratore præstantissimo dictu-  
rus semel fœcundus facundia Parens;  
Prætor, inquit, qui apud te audent  
dicere, sublimitatem ingenij tui  
ignorant; qui non audent, humani-  
tatem. Quo principio mihi videtur om-  
nes uti posse (Præses æquissime, eruditissime) quibus ad  
te dicto, scripto ve aliqua suscipitur: nam & eminenti doctri-  
na tua nulla par inueniri potest oratio, & humanitas tua ne  
infimorum quidem obseruantia & studij significationem re-  
ssit; ita ut magna ingenij tui dotes, & aurea tua virtutes,  
quæ te ad sublimiores fori Lugdunensis dignitates, & emi-  
nentiores eiusdem Urbis honores extulerunt, certent cum pari  
humanitate: ego tamen humanitatis, & benignitatis tuæ  
admiratione ductus sum sapiens, quàm fastigij ac splendoris;  
perinde ut in ipsius præstantis æternæque natura boni-  
tatem animo & cogitatione feruntur citius homines, quàm  
in opes ac potestatem; priusq; olim Optimi à Romanis quàm  
Maximi nomine affectus est Iupiter. Ita multi ad te scribunt,  
aut dicunt quotidie, qui tamen si in sublimitatis tuæ splendo-

rem quasi in orbem solis intueri non audeant, clementia ta-  
 men tua & facilitate propè singulari alliciuntur, quorum ut  
 in numero quoque adhaerescerem, factum est, ut cum de Pa-  
 trono mecum agerem, cuius potissimum nomini exquisitum  
 hoc IACOBI RÆVARDI percelebris Iurisconsulti  
 Opus esset nūcupandum, ac patrocinio committendum (Vir  
 amplissime) unus præ omnibus visus sis, cuius nomen  
 tanquam potentissimum numen & securum præsidium im-  
 plorandum foret; essetque prænotandum utpote cuius semel  
 autoritate & commendatione comprobatum omnibus fo-  
 ret acceptissimum: quis enim melius de Operis præstantia  
 iudicare poterit quàm is, qui cum omnibus liberalibus di-  
 sciplinis, maximè iurisprudentia adoleuit, vitam posuit,  
 ac maximi iurisconsulti optimique iudicis nomen obtinuit?  
 Cuius quidem rei unum aut alterum testem non proferam,  
 sed uniuersam Curiam Parisiensem & totum forum Lugdu-  
 nense, in quo tantum æquitatis, doctrinæ & ingenij tui spe-  
 cimen dedisti, ut celebriores Consiliarij & aduocati in admi-  
 rationem simul & amorem virtutum tuarum traducti post  
 adeptam Præsidis dignitatem exultantes miris te extulerint  
 præconiis. In hoc autem antiquissima familiae tuæ laudem  
 retulisti, amplificasti, ex qua fuerunt viri præstātes armis, do-  
 ctrina, amplissimis dignitatibus perfuncti; ex qua Regi à se-  
 cretis & in Parlamento Parisiensi Consiliarij; ex qua Lug-  
 duni multi Quæstores regij, multi Consules, multi nobilissimi  
 Ciues floruerunt & florent adhuc hodie, viuunt & æternum  
 viuunt in bonorum ciuium Lugdunensium animis propter  
 varios in publica commoda susceptos labores, de quorum  
 virtutibus aliquid aliud adderem, nisi vererer inna-  
 tam eorum modestiam offendere. Hac cum ita sint, quis  
 non iudicet me percommode agere, si te huius libri Patro-  
 num interpellem, qui in tui contemplationem tot simul ha-  
 biturus sit patronos & protectores: sed an velles annuere,  
 necne, non semel anceps apud me cogitavi. Tandem quænad-  
 modum

modum solet contingere iis liberis , qui extra nuptias nati patrem ciere non audent , ne pudorem eius onerent ; si tamen ea sint indole, iis moribus , ut non indigni suorum conditione videantur , postmodum patrem inveniunt , qui adoptionis iure aliquo eos in numerum liberorum aggregat, nec naturales modo sed & legitimi aut certè ciuiles appellantur.

Quod,inquam,iis liberis accidit , idem prorsus de hoc libello fore non temere autumo , qui in primis pubertatis suæ annis ita volitare cœpit per manus hominum , & famam nescio quam auctori suo & patrino futuro quarere, ut iam iteratò excusus fuerit, & nunc denuo venustus, suis omnibus numeris absolutus & ad umbilicum perductus , in lucem sub tui nominis splendore & auspiciis prodire gestiat, adoptionemque speret : tandem ex communis famæ calculis me eo pellexit ac flexit ut eum tibi sisterem, adoptionemque tuam pro eo postularem, quasi qui muniri tuo nomine prorsus indignum se non indicet , nisi eum fallat φιλανθία : si autem mea industria, licet infinitis propemodum tuis meritis longè impar , quam ad ornatum & decorem ipsius non segniter adhibui , tibi grata fuerit, ut ab animo obseruantia & studiij humillimi

& addictissimi tui clientis in te profecta, animos  
addes ad maiora tuo angusto  
nomini offerenda.

Vale.

# INDEX SCRIPTORVM

IACOBI RÆVARDI BRUGEN-  
SIS IC. EGREGII ET ANTE-  
cessoris Duacæni.

## T O M V S I.

† Ad leges XII. Tabularum liber singularis, anno 1563.

\* Ad titulum De diuersis Regulis Iuris antiqui Commentarius, anno 1568.

† Variorum, siue de iuris ambiguitatibus libri V. anno 1564.

## T O M V S II.

\* Tribonianus, siue De veris vsucapionum differentiis aduersus Tribonianum, liber vnus, & ad legem Scribonianam, liber singularis, anno 1561.

† De præiudiciis libri II. anno 1565.

† Protribunalium liber singularis, anno 1565.

\* De auctoritate prudentum liber singularis, anno 1566.

*Hoc\* notata à Christophoro Plantino sunt  
Antuerpia edita, reliqua † ab Huberto  
Goltzio Brugis.*

C A P I

*CAPITA HVIVS LIBRI  
singularis.*

I. CAP.	<b>D</b> E legibus populi Romani.	fol. 1
II.	De priuilegiis sublatiſ.	3
III.	De patria poteſtate.	4
IV.	De priſco patronatus iure.	5
V.	De in ius vocando.	12
VI.	De priſco iure vindictiarum.	20
VII.	De litis addictione.	26
VIII.	De nexis.	27
IX.	De vindicibus.	38
X.	De teſtibus.	40
XI.	De eiꝯ cui teſtimonium deſuit obuagulatione.	41
XII.	De tutelis.	43
XIII.	De curatoribus furioſi vel prodigi.	45
XIV.	De ſeruitutibus itineris, actus & viæ.	47
XV.	De ſumptibus funerum, & iure ſepulchrorum.	49
XVI.	De mancipationibus.	58
XVII.	De uſucapionibus.	69
XVIII.	De teſtamentis.	71
XIX.	De ſucceſſionibus ab inteſtato.	72
XX.	De connubio patrum.	76
XXI.	De diuortiis.	77
XXII.	De tigno iuncto.	84
XXIII.	De frugum excantationibus.	89
XXIV.	De damno dato.	90
XXV.	De iniuriis, & famoſis libellis.	91
XXVI.	De furtis.	94
XXVII.	De publicis iudiciis & capitalibus.	97
XXVIII.	Miſcellanea quædam.	100

**INDEX**

# INDEX LEGVM QVÆ NOVO sensu in hoc libello declarantur.

<i>L. 26. D. De legibus.</i>	folio 2
<i>L. 4. de his qui sunt sui.</i>	4
<i>L. 2. §. 2. si quis caut.</i>	13
<i>L. pen. Qui satisfd. cog.</i>	12
<i>L. 2. de leg. tut.</i>	44
<i>L. 1. de seruit. rust. prad.</i>	47. 48
<i>L. 2. §. 13. de orig. iur.</i>	26
<i>L. 2. §. his legibus latis de orig. iur.</i>	68
<i>L. 3. de vsurpationibus.</i>	70
<i>L. 6. Ad exhibendum.</i>	84
<i>L. 98. in fin. de solut.</i>	ibid. & 86
<i>L. 18. §. tignum de rei vind.</i>	ibid.
<i>L. 7. §. cum in suo de acquir. rer. dom.</i>	85
<i>L. 1. de tigno iuncto.</i>	ibid.
<i>L. 2. de tigno iuncto.</i>	86
<i>L. 5. de iniuriis.</i>	93
<i>L. 3. Ad L. Iul. pecul.</i>	110
<i>L. 48. de verb. signific.</i>	15. 17. 18
<i>L. 53. de verb. sign.</i>	45
<i>L. 125. de verb. sign.</i>	61
<i>L. 233. de verb. sign.</i>	14
<i>L. 234. de verborum sign.</i>	98
Ex Codice.	
<i>L. ult. C. de patr. potest.</i>	6
<i>L. unic. de Athletis.</i>	57
<i>L. unic. de nud. iure Quirit.</i>	63
<i>L. 3. de suis &amp; legit.</i>	74
Ex Institut.	
<i>§. Vendita. de rerum diuis.</i>	62
<i>§. Cum filius de hered. quæ ab intestato def.</i>	74
IACOBI	



## IACOBI RÆVARDI

## IVRISCONSULTI AD

leges duodecim Tabularum  
liber singularis.

## CAPVT I.

*De legibus populi Romani.*



OPVLVS Romanus vt legem ferre, sic legem antiquare, & abrogare potuit. Antiquabat legem, quæ non perferebatur. Quo sensu antiquatam fuisse Tribuniciam rogationem de Veios commigrando, scripsit lib. quinto Lilius. Postquam enim Tribuni plebem assiduus concionibus agitassent, vt relictis Romanæ ciuitatis ruinis, in urbem paratam Veios transmigrarent, *tandem antiquata*, inquit Lilius, *huiusmodi lege, vrbs adificari cœpta est. Quæ autem semel perlata iterum tollebatur, lex illa abrogari dicebatur. Lex*, inquit Vlpianus, *aut rogatur, id est, fertur: aut abrogatur, id est, prior lex tollitur.* Et huius quidem abrogationis ea fuit auctoritas, vt nouis legibus antiquæ abrogatæ cederent, quemadmodum Varro testatus est lib. 8. de lingua Latina. *An non*, inquit, *sæpe veteres leges abrogata nouis cedunt?* Cicero quoque ad Atticum lib. 3. auctor est, nunquam esse obseruatas sanctiones earum legum, quæ abrogarentur. *Nam si id esset*, inquit, *nulla fere abrogari posset: neque enim vlla lex est, quæ non se sepiat difficultate abrogationis.* Cæterum vnde ius illud orum sit,

A

sit,



fit, vt veteres leges abrogatæ nouis cedant, & nunquam obseruentur sanctiones earum legum, quæ abrogarentur, exposuit Liuius. Legis enim cuiusdam Decemuiralis libro septimo meminit, cuius hæc fuisse verba videntur. **IVSSVS POPVLI, ET SVFRAGIA SVNT. QVODCVNQVE POSTREMVM IVSSIT, ID IVS RATVMQVE ESTO.** Ad quam legem visus est auctor ad Herennium libro secundo respexisse, quum eam defensionem tenuem esse contenderet, qua ostenditur id factum esse, quod ea lex sanciat, cui legi abrogatum, vel derogatum sit: id quod posteriori lege sancitum sit, esse neglectum. Nimirum quia illud demum ius, & ratum erat, vt aiunt Decemviri, quod postremum populus iusserat. Proinde si noua lege vetus esset abrogata sanctio, legi nouæ lex vetus omnino cedebat. Nec quidem in legum abrogationibus dūtaxat locum lex ista Decemuiralis habuit, verumetiam si cui legi derogatum, subrogatum, aut obrogatum esset. *Derogatur legi*, auctore in fragmentis Vlpiano, *cū prima legis pars tollitur*: vel vt Festus definit, *cū quid ex lege vetere quo minus fiat, sancitur noua lege*. Derogare ergo detrahere est. Subrogatur, cū aliquid primæ legi adiicitur: Obrogatur denique, quum mutatur aliquid ex prima lege. Ergo quodcunque populus abrogando, derogando, subrogando, & obrogando postremum iusserat, id ius ratumque erat. Quod autem Paulus contendit, *non esse nouum vt priores leges ad posteriores trahantur*, cap. 26. de legib. hoc ad legum abrogationes non pertinet, verū tunc locum habebat, si cui legi veteri aliqua sanctione noua derogatum, subrogatum, aut obrogatum esset: tunc enim lex vetus ex noua lege sic dependebat, vt hæc sine illa, & è contra, in vsu esse, aut in iudiciis versari nulla ratione posset: id quod auctore ad Herennium demonstrauimus.

CAPVT

## CAPVT II.

*De priuilegiis sublatiis.*

**A**LIO sensu Decemuiri, alio item Iurisconsulti priuilegia sunt interpretati. Illi quidē omnes illas leges priuilegiorū nomine complexi sunt, quæ in priuatos homines ferebantur: cū ē contrario legis ea vis semper esset, vt ad omnes pertineret. Iureconsulti verò ius illud singulare priuilegium appellarunt, quod manifesta & euidentis æquitatis ratio, contra vulgaris, iuris communis regulas, aliquando cogit indulgeri Decemuiri nulla admittunt priuilegia: Iureconsulti ea requiri non dissimulant. Nec enim comitiis centuriatis aliqua irrogari priuilegia passi sunt Decemuiri. Expresse enim pro domo sua testatus est apud Pontifices Cicero, vetare leges sacratas, vetare 12. tabulas, leges priuatis hominib. irrogari, id esse enim priuilegium, neminem vnquam tulisse: nihil esse crudelius, nihil perniciosius, nihil quod minus Romana ciuitas ferre possit. Idem Cicero huius legis verba libro 3. de legibus hunc in modum refert: PRIVILEGIA NE IRROGANTO. Et quia in iisdem tabulis huiusmodi caput sequitur: *De capite ciuis nisi per maximum comitiatum ne ferunto.* Inde quidam statim ratiocinati sunt, priuilegia per comitiatum maximum irrogari potuisse: quo nihil potest absurdius dici, præsertim cū eodem in loco Cicero leges hæc duas præclarissimas de duodecim tabulis trāslatas scribat, earumque alteram priuilegia tollere, alteram de capite ciuis rogari nisi maximo comitiatu, vetare. Nec quem moueat, quod in eodem de legibus lib. 3. dixerit expresse Cicero, ferri de singulis nisi cēturiatis comitiis, Decemuiros noluisse. Illud enim non ad priuilegia, sed ad

A 2

roga

rogationem de capite Romani ciuis omnino pertinet. Verant, inquit, priuilegia irrogari, hoc est, in priuatos homines leges ferri; vetant, inquit, de capite ciuis nisi per maximum comitiatum ferri, hoc est, de singulis. Igitur priuilegium omne secundum Decemuiros iniustum est, & improbum, & idcirco nec irrogandum: secundum Iureconsultos verò probum, iniustum, ac sæpe necessarium: qualia sunt, creditorum priuilegia, priuilegium fisci, & id genus alia.

## CAP V T III.

*De patria potestate.*

**S**TIPVLATIO quatenus conuentio est, iuris non Sciuilis tantum, sed etiam gentium est: quatenus contractus iuris ciuilis est, non gentium. Testamentum quatenus suprema voluntas definitur, iuris tam gentium est, quàm ciuilis: quatenus verò iusta voluntas, iuris ciuilis est, non gentium. Sic quoq; patria potestas, iuris ciuilis, & gentium est, & est quoq; iuris ciuilis tantum. Est quidem iuris ciuilis, & gentium ratione potestatis, quia omnibus hoc gentibus innatum est, & ab iis obseruatur, vt filius in sui patris sit potestate, c. 2. de iust. & iur. Est verò iuris ciuilis tantum, quia ex iustis nuptiis, quas soli ciues Romani contrahunt, ea sic constat, vt iure ciuili plurima patri concessa sint, quæ gentium iure eidem non conceduntur. Ideoq; ius potestatis, quod soli ciues Romani liberos habent, ius dicitur proprium ciuium Romanorum, c. 3. de his qui sunt sui. §. 2. instit. de patr. potest. Neque enim peregrinus ciuem Romanum, nec ciuis Romanus peregrinum in potestate habere potest. Et idcirco si patri, vel filio aqua & igni interdictum esset, patria huiusmodi potestas tollebatur: siquidem is cui aqua & igni interdictum erat, peregrinus fiebat, auctore in fragmētis Vlpiano,

piano, tit. 10. Eoque respexisse omnino visus est libro decimo epistolarum Plinius ab Imperatore Traiano Chrysippo cuidam eiusque vxori ciuitatem postulans. *Rogo ergo, inquit, ut propinquis eius des ciuitatem Chrysippo Mithridatis, vxorique Chrysippi Stratonica Epigoni. Item liberis eiusdem Chrysippi, Epigono & Mithridati, ita ut sint in patris potestate, utque iis in libertos seruetur ius patronorum.* Illud autem ius potestatis, quod cum reliquis gentibus ciues Romani habent commune, ad ius non solum ciuile, sed etiam gentium referri debet. Idque inter ceteros apertè testatus est idem Plinius, de hereditatù vigesima differens in Panegyrico. *Tu quidem, inquit, Caesar, illam exceptionem remouisti, si modò filius in patris potestate fuisset: intuitus opinor vim legemque naturæ, quæ semper in ditione parentum esse liberos iussit.* Et hoc illud est, quod hunc in modù Cicero scribit. lib. 3. offic. *Maiores aliud ius gentium, aliud ciuile esse voluerunt: quod enim ciuile, non idè continuo gentiū: quod autè gentiū, id ciuile debet esse.* Ius autè potestatis, quod proprium ciuiū Romanorum dicitur, inde ab ipso Romanæ ciuitatis exordio trahit originem. Temporibus siquidem Romuli, omnis etiam necis in filium patri iure ciuili auctoritas indulgebatur: maiorque concessa patri filium potestas fuit, quam domino in seruum. Seruus enim venditus, deinde libertatem adeptus, sui iuris fiebat. Filius verò à patre venditus, si liber fieret, rursus in patris potestatem redigebatur, & post tertiam demum venditionem eximebatur è potestate, ut auctor est Dionysius lib. secundo. Proinde si quid commisisset filius, quod castigationem, aut etiam seueriorem aliquam requireret animaduersionem, castigandi, & in filium animaduertendi, omnem patri permisit Romulus potestatem: adeò ut occidere, vendere, in exilium mittere, aliisque supplicijs filium pro arbitrato affice-

re pater sine fraude potuerit. Nec quidem videri potest Romulus tyrannidem, aut carnificinam aliquam parentū iure iniustam tollerasse, ut imperitis quibusdam persuasum esse intelligo, verum scelera filiorū iustis parentum decretis vindicari voluisse. Hæc cum ita sint, videamus quo sensu accipi debeat, quod c. ult. C. de pat. potest. hunc in modum Constātinus scribit: *Libertati à maioribus tantum impensum est, ut patrib. quibus ius vite in liberos, necisque potestas olim erat permissa, libertatem eripere non liceret.* Nonne qui filium vendit, libertatem eripit? Si pater, qui filium vendit, eriperet libertatem filio, utique filius manumissus non ingenuus, sed ut reliqui serui libertinus efficeretur. *Libertatem autem pro ingenuitate accipi, non est nouum.* cap. 40. de lib. causa. c. 21. de stat. hom. Permiserunt itaque maiores à patribus filios vendi, & in seruitutem redigi, salua tamen libertatis, hoc est, (ut interpretari videtur Iulius Paul. lib. 5. sent. tit. 1. in princ.) ingenuitatis prærogatiua, sic ut manumissi inter ingenuos cēseantur, non autem inter libertinos. Sed an postliminium habeant? Postliminium habere filium à patre venditum, negat apertè Cicero de Orat. libro 1. *Memoria enim proditum esse, ait, quem pater suus, aut populus vendidisset, aut pater patratus deditisset, ei nullum esse postliminium.* Cæterum an ius istud potestatis scripta lege proditum sit, an verò sine lege dubitat Dionysius. Nobis aliquando placebat expressa quadam Romuli constitutione illud fuisse introductum: sed in contrarium me vocat Vlpiani sententia; qui ius istud potestatis moribus receptum fuisse arbitratus est cap. 8. de stat. homin. Scribit etiam Pomponius, in initio Romanæ ciuitatis populum sine certa lege, sine iure certo primum agere instituisse, cap. 2. in princ. de orig. iur. Proinde huiusmodi iure incerto ius patriæ potestatis

potestatis fuisse receptum, quam per certam aliquam legem Regiam est verisimilius. An autem ius istud potestatis ante exactos Reges in usu Romæ desierit esse, videamus. Numa Pompilius omne ius vendendi filios, connubio parentum consensu iunctos, parentibus, si Dionysio credimus, expressa lege ademit. Nec quidem ius vendendi huiusmodi filios duntaxat, sed etiam omne ius necis, & seuerioris in filios animaduersionis Numam ademisse parentibus omnino mihi persuaderem, nisi expressè scripsisset Liuius, cum de prouocatione Horatij, qui propriam sororem interemerat, ad populum certabatur, motos tunc fuisse homines in eo iudicio, maximè P. Horatio patre proclamante, se filiam iure causam iudicare, seque nō ita esset, patrio iure in filium animaduersurum fuisse. Vnde statim conieci, ius in filios animaduertendi necdum Tullij Hostilij, qui tunc regnabat, temporib. ademptum, parentibus fuisse. Porro non multò post Hostilium Seruius Tullius Tarquinij successor, legem tulit, qua filium parentes verberantem Diuis parentum sacrum esse voluit. Et quia huiusmodi facinus iure potestatis patriæ à parētibus vindicari Seruius non permisit, si non parentibus omne in filios animaduerrēdi ius eo tempore ademptum fuisse videatur, saltem patriæ potestatis iure saluo, tantæ impietatis auctores filios sic Rex voluit puniri, ut à quouis impunè possent occidi. Verba legis hæc sunt: SI PVER PARENTEM VERBERARIT, AST OLLE PLORASSIT PARENTES, PVER DIVIS PARENTVM SACER ESTO. auctore Festo lib. 14. Quæ lex etiam Virgilio nota fuit: ait enim libro sexto, apud inferos puniri quibus

*Pulsatúsve parens, aut frans innexa clienti.*

Scribit idem Festus (ut hanc legem obiter explicemus) plorassit parentes, idem esse quod clamarit. Sed

quia qui proquiritant, qui iubilant etiam clamant, videamus quid inter proquiritare, iubilare, & parentes plorare intersit. Varro scribit libro quinto, de lingua Latina qui fidem Quiritium clamans implorat eum dici proquiritare: & ut quiritare urbanorum, sic iubilare rusticorum esse. Simili modo qui parens parentum implorabat auxilium, parentes plorare dicebatur. Solebat autem is cui vis aliqua fiebat, si quidem ruri ageret, iubilare: sin verò in Romana ciuitate, & ciuis esset, proquiritare. Vnde illud Terentij in Adelph.

*Obsecro populares ferte misero atque innocenti auxilium,  
Subuenite inopi.*

In quem locum Donatus, & hoc est, inquit, quod veteres quiritare dicebant, Quirites conclamare.

Quo spectat etiam Plauti illud in Curcul.

—— Ergo ambula in ius, hem tibi.

C N. O ciues, ciues. M I. Quid clamas?

Si deniq; parens esset qui à filio vim pateretur, parens parentes plorabat, hoc est, conclamabat, & Diuis parentum sacer erat filius, hoc est, eius facinus conclamatis parentibus Diuis parentum sic deuovebatur, ut filius à quouis sine fraude posset occidi, & qui eum occidisset, parricidij non damnaretur. Quia quidem lege Regia vsi nō sunt Romani perpetuo. Scribit enim Vlpianus, Si filius matrem, aut patrem, quos venerari oportet, contumeliis affecisset, aut impias manus eis intulisset, præfectum urbis delictum ad publicam pietatem pertinens, pro modo eius vindicasse. cap. 1. de obseq. parent. & patron. præst. Potestatis itaque patriæ ius, quo impunè filios vendere & occidere parentibus omnino erat liberum, ante exactos Reges, nisi me vehementer coniectura fallit, in vsu esse desuit. Quamuis interim inficiari non possim, Decemuiros in quartam suarum legum tabulam



tabulam eum quoque morem retulisse, quo *non nisi post tertiam venditionem patris potestate filios liberari erit receptum*, idque Dionysium scripsisse libro secundo. Verum eam fuisse Decemviorum intentionem, vt veterem & incertam illam vendendi filios consuetudinem, quæ Romuli temporibus in viuerat, noua lege confirmare voluerint, mihi nequaquam persuadeo. Dicam itaque quod sentio liberè. Romuli temporibus post tertiam demum venditionem filius potestate patria liberabatur, & sui iuris fiebat. Voluerunt quoque Decemuii, post tertiam demum venditionem filios sui iuris fieri. Sed diuersa ratione. Romulus per venditiones tres veras tres venditiones intellexit. Decemuii verò ne ius antiquum penitus immutatū cum magistratu videretur, aliqua non legum dūtaxat, sed & morum veterum superesse vestigia voluerunt. Ideoque tres illas venditiones, sine quibus & patris potestate filius more maiorū non eximebatur, in suas tabulas retulerunt. Itaque filius ter mancipatus, ter manumissus, & more maiorū, & lege Decemuirali sui iuris olim fiebat. More maiorum quidem, si ter verè mancipatus, ter verè manumissus fuisset: lege verò Decemuirali fiebat sui iuris filius familias emancipatione, hoc est, tribus imaginariis mancipationibus & manumissionibus. *Liberi*, inquit Vlpianus in fragmentis, tit. 10. *parentum potestate liberantur emancipatione, id est, si postea quam emancipati fuerint, manumissi sint.* Per emancipationem autem, imaginariam apud Vlpianum intelligi, non aliquam veram venditionem, Caius in suis institutionibus demonstrat lib. 1. tit. 6. *Emācipatio*, inquit Caius, *hoc est, manus traditio, quedam similitudo venditionis est.* Et ad huiusmodi emancipationem legem hanc Decemuiralem pertinuisse, expressè testatus est idem Vlpianus eod. tit. 10. Cū enim dixisset,

xisset, filios patria potestate emancipatione liberari, subiecit: *Sed filius quidem ter mancipatus, ter manumissus, sui iuris fit. Id enim lex 12. tab. iubet his verbis: SI PATER FILIUM TER VENVDAVIT, FILIUS A PATRE LIBER ESTO.* Nec verò dubitabit, quin hæc interpretatio nostra verissima sit, qui satis emancipationum solemnia apud Caium diligenter excusserit.

## CAPUT IV.

*De prisco patronatus iure.*

SCRIBIT lib. II. Dionysius Romulum patriciis plebeios commendasse, optione cuique è vulgo data quem vellet patronum eligendi, more ab Atheniensibus repetito: & eam pauperum tutelam patronatum appellatam fuisse: iusque patronatus officii tum inde apud Romanos duratibus huiusmodi constituisse: nimirum ut patroni clientibus de iure responderent, cuius illi rudes erant, & ignari: absentium æquè atque presentium curam gererent: adessent in iudiciis, omnemque accusatoris impetum sustinerent. Iuxta Plauti illud in Menec.

*Iuris ubi dicitur dies, simul*

*Patronis dicitur: quippe qui pro illis*

*Loquantur, male quæ fecerint: aut ad*

*Populum, aut in iure, aut apud iudicem res est.*

*Sic me hodie nimis sollicitum cliens*

*Quidam habuit: neque quod volui agere quicquam*

*Licium est: ita me attinuit, ita me detinuit.*

*Apud Aediles pro eius factis plurimis,*

*Pessimisque dixi causam.*

Cientes autem patronis, qui tenuioris erant fortunæ, quam ut filias honestè commodèque possent elocare, in elocandis filiabus opitulabantur, eosque eorumque filios ab hostibus interceptos, sumptu proprio

prio redimebāt. Et fuit certè ius istud patronatus tantæ apud veteres auctoritatis, vt contenderit expressè M. Cato, *patrem primum, deinde patronum proximum nomen habuisse* auctore Gellio l. 5. c. 13. Proinde non est dubium, quin seuerè in patronos fraudulētos Romani animaduernerint. Sanè Dionysius auctor est, clientē aduersus patronum, aut patronum aduersus clientem dicere testimonium non potuisse: nec alterum ab altero accusari, aut inter inimicos numerari: qui quid horum fecisset, teneri eum Romuli lege de proditoribus, eumque vt Diti sacrū, interficere cuilibet liberū fuisse. Atq; huius quidē prisci iuris Decemuires etiā nostri aliquā in suis tabulis memoriā superesse voluerūt. Ideoq; ius istud patronatus à Romulo vtī introductū fuit, ita in suas quoq; tabulas transtulerūt, his verbis:

PATRONVS SI CLIENTI FRAVDEM FAXIT SACER ESTO: quemadmodū Seruius Honoratus; & post eū Iulius Sabinus exponentes illud Virgilij, *Et fraus innexa clienti*, adnotarunt. Refert idē Sabinus, per fraudē in hac lege prauaricationes Urbanū intellexisse, quod mihi ad omnem fraudē, dolūque malum potius referendum videtur. Voluerunt itaque Decemuires, patronum qui clientē fraudasset, sacrum esse. Morem Romanis fuisse ait Dionysius, vt quos vellēt impunè occidi, eorum corpora deuouerēt Deo cuipiā, præcipuēque Diis inferis. Eumq; morē obseruasse Romulum in fraudibus patronorum, clientumque vindicandis, idē expresse addidit Dionysius. Quo sensu hominē sacrum accepisse in hac lege Decemuiros dubium non est: quamuis *hominem sacrum Festus eum definierit, quem populus indicauit ob maleficium, neque fas est eum immolari, sed qui occidit, parricidij non damnatur. Quæ quidem Festi definitio alio referri debet.* Et certè Liuius lib. 3. *L. Valerio & M. Horatio*

Consul.

*Consulibus, sancitam, ait, nouam fuisse legem, ne quis ullum magistratum sine prouocatione crearet: qui creasset, eum ius fasque esse occidi, nec eam eadem capitalis noxe haberi. Ad quam legem Festi definitio non incommodè trahi posse videtur.*

## CAPVT V.

*De in ius vocando.*

**Q**U I ius suum volebant persequi, in ius aduersarium vocabant:quem sequi nolentem attestationis medio ducebant, & reluctantem omnino trahabant, sique opus esset, rapiebant. Plaut. in Pen.

*Sed quid ego dubito fugere hinc in malam crucem,*

*Prinsquam oborto collo ad Pratorem trahor?*

Erat enim lege sancitum Decemuiri, in ius vocati ut irent. Auctor ad Herennium, lege ius est, inquit, ut in ius eas cum voceris. Cicero l. 3. de legibus: A pueris, Quinte, didicimus. SI IN IUS VOCET, ATQUE EAT, & huiusmodi alias leges nominare. Si autem in ius vocatus vitio, morbove, id est, neque febriculoso, neque graui nimium, sed vitio quodam imbecillitatis, atque inualentiae ire in ius non poterat, ei *iumentum*, hoc est, vectabulum (ut Cæcilius apud Gellium lib. 20. interpretatur: ) quod iunctis pecoribus trahabatur, dari voluerunt Decemuiri. Eique haud aliter in ius sequi, quam strata, qua nimis agri portari solebāt, arcera, recusanti, arcera sterni expressa lege prohibuerunt, quam legem hunc in modum apud Gellium esse restituendam existimaui: SI MORBUS ÆVITASVE VITIVM ESIT, QVI IN IUS VOCASSIT, IUMENTVM DATO: SI VOLET AR CERAM, NE STERNITO. In libris enim impressis mendosè legitur: Si nolet, arcera ne sternito. pro, Si volet arcera, ne sternito. Item esset, pro est. Decemuiri itaque

iraque postulanti arceram reo sterni veruerunt: non quod eam sternere si actor voluisset prohiberetur, verum quod eam reo sine arcera in ius sequi recusanti, inuitus actor sternere non cogeretur. Ea siquidē est (prout illam Sextus Cæcilius interpretatur) Decemuirorum sententia, vt in ius vocato pauperrimo homini, vel inopi, qui aut pedib. fortē ager esset, aut quo alio casu ingredi nequiret, plaustri daretur: ne causatio ægri corporis perpetuam daret fidem derectantibus, iurisque actiones declinantibus, vacationem. Nec quidem si *morbis fonticus*, quem vehementiorem vimque grauiternocendi continentem interpretatur idem Cæcilius, reum inuasisset, arceram sterni permiserunt Decemuires, sed *iudicij diem diffisum esse voluerunt*, cap. 11. §. 11. Si quis cautio. Decemuires cum diem diffindi dicebant, qui differebatur. Nec dubium est, quin hanc legem de diffindēdo die à Numa Rege desumpserint. Nam certa quædam vitia enumerasse visus est Numa, quibus si iudex, vel altervter ex litigatoribus impeditus esset, dies iudicij diffinderetur. Eiusque legis particulam, quæ apud Festum lib. 16. mendosissima exstat, omnino mihi persuasit Iacobus Cuiacius acutissimus interpres, sic esse restituendam: *SI QUID HORVM FVIT VITIVM IVDICI, ARBITROVE, REOVE, DIES DIFFISVS ESTO.* In exemplarib. impressis pro *Diffisus*, legitur *Diffensus*, erroris non admodū obscura origine, siquidem veteres ita scribere solebant, *disseisus*, pro *diffisus*: quod cum non perciperent imperiti librarij, *disseisus* loco, *diffensus* posuerunt. Dies autem ita diffindi solet ex lege duodecim tabularum, vt si morbo fontico actor, vel reus impeditus esset, morbum in iure allegari per amicum curaret: tunc Prætor excusatione cognita, quia Decemuires ob morbum fonticum volebant diem iudicij

dicij diffisum esse, in diffindendo die hac formula utebatur: HIC DIES DIFFISVS ESTO. vt auctor est Acron in Horatium. Ergo vocatus in ius, ni morbo esset opus iumento, ni ve morbo fontico dies iudicij diffisus esset, statim in ius sequi actorem cogebatur: eique non sequenti præsentibus antestatis actor iudicium denunciabat. Antestatos autem inde appellatos putauit Porphyrio, quod ante superstites, siue testes deberent aduocari, & in testimonium adhiberi, quam actor reum manu posset præhendere. Et id quidem expressa Decemuirali lege fuisse cautum, idem addidit: quam ego sic restituo: SI VIS VOCATIONI FVAT, TESTAMINI: IGITVR EM CAPITO ANTESTARI. Veteres autem *fuat* dixisse pro *fiat*, expressè testatur Nonius Marcellus, & in Virgilium Iulius Sabinus. *em* quoque pro *eum* antiquos posuisse, auctor est Festus. Itaque si actor aduersarium vocaret in ius, & is vi resisteret, (vt ita vis fieret vocationi) voluerunt Decemuires actorem testari, hoc est, testes aliquot aduocare. *Igitur em capito*, id est, tunc cum capito, siue cum manu præhendito: *antestari*, hoc est, attestando, siue Græcorum more, τοῖς μαρτυρίσασθαι. Sic enim antestari Græcè dici ex ædis Beati Germani Parisiensis Lexico primus observit Barnabas Brissonus. Vt ita ne ex lege quidem 12. tabularum reus manu præhendi sine antestatione potuerit. Nec verò satis erat Decemuiris manibus antestationis medio reos præhendi, verum si caluerentur, si pedem struerent, hoc est, si frustrarentur, vix pedem pedi præferrent, fugerent, ociosè irent, remorarentur (vt Festus in verbo *Struit*, & Caius c. 233. de verb. sign. interpretantur,) manus in reos iniici, hoc est (vt mihi quidè videtur) manibus reos trahi, & rapi in ius permiserunt Decemuires his verbis: SI CALVITVR, PEDEMVE STRUIT, MANVM ENDO IACITO. vt auctor est idem



idē Festus. Antestationes autē sic fieri solebāt: Auriculā actor vnus ex superstitibus attingens, sic eū interrogabat, *Licet antestari?* Si ille responderet, *Licet*, manus in aduersariū iniiciebantur, perque manus iniectionē ducebatur, trahebatur, sique opus esset, ad Prætorem obtorto loco rapiebatur. Horatius lib. 1. serm. sat. 9.

— *Casu venit obuius illi*

*Aduersarius: & quo tu turpissime? magna*

*Exclamat voce, & licet antestari? ego verò*

*Oppono auriculam: rapit in ius, clamor utrimque,*

*Vndique concursus.*

Vnde satis perspicuum est; medio antestationis, in aduersarios manus sic olim actores iniecisse, vt eos reluctantes, pedē struentes, vi ad Prætore raperent. Hic illius facienda mentio antiqui lapilli est, quē cū tuus Marce generosissime, germanus frater Guido Laurinus mihi nuper exhibuisset, statim ea quæ de antestatione coniecturis aliquot verisimilibus confirmaram, esse verissima deprehendi. Erat enim insculpta lapillo manus atterēs auriculā, cū hac inscriptione MNHMONETE, quod idē est cū memor esto. Eoque referendum esse illud Virgilij in Bucol. *Cynthius aurem vellit,* & admonuit vir clarissimus, eruditionisque tibi, & affinitatis nomine charissimus, Iacobus Susius nuper dū hæc legeret, rectē animaduertit. Et sic quidē aliud nihil in effectu significare videtur antestari, quā testibus vti, vel, vt Plautus ait, testes facere, quādo actor in reum manus iniicere volebat. Plaut. in Curcul.

*Ne facias testes, neque equidem tibi debeo quicquam.*

Quin & Caius cū de illis ageret, qui neque sequuntur, neque ducuntur, in reum manus iniici solere, *reum manibus teneri* scribens, indicare visus est: *Solutum*, inquit, *non intelligimus eum, qui licet vinculis liberatus sit, manibus tamen tenetur.* cap. 48. de verborum significat.

Quod



Quod si antestatus non esset actor, & manum inie-  
cisset, *iniuriarum*, vt existimat Acron, reus constitui  
poterat. Hinc illud Plauti in Curcul.

*Hocine pacto indemnatum, atque intestatum me arripi?*  
Nec immerito, qui enim non reluctantem trahit, aut  
rapit, vim inferre videtur. Proinde ne sine iusta causa  
sic in aduersarios sæuirent actores, lege constitutum  
reor Decemuirali, vt qui sine antestatione in reum  
manus iniecisset, *iniuriarum* posset conueniri. Nec  
verò huius antestationis solemnitas in tantum ab  
aliorum testimoniorum iure discedebat, quin vt à te-  
stimoniis reliquis, sic ab antestatione serui repelle-  
rentur. Plautus in Curcul.

——— *Seruon' antestari? P. H. Vide.*

c. *Hem, vt scias me liberum esse.*

Porrò vt quis in ius raperetur, non semper opus ante-  
statione fuit: nam si reus improbus esset, & intestabi-  
lis, vt sunt lenones fures, & id genus alij, sine ante-  
statione ad Prætorem rapiebatur: id quod doctissimus  
Præceptor meus Hopperus in eruditissimo suo de  
iuris arte libro tertio adnotauit. Vtilius siquidē erat,  
plagiarios, & fures priuata manu ciuiumque concur-  
su ad Prætorem sine antestatione rapi, quam sub præ-  
textu securitatis tranquillitatisque publicæ, tergiuer-  
satione rapinis, plagis aut furtis indulgere. Quod cū  
ita sit, mirum nemini profectò videri debet, in impro-  
bos huiusmodi homines manus etiam sine antesta-  
tione iniici consueuisse. Sic Lyconidem adolescen-  
tem aulæ quadrilibris furem suspicans Euclio, in ius  
rapere visus est voluisse apud Plautum in Aulularia:

*Nisi referes. L. Quid tibi ego referam? E. quod sur-  
ripuisti meum.*

*Iam equidem ad Prætorem hercle te rapiam, & tibi scri-  
bam dicam.*

Nam

Nam quod nullam hîc superstitem optauerit praesentiam Euclio, quod nullum viatoris implorauerit auxilium, hinc potest probabiliter argui, communi iure in eum quem furem esse non dubitabat adolescentem manus iniicere Euclionem potuisse. Similiter in Persa, cum in Dorpalum lenonem manus iniiceret Saturio parasitus, interrogatus à lenone an te antestaretur, respondit:

— Tuane ego caussa carnifex  
Cuiquam mortali libero aures atteram,  
Qui hic commercaris ciues homines liberos?

Rursus in Rudente, cum Labrax leno à Pleusidippo in ius vocaretur, sic eum interrogabat Pleusidippus:

Rapier hinc obtorto collo manis, an trahi?  
Vtrumuis opta dum licet.

Cumque se neutrum velle leno respondisset, subiecit statim Pleusidippus:

Abi sane ad litus curriculo Trachalio,  
Iube illos in urbem ire obuiam ad portum mihi,  
Quos mecum duxi, qui hunc ad carnificem trahant.  
Ego hunc scelestum in ius rapiam exulem.  
Age ambula in ius. L. quid ego deliqui?

Et paulò pòst:

Obsecro subueni mi Charmides,  
Rapior obtorto collo. C H. quis me nominat?  
L. Viden' me ut rapior? C H. video & inspecto lubens.  
L. Non subuenire mihi audes? C H. quis homo te rapit?  
L. Adolescens Pleusidippus.

Cæterum si honestior esset persona, quam ut eam rapi conueniret, (erant enim qui in ius vocati, duci aut rapi ne medio quidem antestationis poterant, ut ex epigraphe cap. 48. de verb. sign. colligimus) diem ei dicebat, eamque promissa pœna, quam multam Plautus appellat, datisue, ni prædia possideret, vadi-

B bus

bus, vel pignore, dimittebat. Plautus in Capt.

*His diem dicam, irrogabo multam.*

Nam quod lege cautum fuisse diximus, in ius vocati ut irent, Prætor illud edicto sic est interpretatus: *In ius vocati ut eant, aut satis, vel cautum dent.* Quod enim certos Prætor sessionum haberet dies, quibus postulationibus, quibus etiam cognitionibus eum vacasse, lib. 1. Variorum demonstrabimus: manus in aduersarium iniiciendi oportunitate actores fraudari diutius Prætori iniquum videbatur. Proinde concessit agere volentibus *aduersarios suos vadari*, hoc est, sic in ius vocare, ut ni pœnam stipulantibus actoribus promitterent, aut satis vel cautum aliquo modo darent prædiave possiderent, manus iniectionem paterentur, & medio antestationis vel ad Prætorem, si is postulationib. operam daret, ducerentur: vel si aliis negociis occupatus esset Prætor, in carcere proxima postulationum die in iure sistendi causa adseruarentur. Plautus in Persa:

—— *Vadatur hic me. p. utinam vades*

*Desint, in carcere ut sis.*

Quod etiam de his qui neque sequuntur, neque ducuntur, Caius adnotasse visus est, cap. 48. de verb. sig. *Ac ne eum, inquit, intelligimus solutum, qui in publico sine vinculis seruatur.* Per publicum enim carcerem siue custodiam intelligi, illud Plauti in Amph. liquido demonstrat.

—— *Ita*

*Peregrè adueniens, hospitio publicitus accipiar.*

*Vades* autem dicti sunt, qui pro altero vadimonium promittebant: dictosque putat Acron, *quod qui eos dederat, vadendi haberet potestatem.* Et quamuis putauerit Festus, vades sponsores significare datos in re capitali, nihilominus tam in ciuilibus, quàm in capitalibus causis vades dari, vadimoniumque promitti solere,

ex

ex sola quam Cicero pro P. Quintio scripsit oratione, satis probari potest. Promittitur autem vadimonium, cum aliquis formula præscripta certo tempore se spondet præsentibus antestatis in ius venturum. Nec aliter exigi vades potuisse existimo, quàm si de reo sibi non satis confideret actor, cum non ignorans rebus incæptis non satis idoneum. Tunc enim consuetudinẽ fuisse scribit Varro, ut reus pro se alterũ constitueret. Quasi è contrario, si reus incæptis rebus satis esset idoneus, vades peti non debuerint. Hinc factum deindẽ suspicor, ut apud Macrum possessores rerum immobilium satisfacere non debuerint, cap. penult. Qui satisfd. cog. Et cum Vlpianus *duplicem esse in iudicio sistendi cautionem* scriberet, *unam nudam, satisfdato alteram: si domum reuocandi beneficio gauderet reus, nuda cautione promitti vadimonium* addidit. Ut sic non solum possessores rerum immobilium, aliique rebus incæptis, satis idonei, à satisfdatione liberarentur, verum etiam qui domum reuocandi ius habebant. Si itaque reus non satis locuples actori videretur, nec domum reuocandi, aut aliud aliquod habere priuilegium, sic cum actor vadari solet, ut si nulla idonea interueniret satisfdatio, manus ab iniectione non abstineret. Ideoque vades, vel pignus dare vadatus debebat. Vades reum sistere certò die promittebant. De pignore autem addidi, quod *ut reis, sic etiam pignoribus idoneè caueri* Vlpianus responderit. cap. 1. §. 7. de colat. Quomodo satisfdato, aut pignoribus datis idoneè caueri, & si fides sine satisfdatione habita fuerit promittendi, idoneè cautum videri, respondit idem Vlpianus, capit. 4. §. 6. de fideicomm. libertat. Hanc enim veram esse cautionum, quæ iudicio sistendi causa in usu erant, distinctionem, satis indicat titulus octauus libri secundi Pandectarum. Et hæc quidem omnia sic olim

locum habebant, si Romanum ciuem ciuis Romanus in ius vocasset. Cæterum si cum hoste manus esset conferenda, nec trahi, nec rapi peregrinum in ius passi sunt Decemviri, sed diem duntaxat condici, *Hostis*, inquit Cicero libro primo officior. *apud maiores nostros is dicebatur, quem nunc peregrinum dicimus:* indicant duodecim tabulæ, AVT. STATUS DIES CVM HOSTE. Et hæc hæctenus de in ius vocando,

## CAPVT. VI.

*De prisco iure vindiciarum.*

**I**NITIO ciuitatis Romanæ hæc fuisse priuatorum iudiciorum ratio videtur, vt qui rem suam vellet persequi, manum cum aduersario confereret. Nam de qua re disceptabatur, siue ager, siue quid aliud esset, solet eam actor cum aduersario manu præhendere, & in ea re omnibus verbis vindicare: quæ vindicatio, vindicia dicebatur, eaque vindicia correptione manus in re, atque in loco præfenti, auctore Prætor ex 12. tabulis, fiebat, in quibus ita scriptum est: *SI QV EX IVRE MANVM CONSERVNT.* auctore Gellio, lib. 20. cap. 9. Cum enim angustiorib. quàm quibus Italia circumscribitur, Romanum imperium finibus concludebatur, tunc qui iurisdictioni præerant vnà cum litigatorib. ex iure in fundum controuersum, dicendarum vindiciarum causâ, proficiscebantur: ibique manuum facta consertione, quem suum esse fundum actor contendebat, eundem contra vindicabat reus: eamque vim quæ per huiusmodi manus correptionem fiebat, ciuilem, & festucariam verbo dictam, non manu factam fuisse, idem Gellius expressè testatus est. Cæterum postea quàm prætores, propagatis Italiæ, orbisque Romani finibus, datis iurisdictionibus,

tionibus, negotiisque occupati, ex iure proficisci dicendarum vindiciarum causa, in res longinquas gra-  
uabantur, institutum est contra 12. tabulas, tacito  
populi consensu, ut litigantes non ex iure apud Præ-  
torem manum conferrent, hoc est, non vnà cum  
Prætorē manus conferendæ gratia ex iure, siue loco  
illo in quo ius redditur, in locum controuersum pro-  
ficiscerentur: sed ex iure manu confertum vocarent,  
id est, alter alterum ex iure ad conferendam manum  
in rem de qua ageretur, vocaret: & simul in agrum  
( si de eo fortè controuersia esset ) profecti, terræ ali-  
quid ex eo, vti vnā glebam, in urbem in ius ad  
Prætorē deferrent atque in ea gleba tanquam in  
toto agro vindicarent. Quomodo autem huiusmo-  
di manus confertio fieri soleat, litteræ antiquiores  
non declarant. Nec quidem perpetuò in fundum pro-  
fecti sunt litigantes, indeque glebam in ius derule-  
runt. Fuit enim tandem à Iureconsultis noua, & so-  
lennis quædam manus conferendæ ratio excogitata,  
quæ certis concepta verbis, & suam actori, & reo  
item suum, nec non suum quoque Prætori carmen  
præscribebat. Itaque quemadmodum Prætores ne-  
gotiis variis occupati, tandem dicendarum vindicia-  
rum causa proficisci grauabantur, sic litigantes etiam  
manus conferendæ gratia tandem in agros proficisci,  
indeque glebas in ius deferre omninò desierunt. Ne  
tamen nouis aliquibus institutis omnis prisce iudi-  
ciorum ordinis solennitas aboleretur, visum fuit Pon-  
tificibus, qui iuri ciuili, & legis actionibus præ-  
rant, aliquam perfectionem imaginariam, in verā  
profectionis locum surrogare, qua litigantes certam  
inire viam, eamque redire docerent. Quo tempore  
hæc iudiciorum ratio in vsu fuisse videtur, quantum  
ex Cicerone pro Murena colligimus, ut actor cum in

ius vocasset aduersarium, hac in iure formula uteretur: *FVNDVS QVI EST IN AGRO QVI SABINVS VOCATVR, EGO EVM EX IVRE MEVM ESSE AIO: INDE EGO TE EX IVRE MANV CONSERTVM VOCO.* Citatus deinde reus usus est hac formula: *VNDE TV ME EX IVRE MANV CONSERTVM VOCASTI, INDE EGO TE REVOCO.* Tum Prætor: *VTRISQVE SVPERSTITIBVS PRÆSENTIBVS, ISTAM VIAM DICO: INITE VIAM.* Præstò aderat sapiens qui viam inire doceret: *REDITE VIAM.* eodem duce redibant. Hæc iam tum etiam in usu esse desierunt, cùm Prætor additis exceptionibus & replicationibus ius in litis verba componebat. Tunc enim cuilibet ita ut sibi videretur, edere actionem fuit liberum, siue per libellum, siue per solam denunciationem: satisque erat hac uti formula in fundi vindicatione: *Fundum Tusculanum ex iure Quiritium meum esse aio.* Et quamvis hæc ita tam variè fuerint in iudiciis olim usurpata, vnà tamen eademque perpetuò observabatur litis vindiciarum ratio, qua res tamdiu vindicabatur, donec alterutrius ex litigatoribus *sacramentum iustum esset pronunciatum.* Veteres siquidem & vindiciis, & sacramentis olim contendisse, vnico Ciceronis testimonio confirmari potest pro Milone. *Eum,* inquit, *deniquè cui iam nulla lex erat, nullum civile ius, nulli possessionum termini, qui non calumnia litium, non iniustis vindiciis, ac sacramentis alienos fundos, sed castris, exercitu, signis inferendis petebat.* Nec id etiam ignorasse visus est Arnobius, aduersus gentes lib. 4. dum ita scribit: *Quis quesitor, quis arbiter cervicibus tantis erit, qui inter personas huiusmodi aut vindicias iustas dare, aut sacramenta conetur pronunciare non iusta?* Vindicis quidem res petebatur, quoties incertum erat,

vter



Uter litigantium lite proprietatis pendente, rei controuersæ futurus esset possessor: sacramentis verò de ipsa re principaliter, hoc est, de rei proprietate contendebatur. Et idcirco fieri potuit, ut solo sacramento, nulla vindiciarum mora quæstione, de controuersis rebus disceptaretur. Idque diligenter adnotasse, ac acutè animaduertisse Asconius mihi visus est, litem vindiciarum hunc in modum definiens: *Lis vindiciarum est, cum litigatur de ea re apud Prætorem, cuius incertum est quis debeat esse possessor: & ideo, inquit, is qui rem tenet, satisfat pro præde litis vindiciarum aduersario suo, quo illi satisfaciatur, nihil se deterius in possessione futurum, de qua iurium est: rursus cautione præstita, sponsione prouocatur ab aduersario certa pecunia, aut astimationis, quam amittat ni sua sit hæreditas, de qua contenditur.* Cæterum si nulla possessionis fieret controuersia, solis sacramentis, nulla vindiciarum quæstione mora sic contendebatur, ut is interim penes quem rei controuersæ possessio esset, idoneè satisficeret, auctore Paulo, libro 1. sentent. tit. 11. *Quoties hæreditas petitur, inquit, Paulus, satisfactio iure desideratur, & si satisfactio non datur, in petiorem hæreditas transfertur: si petitor satisfacere noluerit, penes possessorem possessio remanet: in pari enim causa, potior est possessor.* Proinde errare mihi plurimum videntur, qui petitionem hæreditatis litem appellant vindiciarum. Hæreditates enim sacramentis petuntur, id est, legis actionibus: possessiones hæreditatum, si fortè de iis esset contentio, lite principali pendente, vindiciis, non sacramentis alterutri ex litigatoribus addici solent. Eoque mihi omnino visus est respexisse Cicero, cum ita scriberet, in Verrina 3. *Si quis testamento se heredem esse arbitraretur, quod tum non extaret, lege ageret in hæreditatem, aut pro præde litis vindiciarum, cum satis accepisset,*

*sponſionem faceret , & ita de hæreditate certaret.* Sensus enim eſt, cum qui ſe hæredem eſſe arbitratur, hæreditatem petere duabus rationibus poſſe, nimirum ſacramento ſine vindiciis , aut vindiciis & ſacramento ſimul. Sacramento quidem, ſi nulla poſſeſſionis mōta controuerſia, lege in hæreditatem agat : quo caſu locum habere ſolet illa, quam modò adnotauimus Pauli ſententia : Vindiciis verò, & ſacramento ſimul , in hæreditatis petitione locus erat , ſi non hæreditas duntaxat peteretur , ſed inſuper iſ qui lege in hæreditatem agebat , ſe pendente legis actione hæreditatis poſſeſſorem eſſe oportere contenderet. Idque expreſſè ſignificant huiusmodi quæ in eadem Ciceronis Verrina ſubſequentur verba : *Iam quid id ad Prætorem , vter poſſeſſor ſit ? Nonne id quari oportet, vtrum poſſeſſorem eſſe oporteat?* Ergo vindiciarum liti, ſi Aſconio, & Ciceroni credimus , tunc demum apud veteres locus erat, cū incertum eſſet, vter litigantium rei controuerſæ lite principali pendente, futurus eſſet poſſeſſor. Eoque ſenſu apud Liuium alioſque auctores probatos, vindicias eſſe accipiendas, ab eruditis quibuſdam viris copioſè ſatis eſt demonſtratum. Sanè quod Feſtus ſcribit , *Vindicias res illas eſſe de quibus controuerſia eſt*, illud omnino ad antiquam manus conſertionem pertinet. Cū enim manus conſerebantur , tunc ſi quæ vindiciarum fieret controuerſia , res controuerſas in iure præſentes alterutri ex litigatoribus vindicanti Prætor tamdiu addicebat , quamdiu alter alterum iuſto ſacramento, & ſponſione non ſuperafferet. Idque mirum in modum probat vindiciarum, quam Cincius apud eundem Feſtum dedit, definitio: *Vindicia* , inquit , *olim dicebantur glebæ* ( ſic legendum eſt, non *illa*, vt paſſim legitur ) *quæ ex fundo ſumptæ, in ius allatæ erant.* Proindè cui glebas ex fundo in ius allatas

allatas, aut alias res mobiles, pendente proprietatis controuersia, causa cognita, is qui iurisdictioni præerat, addicebat, eidem vindiciæ addici dicebantur, quantum ex Festo, & Cincio colligimus. Seruius autem Sulpitius vocabulo etiam singulariter formato, *vindiciam* esse ait, cum aliqua de re controuersa est, ab eo quod vindicatur. Illudque huiusmodi Decemuirali lege confirmat: *SI VINDICIAM FALSAM TVLIT, REI SIVE LITIS ARBITROS TRES DATO: EORVM ARBITRIIS FRUCTVS DVPLIONE DAMNV M DECIDITOR.* Sic primus locum hunc, qui mutilus erat, & omnino deprauatus, apud Festum restitui in verbo *Vindiciæ*, Ecquis obsecro dubitauerit, quin hæc emendatio verissima sit, præsertim si non ignoret, in legibus sic scribi solitum: *Rem siue litem*, idque Seruium Honoratum in Virgilium adnotasse. Quid autem hac in lege sibi voluerint Decemuii, non admodum esse obscurum puto. Voluerunt enim iudicem, qui dolo malo in fraudem legis, vindiciam iniustam tulerat, tres arbitros constituere, quorum arbitriis fructus duplione damnum decidi posset. Eoque omnino pertinere, & inde primum ortum vix dubito, quod in Pandectis de iudicibus passim legimus, *qui litem suam fecerunt*. Nec quidem huiusmodi fructus duplione multati perpetuò fuerunt iudices, qui vindiciam sententiæmve iniustam tulissent dolo malo, nonnunquam enim veram iustamque litis æstimationem præstabant. cap. 15. de iudic. nonnunquam in quantum de ea re æquum religioni iudicantis visum fuerat, pœnam sustinebant. cap. ult. de var. & extraord. cog. Porro vindicias nisi superstitis præsentibus, eos inter quos erat controuersia, sumere non potuisse, Festus adnotatum reliquit: *vindiciasque secundum libertatem semper ex vetere iure*, quod in duodecim ta-

bulas translatum est, *dicendas esse*. testatur Pomponius, cap. 11. §. 13. de orig. iur. Nec quidem antiquissima ista dicendarum vindiciarum ratio in rebus mobilibus Romæ in vſu fuit perpetuò. Fuisse enim tēpora, quibus tam diu res mobiles, de quibus controuersia mouebantur, aut in æde, aut apud sequestrem ponebantur, donec alterutrius ex litigatoribus sacramentum iustum esset pronuntiatum, ex innumeris prudentum responsis constat. Sanè homines quoque apud sequestres deponi potuisse, testatur Vlpian. cap. 7. de pos. Quin & iudicibus olim homines sequestro datos fuisse, Plautus refert in Mercat.

*De isthac sum index captus. D. index: iam scio.*

*Nunc tu in consilium istam aduocaſti tibi.*

L I. *Imo sequestro mihi data est.*

Res autem mobilis quæ apud sequestrem non ponebatur, solet in æde, siue in fano custodiri. Et certè antiquissima fuit, diligentissimèque olim obseruata rerum pecuniarumque in fanis deponendarum ratio, de qua sic Cicero scribit lib. 5. epist. fam. *Nam de Luceio, inquit, est ita actum, ut auctore Cn. Pompeio ista pecunia in fano poneretur.*

## C A P V T VII.

### *De litis additione.*

**Q**UAM Gellius lib. 16. cap. 2. allegat legem Decemviralem, eam vtpote vitiosissimam sic esse restituendam probabilibus aliquot coniecturis demonstrabo: ANTE MERIDIEM CAUSSAM GNOSCITO, QUVM PERORANT AMBO PRÆSENTES. POST MERIDIEM LITEM ADDICITO, SI AMBO PRÆSENTES. SOLE OCCASO, DIEI SUPREMA TEMPE-

STAS

STASESTO: Et constat quidem hæc verba, *caus-  
sam conscito*, non ad litigatores, sed ad ipsum iudicem  
esse referenda, propter hæc verba. *quum perorant am-  
bo presentes*. Ergo quòd causæ coniectio, vt satis ex  
Asconio & Marcello constat, non ad iudicem, sed ad  
litigatores referatur, certissimum est loco *conscito*, re-  
poni non posse *conicito*. Ea enim legis videtur esse sen-  
tentiæ, vt iudex ante meridiem, quum actor & reus per-  
orassent, id est, causam dixissent, de causa cognosce-  
ret. Veteres autem dixisse causam *conscito*, pro co-  
gnoscito, non memini me legisse. Illud quidè dubium  
non est, pro cognitu auctore Festo gnotu, dixisse ve-  
teres. Si gnotu ergo & gnosco: nam vnde gnotu, nisi  
à gnosco? Certè veteres gnosco dixisse, non Festus  
solum, sed etiam lib. 2. testatus est Priscianus. Quid  
igitur obstat, quo minus pro *causam conscito* lega-  
mus *causam gnoscito*, aut certè *causam enoscito*. Si non  
ob aliud, certè quod Latini plerunque G litteram ita  
formarint; vt Græci suum gamma, quod facilè in C  
Latinum potuit transformari. Imò Festus lib. 13. con-  
rendit, C pro G frequenter antiquos posuisse. Idque  
etiam ex antiquissimis quibusdam numis deprehen-  
di, in quibus pro Gulo, Gurges, Galba, Glicia, Gel-  
lius, Ogulnius Gallus, expressè legitur Culo, Curges,  
Calba, Clicia, Cellius, Oculnius Callus. Sic pro pa-  
go, aliquando est in duodecim paco: & quem Caium  
vulgares, eum Florentinæ Pandectæ Gaium appella-  
tum continent, Et ita quidem ex gnoscito, interdum  
ab antiquis enoscito, indeque vnius literulæ transpo-  
sitione, ex enoscito factum ab imperitis videri po-  
test conscito. Quod autem subiicitur de litis addictio-  
ne, his verbis: *Post meridiem presenti litem addicito*.  
profectò nisi me vehementer coniectura fallit, id  
etiam vitiosum est. Videamus quid sit litem addi-  
cere:

cere : an secundum præsentem litem dare ? Sic magis plerisque visum est. Itane verò ? Quænam igitur obsecro huiuscè legis est æquitas si secundum præsentem forte peritorem iniustum , iudex debuerit iudicare ? Constat certè eos , qui cum frustrationis causâ latitarent , tribus edictis euocati præsentiam sui facere contemnebant , litem idcirco non perdidisse : verum , si post edictum peremptorium , quum dies eius superuenisset , citati non respondissent , actâ fuisse causam : non utique secundum præsentem , *sed interdum absentem , si bonam causam haberet , vicisse . cap. 73 . de iud.* Eum igitur qui ante meridiem peroravit , post meridiem propter absentiam olim lite fuisse multatum audebimus existimare ? Qua auctoritate ? An quæso Decemviri ? Tam stupidos fuisse Decemviros , & imprudentes , quis est qui sibi persuadet ? Ego itaque didici litem addicere , aliud nihil esse in hac lege , quàm litigandi potestatem facere . Quam potestatem quia iudex non solet facere , nisi actore cum reo præsentem , nisi audita & cognita causâ , hac ratione impulsus secundam Decemviri huius legis partem sic ausus sum restituere : *Post meridiem litem addicito , si ambo præsentem .* Tertiam legis partem sic etiam emendo : *Sole occaso , diei suprema tempestas esto .* Scribit enim expressè Gellius , non Sol occasus , sed Sole occaso Decemviros in legibus posuisse . Et sic apud Varronem lib. 6 . de lingua Latina , legendum puto , *Sole occaso , diei suprema tempestas esto .* non , *Solis occasu .* ut passim legitur . Quo modo etiam apud Censorinum in libro de die natali , & Macrobius Saturn. lib. 1 . cap. 3 . hæc eadem legis pars est restituenda . Sanè Solem occasum , pro Solis occasu , auctores priscos quadam vetustate non insuavi dixisse , non Gellius solum , sed etiam Plautus in Menach. testatur , his verbis :

*Namque*

*Namque si absque te essem hodie, nunquam ad Solem occasum viverem.*

Supremam autem tempestatem idem Varro lib. 4. de ling. Lat. sic interpretatur: *Suprema*, inquit, *summum diei*, id à *supremo*: hoc tempus duodecim tabule dicunt *occasum esse Solis*. Sed postea *lex Pratoria* id quoque tempus iubet esse supremum, quo Prator in comitio supremam pronuncianit populo. Et libros augurum pro tempore tempestatem dicere, idem Varro est auctor lib. 6. de ling. Lat. Festus etiam pro tempore tempestatem antiquos posuisse, adnotatum reliquit. Totius igitur legis sēsus est: Iudicem ante meridiem causam vtrunque cognoscere oportere: post meridiem, litem postulanti addicere, aut denegare, hoc est, si ita videretur, litigandi potestatem facere, sin minus, eam denegare: tempusque pomeridianum ad occasum vsque Solis extendi. Illud certè constat, & aliquando à nobis tractatum est, de præiudiciis libro primo, eum qui ius suum persequi volebat, Prætorem olim adiisse, causamque præsentē aduersario in iure dixisse: & tandem audita cognitaque causā, vel dedisse Prætorem, vel eam quæ petebatur, actionē denegasse. Cæterum antequam Prætor esset, antequam Cn. Flavius actiones promulgasset, eas à Pontificibus peti consuevisse, neminem puto tam imperitum, quid id ignoret. Siquidem is, qui ex Pontificibus ut præesset anno priuatis erat constitutus, iisdem fere anni spatio in reddendo iure partibus fungebatur, quibus postea Prætores functi sunt. Porro ante huiusmodi Pontificiam iuris reddendi potestatem, quum Decemviri ius dicebant, tunc etiam in vsu actionum fuisse impetrationem, & hac eadem, quam tunc interpretor, lege prima introductam utique mihi persuadeo. Ut ita quidem actionum impetratio lege duodecim tabularum possit introducta

troducta videri, primumque apud Decemuiros in usu fuisse, & deinde à Decemuiris ad Pontifices, & à Pontificibus tandem ad Prætores transiisse.

## CAPUT VIII.

### De nexis.

GELLIUS libro vigesimo c. i. auctor est, sic in duodecim scriptum fuisse: *Aris confessi, rebusque iure indicatis triginta dies iusti sunt. Post deinde manus iniectio esto, in ius ducito, ni indicatum facit: aut qui pseudo ea in iure vim dicit, secum ducito. Vincito, aut neruo, aut cornipedibus quindecim pondo, ne minore, aut si volet maiore vincito. Si volet, suo vino: ni suo vivit, qui eum vinctum habebit, libras farris in dies dato. Si volet plus, dato.* Hic legis sententiam interrumpens Gellius, quid deinde fieri de nexis voluerint Decemuires, excepta postrema legis parte, verbis propriis declarat: reliqua legis verba, magno studiosorum incommodo, antiquitatis fraude maxima supprimens. *Erat, inquit, ius interea paciscendi, ac nisi pacti forent, habebantur in vinculis dies, LX. Inter eos dies, trinis nundinis continuis ad Prætorem, in comitium producebantur, quantaque pecunia indicati essent, prædicabatur. Tertijs autem nundinis capite pœnas dabant, aut trans Tyberim peregrè venum ibant. Et paulò post: Si plures forent, quibus reus esset indicatus, secari si vellent, atque partiri corpus addicti sibi hominis, permiserunt. Et quidem verba ipsa legis dicam, ne existimes invidiam me istam fortè formidare: Tertijs nundinis partes secanto: si plus minúsve secuerunt, sine fraude esto.* Hactenus Sextus Cæcilius apud Gellium.

Quia autem legem hanc mendosissimam esse, vel me tacente nemo est qui non animaduertat, idcirco non eius duntaxat partem illam quæ verbis Decemui-  
uorum



uirorum hic apud Gellium mendosè legitur, sed vniuersam argumentis aliquot, & coniecturis verisimilibus sic esse restituendam demonstrabo: **ÆRIS CONFESSI, ÆRISQUE DEBITI IUDICATIS, TRIGINTA DIES IUSTI SVNTO. POST DEIN, MANVS INIECTIO ESTO: IN IVS DVCITO. NI IUDICATVM FAXIT, NEMVT QVIPS ENDO EO IN IVRE VINDEX ESIT, SECVM DVCITO. VINCITO AVT NERVO, AVT COMPEDIBVS QVINDECIM PONDO, NE MINORE, AVT SI VOLET MAIORE VINCITO. SI VOLET SVO VIVITO. NI SVO VIVIT, QVI EM VINCTVM HABEBIT, LIBRAM FARRIS ENDODIE DATO, SI VOLET PLVS, DATO. NI CVM EO PACIT SEXAGINTA DIES IN VINCVLIS RETINETO. TRINIS NVNDINIS CONTINVIS IN COMITIVM PROCITATO, ÆRISQUE ÆSTIMIAM IUDICATI PRÆDICATO. TERTIIS NVNDINIS CAPITE POENAS LVITO, AVT TRANS TYBERIM PEREGRE VENVM ITO. AST SI PLVSES ESUNT REI, TERTIIS NVNDINIS PARTEIS SECANTO: SI PLVS MINVSVE SECVE SVNT, NESI FRAVDE ESTO. Nunc videamus quæ fuerint huius restitutionis rationes præcipuæ, quib. impulsæ lectionē veterē sic immutauimus. Pro *Rebusque indicatis*, reposuimus, *Ærisque debiti indicatis*. Certè quia in hac lege non de confessi tantum, sed etiam de æris debiti iudicatis tractatur. Confessi igitur æris, inquit Gellius, ac debiti iudicatis 30. dies sunt dati. Et quòd apud eundem Gellium sic nullo sensu legitur, *ni indicatum facit, aut qui pseudo eo in iure vim dicit*, illud sic emēdauius: *ni indicatum faxit,***

*nenius*

*nemut quips endo eo in iure vindex esit.* Festus auctor est, veteres pro fecerit faxit, & pro egerit axit dixi: eosque pro nisi etiam, vnico verbo nemut, vlos esse. Iac. Cuiacius, in antiquo exemplari, & valdè fideli, pro quispam, testatur legi quips. Cuiacij emendationem mirum in modum confirmat vulgaris lectio. Dubium enim non est, quin apud Gellium hæc verba, *qui pseudo eo*, ex his verbis, *quips endo eo*, librariorum imperitia deprauata sint. Qui legis verba non percipientes, dictionem *quips*, diuiserunt, & eius postremas litteras duas *ps*, sequenti dictioni *endo*, adiecerunt: & ita pro *quips endo*, *qui pseudo*, reposuerunt. Pro *vim dicit*, in eodem exemplari, *vindicat* legi, refert idem Cuiacius. An veteres vindicat ea forma qua lauit, sonit, dixerint, subsisto. Quod autem sonit & lauit veteres dixerunt, hoc inde est quod iidem etiam lauere, & sonere dicerent, vt testatur Nonius Marcellus. Vindicere pro vindicare eosdem dixisse, non obseruavi. Illud profectò certissimum est, *vindicem ab eo appellatum esse*, si Festo credimus, *quod vindicat, quominus is qui pressus est, ab aliquo teneatur.* Quid igitur obstat, quominus pro *vim dicit*, legamus, *vindex esit*? Maximè quòd hanc emendationem antiqua per vindicem asserendi ratio videatur confirmare, quam eleganter descripsit Liuius lib. 6. *Centurionem, inquit, nobilem militaribus factis, indicatum pecunie quum duci vidisset M. Manlius, medio foro cum caterua sua accurrit, & manum iniecit, vociferatusque de superbia patrum, & crudelitate sceneratorum, miseris plebis, virtutibusque eius viri fortunaque: tum verò, Ego, inquit, nequicquam hac dextra capitolium, arcemque seruauero, si ciuem commilitonemque meum à Gallis victoribus captum, in seruitutem, ac vincula duci videam. Inde rem creditori palam populo soluit, libraque & are liberatum emittit, Deos atque homines obtestantem, vt M. Manlio liberatori*

*liberatori suo, parenti plebis Romanae, gratias referant. Indeque vindicem libertatis appellatum M. Manlium restatur paulò post idem Liuius. Aiunt Decemuii, secum ducito. Quo in neruum, in vincula, in carcerem priuatum. Liuius libr. 6. An placeret (sunt verba C. Licinij Stolonis, in legis de are alieno rogatione) fœnore circumuentam plebem ni potius quàm sortem, creditum soluat, corpus in neruum ac supplicia dare? & gregatim quotidie de foro addictos duci? & repleti vinetis nobiles domos? & ubicunque patricius habuerit, ibi carcerem priuatim esse? Quod autem pro libras farris, reposuimus libram farris, certa legis sententia hanc nobis emendationem suadere videbatur: ea siquidem legis est sententia, vt si illa, quam lex constituit, farris quantitate, nexus non sit contentus, velit plus dari. Quis ergo tam erit imperitus, vt non intelligat, certam farris quantitatem legem expressisse? Si itaque legeris, libras farris, quâ quæso fieri potest, vt plus petatur? Ideoque certam visum sunt Decemuii farris quantitatem expressisse, nimirum libram vnâ, quâ si contentus non esset nexus, voluerunt plus dari. Voluerunt igitur Decemuii, nexos, ni suo viuerent, à creditoribus ali. Eoque respexisse visus est Terentiânus ille Phormio, his versibus:*

*Aliis aliud est periculum, vnde aliquid abradi potest.*

*Mihi sciunt nil esse, dices; ducent damnatum domum.*

*Alere nolunt hominem edacem.*

**Huc quoque pertinet illud Plauti in Menæch.**

*Nam ego ad Menachmum nunc eo, quoi iamdiu*

*Sum indicatus: ultro eo vt me vinciat.*

*Nam illic homo, homines non alit, verum educat,*

*Recreatque: nullus melius medicinam facit.*

**Sunt qui pro in dies, endo dies legunt. Ego contendo endodie, ea forma, & ratione legendum esse, qua apud Festum endoprocinctu, vnica dictione legimus. En-**

**C. dopro.**

doprocinctu , in procinctu : endoplorato , implorato : sic endodie , quotidie. Et hæc quidem ad illam legis partem, quæ apud Gellium ipsis Decemviro-  
 rum verbis mendosè legitur , sufficiant. Eam verò , quam propriis verbis idem Gellius declarat , verbis prout potuimus Decemviralibus, hoc est, antiquis, & quæ Decemviro-  
 rum temporibus Romæ in usu fuisse existimamus , summo studio restituere conati sumus. Itaque hæc Gellij verba: *Erat autem interea ius paciscendi , ac nisi pacti forent, habebantur in vinculis dies sexaginta* : sic restituimus : *Ni cum eo pacit , sexaginta dies in vinculis retinetur*. Sic locuti sunt etiam alio loco Decemviri , *Si membrum rupit , ni cum eo pacit talio esto*. Item hæc Gellij verba: *Inter eos dies trinis nundinis continuis ad Pratorem in comitium producebantur, quantæque pecunia iudicati essent, predicabatur* : sic in legis formam rede-  
 gemus : *Trinis nundinis continuis in comitium proci-  
 tato , arisque æstimiam iudicati predicato*. Proci-  
 tare veteres dixisse pro vocitare, & producere, scribit Festus: qui eosdem pro æstimatione , æstimiam dixisse etiam adnotatum reliquit. Deniquè quod idem Gellius nexos tertiis nundinis capitis pœnas dedisse , aut trans Tyberim peregrè venum iisse scribit , hoc etiam in legem ita trāstulimus: *Tertiis nundinis capite pœnas luito, aut trans Tyberim peregrè venum ito*. Cæterum postrema huius legis pars, quæ etiam vitiosa passim circumfertur , sic est à nobis restituta : *Ast si plures esunt rei, tertiis nundinis partes secanto : si plus minusve secue-  
 runt, nesi fraude esto*. Veteres pro plures & plurima , plures dixisse , & plurima , est à nobis alio loco demonstra-  
 tum. Dicebant etiam se vel nesi , pro sine : & reorum nomine, actorem & reum promiscuè accipiebant , ut tradit Festus. Illud autem hîc quæri potest , cur Decemviri noluerint addictos neruo, aut vinculis quin-  
 decim

decim pondo minoribus vinciri? Respódeo, id ita non sine certa, & aperta ratione Decemuiros prohibuisse. Scribit lib. quinto Festus, fuisse quædam sacrificia, in quibus ita clamitabat lictor: *Hostis vincetus, mulier, virgo exesto*, scilicet interesse prohibebantur. Ex quo loco vincetos, siue nexos, sacris olim interesse solitos colligo. Et idcirco compedes quindecim pondo maiores, quia essent grau. o. es, quàm vt iis cum sacris intersunt, sese vinceti possent subducere, aut fugere expressè videntur requirere Decemuiros: ne si minores essent, aut nexis custos perpetuò adesset in sacris, aut sine custode aliquod fugæ periculum subirent creditores. Et eo fortè spectat illa legis Decemuiralis particula, quæ apud Festum libro duodecimo Antonij Augustini diligentia sic emendata legitur: *AST E I CVSTOS NEC ESIT*. quum antea: *Atta custodes nec sint*. peruersissimo sensu legeretur. Compedes quoque quindecim pondo grauiores, ideo permiserunt, ne si forte robustiores essent debitores, quàm vt compedibus quindecim pondo securè possent à fuga retineri, aliqua securitas creditoribus adimeretur. Voluerunt ergo Decemuiros addictos compedib. indui quindecim pondo maioribus, non autem minorib. Non quod creditores si vellent, prohiberentur eos minoribus induere, sed quod inuiti minoribus induere non cogerentur. Cæterum ante 12. tabulas, non solum in vincula, in neruum, aut alio, quo creditoribus erat lubitum, addicti ducebantur, iuxta Plauti illud in Bacch. *Ducito nos quocunque lubet, tanquam vobis addictos quidem*: sed etiam verberibus cædi, fame enecari, alijsque grauissimis, & inhumanis cruciatibus affici solebant. Refert enim Liuius, anno ab vrbe condita 259. Appio Claudio, & P. Seruilio coss. ciuitarè secū ipsam discordem, intestino inter patres plebémque flagrasse odio, ma-

ximè propter nexos ob æs alienum. *Magno*, inquit *Liuius*, *natu quidam*, cum omnium maiorum suorum insignib. se in forum proiecit. Obsita erat squallore vestis, fe-  
dior corporis habitus, pallore ac macie perempti. Ad hoc promissa barba, & capilli efferauerant speciem oris. Nosci-  
tabatur tamen in tanta deformitate & ordines duxisse aie-  
bat, aliaque militia decora vulgo miserantes eum iactabant:  
ipse testes honestarum aliquot locis pugnarum, cicatrices ad-  
uerso pectore ostentabat. Sciscitantibus unde ille habitus, un-  
dè deformitas, cum circumfusa turba esset, propè in concio-  
nis modum: Sabino bello, ait, se militantem, quia propter  
populationes agri, non fructu modo caruerit, sed villa in-  
censa fuerit, direpta omnia, pecora abacta, tributum iniquo  
suo tempore imperatum, æs alienum fecisse, id cumlatum  
usuris primo se agro paterno, auitoque se exuisse, deinde  
fortunis aliis, postremò velut tabem peruenisse ad corpus:  
ductum se ab creditore, non in seruitium, sed in ergastu-  
lum, & carnificinam esse. Inde ostentare tergum fœdum  
recentibus vestigiis verberum. Ad hac visa auditaque cla-  
mor ingens oritur: non iam foro se tumultus continet, sed  
passim totam urbem peruadit. Nexu vincti, solutique se  
vndique in publicum proripiunt, implorant *Quiritium* fi-  
dem: nullo loco deest voluntarius seditionis comes. Et idcir-  
co idem *Liuius Sernilium* edixisse refert, ne quis ciuem  
*Romanum* vinctum, aut clausum teneret, quominus ei no-  
minis edendi apud *Consules* potestas fieret, ne quis militis,  
donec in castris esset, bona possideret, liberos nepotesve eius  
moraretur. Vnde satis apparet, ante duodecim tabu-  
las hanc legem *Decemviralem* in vsu *Romæ* non  
fuisse. Tunc enim nexu vincti, verberibus cædi, per-  
petuisque vinculis indui, & in priuatum carcerem,  
velut carnificinam coniici tamdiu à creditoribus so-  
lebant, donec illi vel creditorum miseratione, vel  
boni vindicis indulgentia, & liberalitate nexu sol-  
uerentur

uerentur. Decemuiri verò hanc nimiam crudelitatem alio verū nescio an mitiore addictos territandi, excruciantique medio pensarunt. Quum enim illi antea in neruo, ac vinculis sic detinebantur, vt nisi iis liberarentur, totam in vinculis ætatem consumerent, satius esse existimauerunt Decemuiri, certò tempore eos vinciri, deinde peregrè venum mitti. Consultius siquidem esse iudicarunt, eos sexaginta duntaxat dies in vinculis esse, deinde venum peregrè mitti, quàm domi perpetuis vinculis contineri, ac seditiosis hominibus perpetua crudelitate, immanique creditorum sæuitia, populi illacrymatione, odio patrum, plebisque inconstantia, bellis intestinis, ac seditionibus fenestram aperire. Fuit autem hæc Decemuiralis lex non desuetudine, sed expressa Consulari lege abrogata anno ab vrbe condita 630. L. Papirio Mugellano, qui etiam Cursor dicitur, C. Pœtelio, 2. c o s s. & tunc quidem sectionem, pœnamque capitis in bonorum proscriptionem conuersam fuisse, rectè ex Tertulliano Contiùs obseruauit. Sanè si bona iudicato non sufficerent, adhuc vincula, & additio in vsu fuisse videntur, auctore Gellio: sed ita, vt nec venum ampliùs peregrè debitores mitterentur, nec sectioni capitivæ pœnæ subiecti forent, sed ad hoc tantum in vinculis essent, vt operas in seruitute pro iudicato præstarent creditoribus, donec illis satis abundè factum esset. Idque confirmat illud Senecæ libro 7. cap. 10. de benefic. *O miserum, inquit Seneca, si quem delectat sui patrimonij liber magnus, & vasta spacia terrarum colenda per vinctos, & immensi greges pecorum per prouincias, ac regna pascendi.* Et *quauis Sulla Dictatore nexi omnes qui bonam copiam iurassent, fuerint dissoluti, auctore Varrone libro 6. de ling. Lat.* ideirco tamen post Sullæ tempora addici, necti-

que debitores non desierunt. Concessisse quidem illud Sullam C. Popilio roganti Varro scribit, fortè non ut eo iure ciues Romani perpetuò vterentur. Dico Varr. sic intelligi posse, siquidem in re tam perplexa definire nihil certi ausus sum.

## CAPUT IX.

*De vindicibus.*

**C**APITE *censi* dicebantur, quia nullo, aut perquam paruo ære censebantur: *proletarij* à munere, officioque prolis edendæ appellati sunt, quod cum re familiari parua minus possent Remp. iuuare, sobolis tamen gignendæ copia ciuitatem frequentarent: *assiduus* autem & pro locuplete ponitur, & pro faciliè munus faciente: dictus *ab assibus*, id est, ære dando, quum id tempora Reipub. postularent: aut à muneris pro familiari copia faciendi assiduitate, auctore Gellio noct. Attic. lib. 16. cap. 10. Eoque sensu proletarium & capite censum accepisse visus est etiam Arnobius, aduersus gentes libro secundo. *Desinite*, inquit, *hominem, proletarius cum sit, classibus, & capite censeatur, adscribere ordinibus primis: cum sit inops, pauper lare, & tuguriij pauperis, nec patricia claritatis unquam meritis nuncupari.* Sed quorsum hæc? Nimirum ut intelligamus, quid illud sit quod duodecim tabulis idem Gellius ita scriptum fuisse ait: ASSIDVO VINDEXT ASSIDVVS ESTO, PROLETARIO CIVI QVIVIS VOLET VINDEXT ESTO. Diximus superiore capite, *vindicem* auctore Festo, *veteres eum appellasse qui vindicabat; quominus is qui presus erat, ab aliquo teneretur:* hoc est, qui pressum, nexum, siue addictum liberabat. Ea forma, & ratione, quâ vindicem æris alieni, liberatisque, pro redemptore in epistolis ad Atticum, aliisque



aliisque in locis accepisse videtur Cicero. Eoque sensu accepisse etiam visus est, vindicæ libertatis, Livi lib. 6. id verò, inquit, *ita accendit animos, ut per omne fas ac nefas secuturi vindicem libertatis viderentur*. Sic Brutum idem Livius vindicem appellat libertatis, lib. 2. *Brutus*, inquit, *prior concedente collega fasces habuit, quod non acrior vindex libertatis fuerat, quam deinde custos fuit*. Imò pro assertore antiquos vindicem interdum posuisse, in libro de testimonio animæ liquidò demonstrat Tertullianus: *Cur*, inquit, *alibi servit, alibi vindicem conuenit*? Proinde errare mihi plurimum videntur, tam hi qui per vindicem in hac lege procuratorem, quàm illi qui fideiussorem intelligunt. Aliò enim respexisse videntur Decemviri. Eò nimirum, ut noluerint à proletariis civibus, ciues assiduos creditoribus addictos vindicari. Certè ne proletarij cum sint tenuioris fortunæ, quàm ut asses possint dare, quibus assiduos è vinculis eximerent ipsi pro assiduis & se, suosque liberos, familiamque totam in discrimen adducant: neve corpus liberum immunèque, assidui hominis liberandi gratia, servituti capitisque pœnæ, aut sectioni subiiceretur: quod quàm iniquum sit, nemo est qui non intelligat. Et ita quidem in effectu aliud nihil visi sunt voluisse Decemviri, quàm assiduos non servitiis cuiusquam, aut deditionibus, sed assibus vindicandos. Nam cum assiduò lex assiduum esse vindicem iubet, locupletem iubet locupletari, inquit Cicero in Topicis. *Locuples enim assiduus*, ut ait Ælius, *appellatus est ab are dando. Esse quidem perquam iniquum, alterum pro altero pignoriari*, etiam Theodoricus Italiæ Gothorumque Rex, apud Cassiodorum libro quarto variat. intellexit: tam inquam, Romani, quàm Decemviri. Idèò autem proletario quemuis vindicem esse permiserunt Decemviri,

quia eorum debita non solent esse grandiora, quàm quæ ære exiguo lui potuerint. Et ita mihi videtur.

## C A P V T X.

### *De testibus.*

**N**ON solùm in testamentis, quæ per æs & libram fiebant, sed etiam in aliis omnibus mancipationibus, is qui testis libripensve fuerat, si fidem perhibiti testimonij non approbaret, improbus erat, & intestabilis, idque expressa quadam lege Decemviralì esse definitum, Gellius auctor est, lib. 15. c. 13. quam hunc in modum puto restituendam esse: QVI SE SEIERIT TESTARIER, LIBRIPENSVE FVERIT; NI TESTIMONIUM FARIATUR IMPROBUS INTESTABILISQUE ESTO. In omnibus antiquissimis exemplarib. impressis & manuscriptis, non *in testimonium feriat*ur, sed *in testimonium fariatur*, expressè legitur. Vndè statim coniecturam duxi, ita legendum esse, *ni testimonium fariatur*: & verbum fariari priscum esse, eoque pro fari veteres esse, vsos. Huiusmodi siquidem antiquis fuisse morem testatur Diomedes, ut in dictionibus quibusdam sermonem ex abundanti adderent, nihilque adiecta syllaba dictionibus conferret. Quo modo aggredi, pro aggredi: item moriri, pro mori, veteres dixisse sæpius animaduerti. Plautus in Trucul.

—— *Nullam rem oportet dolosè aggredi.*

Idem in Rudent.

—— *Certum est moriri, quam hunc pati.*

*Leonem in me grassari.*

Et ita fariari etiam antiquos dixisse, pro fari, non dubito. Igitur, *Qui se seierit testarier*, hoc est; qui se vocari in testem passus est, libripensve fuit: *ni testimonium fariatur*,

*fariatur*, hoc est, si de perhibito testimonio rogatus, illud fari, eiusque approbare fidem non voluerit, improbus intestabilisque esto. Sic nimirum ut non tantum, sicut Theophilus videtur interpretari, ex alieno testamento quicquam capere, aut iure testamenta eondere, aut in testamento testis esse prohiberetur: verum etiam ut ab omnibus nexus & mancipationum solemnibus sic arceretur, ut nunquam vel eius recipi, vel ei testimonium dici posset cap. 26. de testament. Eoque sensu intestabilem Plaut. etiam videtur accepisse in milite glorioso:

*Quid si id non faxis? r. ut viam semper intestabilis.*  
Nunc de illo videndum, qui falsum perhibuit testimonium. Et sanè hūc è Tarpeia rupe præcipitare Decemviri voluerunt, idque apertè testatus est Sextus Cæcilius apud Gellium lib. 20. cap. 1. Quæ de re ab aliis accuratè satis plurima sunt in hanc legem adnotata.

## CAPVT XI.

*De eius cui testimonium defuit obuagulatione.*

**P**ORTVM, inquit Festus, in duodecim, pro domo positum, omnes ferè consentiunt: CUI TESTIMONIUM DEFVERIT, IS TERTIIS DIEBUS OB PORTVM OBVAGVLATVM ITO. Idem alio loco vagulationem in hac Decemviri lege, quæstionem interpretatur cum conuitio. Et ob, præpositione, antiquos vsos esse pro ad, testis est Ennius, cum ait lib. quartodecimo.

*Omnes occisi, obcensique in nocte serena.*

Id est, accensi. Hæc cum ita sint, nunc quid sibi Decemviri voluerint videamus. Cui testimonium deest, hoc est, qui suam intentionem nullo potest testimonio confirmare, is die tertio ad ædes aduersarij obua-

C 5

gularum

gulatum ibat, hoc est, aduersario iustum testibus adhibitis conuitium faciebat. Veluti si quid esse in tuis ædibus contenderem, quod quum verè ad me pertineret, tamen apud te esse nullo testimonio poteram demonstrare, illudque mihi restituere vpo & altero die rogatus omnino recusares, mihi permississe videntur Decemuiri, quando quidem deficiente testimonio inutiliter iure, aut lege ageretur, tertio die ad ædes venire, ibique ante tuas ædes rem meam repetere cum conuitio: siue, vt vtar Plauti verbis, *te pipulo ante aedes tuas differre*. Et hanc quidem interpretationem nostram, ita apertè visus est Plautus confirmare, vt verisimiliorem non posse, attentius paululum loco Plautino quem subiiciam perpenso, legis huius declarationem excogitari, nemo non continuò fateatur. Plautus in Aulularia cuiusdam Congrionis meminit, qui cum à Megadoro ad nuptialem cœnam coquendam (erat enim coquus) conductus esset, & idcirco vasa in ædes Euclionis intulisset, ædibus vi eiectus vasa sibi ab Euclione petiit restitui: cumque ea reddere Euclio negaret, quia Congrioni defuit testimonium, quo docere posset, sua vasa esse in Euclionis ædibus, certè repetere ea iudicio nequiuir. Quid igitur fecit? Quid? Pipulo antè ædes Euclionem, ni vasa redderet, differre voluit, hoc est, vt Decemuiri loquuntur, *ob portum Euclionis obuagulatum ire*. Plauti verba sunt hæc:

*Ita me bene amet Lauerna, tu iam nisi reddi*

*Mihi vasa inbes, pipulo hic differam te ante aedes.*

*Pipulum* idem esse quod conuitium Varro scribit lib. 6. de lingua Latina. In Aulularia, inquit, pipulo te differam ante ædes, id est, conuitio, declinatum à pipatu pullorum. Quia igitur *obuagulario* etiam nihil est aliud quàm conuitium, quis dubitabit, quin eadem planè

planè sint, ob portum obuagulare, & pipulo aliquem ante ædes differre? Quod igitur Euclionem ante ædes differre pipulo volebat Congrio, id omni legis huius Decēviralis auctoritate facere voluisse visus est. Cæterum effectus obuagationis is olim fuisse videtur, ut tertio die, iusto præsentibus superstitionibus conuitio solemniter ob portum factò, licuerit conuitiatori eius qui conuitium passus erat ædes cum iisdem testibus ingredi: & liberam res suas quarendi in suis ædibus potestatem facere is cui conuitium factum erat suo conuitiatori cogeatur. Indequè Festum *obuagationem* definiuisse, quæstionem, hoc est, inquisitionem cum conuitio est verisimile. Ea nimirum ratione, qua furtorum quæstiones cum lance & licio illæ furtorum inquisitiones veteribus dicuntur, quæ cum lance & licio fieri solebant.

## CAPUT XII.

*De tutelis.*

**L**EGE *duodecim tabularum*, inquit Caius, *permis-*  
*sum est parentibus liberis suis, siue fæminini, siue ma-*  
*sculini sexus, si modo in potestate sint, tutores testamento*  
*dare.* cap. 1. de testament. tutor. Legisquè hæc fuisse  
 verba: PATERFAMILIAS VTI LEGASSIT  
 SUPER PECVNIA TVTELAVE SVÆ REI,  
 ITA IVS ESTO. in fragmentis testatus est Vl-  
 pian. tit. 11. & auctor ad Herennium lib. 1. Quam le-  
 gem deinde interpretans Pomponius, his verbis. *Vis*  
*legassit super pecunia tutelave suæ rei, ita ius esto,* (sic enim  
 restituendus est hic Pomponij locus, qui in Pande-  
 ctis etiam Florentinis mutilus hunc in modum legi-  
 tur: *Vti legassit suæ rei, &c.*) latissimam putat pote-  
 statem tributam videri, & hæredis instituendi, & le-  
 gata & libertates dandi, tutelas quoque constituendi:  
 sed

sed id interpretatione coangustatum esse, vel legum, vel auctoritate iura constituentium. c. 120. de verb. sig. Cæterum quibus testamento tutor datus non erat, his agnati legitimi tutores fuerunt. *Legitima tutela*, inquit Vlpianus, *lege 12. tabularum agnatis delata sunt, & consanguineis.* cap. 1. de legit. tut. Decemviri consanguineorum nomen non agnoscunt: liberos enim appellant suos hæredes, consanguineos verò omnesque qui ex latere familiam attingunt per sexum virilem, communi nomine agnatos vocant, vt alio loco demonstrauimus. *Legitimi tutores sunt*, inquit Vlpianus, *qui ex lege aliqua descendunt: per eminentiam autem, qui ex lege 12. tabularum introducuntur.* Introducuntur quidem vel propalam, hoc est, specialiter, siue nominatim, quales sunt agnati, vel per consequentiam, quales sunt patroni. Non enim expressa lege aliqua Decemviri impuberis liberti patrono defertur tutela, sed quia patronis hæreditates libertorum. lege duodecim tabularum ab intestato conceduntur, & quia natura æquum est, ad eum onus tutelæ pertinere, ad quem commodum spectat successionis, ideò per consequentiam manumissor impuberis manumissi tutor efficitur: non tam verbis quàm legis sententia, ideòque etiam *legitimus* appellatur. capit. 2. de legit. tutor. Non enim id tantum quod nominatim lege cautum erat legitimum dicebatur, verumetiam quòd perinde accipiebatur per interpretationem, atque si legis verbis expressè introductum fuisset. Ea fortassis ratione, qua multorum matrimoniorum experientiam *legitima cuiusdam intemperantia signum* appellat Valerius lib. 2. c. 1. Non enim verbis expressis alicuius legis huiusmodi matronis imperata fuit intemperantia, sed legis illius quæ contra cælibatum aliquando lata fuit, vera sententia, intemperantiam huiusmodi suadere omnino videbatur,

videbatur, eaque etiam idcirco legitima videtur à Valerio appellata fuisse. Et hæc hæctenus de tutelis, quibus illud etiam addendum videtur: nimirum suspecti tutoris crimen, ex lege 12. tabularum descendere, tutoremque propter admissam administrationem, in duplum eadem lege teneri. cap. 1. de suspect. tutor. cap. 55. de administrat. & peric. tut. quòd qua ratione accipiendum sit, alij docuerunt.

## CAPUT XIII.

*De curatoribus furiosi, vel prodigi.*

**V**OLVERUNT Decemuiri, furiosos in tutela agnatorum esse, gentiliumque. Cicero legem his fuisse conceptam verbis testatur, lib. 2. de inuentione: *SIFURIOSVS ESSE INCIPIT, AGNATORVM GENTILIVMQVE IN EO, PECVNIAQVE EIVS, POTESTAS ESTO.* Paulus admonuit, hæc verba *agnatorum gentiliumque*, pro separatis accipienda esse, cap. 53. de verb. sign. Quod quidem verissimum est: Decemuirorum enim huiusmodi videtur esse sententia, vt voluerint agnatis deficientibus; ad eos gentiles qui agnati non sunt onus huiusmodi tutelæ deuolui. *Gentilis*, inquit Festus, *dicitur, & ex eodem genere ortus, & is qui simili nomine appellatur: vt ait Cincius, gentiles mihi sunt, qui meo nomine appellantur.* Ergo gentiles, non eos tantum veteres appellasse videntur, qui ex eodem genere essent orti: sed illos etiam, qui licet non generis eiusdem, eiusdem tamen nominis erant: eoque sensu gentiles etiam serui appellabantur, vt Marcipor, id est, Marci puer, auctore Plinio: sic etiam ab aliis adnotatum est, Ciceronem Regem Tullium gentilem suum appellasse, cum interim ab eo genus Cicero nequaquam traheret. Sed de  
istis



istis gentilibus Decemuiri hîc non loquuntur. Illi si-  
quidem de huiusmodi gentilibus sentiunt, quales de-  
finiuit, Sceuolam secutus, in topicis Cicero hunc in  
modum: *Gentiles sunt qui inter se eiusdem nominis sunt,*  
*qui ab ingenuis oriundi sunt, quorum maiorum nemo ser-*  
*uitutem seruiuit, qui capite non sunt diminuti.* Elegans de-  
finitio: in qua maiores appellari patrem & auum, do-  
cuit rectissimè Connanus. Idem Connanus gentem  
familiarum multitudinem denotare, acutè (vt est le-  
pidus & totus acutus) adnotatum reliquit. Gentilis  
igitur appellari non potest is, cuius maiores, hoc est,  
auus & pater, seruitutem seruiuerunt. Certè quia *in*  
*seruis gentilitia natura non suberat in usu, in nostris nomi-*  
*nibus, qui sumus in Latio, & liberi, necessaria,* inquit  
Varro, libro octauo de lingua Latina. Quia igitur qui  
ex seruis maioribus est ortus, nullum ex aliqua fami-  
lia genus trahit, idcirco fieri non potuit, vt is aut ef-  
fe, aut appellari gentilis aliqua ratione posset. Ve-  
rùm eius nepotes, abnepotes, trinepotes, & ita dein-  
ceps, eorumque filij: rursus patruus, eiusque filij, ne-  
potes, eorumque filij, & nepotes, vsque in infinitum,  
rectè gentiles inter se & erant & appellabantur: quâ-  
uis ille, à quo hi omnes genus primò duxerunt, serui-  
tutem aliquandò seruiuisset. Desinuntque gentiles  
appellari, si capite fuerint diminuti. Vt enim agnatio-  
nis, ita gentilitatis iura capitis diminutione extin-  
guuntur. Et hanc esse puto sententiam verissimam,  
illius gentilium definitionis, quam ex Cicerone hîc  
adnotauimus. Nunc illud addendum est, agnatos à  
gentilibus in hoc differre, vt agnati omnes gentiles  
sint, sed non contra omnes gentiles agnati. Gentem  
enim quamlibet habuisse olim stirpes varias, hoc est,  
domos, siue familias, Variorum lib. 5. à nobis est ad-  
notatum. Quod igitur gentis vnius erant familiæ,  
totidem



totidem diuerſæ eiufdem gentis fuiſſe videntur agnationes. *Agnatos* enim Iureconſulti appellant auctore Vlpiano, *cognatos virilis ſexus ab eodem ortos*. capit. 2. de ſuis & legit. Veluti patruus eiufque filij & nepotes, mihi ſunt agnati, quia ab eodem orti ſunt, à quo meus pater. Verùm patruus magnus, eiufque liberi, mihi non agnati, ſed gentiles duntaxat ſunt. Quæ cùm ita ſint, iam facilè intelligimus, in hac lege Decemuiros aliud nihil voluiſſe, quàm ad agnatos tutelam furioſorum omnino pertinere, & ſi nullus exſtaret agnatus, ad gentilem poſt agnatos proximum. Nec quidem furioſus duntaxat, verumetiam prodigus ad agnatos, gentilesque deduci ſolet. Lege enim 12. tabularum prodigo interdictam bonorum ſuorum adminiſtrationem fuiſſe, antiqua iuris cuiuſdam moribus introducti prærogatiua, reſtatur eſt Vlpianus capit. 1. de curat. furioſ. Quo iure Caium quendam Licinium cognominæ Hoplomachum à Prætore poſtulaſſe refert libro octauo, Valerius, vt patri ſuo bonis, tanquam ea diſſipanti interdiceretur. *Solent enim*, inquit Vlpianus, *Prætores ſi talem hominem inuenerint, qui neque tempus, neque finem expenſarum habet, ſed bona ſua diſſipando, & dilacerando profudit, curatorem ei dare exemplo furioſi* d. capit. 1.

#### C A P V T XIV.

*De ſeruitutibus itineris, actus, & via.*

**A**CTVS, vt Varro & Feſtus ſcribunt, in latitudinem pedes habebat quatuor, fortaiſſis quod ea quadrupes ageretur. *Via latitudo*, auctore Caio, ex lege 12. tabularum in porrectum octo pedes continebat: in anfractum, id eſt, vbi flexum erat, ſedecim. cap. 8. de ſeruit. præd.

præd. rustic. Idque sic etiam Varro tradidit de lingua Latina lib. 6. *Anfractum*, inquit est, *ab origine flexum duplici: dictum ab ambitu & frangendo: ab eo leges iubent viam in directo pedum octo esse, in anfracto sexdecim*, hoc est, in flexu. Iter autem duorum habebat vel trium pedum latitudinem. Et proinde *qui iter habet, actum non habet: sed contra, qui actum habet, is iter habet.* cap. 1. de seruit. præd. rustic. Cæterum *via, actum, iter, & se continet*: hoc est, qui viam habet, ius habet itineris, quod videlicet ex duorum, aut trium pedum latitudine constat: ius habet etiam actus, hoc est, non trium solum, sed etiam ius quatuor pedum: qui simul septem pedes conficiunt. Iam si addideris octauum pedem, non iter, non actum duntaxat, sed etiam se via continebit, hoc est, ius octo pedum. Errant profecto qui sic putant Vlpianum scripsisse: *Nam & iter, & actum in se via continet.* d. capit. 1. Rectè enim pro *in se*, legimus *& se*, in Pandect. Floren. Nec quidem dubium est, quin ad vulgarem actus & itineris, legitimamque viæ latitudinem eo in loco respexerit Vlpianus. Ad quam semper esse respiciendum docet Iabolenus, cum alia, aut latior, aut angustior octo pedibus, non est inter contrahentes viæ seruitus expressa. cap. 13. §. 2. d. titul. Voluerunt itaque Decemuiri, legitimam viæ latitudinem octo pedum spatio comprehendi. Iidem si via esset immunita, cui viæ seruitus debebatur, ei qua vellet agere iumentum permiserunt: quemadmodum pro Cecinna M. Cicero testatus est. Adderem nonnulla de parietum ambitu, quem esse sestertium pedem Decemuiri voluerunt, nisi ea de re Brissotius in suis elegantissimis antiquitatum commentariis luculenter scripsisset. Sanè Varro scribit de ling. Lat. lib. 4. *duodecim tabularum interpretes ambitum parietis circumitum interpretatos esse.*

## CAPVT XV.

*De sumptibus funerum, & iure sepulchrorum.*

CICERO libro 2. de legibus refert, in duodecim tabulis scriptum fuisse; HOMINEM MORTVVM IN VRBE NE SEPELITO, NEVE VRI TO. eiusque causam fuisse ignis periculum: vel vt Paulus lib. 1. sent. scribit, *ne funestentur sacra ciuitatis*. Porro Decemuirali isto iure Romani vsi non sunt perpetuò. Ipse enim Cicero auctor est, nonnullos in hoc solutos legibus consecutos esse, vt in vrbe & vri, & sepeliri possent. Idem Cicero libro 14. ad Atticum scribit, Caium Cæsarem in foro combustum laudatumque miserabiliter fuisse. *Meministine, inquit, te clamare causam perisse, si funere elatus esset? At ille etiam in foro combustus, laudatusque miserabiliter, seruique & egentes in tecta nostra cum facibus immissi*. Nec quidem mortuum hominem in vrbe duntaxat sepeliri, aut vri prohibuerunt Decemuii, verum etiam nec ascia fieri nec poliri rogum permiserunt. Scribit enim in eodem libro 2. de legibus Cicero, minutos fuisse sumptus lamentationesque funebres Solonis & duodecim tabularum legibus: & hoc plus lege Decemuirali contineri, ne rogos ascia fieret, neue poliretur. Sic enim apud Ciceronem legitur: Iam cetera in duodecim: *Minuendi sunt sumptus lamentationesque funeris*: translata de Solonis ferè legibus: *hoc plus*, inquit, *Ne facito rogam ascia, ne poliro*. Hæc Cicero. Sensus est, quæ de minuendis sumptibus lamentationibusque funerum Decemuii scripserunt, ea ferè omnia de Solonis legibus translata sunt: sed hoc plus lex 12. tabul. inquit: hoc est, lex 12. tab. illud plus continet legibus à Solone latis, *Ne facito rogam ascia, ne poliro*. Sunt enim hæc verba, *hoc plus*,

D non

non Decemuirorum, sed Ciceronis quibus lex illa Decemuiralis denotatur, quæ à Solone reperita non est. Quod qui non animaduerterunt fuisse hanc legem his verbis conceptam existimarunt : *Hoc plus ne facio, rogum ascia ne polito*, Sic igitur legendum est : NE FACITO ROGVM ASCIA, NE POLITICO. ut ita affabrè construi rogum, aut dolatis aliquibus lignis expoliri, videantur Decemuii prohibuisse: sed potius ex incompressis impolitisque lignis, sine arte simul congestis, pyram fieri voluisse. *Ascia* enim instrumenti genus erat non solum poliendis lignis, sed etiam construendis, connectendisque aptum: *quo in calcis maceratione veteres etiam usus esse*, testatur Vitruvius de architect. libro 7. cap. 2. Igitur Decemuii *ascia* sine, arte aliqua fabrica, fieri vel expoliri rogum noluerunt, Cæterum sumptu tribus riciniis, & vinculis purpuræ, & decem tibicinibus extenuatò, sustulerunt etiam lamentationem Decemuii, ut eodem loco scribit Cicero. *Ricinium esse*, refert Festus, *omne vestimentum quadratum: eosque qui duodecim interpretati sunt, ricinium appellasse virilem togam, qua mulieres utebantur, prætextam clauo purpureo*. Quia igitur unumquodque ricinium clauum habebat purpureum, utique obscurum non est, quid hic per tria purpuræ vincula intellexerit M. Cicero. Ait enim sumptum funebrem tribus riciniis, & vinculis purpuræ extenuatum fuisse: haud dubiè per tria ricinia, & vincula purpuræ, tres viriles togas, tribus clavis purpureis prætextas intelligens. sic ni fallor, ut in funere tres duntaxat fœminas tribus riciniis indutas esse Decemuii voluerint, non autem ut vna fœmina tria ricinia indueret. Et cum nãias ad tibias canere in funeribus more quodam inueterato etiam receptum esset, eum morem non sustulerunt: sed quia infinito quodam tibicinum

nume

numero funera grauabantur, Decemuires plures in funere tibicines esse quàm decem prohibuerunt. Qui quidem tibicines idcirco adhibebantur, ut in funebres eorum tibias (quas flamini audire nefas erat) nania mortui hominis laudandi causa canerentur, auctore Festo. Fuisse etiam praeficas idcirco olim conductas, ut ante domum mortui laudes eius canerent, Varro testatus est, citans illud Næuij. Hac quidem herclè opinor praefica est, nam mortuos conlaudat. Eoque spectat Plauti illud in Truculento:

*Sine virtute argutum cinem, mihi habeam pro praefica:*

*Quae alios conlaudare absentes, sese verò non potest.*

Cicero scribit, legem quoque Decemuiralem his verbis lamentationem sustulisse: MULIERES GENAS

NE RADVNTO, NEVE LESVM FVNERIS ERGO HABENTO. Plinius libro II. cap. 37. *Infrà oculos*, inquit, *mala homini tantum, quas prisci genas vocabant*, duodecim tabularum interdicto radi a feminis eas

vetante. Pudoris hæc sedes, ibi maximè ostenditur rubor. Radere veteribus idem erat quòd vnguibus cruentare, digitisve conterere: indeque fidicines, à radendis siue conterendis fidibus veteres appellasse rases, testatur Festus. Voluerunt igitur in effectu Decemui-

ri, lacrymis cadere permittendum, non imperandum. Quid autem per lessum Decemuires intellexerint, veteres interpretes Sextus Aelius, Lucius Aelius, non satis se intelligere dixerunt, inquit Cicero, sed suspicari vestimenti aliquod genus funebris esse. Latius lessum interpretatur, quasi lugubrem eiulationem, ut vox ipsa significat. Illudque eo magis verum Ciceroni videtur, quòd lex Solonis id ipsum vetet, eoque sensu Plautus lessum videtur accepisse, cum sic in Trucul. scriberet.

— Stultus es,

D 2

Qui

*Qui facta infecta facere verbis postules : Thetis quoque etiam*

*Lamentando lessum fecit filio.*

Quasi dicat Plautus, *lamentis gemituque & fœmineo ululatu*, ut utar Poëtæ verbis, filium defleuit Thetis, & tamen suis illa lacrymis quod factum erat infectum reddere non potuit. Et sic quidem hunc Plauti locum accipiendum esse, euidenter in libro de anima docet Tertullianus : *Planè*, inquit, *stygias paludes Poëta tradidit mortem diluentes. Sed & Thetis filium planxit.* His addenda est alia quoque lex, quam in eodem libro secundo de legibus ex duodecim tabulis Cicero his verbis refert : *HOMINI MORTVO NE OSSA LEGITO, QVO POST FVNVS FACIAS*, & ait excipi bellicam peregrinamque mortem. Quid autem in hac lege sibi voluerint Decemviri, Cicero non exposuit. Et certè, ut quid mihi videatur paucis exponam, multum interesse puto, inter ossa legere homini mortuo, & inter hominis mortui ossa legere : nam ossa hominis quæ dispersa sunt, & non coherent, cum simul colliguntur, tunc hominis ossa legi dicuntur. Seneca libro secundo, de Ira : *Dignus fuit cum permetteret à conuiuio ad ossa filij legenda discedere.* Apuleius libro tertio florid. *Recta de auditorio ad exequias eundum, legenda eius esse ossa, mox carmina.* Cæterum homini mortuo leguntur ossa, cum eius cadaueri aliqua ossa adimuntur. Eoque sensu *viuis ossa legere* dixit idem Seneca in libro de Consolat. *Adiice*, inquit, *incendia, ruinas, naufragia, lacerationes Medicorum ossa viuis legentium, & totas in viscera manus dimittentium.* Legere siquidem pro adimere, & auferre veteres dixisse, non esse obscurum, si consideremus eum dicendum esse sacrilegum, qui adimit, qui aufert res Deo ritè consecratas. Horatius serm. libro primo, satyr. 3.

*Nunc.*

*Nunc vincet ratio hoc, tantundem ut peccet idemque*

*Qui teneros caules alieni fregerit horti.*

*Et qui nocturnus Divûm sacra legerit.*

*Membrum abscindi mortuo dicebatur, inquit Festus, quum digitus eius decidebatur, ad quod servatum iusta fierent reliquo corpore combusto. Et idcirco Decemuiros cum ventant homini mortuo ossa legi, per ossa membrum aliquod ex ossibus duobus, aut tribus constans, ut est digitus, existimaui intellexisse: illudque homini mortuo adimi vetuisse, ni is aut peregri, aut in bello mortuus esset. Quum enim alicui digitus legitur, certè eidem adimuntur, siue leguntur ossa, quo post funus fiat, hoc est, ut Festus interpretatur, membrum adimitur ad quod servatum iusta fiant reliquo corpore combusto. Credo quia molestum esset ad eum locum amicos exequiarum causa euocare, ubi quis bello occubisset; vel ubi civis Romanus inter peregrinos mortem obiisset. Ideoque homini huiusmodi mortuo permiserunt Decemuiros ossa legi, quo post funus fiat, hoc est membrum aliquod adimi, ad quod servatum iusta Romæ fierent, reliquo corpore apud peregrinos combusto. Hæc præterea sunt in duodecim de vinctura: SERVILIS VNCTURA TOLLITOR, OMNISQUE CIRCUMPOTATIO. Audio legem hanc sic exponi, pollinctores ne sint Decemuiros prohibuerint. Profecto hi non rectè mihi intellexisse visi sunt; quales olim dicerentur haberenturque pollinctores. Pollinctores dicebantur, non qui cadauera vnebant duntaxat, sed etiam libitinariorum, quibus cadauera eluenda, commundanda, exornandaque locabantur servi, cap. 5. §. 1. de inst. act. Eoque sensu pollinctores Plautus accepisse visus est in Pænulo:*

*Carthaginenses fratres patriæ duo*

*Fuere, summo genere, & summis divitiis,*

D 3

*Eorum*

*Eorum alter vivit , alter est emortuus.*

*Propterea apud vos dico confidentius,*

*Quia mihi pollinctor dixit qui eum pollinxerat.*

Proinde si hanc legem intelligo , quasi per illam vngi feruorum corpora Decemuii prohibuerint. Solitas etenim aliqui in funus mortui serui impensas fieri testatur *Ulpianus* capit. 13. §. 19. de action. empt. Sustulerunt etiam omnem circumpotationem seruilem. Nam liberi homines quo minus coronati parentantes , quum supra tumulum dapes posuissent , circumpotare potuerint , nulla lege mihi prohibitum fuisse videtur. *His adde sumptuosam resperfusionem, longasque coronas & acerras etiam Decemuiros sustulisse.* Sumptuosam resperfusionem, murratam potionem Festus appellare visus est. *Murrata*, inquit , *potione usus antiquos indicio est , quod etiam nunc Ediles per supplicationes Diis addunt ad puluinaria , & quod duodecim tabulis cauetur , ne mortuo indatur , ut ait Varro in antiquitatum libro primo.* Scribit etiam Plinius libro decimoquarto cap. 12. Numam legem huiusmodi tulisse : VINO ROGVM NE RESPERGITO. Sed quia illud Numam sanxisse propter rei inopiam non dubitauit Plinius , existimo vino duntaxat murrato rogum respergi vetuisse Decemuiros, eosque hanc Numæ legem in suas tabulas non retulisse. *Murrinam* Festus esse contendit genus portionis , quod Græcè *nectar* dicitur : hanc mulieres vocabant murriolam , quidam murratum vinum , quidam id dici putant ex vux genere murrinæ nomine. *Plinius* verò eodem libro cap. 13. non inter vina modò , sed etiam inter dulcia vina , odore miro , preciosisque aromatibus condita murrinam refert : & ait *Scenolam quoque , & Lalium & Ateium Capitonem* ( legem fortè Decemuiralem de murrata potionem interpretantes



centes) in eadem sententia fuisse : quoniam in Plauti Pseud. sit.

*Quod si opus est ut dulce promat*

*Indidem, ecquid habet? rogas?*

*Murrinam, passum, defrutum, mellinam.*

Permiserunt igitur Decemviri, excepto murrato, ro-  
gum omni vino respergi, quem Numa Pompilius rei  
inopia expressè prohibuerat aliquo vino respergi. Do-  
cet Apuleius in apologia prima, quales olim funeri  
odores parari soleant : *Nec tamen*, inquit, *idcirco om-*  
*nia ad nequiores suspitionem trahuntur, etsi thus, & ca-*  
*ssiam, & myrrham, ceterosque id genus odores funeri tan-*  
*tum emptos arbitreris, qui & medicamento parentur, &*  
*sacrificio.* Denique huiusmodi odoribus sentire omni-  
no visus est Festus, qui acerram interpretatur aram, qua  
ante mortuum poni solebat, in qua odores incendebantur.  
Cæterum de longis coronis interpretes hîc nihil ad-  
notant, putò quia non satis, quales illæ fuerint, in-  
tellexerunt. Quidam ut audio, per coronas longas  
lemniscos intelligit, sed errat: tam enim rotundæ  
esse lemniscatæ possunt, quàm coronæ longæ. Obser-  
uauimus longis coronis busta, sepulchra, sellas cu-  
rules, theatra, & currus triumphales exornari con-  
sueuisse: rotundis homines vsos esse. Obseruabunt id  
mecum viri omnes literati, ex illo præclaro, quem  
GOLTZIVS tuus Marce Laurine propediem est edi-  
turus, C. Iulio Cæsare, siue historiæ Imperatorum  
Cæsarumque Romanorum, ex antiquis numismati-  
bus restitutæ, libro primo. De longis coronis illud ac-  
cipiendum putò, quod hunc in modum scripsit in  
Ostauio M. Minucius Felix: *Sic reformidatis Deos quos*  
*negatis, non floribus caput nectitis; non corpus odoribus*  
*honestatis, reseruatis unguenta funeribus, coronas etiam*  
*sepulchris denegatis pallidi, trepidi, misericordia digni,*

D +

sed

*sed nostrorum Deorum.* Nunc exponemus, vndè laudis ornamenta ad mortuos pertinere Cicero manifestum fecerit. *Iam illa, inquit, significatio est, laudis ornamenta ad mortuos pertinere, quod coronam virtute partam, & ei qui peperisset, & eius parenti sine fraude esse lex impositam iubet.* Idque etiam adnotans iisdem ferè verbis Plinius libro vigesimo primo cap. 3. fuisse & aliam quoque legem testatus est, qua is arguebatur, cuiusque pecunia, qui non virtute, sed pactione coronam acquisiverat. Quam legem, ut potè vitiosissimam, & locum Plinij, qui etiam mendosus est sic restituo: *Semper tamen auctoritas vel ludicro quaesitarum fuit. Namque ad certamina in circum per ludos & ipsi descendebant, & servos suos quoque mittebant. Inde illa duodecim tabularum lex: QVI CORONAM PACIT, IPSE PECVNIAQVE EIVS VIRTUTIS ERGO ARGVITOR.* Quam servi, equivè meruissent, pecunia partam lege dici nemo dubitavit. *Quis ergo honore? Ut ipsi mortuo, parentibusque eius, dum intus positus esset, forisve ferretur, sine fraude esset imposita.* Hæc Plinius Vnde intelligi perspicuè potest, duas de Circensibus coronis in duodecim tabulis leges fuisse: vnam, qua pecunia eas acquiri prohibuerunt Decemviri: alteram, qua coronæ virtute, non pecunia acquisitæ, commoditates honoresque describuntur. Et proinde in hac lege rectè pro *Qui coronam parit*, mihi reposuisse videor, *Qui coronam pacit*: præsertim quod hanc emendationem mirum in modum verba subsequētia confirmant. Quibus nimirum significatur, si coronam, quam servi equivè meruissent, præcones Ædiliū iussu, domino ut victori imponent, eam legem dici pecunia partam neminem dubitasse. Et ita legem de corona, quæ non virtute, sed pecunia est acquisita, loqui, testatur expressè Plinius. Aut igitur pro *parit* legendum

legendum est *pacit*, aut certè *pecunia parit*: vt sit *ser-*  
*sus*, qui non virtute, sed pecunia coronam acquisiuit,  
 quia virtuti fraudem fecit, virtutis ergo, & ipsum, &  
 eius pecuniam arguendam esse. Id quod *Imp. Alexan-*  
*der etiam obseruasse visus est. cum tribui ciuilium munerum*  
*athletis iis vacationem non permisit, qui amulis corruptis, ac*  
*redemptis coronati dicebantur.* cap. vnico. C. de athleticis.  
 Eoque omnino spectare videntur hi versus Plauti,  
 quos pronunciare in Amphytruon. prologo Mercu-  
 rius fingitur:

*Hoc quoque etiam mihi in mandatis dedit.*

*Vt conquisitores fierent histrionibus:*

*Qui sibi mandassent delegati vt plauderent,*

*Qui ve, quo placeret alter, fecisset, minus:*

*Eius ornamenta, & corium vti conciderent.*

Et hæc quidem mihi sufficere videntur ad emenda-  
 tionem, interpretationemque legis illius Decemuir-  
 alis, qua, qui pactione coronam acquisiuit, arguitur.  
 Altera porro lex, qua homini mortuo eiusque paren-  
 tibus imponi coronæ honoris gratia permittuntur,  
 non multum difficultatis continet, si consideremus  
 moris apud antiquos fuisse, vt cadauera per dies se-  
 ptem domi seruantur, octauo die darentur rogo, &  
 nono sepelirentur, auctore in Virgil. Seruio. Quod  
 quum ita sit, quis est qui non intelligat quid sibi Plin.  
 voluerit, coronam sine fraude homini mortuo, cum intus po-  
 situs esset, & quum foris ferretur, eiusque parentibus fuisse  
 impositam scribens? Erat & alia lex in duodecim, qua,  
 quod erat olim factitatum, vt vni plura funera fie-  
 rent, lectique plures sternerentur, id quoque ne fieret  
 sancitum est: & fuisse in ea lege, NEVE AVRVM  
 ADDITO, testis est M. Cicero. Meminit etiam idem  
 Cicero legis cuiusdam Decemuiralis, qua cum dentibus  
 auro vinctis sine fraude mortuos vti & sepeliri fuit libe-

rum. Quæ quidem lex sic mihi restituenda videtur:  
 QVOI AVRO DENTES VINCTI ESUNT,  
 AST IM CVM OLLO SEPELIRI, NESI  
 FRAUDE ESTO. *Dua sunt praterea in duodecim, leges,*  
*inquit Cicero, de sepulchris, quarum altera priuatorum*  
*adificiis, altera ipsis sepulchris cauet.* Nam quod *rogum,*  
*bustumve nouum vetat propius sexaginta pedes adijci aedes*  
*alienas inuito domino incendium veretur, acerbum: quod*  
*autem forum, id est, vestibulum sepulchri, bustumve usu-*  
*capi vetat, tuetur ius sepulchrorum.* Hæc Cicero lib.  
 secundo de legibus.

## CAPVT XVI.

*De mancipationibus.*

**M**ANCIPIVM pro dominio in iure ciuili po-  
 situm omnes consentiunt. Indequæ *res omnes*  
*aut mancipi esse, aut nec mancipi dicuntur.* Mancipi res sunt,  
 auctore Boëtio, *quæ à nostro ad alterius dominium per ne-*  
*xus quadam solemnitate transire possunt: nec mancipi verò*  
*res illa dicuntur, partim quidem quæ sui iuris & libera*  
*sunt, partim verò quæ dominio semper non sunt subiecta: &*  
*si res illas addideris quæ mancipio dari, aut accipi*  
*mancipio nequeunt, perfecta erit rerum nec mancipi*  
*definitio.* Res mancipi solæ mancipari possunt: res nec  
 mancipi, aut nuda traditione, aut si tradi non pos-  
 sint, cessione acquiruntur. Inter res mancipi prædia in  
 Italico solo tam vrbana quàm rustica, eorumque iu-  
 ra, item serui & quadrupedes, quæ collo dorsove do-  
 mantur, velut boues, muli, equi, asini, ab Vlpiano in  
 fragmentis referuntur: reliquæ autem res nec man-  
 cipi sunt. Et quamuis elephanti & cameli dorso col-  
 lōve domari possint, eos tamen idcirco idem Vlpia-  
 nus inter res mancipi negauit numerari, *quod essent*  
*bestiarum*

*bestiarum numero.* Opinor quia veteres Mancipi res appellabant, res alterius dominio semper subiectas. Nam serui, equi, asini, nulli vnquā fuere qui proprium dominum non haberent: & proinde etiam si fugissent, si surrepti essent, aut abacti, semper alicuius erant in dominio. Verum cameli & elephanti, quia sui iuris sunt, idcirco statim occupantis iure Quiritium fiunt, sine aliqua aut Mancipationis, aut in iure cessionis, vel vsucapionis auctoritate: sique alienati fuerint, nulla traditione eorum dominia acquiruntur. Sed quia eousque duntaxat occupantis esse intelliguntur, donec eius custodia coërentur, hinc factum etiam deinde videtur, vt cameli & elephanti, licet collo dorsove domati essent, inter res tamen Mancipi non referrentur. Non enim satis erat, Mancipium quid fuisse, vt posset rerum Mancipi numero comprehendere, verum etiam Mancipium esse perpetuò debebat. Sanè seruus quàm diu seruus est, Mancipium est: elephas verò Mancipium diutius esse non potest, quàm custoditur. Nam semel vbi custodiam euasit, & in pristinam libertatem sese recepit, Mancipium esse desinit. §. *fera.* Inst. de rer. diuis. Prædia in Italico solo Mancipi esse tradidit Vlpianus. Nec quidem in solo prouinciali prædia omnia nec Mancipi fuerunt. Ciues enim Romanos in prouinciis tam prædia possedisse, & emancipasse, quam in Italico solo, scripsit Nepoti suo Plinius lib. 6. epist. de candidatis disserens, quos prædia in solo Italico comparare princeps cogebat, *Eosdem,* inquit Plinius, *pairimonij tertiam partem conferre iussit, in ea quæ solo continerentur: deforme arbitratus, vt erat, honorem petituros, vrbeim, Italiamque, non pro patria, sed pro hospitio, aut stabulo quasi peregrinantes habere. Concurfant ergo candidati, certatim quicquid venale audiunt, emptitant, vt sint quoque plura venalia, efficiunt.* Proinde

*Proinde si pœnitet te Italicorum prœdiorum, hoc vendendi tempus, tam hercule quàm in prouinciis comparandi, dum idem candidati illic vendunt, ut hic emant. Hæc Plinius. Modestinus etiam scribit, eum qui officij causa in prouincia agit, vel militat, prœdia comparare in eadem prouincia, non potuisse, præterquam si pœterna eius à fisco distraherentur. cap. 62. de contrah. emp. Ex quibus locis verissimum apparet, non in Italico duntaxat solo, sed & in prouinciis quoque iure Mancipij ciues Romanos prœdia possedisse. Nec id quidem coniecturis tantum verisimilibus, sed expressis etiam M. Tullij verbis confirmari potest, qui de quibusdam Apolonidensibus Pergamenisque prœdiis hunc in modum pro L. Flacco differit. *Illud quero, sintne ista prœdia censui censendo, habeant ius civile, sint nec ne Mancipi?* Et certè ea fuisse videtur, quantum ex Siculo Flacco possum colligere, agrorum prouincialium differentia, ut vel diuisi & assignati, vel quæstorij, vel occupatorij, aut vectigales, id est, stipendiarij, vel denique tributarij dicerentur. Ut enim Romani omnium gentium potiti sunt, quos agros ex hoste captos in victorem populum partiti non sunt, eos limitibus actis, aut per quæstores populo Romano vendiderunt, aut ciuitatibus, certo vectigali imposito, quod stipendiarium dicitur, reddiderunt. Quod quum ita sit, non est igitur dubium, quin ager ille, quem à Romano ciue ciuis Romanus emebat in prouinciis, rerum Mancipi numero sic contineretur, ut eius dominium, non traditione nuda, sed per Mancipationem, aut in iure cessionem duntaxat transferretur. *Ceterum agri vectigales, & stipendiarij, item tributarij, idè iuris nec Mancipi sunt, quia vectigales populi Romani, tributarij principis sunt proprietate, usu verò & fructu prouincialium, auctore Theophilo: & idcirco à possessoribus dari Mancipio nequeunt. Et eo quidem**

dem visus est omnino Iabolenus respexisse, possessionem ab agro iuris proprietate sic distinguens, *ut quicquid apprehendimus, cuius proprietas ad nos non pertinet, nec pertinere potest, id appellari possessio debeat.* capit. 12 §. de verbor. significat. Quo sensu possessiones etiam Festus agros definiuit latè parentes, qui non mancipio sed usu tenebantur, quos ut quisque occupauerat, colebat. Est autem mancipatio, auctore Vlpiano, propria species alienationis rerum Mancipi, eaque fit certis verbis, libripende & quinque testibus præsentibus, hunc videlicet in modum: Is qui rem mancipio accipit, æs tenens ita dicit: *Hunc ego hominem ex iure Quiritium meum esse aio, isque mihi emptus est hoc ære, aneaeque libra.* deinde ære percutit libram. Fuisse enim in veteribus Mancupiiis scriptum, *Raudusculo libram ferito*, Varro testatur lib. 4. & §. de ling. Lat. Illudque in mancipando etiam dici solitum, Festus obseruauit. *Quum autem libra raudusculo esset percussa, tunc is qui rem mancipio capiebat, æs ei dabat, à quo rem accipiebat mancipio*, auctore Boëtio: qui etiam mancipationem hanc lege 12. tabularum, sic esse introductam contendit, ut Mancipi res aliquas eadem lege abalienari potuisse, nisi per hanc solemnitatem expressè negauerit. Proinde si à Romano ciue cuius Romanus seruus emisisset, isque traditus esset, neque tamen Mancipatus, nec in iure cessus, aut anno possessus, seruus quidem in bonis emptoris esse, ex iure Quiritium verò eundem remanere venditoris: testatur Vlpianus in fragmentis titulo primo. Sic nimirum ut usu & fructu seruus emptoris esset, mancipio verò & nexu venditoris. Quò respexisse visus est etiam M. Cicero, quum ita lib. 7. epist. famil. scriberet: *Cuius quando proprium te esse scribis Mancupio & nexu, meum autem usu & fructu, contentus isto sum.* Hùc quoque spectat illud Arnobij aduersus gentes l. 2. *Usu*

*& illis est vita, non mancipio tradita.* quamvis aliter quidam inferant. *Esse enim duplex dominium Theophilus ait, unum naturale, alterum legitimum:* & is qui naturale duntaxat dominium habebat, rem in bonis habere, qui verò legitimum, iure Quiritium dominus esse dicebatur. Et eo quidem spectare Decemviri videntur, quum venditas res, & traditas aliter emptori non acquiri, in duodecim tabulis scripserunt, quàm si is venditori pretium soluisset, aut ei satis alio modo fecisset. §. venditæ. Instit. de rer. diuis. Quia enim ex his quæ de mancipatione hîc adnotata sunt, liquidò constat, statim ubi res empta mancipio data esset, emptorem eius legitimum dominium iure Quiritium adeptum fuisse, etiamsi pretium non verè, sed dicis duntaxat gratia interuenisset, ideò si non Iustinianum, saltem legem quàm allegat Decemviralem, eiusque interpretes sic esse intelligendos puto, ut contenderint rem venditam aliter emptoris facere venditorem non cogendum, quàm si ab emptore venditori satis esset abundè factum. cap. 19. de contrah. empt. cap. 5. §. 3. de tribut. act. Tunc enim erat satis emptori à venditore rem tradi, sed etiam emptoris eam facere, hoc est, rem emptori mancipio dare, aut ea in iure cedere venditor lege 12. tab. cogebatur. Quia enim, ut est expositum, qui rem vendiderat, & tradiderat, neque mancipio dederat, nec ea in iure emptori cesserat, eius iure Quiritium dominus manebat, eadem interim in bonis emptoris usu & fructu existente: idcirco emptor rem emptam poscere solebat *mancipio*: hoc est, rem non solum tradi, verumetiam suam legitimè fieri postulare: siquidem nuda traditione ante Iustiniani constitutionem rerum mancipi dominia non transferbantur. Hûc spectat Plauti illud in Mostel. *Inbe ades mancipio poscier.* Quamvis interim mancipi res



ita etiam potuerit alienari, ut eam mancipio dare, aut in iure cedere venditor non cogeretur: nimirum cum sic inter contrahentes actum esset: Plaut. in Pers.

*Præus dico hanc mancupio nemo tibi dabit: iam scis?*

D. Scio.

Et tunc quidem plerunque solet, aut dupla, aut simpla promitti, si Varroni credimus, libr. 2. de re rust. Solet, inquit Varro, si mancupio non datur, dupla promitti, aut, si ita pacti, simpla. Hinc fortè simplaria venditio, de qua suo loco latius. Illud etiam tunc obseruabatur, ut eiusdem rei venditor & emptor in solidum essent domini: sed hic quidem bonitarius, ille verò quiritarius. Eoque spectare videntur, titulus, & Imp. Iust. constitutio, *De nudo iure Quiritium tollendo*. Qui quidem Iustinianus, cum etiam rerum mancupi, & nec mancupi differentiam aboleuisset, mancupationem visus est omnem ita sustulisse, ut amplius rem emptoris facere, hoc est, rem mancupio dare venditor non cogeretur, sed tam nuda traditione legitima rerum mancupi dominia, quam rerum nec mancupi acquirerentur. Qua sola ratione factum deinde videtur, ut nulla huiusce Quiritium iuris, veterisque rerum mancupi & nec mancupi differentia, in nostris Pandectis supersint vestigia. Et ubicunque nexu tradere, aut mancupio dare legebatur, ibi dare, tradere, aut præstare visus est Tribonianus reposuisse: ne videlicet animi inueniunt, qui ad primam legum veniunt audientiam, iuris Quiritium mancupique verbis perterriti, inutiles, si Diis placet legis antiquæ, hoc est, Decemuiralis dispositiones accipiant, auctore Iustiniano capit. vnic. de nudo iur. Quirit. toll. Et ita quidem mancupatione dominia rerum acquirebantur. Cæterum in iure cessio, communis erat alienatio, inquit Vlpianus,

& rerum, mancipi & nec mancipi, quæ fiebat per tres per-  
 sonas, in iure cedentis, vindicantis, addicentis. In iure cede-  
 bat dominus, vindicabat is cui cedebatur, addicebat Pretor.  
 Nec sanè cessione duntaxat, sed etiam nuda traditione res  
 nec mancipi acquirebantur, auctore eodem Vlpiano: tra-  
 ditione quidem res mobiles, cuius generis sunt apri, vrsi,  
 leones, cerui, & alia id genus animalia, quæ bestiarum  
 numero sunt: cessione verò res immobiles, quales sunt  
 possessiones prædiorum, vectigalium, aut tributario-  
 rum: Quia enim huiusmodi prædia in bonis dunta-  
 xat sunt possessorum, proprietate verò populi Ro-  
 mani, aut Principis: & quia nihil aliud mancipium  
 est, quàm proprietas, siue dominium legitimum, cer-  
 tè nulla mancipatione à possessoribus potuerunt alie-  
 nari. Sed quandoquidem vsu & fructu eadem prædia  
 possessorum essent, vsu & fructu non mancipa-  
 tione, sed cessione rectè alienabant: sic nimirum vt il-  
 lo eodem iure, quo in huiusmodi prædiis utebantur,  
 alteri rectè apud prouinciæ Præsidem in prouinciis  
 possessores cederent: proprietate interim manente  
 penes populum aut Principem semper salua. Quod  
 autem Varro scribit lib. 2. de re rustica, cessionem legiti-  
 mum dominium in emptionibus perficere, si quis ei in iure  
 cessit, cui cedere potuit, & id ubi oportuit, sanè eleganter il-  
 lud explicat Boëtius in Top. Cicer. Fiebat, inquit, ces-  
 sio tali modo: Apud magistratum populi Romani, vel apud  
 Pratorem, vel apud Præsidem prouinciæ, is cui in iure re  
 aliqua cedebatur, rem tenens ita vindicabat, Hunc ego ho-  
 minem ex iure Quiritium meum esse aio: Deinde postquam  
 hic vindicasset, Pretor eum interrogabat qui cedebat, an  
 contra vindicaret: quo negante, aut tacente, tunc ei qui vin-  
 dicauerat, eam rem addicebat, idque legis actio dicebatur.  
 Vnde illud imprimis obseruatione non indignum vi-  
 detur, legis videlicet actionem veteres tam ad imagi-  
 nariam,

nariam, quàm ad veram rei vindicationem retulisse. Nam qui lege in rem aliquam agebat, is hac vti eadem formula solet. Et idcirco magistratum apud quem legis actio est, cuius Modestinus & Ulpianus meminerunt, cap. 4. de adopt. cap. 3. de offic. Procons. cap. 1. de offic. Iurid. eum rectè interpretabimur, apud quem non solum legitimis actionibus liberum cuius erat experiri, filium emancipare, aut adoptare, sed vindicanti etiam suo iure cedere. Nunc videndum est, quid à nexu mancipatio differat. *Nexum*, inquit Festus, est quodcumque per as & libram geritur, idque rectè dicitur: quo in genere sunt testamenti factio, nexi datio, nexi liberatio. Manilius autem, teste Varrone libro sexto de lingua Latina, *nexum* esse etiam scribit, omne quod per libram & as geritur, sed ita ut in eo sint res mancipi. Denique Mutius Scevola, ut ait idem Varro, *nexus* appellatione existimavit contineri, quæ per as & libram fiunt ut obligentur, præterquam quæ mancipio dantur. Igitur ex Scevolæ sententia differre à mancipatione in hoc videtur nexus, quod res mancipi nexu obligentur, non autem mancipio detur: hoc est, mancipatione non alienentur. Et hoc quidem tunc verum esse non dubito, quum ut species nexus accipitur. *Testis est enim Ælius Gallus*, omne quod per as & libram geritur, genere quodam *nexum* appellari. Et idcirco si illud in suas species distribueris exemplo adoptionis, rectè dices *nexum*, hoc est, omne quod per as & libram geritur, in quendam *nexum* specialem, & in mancipationem discedere. Itaque genere quodam omnis mancipatio nexus est. Quo sensu rem illam quæ mancipio datur, *nexu* tradi, dixit in Topicis Cicero. *Abalienatio*, inquit, est eius rei quæ mancipi est, aut traditio alteri nexu, aut in iure cessio, inter quos ea iure civili fieri possunt. Rursus, specialiter, mancipatio nexus non est; au-

E ctore

Etore Sceuola: cū enim nexum, vt speciem sumimus, tunc omne quod per æs & libram geritur, præterquam quod mancipio datur, nexus appellatione continetur. Testamenta per æs & libram nexu fiunt, non mancipatione. Pignora dicuntur necti, non mancipari. capite 22. §. 1. de iure fisci. Quod igitur per æs & libram alienatur, mancipari, & quod eodem modo obligatur, necti propriè & specialiter dicitur, cap. fi. C. Si aliena res pig. Cæterum effectus mācipationis is fuisse videtur, vt vbi res mancipi mancupio data esset, iure Quiritium eius qui eam mancupio acceperat, ita efficeretur, vt ille vero domino rem suam vindicanti, non restituere, sed laudare duntaxat auctorem suum cogeretur. Idque pro Murena expresse testatus est Cicero. Quò spectat Plauti illud in Mercat.

*Non ego illam mancupio accepi, sed ille illam accepit.*

*D. sine,*

*C. H. Non potes tu lege vendere illam.*

Loquitur adolescens Charinus de puella, quam cū matri se emisse Demiphoni patri adolescens persuassisset, eam pater alienare simulauit se velle: id ne fieret, fingit adolescens non se, sed amicum quendam eam mancupio accepisse, proindeque nec sibi nec patri integrum esse eam alienare. Quibus addenda sunt quæ in Curcul. sic idem Plautus scribit.

*Memento promisisse te, si quisquam hanc liberali  
Cassa manu adfereret, mihi omne argentum redditū iri:  
Triginta minas. C. A. meminero, de isthoc quietus esto.  
Et nunc idem dico. L. V. & commeminisse hac ego volam te.  
C. A. Memini & mancipio tibi dabo. C. V. R. Egon vt ab  
leone quicquam.*

*Mancipio accipiam: quibus suum nihil est, nisi vna  
lingua:*

*Qui abiurant si quid creditum est? alienos mancupatis.  
Alienos*

*Alienos manumittitis, alienisque imperatis:*

*Nec vobis auctor ullus est, nec vosmet estis ulli.*

Et hæc quidem sic olim obseruabantur, si res quæ erat mancipata eius esset conditionis, vt dari mancipio posset, & ab eo daretur, à quo dari mancipio poterat. Nam si id datum mancipio esset, quod dari non poterat, aut is rem aliquam mancipio dedisset, qui mancipio dare iure ciuili non potuit, nulla erat ipso iure huiusmodi mancipatio. Testis est enim lib. 2. de re rust. M. Varro, *tunc demum mancipationem in emptionibus dominium perficere legitimum, cum quis vt debuit rem mancipio ab eo accepit, à quo iure ciuili accipere potuit, cumque, vt ait in Topic. Cicero, res ea mancipio datur, quæ dari mancipio potest. Finge, inquit Cicero, mancipio aliquem dedisse id, quod mancipio dari non potest, num idcirco id eius factum est, qui accepit? aut num is qui mancipio dedit, ob eam rem se vlla re obligauit? Quem locum Boëtius sic interpretari videtur, vt contendat Ciceronem de rebus nec mancipi mancipatis loqui, & ideo huiusmodi mancipationem esse inualidam, quia omne quod non iure contractum est, nihil retinet firmitatis. Nunc his ita de mancipationibus, de nexu, deque rebus mancipi, & nec mancipi obiter expositis, videndum est quid sibi voluerint Decemuii cum ita scriberent:*

QVI NEXVM FACIET MANCIPIVMQVE  
VTI LINGVA NVNCVPASSIT, ITA IVS ES-  
TO: VTI NOMINASSIT LOCVTVSVE ESIT,  
ITA IVS ESTO. Sic legem hanc apud Festum lib.  
12. de verb. sign. restituo. Etenim nuncupasso, nomi-  
nasso, eso, & alia id genus verba, veteribus admodum  
familiaria sunt, quemadmodum ex Plauto, Festo &  
Varrone quiuis potest animaduvertere. Testatur Cicero  
de Orat. lib. 1. in duodecim tabulis expressè scriptum  
fuisse, *vti lingua nuncupassit*. Et quia idem Cicero lib. 3.

E 2

Offic.

Offic. *duodecim tabulis* caueri etiam scribit, *ut ea præstentur quæ lingua nuncupata sunt*, idcirco non dubitavi, quin ex *duodecim tabulis* lex ista desumpta fuerit. Quæ quidem lege nihil aliud visi sunt Decemuiui voluisse, quàm ea duntaxat quæ in nexu aut mancipatione expressa sunt, præstari: ea verò quæ lingua nuncupata non sunt, non præstari. Videntur etiam hæc verba, *nexum mancipationque*, licet coniuncta sint, pro disiunctis tamen Decemuiui posuisse: sicut illa, *agnatorum gentiliumque*, siquidem ut est declaratum, nexus & mancipatio, non nihil inter se differunt. Decemuiui ea præstari quæ lingua essent in mancipando nuncupata duntaxat voluerunt: Iurisconsulti etiam reticentiæ pœnam introduxerunt, ut auctor est eodem in loco Cicero. *Nam cum*, inquit, *ex duodecim tabulis satis esset ea præstari, quæ essent lingua nuncupata, quæ qui inficiatus esset dupli pœnam subiret, à Iurisconsultis etiam reticentiæ pœna est constituta: quicquid enim inest prædiorum vitij, id statuerunt, si venditor sciret, nisi nominatim dictum esset præstari oportere.* Nec id absurdum adeo, si verum est quod Pomponius scribit; *perlatis nimirum legibus Decemurialibus, quia naturaliter eueniebat, ut earum interpretatio desideraret prudentium auctoritatem, necessariam fuisse fori disputationem, quæ ius quoddam à prudentibus componebatur, quod communi nomine appellatur ius civile*, capit. 2. §. His legibus latis, de origin. iur. Et in hoc quidem iure componendo hanc mihi prudentes rationem secuti videntur, ut partim leges interpretarentur, partim quæ legibus deesse videbantur, ea supplerent. Interpretabantur, si quid obseruari non legum verba, sed earum sententia omnino suaderet: ut contingit in legitima patronorum tutela. Suppleuisse etiam ea Iurisconsultos, quæ *duodecim tabulis* deesse videbantur, obscurum non est, si consideremus,

remus,

femus, ius quod ab iis compositum fuit, appellari ius non scriptum consueuisse, hoc est, ius duodecim tab. non comprehensum. *Omne enim ius aut scriptum* hoc est inclusum duodecim tabulis, *aut non scriptum*, hoc est, iisdem tabulis prudentum auctoritate adiectum tunc appellabatur, cum legibus perlatis Decemuiralibus esse necessaria fori disputatio cœpisset. Quo tempore iuris non scripti fuisse videntur, vsucapio seruitutum, vsucapio libertatis, vsucapio hereditatis, tutela scæminarum, tutela fiduciaria, prohibitæ inter virum & uxorem donationes, prohibitæ mulierum intercessiones, reticentiæ pœnæ, & id genus alia, de quibus in libro singulari *De auctoritate prudentum*, fauente Deo, differemus. Et ita quidem scripto iure, quæ lingua fuerant nuncupata in mancipâdo, ea duntaxat præstabantur: iure vero non scripto, etiam reticentiæ pœnæ sunt constitutæ. Hæc hæctenus de mancipationibus. De conuentionibus autem legitimis nihil hîc tractabitur, certè quia de iis Variorum lib. 4. accuratè disseruimus, legem illam Decemuiralem interpretantes, cuius auctor ad Herennium lib. 2. meminit. Nunc de vsucapionibus videamus.

## CAPUT XVII.

*De vsucapionibus.*

**Q**UI possidet, vel à domino possidet, vel à non domino. Qui à domino possidet, iure gentium & ciuili dominus esse potest: potest etiam iure gentium dominus esse & non ciuili, rursus iure ciuili, & non iure gentium. Qui rem mancipi mancipio accipit, is tam ciuili quàm gentium iure dominus est: qui rem in bonis habet, iure gentium, non ciuili, qui dominus rei quiritaris est, iure ciuili non gentium rem

possidet. Qui autem à non domino possidet, nec iure gentium dominus est, nec iure ciuili: sed vsus rei, siue possessionem illius nudam habet ad certum tempus sine dominio: quo tempore finito, nuda possessioni dominium adiicitur. Et ita qui nec gentium, nec ciuili iure dominus erat, tempore legisque beneficio tam rei possessæ dominus efficitur, quàm si mancipio, aut cessione eam acquisiuisset. Quod cum ita sit, nunc intelligimus quid sibi voluerit pro Cecinna Cicero, cum ita scriberet: *Lex vsus, auctoritatem fundi iubet esse biennium.* Et in Top. *Quoniam vsus auctoritas fundi biennium est, sit etiam adium.* Sensus enim est: Lex voluit vsus esse fundi auctoritatem: quamdiu? biennium: hoc est, fundi auctoritatem non diutius biennio ex nudo vsu & sola possessione constare: siquidem finito biennio, eadem lex possessioni voluit adiici dominium. Certum autem est, qui quid mihi vendit, eum auctorem meum dici, cap. 14. in fin. de Public. in rem act. cap. 4. §. 1. cap. 6. §. 4. cap. 52. §. 3. de act. empt. & ob id, ius quod idem venditor in me transfert, auctoritatis nomine etiam contineri, cap. fin. de pignor. act. Et quia plus iuris in emptorem transferre, quàm ipse habet, venditor non potest, idcirco fieri etiam potuit, vt interdum auctoritas fundi, ex nudo soloque vsu constaret: quod tunc accidere solet cum à non domino res emitur. Igitur ne quarundam rerum diu & ferè semper incerta dominia essent, voluerunt Decemviri certo quodam tempore vsus esse earum auctoritatem: hoc est, earum auctoritatē ex nuda possessione certo quodam tempore constare, eoque finito auctoritati ex nudo vsu constanti dominium adiici. Proinde rectè mihi Modestinus visus est *vsucapionem*, non *adoptionē* cum Vlpiano, *sed adiectionem dominij* definiuisse, c. 3. de vsurpat. Est enim vsucapio modus legitimus, quo



AD LEG. XII. TAB. CAP. XVIII. 71  
 quo per continuationem possessionis, possessioni nu-  
 dæ dominium adiicitur: adiectoque dominio, quia au-  
 ctoritas vsuaria beneficio legis habetur rata, idcirco  
 non amplius auctoritas duntaxat, sed rata auctoritas  
 vsus appellatur. Quamobrem errare mihi plurimum  
 visi sunt, tam qui apud Ciceronem, pro biennium  
 biennij, quàm qui biennis legunt, loco biennij. Volue-  
 runt igitur Decemviri vsum esse auctoritatem, fundi  
 quidem biennium, rerum verò mobilium, annum,  
 aduersus hostem & rerum furtiuarum æternam. De  
 lege Atinia hîc nihil dicam. De quinque pedum vsu-  
 capione, scribemus alio loco.

## C A P V T XVIII.

### *De testamentis.*

**D**ECEMVIRALIS lex testamentaria nullam ha-  
 bet obscuram sententiam: siquidem eius hæc  
 verba sunt: PATERFAMILIAS VTI LEGASSIT  
 SUPER PECVNIA, TUTELAVE REISVÆ  
 ITA IVS ESTO: auctore Cicerone de inuent. lib. 2.  
 Cornificio Rhetoric. lib. 1. & Vlpiano in fragmentis  
 tit. 11. Permiserunt enim Decemviri *patrifamilias*, hoc  
 est Romano ciui qui in potestate non est, liberam  
 testandi facultatem. *Legare* autem Decemviris idem es-  
 se, quod Iureconsultis *testari*, alio loco diximus. Porro  
 latissimam hanc testandi potestatem interpretatione  
 coangustatam esse vel legum, vel auctoritate iura con-  
 stituentium, auctor est Pomponius, cap. 120. de verb.  
 sign. Hinc originem habent leges tot testamentariæ,  
 Falcidia, Furia, Voconia, Velleia, Cornelia, Caninia,  
 Sentia, Papia, Glicia. Hinc regula Catoniana, hinc  
 Aquiliana formula. Adderé varia testaméntorum gene-  
 ra, sed quæ ab aliis rectè tractata sunt, hîc repetere nō

est necesse. Vt interim non omittamus, actionem familiaris erciscundæ ex duodecim tabulis descendere, cap. 1. famil. ercisc. *Et nomina ipso iure in portiones hereditarias ex eadem 12. tabul. lege esse diuisa*, Gordianus Imperator scripsit, capit. sexto, C. famil. erciscund. quod quidem rescriptum qua ratione accipiendum sit, commodiore loco demonstrabimus.

## CAPVT XIX.

*De successione ab intestato.*

**E**VND<sup>EM</sup> secuti in successione Decemviri & Prætores ordinem sunt. Quemadmodum enim illi ante de iudiciis testantium, deinde verò de successione ab intestato tractarunt: sic & hi postea quàm de bonorum possessione eius qui testatus est, edixissent, transitum ad intestatos fecerunt, cap. 1. Si tab. test. Et sunt quidem intestati gradus partim legitimi, partim honorarij, sic nimirum, vt primum vocentur sui hæredes, secundò legitimi, tertio cognati, quartò, vir & vxor, c. 1. Quis ord. in bon. poss. Sui hæredes vocantur lege 12. tab. sola: legitimi verò etiam aliis legibus, & Senatusconsultis, cognati denique, sicut etiam vir & vxor, sine legis cuiusquam subsidio, ad possessionem bonorum iure honorario admittuntur. Hinc titulos huiusmodi, *undè liberi, undè legitimi, undè cognati, undè vir & vxor*, ita interpretari soleo, quasi per eos proponatur, si nullæ existent testamenti tabulæ, undè liberi, undè legitimi, undè cognati, undè vir & vxor ad bonorum possessionem admittantur. Nunc de successione quæ ex lege duodecim tabularum ab intestato competunt, hîc tractabimus, de aliis suo loco disputaturi. Et quidè mortuo patrefamilias intestato suos hæredes ad successionem vocant Decemviri, iisque non exstantibus

exstantibus agnatos, his verbis: SI INTESTATVS MORITVR, CUI SVVS HÆRES NEC EXTABIT AGNATVS PROXIMVS FAMILIAM HABETO, auctore in fragmentis Vlpiano, tit. 26. Decemuii intestatum appellant, aut qui nullum, aut qui non iure testamentum condidit: I C. verò etiam cum cuius ex testamento hæreditas adita non est. cap. 64. de verb. sig. Et hoc inde potissimum, quòd hæredes, quos suos dicebant, eosdem Decemuii necessarios esse voluerint: siquidem illi siue vellent, siue nollent, tam ab intestato, quàm ex testamento hæredes lege 12. tab. fiebant. §. necessarij. Instit. de hæred. qual. & diff. Passi quoque non sunt Decemuii, scemini sexus necessitudinem ad intestati successionem admitti: adeò vt ne quidem inter matrem & filium filiamve vltro citroque hæreditatis capiendæ ius darent. §. 1. Instit. de s c. Tertull. Sed hæ iuris angustia postea emendatæ sunt. Porro Iulianus legem 12. tab. etiam eum vocare ad hæreditatem auctor est, qui moriente eo de cuius bonis quæritur, in rerum natura fuit. cap. 6. de suis & legit. Quod sanè verissimum mihi videtur, si non ob aliud, certè quia lex suos ad intestati hæreditatem primo gradu vocans, quinam sui dicerentur non exposuit. Et idcirco suos deinde sic interpretati videntur Iureconsulti, vt eorum nomine tam posthumos legè intellexisse, quàm filios familias cõtenderint. Nam posthumos prudentes iuris, alios quidem suos appellasse, alios verò alienos, manifestius est, quàm vt probationibus opus habeat. Nec quidem satis erat, quem suum dici, ad hoc vt posset ad intestati hæreditatem admitti, verùm necessum etiam fuit, vt eo nullus gradu esset proximior. Quemadmodum enim suis deficientibus ad agnatos proximiores, ita iis exstantibus ad suos proximiores hæreditas per-

tinet. c. 1. §. 5. & 6. de suis & legit. Igitur mortuo filio,  
 proximum gradum obtinet nepos, nepote mortuo,  
 pronepos, & ita deinceps. Cæterum si proponamus,  
 ex defuncto, qui duos filios habuerat, superesse filium,  
 & ex altero filios nepotes item duos plurésve, videam-  
 us an pariter nepotes cum patruo ad auitam hære-  
 ditatem admitti debeant. Et debere quidem Caius,  
 Ulpianus, Iustinianusque testatur, negatque patrum,  
 qui gradu proximior est, vltiores, quales hi nepotes  
 sunt, excludere. Et idcirco conueniens esse aiunt, non  
 in capita, sed in stirpes hæreditatem sic diuidi, vt filius  
 partem dimidiam hæreditatis habeat, & ex altero filio  
 duo plurésve nepotes alteram dimidiam. §. cum filius.  
 Inst. de hæred. quæ ab intest. def. lib. poster. inst. Caij  
 tit. 9. & apud Vip. in frag. tit. 26. Idque etiam leg. 12.  
 tab. euidenter caueri, Impp. Diocletianus & Maximia-  
 nus auctores sunt cap. 3. C. de suis & legit. Atque hu-  
 ius quidem iuris non est obscura aut admodum ab-  
 surda ratio, si consideremus patrefamilias mortuo in  
 stirpes siue diuersas familias eius domum discedere.  
 Adeò quidem, vt quòd filij fuerant familias, totidem  
 confestim patresfamilias efficiantur, qui singuli sin-  
 gulas & separatas familias, siue stirpes constituunt. Si  
 igitur patrefamilias mortuo tres superfuerint filij, in  
 stirpes tres familia paterna diuidetur: & quia non plu-  
 ra quàm tria capita sunt, idcirco non in stirpes solum,  
 sed in capita eriscit familia dicitur. Verùm si duo su-  
 persint duntaxat filij familias, & ex tertio nepotes duo  
 plurésve, hic non in capita, sed in stirpes ideò fieri di-  
 uisio debet, quia plura sunt capita quàm stirpes: & in  
 plura capita quàm sunt stirpes familiam huiusmodi  
 discedere, ne natura quidem æquum est. Et quamuis  
 filij nepotibus in paterna successione proximiores esse  
 natura videantur, tamen consideratione quadam stir-  
 pium

pium ciuili proximiores non sunt, & ideò nepotibus non præferuntur. Si nõ ob aliud, certè quod mortuus nõ esse tertius ille filiusfamilias præsumatur, cuius supersunt filij: qui omnes eandẽ, stirpis consideratione, quàm pater sustinuerat, simul induisse personã in auita successione finguntur. Et hæc quidem hæctenus de primo legitimorũ hæredum ordine. De altero, eorum nẽpẽ qui agnati dicuntur, illud dicendum restat, videlicet agnatorũ appellatione cõsanguineos quoque in hac lege contineri: Admonuimus enim aliquando, ab agnatis cõsanguineos separasse Iureconsultos, quos Decẽuiri agnatorũ nomine complexi sunt. Quinã autem agnati sui dicerẽtur, & quis filius dicatur agnatus patri, in eo capite exposuimus, quod de veris agnationũ cognationumque differẽtiis l. 5. Variorum inseruimus. Itaq; si nẽmo suus esset hæres, lege Decẽmuali *ad agnatum proximum* hæreditas intestati deuoluebatur, auctore Iustiniano, & in frag. Vlpian. tit. 26. hoc est, ad cõsanguineum, is enim agnatis reliquis gradu proximior est: sique cõsanguineus non exstaret, ad agnatum post cõsanguineos proximum. Et tunc quidem si plures essent agnati proximiores, non in stirpes, sed in capita hæreditas diuidi solet. Veluti, si sit fratris filius, & alterius fratris duo plurẽsve liberti, quotquot sunt ab vtraque parte personæ tot fiunt portiones, vt singuli singulas capiant. d. tit. 26. Ideò in capita hæreditas hic diuiditur, quia quot sunt capita, tot sunt agnati diuersi: & quot sunt agnati proximi, tot fieri in huiusmodi hæreditatibus portiones solẽt. Ideò non in stirpes, quia fratris filij in patris successione patris sui personam non induunt, quod in auita successione nepotes faciunt, cùm hæreditas in stirpes scinditur. Tunc enim quot filijfamilias, hoc est, quot diuersæ stirpes sint quæritur, quemadmodum  
in

in agnatorum hæreditatibus, quot agnati proximi, id est, quod capita. De libertis autem ecquid in duodecim fuerit, Vlpian. exposuit tit. 27. *Ita demum*, inquit, *lex duodecim tabularum ad hæreditatem liberti vocat patronum, si intestatus mortuus esset libertus, hærede suo nullo relicto.* Idque etiam alio loco idem Vlpianus testatus est c. 3. de suis & legit. Denique ad liberos patronorum hæreditas defuncti liberti ita pertinebat, ut in capita, non in stirpes ea diuideretur, auctore eodem Vlpian. d. titul. 27.

## CAPUT XX.

*De connubio patrum.*

**I**N duodecim tabulis scriptum fuisse, *ne patriciis cum plebeis connubium esset*, non Dionysius solum lib. 11. sed Liuius etiam testatus est libro 4. Auctor est idem Liuius, anno ab vrbe condita 309. M. Genurio, & P. Curiatio, vel (ut alij malunt) C. Curtio c o s s. de connubio patrum & plebis C. Canuleium Tribunum plebis rogationem promulgasse, qua contaminari sanguinem suum patres, confundique iura gentium rebantur. Et refert quidem in eadem oratione Canuleius *ne connubium patribus cum plebe esset, hoc ipsum Decemuiros tulisse, pessimo exemplo publico, cum summa iniuria plebis, nullamque esse maiorem, aut insigniorem contumeliam posse, quam partem ciuitatis velut contaminatam, indignam connubio haberi, idque nihil esse aliud quam exilium intra eadem mœnia, quam relegationem pati.* Sanè idem Liuius ideò *Decemuiros huiusmodi connubium non permisisse ait, ne incerta prole auspicia, qua nemo plebeius habere poterat, turbarentur.* Et quia plebes ad id maximè indignatione exarsit, quod auspicari: tanquam inuisa Diis immortalibus, negaretur posse, certè non ante finis contentionum fuit, quam victi tandem

dem patres, vt de connubio ferretur concessissent. Et tunc quidem lex ista Decemuiralis repudiata subtrahætaque fuit rogatione Tribunitia.

## CAPVT . XXI.

*De diuortiis.*

**C**VM res Romana, regnante Romulo adeò esset valida, vt ea cuilibet ciuitatum finitimarum par esse videretur, sed penuria mulierum hominis duntaxat ætatem duratura: tunc ex consilio patrum Romulus legatos circa vicinas gentes misit, qui societatem connubiumque nouo populo peterent. Et cum nusquam benignè legatio audita esset, ad vim spectare res cœpit: cui tempus locumque aptum vt daret Romulus, ægritudinem animi dissimulans, ludos ex industria parat Neptuno equestri solemnes: *Consualia* vocat. Indici deinde finitimis spectaculum iubet. Vbi spectaculi tempus venit, tum ex composito orta vis: signoque dato iuuentus Romana ad rapiendas iure matrimonij virgines discurrit. Idque testatus est non Liuius solum, sed etiam Tertullianus in lib. aduersus Valentinianos. *Tunc, inquit, illi Sabinas raptas iure matrimonij plaudent.* Et quia feliciter raptus Sabinarum Romulo successerat, ideò ab eodem Rege fuisse arbitrator institutum, vt non vero, sed simulato quodam raptu omnis legitimi connubij ritus perageretur. Quo quidem tempore ea fuisse videtur matrimonij contrahendi ratio, vt vsu quisque virginem ex gremio matris, aut ex proxima necessitudine vi simulata raptam, non aliter suam faceret, quàm Romana pubes Sabinas olim virgines suas vsu fecerunt. Idque omnino mihi visus est voluisse Festus, cum ita scriberet: *Rapi simulatur virgo ex gremio matris, aut si ea non est ex proxi-*

ma necessitudine, cum ad virum trahitur, quod videlicet ea res feliciter Romulo cessit. Rapiundæ autem vi simulata virginis, quinam olim ritus fuerit, eleganter Apulcius exposuit lib. 4. de asino aureo, his verbis: *Tunc me gremio suo mater infelix tolerans, mundo nuptiali decenter ornabat, mellitisque sauiis crebriter ingestis, iam spe futura liberorum votis anxius, propagabat, cum inruptionis subita gladiatorum impetus ad belli faciem sauiens, nudis & incertis mucronibus coruscans, non cadi, nō rapina manus afferunt, sed denso conglobatōque cuneo cubiculum nostrum invadunt protinus, nec vllō de familiaribus nostris repugnante: ac ne tantillum quidem resistente, me miseram, exanimem, sauo pauore trepidam, de medio matris gremio raptuere. Et id quidem illud esse omnino videtur, quod hunc in modum in libro de spectaculis Tertullianus scribit: De hinc Equiria Marti Romulus dixit: quanquam & Consualia Romulo defendunt, quod ea Conso dicauerit Deo, ut volunt, consilij, eius scilicet, quo tunc Sabinarum virginum rapinam militibus suis in matrimonia excogitavit. Probum planè consilium, & nunc quoque apud ipsos Romanos iustum, & licitum, ne dixerim penes Deum. Hæc ille. Ecquid autem hæc verba: Et nunc quoque apud ipsos Romanos iustum, & licitum, aliud significat quæso, quàm in locum veri raptus apud Romanos simulatum quendam raptum in nuptiis surrogatum fuisse? Proinde usu olim uxorem in hunc modum acquiri solitam, eamque antiquissimam fuisse connubij legitimi rationem, dubium non est. Fuit etiam alia contrahendi matrimonij ratio, quæ ut in Top. scribit Boëtius, confarreatio dicebatur, & solis Pontificibus conveniebat, hoc est, ut ego interpretor, per solos Pontifices peragebatur. Qualis autem confarreatio huiusmodi fuerit, euidenter in fragmentis exposuit Vlpian. tit. 9. Farre, inquit, convenitur in manum certis verbis, & testi-*

bus



*bis decem presentibus, & solemnī sacrificio factō, in quo panis quoque farreus adhibetur. Et quia Deos fruge colere, molāque salsa supplicare, & far torrere, Numa primus apud Romanos instituit, auctore Plinio libr. 18. cap. 2. idē certissimum est hanc confarreationem à Romulo institutam non esse. Quid igitur si Numam eius esse auctorem dicamus? Subsisto, nec quicquam definio, quamvis Dionysius libr. 2. referat, Romanos priscos sacras nuptias confarreationem appellasse. Illud interim certissimum est, ante coemptionem in usu confarreationem fuisse. Idque obscurè satis Cicero demonstrat, in ea quam pro Murena scripsit oratione, Iurisconsultos stomachosius, quàm virum constantem deceat exagitans. Ait enim *sacra interire maiores noluisse: Iureconsultorum ingenio senes ad coemptiones faciendas, interimendorum sacrorum causa repertos esse.* Quo in loco dubium non est quin per sacra confarreationem Cicero intellexerit, quam introducta coemptione in desuetudinem sensim abiisse, cum Tacito cōtendit. Nam quòd eo in loco de coemptione illa senserit, qua in manum solet conveniri, argumento sunt hæc eiusdem Ciceronis verba subsequētia: *Vt quia in alicuius libris exempli causa id nomen inuenerant, putarunt omnes mulieres quæ coemptionem facerent, Gaias vocari.* Nam si, quòd Festus Pomp. l. 7. scribit, *Tanaquil uxor Tarquinij Prisci, ut Romam venit Gaia Cæcilia fuerit appellata, tantaque probitatis habita, ut id nomen boni omnis causa frequentarent nubentes, videlicet ut Plutarch. ait, hunc in modum: Vbitu Caius ego Gaia: certè quod Cic. de Gaia dixit, id à Gaia Cæcilia originem trahere, & per consequens ad coemptionem illam, qua in manum convenitur, pertinere, dubium non est. Cum igitur sacra dixisset Cicero maiores interire noluisse, haud dubiè per sacra, confarreationis vinculum,**

*qua*

quo nihil in omnibus sacris quicquam, auctore Plinio, fuit religiosius, intellexit. Non enim puto quenquam tam stolido hebetique ingenio esse, ut existimet Ciceronem contendisse, Iurisconsultorum ingenio omnia sacra esse, interempta. Quod autem idem Cicero, senes repositos esse ad coemptiones faciendas ait, illud eo referri debere, ut in coemptionibus non iis solum quibus in manum conuenitur, sed omnibus etiam quibus venale quid proscribitur, senes adhibiti fuisse videantur, aperte demonstrat M. Curius, Ciceroni hunc in modum scribens: *Ergo fructus est tuus, mancipium illius: quod quidem si inter senes coemptionales venale proscripseris, egerit non multum.* Exstat hæc epistola apud Ciceronem lib. 7. epistol. famil. Proinde rectissime in Ciceronis Top. adnotasse mihi videtur Boëtius, tribus modis uxorem haberi, usu, farre, coemptione. Idque etiam aduersus gentes libr. 4. testatus est Arnobius: *Uxores, inquit, Di habent atque in coniugalia fœdera conditionibus veniunt ante quæsitis: usu farre, coemptione, genialis lectuli sacramenta conducunt: habent speratas, habent pactas, habent interpositis stipulationibus sponsas.* Et quia raptus ille simulatus, de quo ex Apuleio, Tertulliano, & Festo, disseruimus, nec confarreationi, neque coemptioni conuenit, idcirco illum rectissime ad eam vxorum speciem retulisse mihi videor, quæ usu habebantur. Ut igitur usu vxor solemnitatibus certis capiebatur, sic confarreatio, & coemptio suas etiam solemnitates habuerunt. *Coemptio ita peragebatur, inquit Boëtius, ut in coemendo se inuicem interrogarent: Viri ita: An sibi mulier materfamilias esse vellet. Illa respondebat, Velle. Item mulier interrogabat: An vir sibi paterfamilias esse vellet, ille respondebat, Velle. Eratque mulier materfamilias viro, loco filia.* Et fuit sanè tanta coemptionis istiusmodi apud veteres auctoritas,

tas, vt per coemptionem facto matrimonio, vir & vxor sibi inuicem succederent. Idque in illud Virgilij, *Externusque in regnū queritur heres*, Seruium Honoratum adnotasse Concius obseruauit. Vlpiani etiam testimonio idipsum confirmatur, qui in frag. tit. 22. ita scribit: *Sui autem haredes sunt, liberi quos in potestate habemus, tam naturales quàm adoptiui: item vxor que in manu est, & nurus, que in manu est filij, quem in potestate habemus.* Sed id quidem verum erat, diligenterq; obseruabatur, si omnium tutorū consensu, mulier coemptione in mariti manum conuenerat. Nam si vel tutoris vnius in coemptione deesset auctoritas, ius successionis huiusmodi cessabat. Idque euidentissimè pro L. Flacco docuit M. Cicero. Quum enim eo nomine L. Flaccus esset accusatus, quod eius sorore Valeria intestato mortua, sic eam rem Flaccus egerat, quasi ad ipsum hareditas pertineret, quum contra certum esset eam iure coemptionis ad Andronem Sestilium Valeriæ maritū, omnino deuolutam esse: alia quidē ratione nulla Flaccum excusauit. Cicero, quā quod esset sine Flacci, qui tutor erat, cōsensu peracta coemptio. Verba Ciceronis hæc sunt: *At enim Androni Sestilio grauis iniuria facta est, & non ferenda, quod quum esset vxor Valeria intestata mortua, sic egit eam rem Flaccus, quasi ad ipsum hareditas pertineret. In quo quid reprehendas scire cupio: quod falsum intenderit, qui doces? Ingenua, inquit, fuit. O peritum iuris hominem! Quid? ab ingenuis mulieribus hareditates lege non veniunt? In manum, inquit, conuenerat. Nunc audio: sed quero, virum vsu, an coemptione? vsu non potuit: nihil enim potest de tutela legitima sine omnium tutorum auctoritate diminui. Coemptione? omnibus ergo auctoribus: in quibus certè Flaccum fuisse non dices.* Hæc Cicero. Diximus quibus olim modis contrahi, nunc videndum quibus dissolui connubium soleat.

F

leat.

leat. Et quidem vſu vxor, vſurpatione vxor eſſe deſinit: conſarreatio, vt diſſarreatione, ſic coemptio remancipatione diſſoluebatur. Quæ vſu vxor erat, antequam eſſet vſucapta, ſi trinoctium à viro vſurpandi cauſſa abſuiſſet, lege duodecim tabularum vſurpata dicebatur. Vſurpatione vſucapionis interruptionem ſignificat, non vi quidem & proprietate verbi, ſed per conſequētiam. Si enim id quod poſſideo, necdum tamen vſucepi, ab aliquo ſolenniter vſurpetur, ſiue apprehendatur, is ſi eius rei dominus eſt, poſſeſſionem meam ſua vſurpatione interrumpit. Quia igitur mulieres in poteſtate aut mariti, aut parentum, vel tutorum erant perpetua, idcirco vſu vxor nondum vſucapta, ante annū à marito diſcedens, *vſurpabatur*, hoc eſt, à parentibus, aut ſi illi non eſſent, à tutoribus ſolenni quadam ratione apprehendebatur, & mariti poteſtate liberabatur, ſi ab eo trinoctium abſuiſſet. Et hoc indè potiſſimum, quod in veri locum, ſimulatus ille raptus, quo vſu vxores habebantur, ſucceſſerat. Quemadmodum igitur Sabinæ virgines, quæ domum raptoribus inſciis fugiebant, *vſurpabantur*, hoc eſt, ab iis apprehendebantur, quorum antea in poteſtate fuerant: ſic vſu vxor ſtatim quum à viro trinoctium abſuiſſet, vſurpandi gratia, vſurpata dicebatur. Itæ enim eſſe accipiendum non dubito, quod ex Q. Mutio de vxore, quæ per trinoctium à viro abſuerat, lege 12. tab. vſurpata Gellius lib. 3. cap. 2. & Macrobius lib. 1. c. 3. tradiderunt. Idque non intellexiſſe viſus eſt, quiſquis ille fuerit, qui Gellium ſuis propriis, & ſatis interdum friuolus, ſingulorum capitum argumentis illuſtrare conatus eſt. Porro conſarreatione matrimonium contractum diſſarreatione diſſolui ſolitum Feſtus obſervauit, qui *diſſarreationem genus fuiſſe ait ſacrificij, quo inter virum & mulierē fiebat diſſolutio*, idcirco ſic appellatam, quia

quia fiebat farreo libo adhibito. Et ita quæ *farreo libo*, hoc est confarreatione facta erat in manus conuentio, eadem *farreo libo*, id est, diffarreatione dirimebatur. Et quia nihil tam naturale est, quàm vnumquodque eo modo dissolui quo ligatum est, ideo etiam non vsus vsurpatione tantum, non confarreatio diffarreatione dyntaxat, sed & coemptio dissolui remanipatione sollet. Testis est enim idem Festus, *remancipatam Gallum Alium eam defininisse, quæ mancipata sit ab eo, cui in manum conuenerat*. In coemptione autem quandam quasi in manus traditionem interuenire solitam, testatur expressè Symmachus, hunc in modum de Fulvio quodam scribens lib. 2. epist. *Sororem Pompeiam olim viro maturam, te auspice in manus optat accipere, nec genere minor, & re fortassis vberior*. Huc spectat quoque Terentij illud in Andria:

*Hanc mihi in manum dat, mors continuo ipsam occupat*, Igitur quæ coemptione in contrahendo matrimonio mulier mariti in manum tradebatur, eadem illa in dissoluendo *remācipabatur*, hoc est, manu ab eo reddebatur, in cuius manum conuenerat. His ita expositis, videamus ecquid de diuortiis amplius in duodecim fuerit. Cuiacius se primùm ait obseruasse, diuortia fieri ex duodecim tab. auctoresque laudat Caium capen. Ad L. Iul. de adult. & Ciceronem in 2. Philip. *Mimam illam, inquit Cicero, suam res suas sibi habere iussit ex 12. tab. clauas ademit, exegit*. Sanè consuetudinem fuisse scribit Festus, mulieribus donare *clauim ob significandam partus facilitatem*. Igitur mulieri quæ data fuerat in contrahendo clauis, eam adimi in dissoluendo matrimonio, Decemuiro voluisse visi sunt,

## CAPVT XXII.

*De tigno iuncto.*

**L**EGEM de tigno iuncto Decemviralem, his conceptam verbis fuisse, vir ille eruditissimus observauit, qui primus Festum temporis iniuria deprauatissimum, integritati summa diligentia conatus est restituere: TIGNVM IUNCTVM ÆDIBVS, VINÆATQVE, ET CAPVLO NE SOLVITO. De qua lege sic scribit Vlpianus: *Lex duodecim tab. neque soluere permittit tignum furtiuum adibus iunctum, neque vindicare. Quod prouidenter lex efficit, ne vel adificia sub hoc prætextu diruantur, vel vinearum cultura turbetur: sed in eum qui est conuictus iunxisse, in duplum dat actionem, cap. 1. de tigno iuncto.* Lex igitur 12. tab. non permittit ad hoc soluere furtiuum tignum adibus iunctum, vt possit solutum vindicari. Sic enim hæc Vlpiani verba esse accipienda Paulus me docuit, qui *de tigno adibus iuncto, ad exhibendum idè agi non posse contendit, quia lex duodecim tabularum illud solui vetat, cap. 6. Ad exhib. Et siquidem qui vindicare non potest, utique nec ad exhibendum agere permittitur, hoc est, vt Vlpianus sentire videtur, ad soluendum tignum adibus iunctum experiri: non est enim alius huiusmodi ad exhibendum actionis effectus. Rursus idem Paulus tignum adibus iunctum posse vindicari, idque Decemviris etiam non ignorasse alio loco testatus est, cap. 98. in fi. de solut. Et hoc nunc etiam verum esse idem Paulus ait, cum aduersus eum est actio, qui sciens alienum adibus suis tignum iunxit. cap. 18. §. tignum, de rei vind. Igitur ad exhibendum agitur de tigno iuncto interdum inutiliter: agi quoq; interdum potest vtiliter. Inutiliter quidem quum aduersus eum experimur, qui ignorans alienum iunxit.*



iunxit. Ideò enim inutilis est hæc actio, quia id quod iunctum est, aliter vindicari non potest, quàm si solum fuerit. Qui igitur ad exhibendum aduersus eum experitur, qui ignorans iunxit, utriusque hoc videtur intendere, ut quod iunctum est, dissoluatur, & dissolutum exhibeatur. Lex autem vetat dissolui: igitur inutilis est hoc casu ad exhibendum actio. d. cap. 6. & cap. 7. §. cum in suo. de acq. rer. domin. Aliud autem est, si aduersus eum sit actio, qui sciens alienum iunxit. Tunc enim rectè ad exhibendum agitur, d. §. tignum. Non ita quidem, ut quod iunctum est dissoluatur: id enim fieri non potest, quia id fieri lex vetuit: verùm ita, ut eum qui iunxit sic conveniamus, quasi dolo malo fecerit, quò minùs possideat, auctore Vlpiano cap. 1. de rig. iuncto. Igitur quæ ipso iure ad exhibendum actio propter Decemviralem hanc legem inutilis est, eadem illa utilis ex scientia, eiusque qui iunxit mala fide, efficitur replicationis auxilio. Itaque si tignum meum petam exhiberi, quod ædibus tuis iunxisti, & tu dixeris illud te non possidere, nimirum propter mutatum habitum, iam si bona fide iunxeris, evanescit ipso iure proposita ad exhibendum actio: sin verò scientiam tuam culpam, teque non possidere quidem, sed dolo malo fecisse, quò minùs possideres contendam, utilis efficitur huiusmodi replicationis auxilio, quæ antea ipso iure nulla erat, ad exhibendum actio: qua quanti inter sit mea tignū iunctum non fuisse fortasse consequar. c. 3. §. sciendū est autem. & §. ibidem. vers. de quibusdam. Ad exhib. c. 18. in princ. de dol. mal. Et ita conciliandos esse illos prudentes iuris non dubito, qui de tigno iuncto nonnullas scripsisse antinomias existimantur. Ceterum vindicari tignum aliter non potuit, quàm si solum esset. Quæ enim iuncta sunt ædibus, separata duntaxat dominum vindicare posse Vlpianus

restatur, c. 7. de except. rei iud. Idque Decemuiros non ignorasse etiam Paulus admonuit, quamvis interim illa solui, iidem Decemuiri prohiberent c. 98. in fin. de solut. Eoque mihi etiam visus est Vlpianus respexisse, quum ita scriberet: *Sed si proponamus tigni furtivi nomine adibus iuncti actum, deliberari poterit an extrinsecus sit rei vindicatio: & esse non dubito*, cap. 2. de tigno iuncto. Sensus enim est, si tigni iuncti nomine sit actum, legis de tigno iuncto actione, an & eadem quoque actione possit tignum quod iunctum non est peti, an verò separarim debeat vindicari? Et extrinsecus quidem vindicationem esse definit Vlpianus. Ea autem extrinsecus vindicantur, quæ adibus non inhærent. Idque Ciceronis auctoritate confirmatur, qui sic de Orat. scribit: *Extrinsecus autem assumuntur, cum ea qua sunt foris, neque inherent, in rei natura colliguntur*. Huic adde illud eiusdem de Finib. *Et nunc quidem quod vitem tuetur, est id extrinsecus*, id est, non in ipsa vite. Ex quibus locis perspicuum satis est, quæ tigna adibus non inhærent, siue soluta, siue nondum iuncta fuerint, ea rectè dici extrinsecus vindicari, d. cap. 2. Tignum igitur aliud quàm quod solutum, aut necdum iunctum est, vindicari nullum potest. Legis autem actio de tigno iuncto, in duplum competit. Videamus quid appellatione tigni in hac lege contineatur. Quidam vir eruditus, tigni appellatione in hac lege, ea duntaxat tigna contineri sustinet, quibus ædes ruinosa fulciuntur. Id si verum est stupiditatis igitur legis huius interpretes Caius, Paulus, & Vlpianus insimulentur, qui non tigni solum, sed etiam huius tigni, cuius in hac lege mentio fit, appellatione omnem materiam significari tradiderunt, ex quæ ædificia fiunt, ædificia constant, non autem fulciuntur, d. cap. 62. d. cap. 7. & cap. 7. §. appellatione, de acquirend. rer. domin.

Quid?



Quid? anne tigni vocabulo in hac lege regulam, lapidem, testam immò calcem & arenam, ceteraque si qua ædificiis sunt vtilia, contineri scripsit Vlpianus c. i. de tig. iuncto. Profectò puerilis est error, & non ferendus, si quis hæc omnia duntaxat fulciendis ædibus ruinosis dixerit accommodari. Quòd si me rogites, cur Decemuiri contrarium ius in ædibus & in nauibus statuerint, negabo quicquam de nauibus Decemuiros iuris constituisse, sed de tigno duntaxat ædibus, vineis, & capulis iuncto. Quod ius si Decemuiri non scripsissent, fortè dubium non esset, quin quod in nauibus æquum prudentibus visum est, idem in ædibus quoque, in vineis, & capulis obseruaretur. Cur autem passi non sint Decemuiri tignum ædibus, vineis, & capulis iunctum dissolui, hæc ab Vlpiano prodita est ratio, ne videlicet sub hoc prætextu ædificia diruantur, vel vinearum cultura turbetur, dict. cap. i. Et quia capulum illud esse scribit Festus, quo mortui efferuntur, profectò mirum non est, capulum ex alieno tigno factum dissolui non magis potuisse, quàm tignum ædibus, aut vineæ iunctum: fortassis ne funus impediat, quod exultatione in ius vocato iustam & idoneam tribuit: neue iusta hominis mortui turbentur. Animaduerti mortuorum cadauera, aut vnco trahi, aut efferri capulo consueuisse. Et eorum quidem quibus iusta fieri poterat cadauera, solenni pompa capulo ad rogam efferebantur: aliorum verò quibus lege iusta fieri erat prohibitum, quod improbi ac nefarii iudicarentur, vnco trahebantur: quique trahebant, *Hamotrahones* dicebantur, auctore Festo. Quo spectat illud Seneca, epist. lib. i. 4. epist. 93. *Non conteret, inquit, me nec vnCUS nec proiecti ad contumeliam cadaueris laceratio, fœda visuris.* Eoque etiã respexisse visus est idem Seneca, de Ira lib. 3. vbi sic de Ira eiusque apparatu loquitur:

*Ostendenda est rabies eius effrenata & attonita, apparatusque illi reddendus est suus, eculans, & fidicula, & ergastula, & cruces, & circumdati defossis corporibus ignes, & cadavera quoque trahens uncus, varia vinculorum genera, lacerationes membrorum, inscriptiones frontis, & bestiarum immanium caverna.* Nec aliò quidem referendum videtur, quod nulla homini fulminibus occiso fieri iusta potuisse testatus est libr. 13. Pompeius Festus: *Homo*, inquit; *si fulmine occisus est, ei iusta nulla fieri oportet.* & ait, *Hominem fulminibus occisum supra genua tolli vetuisse his verbis Numam Pompilium: si hominem fulminibus occisit, ne supra genua tollito.* Credebantur enim huiusmodi homines ira quâdam vindictaque diuina è medio tolli, & idcirco nulla parentatione digni. Igitur homo fulmine occisus supra genua tolli, idcirco non potuisse videtur, quia ei iusta fieri nulla poterant. Opinor quod hi duntaxat supra genua tollerentur, quibus iusta fieri poterant: reliqui verò supra genua non tollerentur. Et hoc indè potissimum, quòd qui capulo efferebantur, non capulo humeris, ut apud nos moris est, imposito efferri soleant, sed in eam, ni fallor, altitudinem à terra capulo leuabantur, ut supra genua duntaxat tollerentur. Quia igitur occiso fulminibus homini iusta fieri nulla poterant, certissimum est, ideò etiam noluisse eum supra genua tolli Pompilium; siquidem qui supra genua tollebantur capulo efferebantur. Et quia hi solum capulo efferri poterant, quibus fieri iusta permissum erat, rectè hinc tatiocinabimur, capulo propterea homines fulminibus occisos non elatos, nec per consequens supra genua sublato, sed unco velut sceleratos homines & impios tractos fuisse. Quid autem, si per capulum non id solum quo mortui efferuntur, sed etiam ipsum sepulchrum

AD LEG. XII. TAB. CAP. XXIII. 89  
 pulchrum intellexerimus: Nihil esse quod reprehendi  
 possit, existimo. Antiquos enim sarcophagum etiam  
 capulum, appellasse, præter Nonium Marcellum te-  
 statur Apuleius lib. 10. de asino aureo: *Ecce, inquit, pa-  
 ter suus, ipse manibus cooperculo capuli remoto commodum  
 discusso mortifero sopore, surgentem postliminio mortis de-  
 prehendit filium.* Eoque sensu capulum accepisse visus  
 est etiam Tertull. in libro de carnis resurrect. *Deus ve-  
 rò, inquit, anima sua umbram, spiritus sui auram, oris sui  
 operam, vilissimo alicui commiserit capulo?* Aut igitur per  
 capulum, id quo mortui efferuntur, cum Festo intelli-  
 ges, aut certè cum Non. Marcello ipsum sepulchrum  
 ex alieno tigno factum.

## CAPUT XXIII.

*De frugum excantationibus.*

**I**N hoc Deceimuiros reprehendit Seneca, libr. 4. na-  
 turalium quæstionum, capite 7. quod illi cantibus  
 attrahi imbres, & repelli crediderint. *At Cleone, inquit,  
 iudicia reddebant, in illos, quibus delegata erat cura proui-  
 denda tempestatis, quod negligentia eorum vinea vapulas-  
 sent, aut segetes procidissent. Et apud nos in duodecim tabul.  
 cauetur, ne quis alienos fructus excantassit. Rudis adhuc  
 antiquitas credebat & attrahi imbres cantibus, & repelli:  
 quorum nihil posse fieri tam palam est, ut huius rei causa  
 nullius Philosophi schola intranda sit. Hactenus Seneca.  
 Esse autem in duodecim Tab. legem, qua fruges ve-  
 tantur excantari, nõ Seneca dūtaxat, sed & Plin. quo-  
 que l. 28. c. 7. his verbis expressè testatus est: *quin etiam  
 & legum ipsarum in duodecim Tab. verba sunt, QVI  
 FRUGES EXCANTASSIT. & alibi, QVI MA-  
 LVM CARMEN INCANTASSIT.* Atque huius  
 quidem legis in 1. apologia meminit etiam Apul. &*

F s

qua

qua ratione fruges soleant excantari elegantér hunc in modum docet: *Magia istares est delegata legibus iam inde antiquis x i i. Tabul. propter incredundas frugum illecebras interdicta.* Igitur & occulta, non minus quàm terra, & horribilis, plerunque noctibus vigilata, & tenebris obstrusa, & arbitris solitaria, & carminibus murmurata, cui non modò seruorum, verumetiam liberorum pauci adhibentur. Prohibuerunt igitur Decemuiri fruges excantari, *cumque qui fruges excantasset, Cereri sacrum esse, eosdem Decemuiros voluisse*, auctor est in Virg. Seruius.

## CAPVT XXIV.

*De damno dato.*

**V**IDETVR in duodecim Tabulis scriptum fuisse, *SI RVPITIAS, SARCITO.* *Rupitias* enim in duodecim damnum dederis, & *sarcito* damnum soluto, significare, ex Seruio Sulpitio adnotauit Festus. Igitur Decemuiri damnum non iniuria, sed negligentia datum *sarciri*, hoc est, solui, siue præstari duntaxat, sine castigatione aliqua voluerunt, capit. 9. de incend. ruin. naufrag. Cæterum qui ædes acruumve frumenti iuxta domum positum sciens prudens combussit, is vinctus, verberatus, igni necari lege Decemuirali iubetur. d. cap. 9. quem postea, si humiliori loco esset, bestiis obiectum; sin verò in aliquo gradu, capite punitum, aut in insulam deportatum fuisse, Vlpianus testatur cap. vltim. d. tit. *Incendium autem nullum sine culpa fieri posse*, hoc est, sine negligentia, Alphenus notat, cap. 11 de per. & com. rei vend. Et ob id ex incendio culpa factò, si quidem ea latior esset, de damno iniuria dato, ex lege Aquilia; sin leuior, ex duodecim tabulis agi solet, cap. 1. Ad l. Aquil.

His

His adde, si quadrupes pauperiem fecerit, etiam ex lege duodecim tabularum actionem sic descendere, ut eadem lege aut dari id quod nocuit, id est, animal quod noxiam commisit, aut aestimationem noxiae offerri necessum fuerit, capite 1. Si quadr. paup. feciss. dic. Fuisse denique in duodecim tabulis de servorum noxiis aliquid cautum, indicat Iustinianus in §. Sunt autem. Instit. de noxal. act. Scribit etiam Vlpianus, *si servus sciente domino furtum fecit, vel aliam noxam commisit, servi nomine ex duodecim tabulis actionem esse noxalem, nec dominum suo nomine teneri.* capit. 2. de noxal. act.

## CAPUT XXV.

*De iniuriis, & famosis libellis.*

GELLIVS auctor est, libr. 20. cap. 1. in duodecim de iniuria punienda sic scriptum fuisse: **SI INIURIAM ALTERI FAXIT, VIGINTIQUINQUE AERIS POENAE SVNTO.** Quam legem Sextus Cecilius, & Sextus Pompeius Festus sic interpretati sunt, ut per viginti quinque aeris poenas, intellexerint viginti quinque asses Scribit idem Gellius, *Lucium quendam Neratium hominem egregie improbum, & immani vecordia, pro delectamento habuisse, os hominis liberi manus suae palma verberare, & quemcunque depalmauerat, ei statim numerari secundum duodecim tabulas quinque & viginti asses iussisse. Propterea, inquit, Praetores poenam hanc obsolescere, & relinquere censuerunt, iniuriisque aestimandis recuperatores se daturos edixerunt. Caterum de membro rupto sic Decemviri scripserunt, apud eundem Gellium legimus: Si membrum ruptum meum, è pacto talio esto. Sed caput istud mendosum esse, quis est qui non videat? Illud iam pridem*  
Iacobus

Iacobus Cuiacius observavit sic esse restituendum:

SI MEMBRVM RVPIT, NI CVM EO PACIT, TALIO ESTO. Elegās restitutio. Quis enim non videat, ex his duabus dictionibus *ni cum*, conflatum fuisse illud *meum*, quod in vulgari editione passim exstat? Talionis, inquit Festus novissimè restitutus, mentionem fieri in duodecim ait Verrius, hoc modo: *Si membrum rupit, ni cum eo pacit, talio esto.* neque id quid significet indicat, puto quia notum est: permittit enim lex parem vindictam. Hūc spectat illud Senecæ de Ira lib. 2. cap. 32. *Inhumanum verbum est, & quidem pro iusto receptum, ultio & talio, non multum differt nisi ordine.* Porro propter os fractum, non talionis, sed nummarias pœnas fuisse in duodecim constitutas, Gellius & Iustinianus consentiunt. Nunc antequam ad legem de famosis libellis Decemviralem veniam, exponendum est, ecquid de arboribus furtim cæsis statuerint Decemviri. Plinius libro 17. cap. 1. cautum fuisse duodecim tabulis ait, *ut qui iniuria cecidisset alienas arbores, lueret in singulas pœnas eris vigintiquinque.* Sic enim legendum est apud Plinium, non ut passim legitur, *Lucret in singulas eris vigintiquinque.* Sed quæadmodum in aliis iniuriis, ita & hic à Prætoribus alia pœna statuta fuit, ad quam pœnalis in duplum actio arborum furtim casarum est introducta. cap. 8. Arbor. furt. cæsar. His addendum est, quod de frugibus aratro quæsitis, hunc in modum idem Plinius scribit, libr. 18. cap. 3. *Frugem. inquit, aratro quæsitam, nocte passisse & secuisse, puberi duodecim tabulis capitale erat, suspensumque Cereri necari iubebant, gravius quàm in homicidio convictum: impuberem Prætoris arbitratu verberari, noxiæmve duplionemve decerni.* Quo in loco pro *noxiæmve duplionemve decerni.* legendum mihi videtur, *noxiæmve duplione decerni.* Nam cum sola noxia decernitur,

nitur. nihil de pœna statuitur, cùm duplio noxia præstari iubetur, & simul pœna decernitur, Balduinus noster antiquitatum illustrator vigilantissimus, de famosis libellis tam scripsit accuratè, ut non magnoperè hîc esse mihi laborandum putem. Ait Ciceronem libr. 4. de Repub. sic scripsisse : *Nostra contra duodecim tabula cùm per paucas res capite sanxisset, in his hanc quoque sancientiam putauerunt : si quis occentassit, actitassit, siue carmen condidisset, quod infamiam faceret, flagitiumque alteri præcaretur.* Ex quo loco dubium non est, quin libelli famosi pœna capitalis fuerit, hoc est, supremi supplicij. Nam quod quidam ait, capitis pœnam non mortem tantum, verum etiam statum & dignitatem respicere, id certè ad rem non pertinet. Decemviorum siquidem temporibus nulla erat relegatio, nulla proscriptio, nulla deportatio, & idcirco qui capitis damnabatur, ad mortem condonari debebat. Igitur hanc infamiam summo supplicio vindicasse videntur Decemviri. Nec moueor auctoritate Vlpiani, quem audio cap. 5. de iniuriis tradidisse, eos qui famosum carmen, libellòsue famosos scribunt, ex lege intestabiles esse. Illud enim non ad Decemviralem legem, sed ad quoddam SC. spectat, cuius idem Vlpianus alio loco meminit : *Si quis, inquit, ob carmen famosum damnetur, SC. expressum est, ut intestabilis sit.* cap. 18. de test. Et eò quidem referendum videtur, quod hunc in modum Arnobius scribit aduersus gentes libr. 4. *Carmen mælum conscribere, quo fama alterius coinquinetur & vita, Decemviralibus scitis euadere noluisse impunè : ac ne vestras aures conuiusio aliquis petulantiore pulsaret, de atrocibus formulas constituistis iniuriis.* Verba legis 12. tab. de famosis libellis, sic esse restituenda obseruaui : **SI QVIS OCCENTASSIT, ACTITASSIT, SIUE CARMEN CONDIDISSIT, QVOD INFAMIAM**

FAMIAM

FAMIAM FACERET, FLAGITIVMVE ALTERI PRECARETVR, CAPITE POENAS LVITO. *Occentassint antiqui dicebant, inquit Festus, quod nunc conuicium fecerint, dicimus: quod id clarè & quodam canore fit, vt procul exaudiri possit: quod turpe habetur, quia non sine causa fieri putatur.* Et hæc mihi sufficere videntur, ad interpretationem legum Decemviralium quæ de iniuriis latæ sunt.

## CAPVT XXVI.

## De furtis.

**D**ECMVIRI tres furtorum species constituunt, *manifestum, nec manifestum, conceptum*: addere Prætores quartam, eamque *oblatum* nominant. Decemviri furem qui manifesto furto prehensus esset, occidi tunc permiserunt: si quum faceret furtum, nox esset, aut interdiu se telo cum prehenderetur, defenderet. Et cæteris autem manifestis furibus, liberos verberari, addicique iusserunt ei, cui factum furtum esset, si modò id luci fecissent, neque se telo defendissent: seruos item furti manifesti prehenso, verberibus affici, & è saxo præcipitari: sed pueros impuberes Prætoris arbitratu verberari voluerunt, noxamque ab his factam sarciri. Aliis deinde furtis omnibus, quæ nec manifesta appellantur, pœnam imposuerunt dupli. Hæc disserit eleganter Gellius noctium Atticarum libr. I I. cap. 18. Et Macrobius lib. I. Saturn. hanc legis Decemviralis referens particulam, **SI NOX FVRTVM FAXIT, ET IM ALIQVIPS OCCISIT, IVRE CÆSVS ESTO**, notandum esse ait, Decemuiros nox pro noctu, & im pro cum posuisse. *Furtum autem conceptum, ac si manifestum foret, Decemuiros etiam vindicasse, idem Gellius auctor est. Ea quoque*



quoque furtum, inquit, quæ per lancem liciumque concepta essent perinde ac si manifesta forent, vindicauerunt. Quo quidem in loco nihil esse aliud furtum per lancem & licium conceptum suspicor, quàm illud furtum, quod conceptum simpliciter à prudentibus iuris est appellatum. Lance, inquit Festus, & licio, apud antiquos dicebatur, quia qui furtum ibat querere in domo aliena, licio cinctus intrabat, lancemque ante oculos tenebat, propter matrum familie aut virginum presentiam. Vnde manifestum satis est, lancem liciumque nihil aut adiecisse, aut substantiæ concepti furti detraxisse, sed nudam duntaxat furti inuestigandi rationem denotasse. Moris enim Decemviorum temporibus fuisse videtur, ut si quis in alicuius ædibus furtum vellet querere, illud faceret nudus, licio cinctus, & lancem ante oculos tenens, iuratusque Deos legum custodes, sese reperiendi spe furtum querere. Et tunc quidem alter ille apud quem furtum quærebatur, domum suam ei qui furtum quærebat aperire, & in obsignatis, & non obsignatis locis liberam furti inquirendi potestatem facere cogebatur. Quem morem primum à Græcis usurpatum, deinde in Romanam Rempub. olim inuentum fuisse, si quis fortè satis sibi non persuaserit, inueniet Platonis de legibus librum duodecimum: in quo id ita perspicuè traditur, ut omnè auctor diuinus cum Festo, Gellio, aliisque Latinis auctoribus collatus, dubitationis mihi scrupulum penitus exemerit. Igitur si conceptum furtum aliud nullum dici possit, quàm furtum quæsitum & inuentum, auctore Paulo, Sententiarum libro secundo tit. 31. & Iustiniano, in §. conceptum, Iustinian. de obligat. quæ ex del. nas. consequi rectè videtur, aliud quoque nullum dici posse furtum per lancem & licium conceptum, quàm furtum per lancem & licium quæsitum & inuentum. Et quia nulla temporibus

poribus Decemviorum furta quæri sine lance & licio in domo aliena poterant, ideò quoque nulla fuisset iisdem temporibus videntur concepta furta, quæ non per lancem & liciu concepta dicerentur. *At posteaquam furtorum quæstiones, hoc est, inquisitiones cum lance & licio evanuisse, ut est apud Gellium libro 16. cap. 10. tunc furta, quæ per lancem & liciu concepta dicebantur, appellari concepta simpliciter cœperunt.* Et ita quidem amplius nihil in effectu furti nomine per lancem & liciu concepti Decemviri sunt complexi, quàm Prætores & Iurisconsulti per furtum conceptum intellexerunt. Idque mirum in modum confirmat idem Gellius. Cùm enim à lege Decemvirali discessum esse, & ex manifesto furto actionem in quadruplum competere demonstrasset, hæc verba subiecit. *Furti concepti, item oblati, tripli pœna est.* Quibus haud dubiè aliud nihil voluisse visus est, quam sicut manifesti furti in quadruplum, sic furti concepti pœnam Decemviralem in triplum conuersam à Prætoribus fuisse. An autem in duodecim, de eo cuius ope, consilio, furtum factum esset, quicquam fuerit definitum, nihil certi existimo affirmari posse. Nam quòd Festus, docens nec, pro non, veteres dixisse, in duodecim scriptum esse ait, *si adierit furto quòd nec manifestum erit*: illud mendosum esse indicant veteres libri, quibus in Festo restituendo Anton. Augustinus usus est. In iis enim pro *aderit*, fuisse videtur scriptum *adorat*. Et quia *adorare* pro *agere*, interdum antiquos posuisse Festus testatur libro 1. idcirco sic hanc legis apud eundem Festum particulam esse restituendam existimaui: *SI ADORAT FURTUM QVOD NEC MANIFESTVM ESIT, DVPLIONEM LVITO*: & sic intelligendam, ut qui furtum nec manifestum fecisset, duplo mulctaretur. Usus in eadem

dem significatione verbo adorare videtur in Octauio Minutius Felix: *At enim, inquit, nos exequias adoramus, eadem tranquillitate qua viuimus: hoc est, exequias facimus, celebramus, eadem qui viuimus tranquillitate.* Et hæc de furtis, de quibus pacisci Decemuiros etiam permisisse, passim traditum est.

## CAP V T XXVII.

*De publicis iudiciis & capitalibus.*

**E** S S E in duodecim Tabulis de capite Romani ciuis ita scriptum, **DE CAPIT E CIVIS NISI PER MAXIMVM COMITIATVM NE FERVNT O**, Cic. lib. 3. de leg. auctor est. Qua quidem lege ante Decemuiroꝝ tempora vixdum in prouocatione vsi videntur Romani. Tunc enim horridi criminis legem in vsu fuisse huiusmodi Liuius testatur lib. 1. **D V V M V I R I P E R D V E L L I O N E M I V D I C E N T. S I A D V V M V I R I S P R O V O C A R I T P R O V O C A T I O N E C E R T A T O. S I V I N C E N T, C A P V T O B N V B I T O, I N F E L I C I R E S T E S V S P E N D I T O, V E R B E R A T O, V E L I N T R A P O M E R I V M, V E L E X T R A P O M E R I V M.** Secundum quam legem, ait idem Liuius, *Tullum Hostilium Duumuiros, qui Horatio perduellionem iudicarent fecisse: & alterum ex Duumuiris in condemnando hac formula vsum esse: Publi Horati tibi perduellionem iudico: Lictor colliga manus. Cumque Horatius prouocasset, de prouocatione statim certatum ad populum fuisse.* Quid autem sit perduellionem alicui iudicare, quid item perduellionis reum fieri, quia id ignorari video, paucis hinc exponam. Et animaduerti quidem à viro quodam, vt mea opinio fert, nostrorum iurisperitorum longè ingeniosissimo, atque exercitatissimo, Liuium esse reprehensum in hoc,

G                      quod

quod ille nefarium illud Publij Horatij, qui propriam sororem interemerat, scelus perduellionem appellauerit. Sed quia aliud est, perduellionem alicui iudicare, aliud perduellionis accusare: sic Liuium esse defendendum puto, vt dixerit expresse Duumuiros non perduellionis Horatium reum fecisse, aut condemnasse, sed Publio Horatio perduellionem iudicasse. Sanè ad legem 12. tab. libro secundo scribit Calus, quos *hostes nos dicimus, eos veteres perduelles appellasse, per eam adiectionem indicantes cum quibus bellum esset*, cap. 234. de verb. sign. Idque etiam Varro de lingua Latina lib. 4. & Festus libro 8. de verborum significatione testati sunt. *Multa verba*, inquit Varro, *aliud nunc ostendunt, aliud ante significabant: vt hostis. Nam tum eo verbo dicebant peregrinum, qui suis legibus uteretur: nunc dicunt eum, quem tunc dicebant perduellem.* Et Festus: *Hostis*, inquit, *apud antiquos peregrinus dicebatur, & qui nunc hostis, perduellis.* Ex quibus quidem Varronis & Festi locis, rectè colligi potest, non vt olim, sic nunc hostes Romani populi perduelles appellari. *Siquidem*, vt Vlpianus ait, *is dumtaxat perduellis nunc dicendus est, qui hostili animo aduersus Rempub. vel Principem suum est animatus* cap. fin. ad L. Iul. maiest. Igitur qui eo nomine accusatur, is rectè perduellionis reus fieri nunc intelligitur; quemadmodum olim qui hostis iudicabatur, illi perduellio iudicari dicebatur. Proinde sic Liuium esse intelligendum puto, vt contenderit, eis qui horrendum aliquod crimen commiserant, perduellionem eo tempore solere iudicari: quò moris fuisse apud Romanos videtur, vt ciui Romano, de cuius capite iudicium erat, ante perduellio indicaretur, hoc est, ciuium exemptus numero, patriæ hostis pronūciaretur, quam capitale sumi de ciue Romano supplicium posset. Et hæc quidem interpretatio eò verisimilior videtur, quòd

quòd filium suum Horatium, populi fauore absolutum, Publius Horatius pater, quibusdam sacrificiis piacul'aribus peractis, transmissò per viam tigillo, capite adoperto, velut sub iugum miserit. auctore eodem Liniò. Quia igitur pràter hostes nulli sub iugum mitti consueuerant, hinc rectè ratiocinabimur, ideo missum velut sub iugum à suo patre Horatium fuisse, qui Horatio Duumviri perduellionem iudicauerant, hoc est, quia inter perduelles Romani populi Horatium referendum esse, deinde vt perduellem interimendum pronunciant. Et hæc ad legem illam horrendi criminis sufficiunt. Quæ lex Regum temporibus Romæ in vsu fuisse, Regibusque exactis, vnà cum reliquis legibus Regiis exoleuisse lege Tribunitia videtur. Quo quidem tempore, suum semper esse de capite Romani ciuis iudicium, populus Romanus visus est primum voluisse. Et idcirco in huius Regiæ de horrendo crimine legis locum, aliam Decemviri legem surrogarunt, qua de capite ciuis nisi per maximum comitatum ne ferretur, continebatur. Eaque lege vsus est Romanus populus semper constantissimè. Adeò quidem, vt contenderit actione quinta in C. Verrem expressè Cicero facinus esse ab aliquo Pratore vel Præsìde vinciri ciuem Romanum, scelus verberari, propè parricidium necari: quid dicam, inquit, in crucem tollere? Scribit etiam Pomponius, ne Consules per omnia Regiam potestatem sibi vindicarent, lege lata factum esse, vt ab eis prouocatio esset, ne possent in caput ciuis Romani iniussu populi animaduertere. Certè quia de libertatis ciuitatisque iure, non Prætoris, Consulis, aut Præsìdis alicuius, sed populi solius iudicium erat. Proficiscar, inquit Cicero in Verrina quarta, eo quo me iam pridem vocat populus Romanus: de iure enim libertatis & ciuitatis suum putat esse iudicium, & rectè putat. Nunc videndum est, de eo qui hostem con-

*citauerit, quæve ciuem hosti tradiderit, quem capite puniendum* Martianus scribit, idque legem duodecim tabularum inbere, cap. 3. ad L. Iul. maiest. Et eo quoque, qui ob rem dicendam pecuniam accepisse conuictus erat, & capite puniendo lege quadam Decemuirali expressè cauerit testatur Gellius libro 20. cap. 1. Quod autem Martianus scribit, lege Iulia repetundarum eum teneri, qui cum aliquam potestatem haberet, pecuniam ob iudicandum, vel non iudicandum acceperit, cap. 3. ad L. Iul. repetund. ex eo probari potest, lege Iulia repetundarum, legem hanc Decemviralem abrogatam fuisse: etiam iis temporibus quibus M. Cicero Verrem accusauit. Ciceronis enim hæc verba sunt, in Actione prima: *Cognoscet ex me populus Rom. quid sit, quod P. Septimio Senatore damnato, Q. Hortensio Pratore, de pecuniis repetundis lis aestimata sit in eo nomine, quod ille ob rem iudicandam pecuniam accepisset. Igitur qui lege Decemuirali capite plecti debebant Indices corrupti, in eos lege Iulia repetundarum non capite, sed exsilio, vel etiam interdum durius, extra ordinem animaduersum fuit, cap. 7. §. hodie. Ad L. Iul. repetund. Et hæc hætenus, quibus si addideris, passos non esse Decemuiros, de inaudito & indemnato supplicium sumi, idque primùm ex Saluiano Massiliensi Episcopo Cuiacium obseruasse existimabo de legibus publicorum capitaliumque iudiciorum Decemuiralibus, hæc satis abundè disputatum esse.*

## C A P V T XXVIII.

### *Miscellanea quadam.*

**I**N hoc capite quædam Decemuiralium legum fragmenta visum est adnotare, quæ licet nullam interpretationem accuratam postulent, omitti tamen non potuerunt. Festus auctor est, *Sanates dictos esse, qui su-*  
*prà*

*præ infraque Romam habitauerunt: idque nomen his fuisse, quia cum defecissent à Romanis, breui post redierunt in amicitiam, quasi sanata mente. Itaque, inquit, in duodecim cautum est, ut idem iuris esset Sanatibus, quod fortibus, id est, bonis, & qui nunquam defecerunt à populo Romano. De vnciario fœnore, cum ab aliis plurima sint adnotata, satis erit hoc loco admonuisse Decemuiros, ne quis vnciario fœnore amplius exerceret, prohibuisse: idque Cornelium Tacitum lib. 5. annalium scripsisse. De collegiis autem, & corporibus copiosos commentarios ediderunt viri aliquot eruditi, qui præclaris Romanorum antiquitatibus illustrandis sedulam operam nauant: quæ res efficit, ut eorum commentariis contenti, industriam nostram in aliud tempus, & locum commodiorem referuamus. Huc accedit, quod in vrbe cœtus nocturnos agitari Decemuires etiam prohibuerint: idque ex Portio Latrone quidam eruditi duodecim tabularum interpretes diligenter obseruarunt. Plinius libro 16. cap. 13. scribit, cautum fuisse, lege 12. tab. ut glandem in alienum fundum procidentem liceret colligere. Interdixit etiam Prætor de glan- de legenda. Vlpianus refert, legem duodecim tab. etiam voluisse, ut quindecim pedes altius rami circuncidantur: & hoc idem effectum esse ait, ne umbra arboris vicino prædio noceret, cap. 1. de arb. cæd. Esse quoque de pastu pecoris ex 12. tabulis actionem, non obscure significat idem Vlpianus, cap. 14. §. ult. de præscrip. verb. De statu liberis autem quid in 12. fuerit, explicat his verbis Vlpianus in fragmentis tit. 2. Sub hac conditione liberè esse iussus, si decem milia heredi dederit, & si ab herede alienatus sit, emptori dando pecuniam ad libertatem perueniet, idque lex, 12. tab. iubet. Denique de decimo mense, deque partu monstroso videndum est, si quid 12. tab. caueatur. Et exstat quidem apud Ciceronem libro 3.*

de leg. locus, qui de monstroso partu Decemuiros quicquam scripsisse tam obscure significat, ut quidnam illud fuerit diuinare nequeamus. Quamuis interim hominem in decem, non in vndecim mensibus gigni, dubium non sit: idque etiam in 12. tab. Decemuiros scripsisse, Gellius auctor est, lib. 3. cap. 16. A qua lege decimum mensem natiuitatem legitimam visus est appellasse Tertullianus in libro de anima: *Legitima*, inquit, *natiuitas ferme decimi mensis ingressus est. Qui numeros ratiocinantur, decuriale numerum, ut exinde reliquorum parentum colunt, denique perfectorem natiuitatis humana.* Et hæc quidem ad illa duodecim tabularum fragmenta, quæ expressam aliquam legis sententiam continent, mihi sufficere videntur. De reliquis verò, nihil est quod hîc differatur. Siquidem in hoc libello conscribendo nostra fuit intentio, leges aliquot deprauatas restituere, restitutas aliasque ab interpretibus non rectè, ut nobis videbatur intellectas breui quadam & perspicua interpretatione illustrare: non autem, quæ ab aliis accuratè & eruditè tradita sunt, iterum hîc inculcare, non singula duodecim tab. verba, quæ sine aliqua legis sententia, passim apud auctores obuia sunt, explicare. Nam id potius ab iis est faciendum, qui commentarios verborum iuris conscribunt.

IACOBI





# IACOBI RÆVARDI IURISCONSULTI AD

TIT. PANDECTARVM, DE  
diuerfis regulis iuris antiqui,

COMMENTARIVS.

PAVLVS LIB. XVI. AD PLAUTIVM.

*Regula est, qua rem qua est, breuiter enarrat. Non ex regula ius sumatur, sed ex iure quod est regula fiat. Per regulam igitur brevis rerum narratio traditur, & ut ait Sabinus, quasi causa coniectio est, qua simul cum in aliquo vitata est, perdit officium suum.*



EMONSTRAVIMVS de auctoritate prudentum libro singulati, olim obseruari solitum, vt quories grauis aliqua & perplexa iuris incideret quaestio, fori quædam institueretur disputatio, iurisconsultis simul congregatis: eaque fori disputatione ius quoddam communi prudentum definitione componi consueuisse, quod ius communi nomine appellabatur *ius civile, ius receptum, recepta sententia, & regula iuris*. Hæc si vera sunt, nunc faciliè intelligimus quid sibi Paulus voluerit hac obscura regulæ definitione; *Regula est, qua rem qua est, breuiter enarrat*. Sensus enim est, regulam iuris eam esse, quæ rem fori disputatione definitam & consensu iurisconsultorum receptam breuiter enarrat. Probauimus Variorum libro tertio, non scholasticis solum auctoribus, sed ipsis

G 4

etiam

etiam iurifconsultis substantiuorum Ellipses admodum familiares fuisse. Eadem ratione verborum, participiorum, & præpositionum Ellipses esse in vſu ſolent. Nam cùm ſic ſcriberet in Andria Terentius; *Ego me continuo ad Chremem*, admonuit Donatus id ἑλλειψιν positum eſſe, & verbum, duco, ſubaudiendum. Simili modo quod Paulus ait, Regulam eſſe quæ rem quæ eſt breuiter enarrat. ad participiorum Ellipses referendum videtur, quaſi ſubaudiatur participium, *definita*, hoc eſt, *conſenſu recepta*. Eadem figura dixit etiam Paulus, *ex iure quod eſt*; ſubauditur enim *definitum*. Hac cùm non conſiderarent interpretes, in eum errorem prolapſi ſunt, vt exiſtimauerint regulam iuris breuem quandam ſententiam eſſe ex vario multiplicique iure, ſiue ex pluribus legum capitibus notatis, & inter ſe comparatis emergentem; idque ſibi Paulum voluiſſe his verbis; *non ex regula ius ſumatur, ſed ex iure quod eſt, regula fiat*. Quaſi verò definiat Paulus ius ipſa regula antiquius eſſe, & per hoc regulam ius aliquod nouum non conſtituere, cùm interim vtrumque veritati ſit conſentaneum Nec enim ius eſt antiquius regula, nec etiam abſurdum eſt ius aliquod nouum regulam iuris ciuilis conſtituere, eo nihil obſtante quod ſcripſerit Paulus, ex regula ius non ſumi: Nam ſic accepimus Iulianum ſcripſiſſe; *Regula eſt iuris ciuilis, qua conſtitutum eſt hereditatem adimi non poſſe propter quam liber & heres eſſe iuſſus ſit*, cap. 13. §. 1. de lib. & poſthum. Ex quo loco euidentiffimè conſtat ius non eſſe antiquius regula. Ait enim expreſſè Iulianus regula iuris ciuilis nouum aliquod ius conſtitui, quod antea in vſu non erat. Id quod idem Iulianus etiam alio loco his verbis demonſtrauit; *In his quæ contra rationem iuris conſtituta ſunt, non poſſumus ſequi regulam iuris*, cap. 15. de legib. Ecce, coniungit expreſſè Iulianus cum noui iuris conſtitutione

stitutione regulam iuris civilis. Quid de regula Catoniana dicemus? Quis est quæso mortalium qui auct sit negare Catonianam regulam ius constituere? Celsus enim ita scribit; *Catoniana regula sic definit. capit. 1. dereg. Caton.* Quid est definire? nōne ex incerto dubioque iure certum aliquod ius, & consensu probatum constituere? Et idcirco explodenda videtur communis illa veterum recentiorumque iuris interpretum definitio, qua tradiderunt ius esse antiquius regula, regulam ius non constituere, & denique breuem quandam sententiam iuris civilis regulam esse ex vario multiplicique iure conceptam. Quod autem Paulus ait ex regula ius non sumi, hoc eam habet sententiam, vt regulæ tanta non fuerit auctoritas, quanta legis, plebisciti, decreti Principis, aut alterius scripti iuris speciei. Leges enim & iuris scripti species reliquæ, etiam si iniquissimæ sint, tamdiu tamen firmam obtinent iuris auctoritatem quamdiu aut in defuetudinem non abierunt, aut abrogatione è medio sublata non sunt; & sic ius sumi ex legibus solet. Aliud dicendum est de regula iuris civilis. Illa enim tamdiu firmam iuris obtinet auctoritatem, quamdiu vitium in ea nullum deprehenditur, quo vitio deprehenso statim iuris auctoritate censei regula definit. Idque interdum fieri solitum testis est pro Muræna his verbis Cic. *Deinde vestra responsa atque decreta & euertuntur sæpè dicendo, & sine defensione oratoris firma esse non possunt.* Per decreta enim receptas sententias Iurisconsultorū, hoc est, iuris civilis regulas intelligit hoc in loco Cic. Nec aliud est quod sic Iulianus scribit; *In his qua contra rationem iuris constituta sunt, non possumus sequi regulam iuris, d. cap. 15. de legibus.* Et sic quidem ius ex regula non sumitur. Si enim ex regula ius sumeretur, utique omnino consequens esset etiam in iis, quæ

contra iuris rationem recepta sunt , sequendam esse iuris regulam. Ius igitur ex regula non sumitur, sed ex iure quod est fieri debet regula, inquit Paulus hoc est, non idè aliquid debet videri iustum , atque ita per consequens iuris auctoritatem obtinere, *quia illud Iurisconsultorum consensu receptum est, & sic in regula nomen transiit* ; sed ex iure quod iustè receptum est & consensu probatum, fieri debet regula quædam iuris civilis. Quasi in effectum dicat Paulus , huiusmodi ratiocinationi locum non esse, Regula est , ergo id quod ea regula continetur iustum est. Sed contra , iusta consensu Iurisconsultorum recepta est quædam sententia , Ergo ex ea fieri regula debet. Hæc interpretatio alio quodam Pauli responso vehementer probatur. Sic enim scribit Paulus *Quod contra rationem iuris receptum est, non est producendum ad consequentias*, cap. 14. de legibus cap. 14 1. hoc tit. haud dubiè per ius receptum regulam intelligens iuris civilis , & per consequentias, huiusmodi ratiocinationes. Idque cum non intelligeret Tribonianus , scriptas aliquot leges & responsa prudentum plurima in hoc titulo pro regulis nobis obtrusit, quæ nec auctoritatem nec nomen regulæ unquam habuerunt. Ait Paulus *regulam esse quasi causæ coniectionem. Rem siue litem, quæ quasi per indicem exponitur, causæ coniectionem , quasi causæ in breue coactionem definivit Asconius*. Et huiusmodi quidem causæ coniectioni simillima est regula iuris civilis. Quemadmodum enim ea *coniici causæ* dicitur, quæ cognitis utrimque propositisque & actoris & rei argumentis in breue cogitur ; ita quoque regula in breuem quandam succinctamque formulam , disputatione fori consensu quodam disputantium finita , ex iis coniici argumentis solet, quæ hinc inde fuerant agitata, addito interdum eius, cuius inter cæteras obtinuerat sententia, expresso

DE DIVERSIS REGVLIS IVRIS. 107  
expresso nomine ; id quod ex Catoniana regula patet  
evidentissimè.

II. VLP. IAN. LIB. I. AD SABIN.

*Fœmina ab omnibus officiis civilibus vel publicis remota sunt : & idè nec iudices esse possunt , nec magistratum gerere , nec postulare , nec pro alio intervenire , nec procuratores existere.*

MUNUS interdum aliud nihil est quàm officium. Idque ex eo constat, quod iudicare ab Vlpiano in hac l. & à Paulo ad publicum munus referatur, cap. 78. de iudic. Eoque pertinet illud Festi, *Munus significat officium, cum dicitur quis munere fungi.* Interdum ab officio separatur munus, quod tunc accidere solet cum munus aliquod patrimonio indicitur, non sine sumptu & periculo. Huic consentaneum est illud Apuleij de asino, libro 4. *nec nos denique latuit Chryseros quidam nummularius copiosa pecunia dominus, qui metu officiorum ac munerum publicorum magnis artibus magnam dissimulabat opulentiam.* Et hac ratione omnis publica functio aut fuisse videtur munus publ. aut officium publ. aut denique publ. ministerium *Munus publicum*, auctore Callistrato, *illud erat quod in administranda re aliqua publica cum sumptu sine titulo dignitatis subibatur*, cap. 14. de muner. & honor. Quæ definitio eam videtur habere sententiam, ut hi qui rem aliquam publicam, hoc est, rem ad ciuitatem pertinentem sumptibus suis factam rectamque sustinent, & conseruant, non priuatum sed publicum munus subire videantur; quales sunt qui rei vehicularis & nauicularis, extruendique vel reficiendi in ciuitate operis curam gerunt, c. 1. in princ. & cap. 4. de muner. & honor. Et hoc inde potissimum quod olim inter Iurisconsultos  
magna

magna fuisse videatur controuersia an à ciuilibus muneribus publica diuersa sint. Quod ipsum Iustinianus his verbis testatus est ; *Et tutelam & curam placuit publicum munus esse*, §. 1. Instit. De excus. tut. Hoc enim verbum, *Placuit*, denotat fori disputationem. In hac disputatione à reliquis dissensisse visus est Callistratus, & existimasse, licet tutela ciuile munus sit, nō tamen publicum munus esse, sed priuatum. Ait enim Callistratus, *eum qui adilitate fungitur, tutorem dari idcirco recte posse, quod adilitas inter eos magistratus numeretur, qui priuatis muneribus excusati sunt*, cap. 17. §. 3. de excus. Ex quo loco euidentissimum est, in ea persuatione Callistratum fuisse, vt existimauerit tutelam non publicum, sed priuatum munus esse ; & per consequens inter publicum & ciuile munus aliquam statuendam esse differentiam. *Excusatio enim manifestum tutoris iure dati argumentum est*, cap. 13. §. pen. de excus. Eaque res efficit, vt mihi persuadeam, hæc Callistrati verba vitiosa esse ; *Eos qui in corporibus sunt, veluti fabricorum, immunitatem habere dicimus ; etiam circa tutelarum exterorum hominum administrationem habebunt excusationem, nisi si facultates eorum adaucta fuerint, vt ad cetera quoque munera publica compellantur*, dict. cap. 17. §. 2. Non enim dubito quin sic Callistratus scripserit, Vt ad munera quoque publica compellantur : & verbum *cetera*, Triboniani esse, satis haud dubiè persuasum placuisse, hoc est receptum fuisse tutelam munus publicum esse. Alioqui sibi ipsi Callistratus in vno eodemque responso contrarius est. Tutelam esse munus ciuile neminem arbitror inficiari. Cū igitur receptum sit aduersus Callistratum inter ciuile munus & publicum nullam esse statuendam differentiam, utique ex eo etiam necessariò videtur consequi, tutelam quæ ciuile munus est, publicum quoque munus sic esse,

esse, vt hi qui ad publica munera vocantur, vocentur etiam ad tutelam, & qui muneribus iis excusantur, hi quoque tutela debeant excusari. Et quamuis hæc ita scripserit Callistratus, nihilominus tamen satis constat plerosque iurisconsultos nullam inter ciuile & publicum munus differentiam fecisse. *Nauicularios* enim *ciuili munere* fungi testis est Hermogenianus, c. 1. in pr. de muner. & honor. *Illud idem ciuile munus* appellat *publicum munus* Serbidius Scauola, c. 5. d. tit. Et huiusmodi publicorum siue ciuilium munerum alia erant ordinaria, alia extraordinaria. *Ordinarium ciuile munus est, quod lege vel more ciuitatis secundum aetates & dignitates inter se municipes ordine*, hoc est, per vices gerunt, c. 1. C. de muner. patrim. Cuius generis est munus hospitis in domum recipiendi, c. 3. §. 11. de muneribus. Idque testatur M. Cicero, sic in Verrina tertia scribens; *Quod ubi Philodamo nunciatum est, tamen si non erat ignarus quantum sibi ac liberis suis iam tum mali constitueretur, tamen ad istum venit, ostendit munus suum, id non esse, se cum sua partes essent hospitum recipiendorum, tum ipsos tantum Praetores & consules non legatorum affectas recipere.* Hæc Cicero, id per partes intelligēs quod vices appellant Iurisconsulti. Sic enim ad illum locum partes interpretatus est Asconius Pedianus. *Munus publicum extraordinarium* definit Pomponius *officium priuati hominis ex quo non ordine*, hoc est, per vices, sed extra ordine commodum ad singulos vniuersosque ciues remque eorum magistratus imperio peruenit, cap. 239. §. 3. de verb. sign. Huius generis esse arbitror publicæ viæ munitiones. Vicinos enim suis sumptibus aut operis cum tunc reficere imperio magistratus extraordinariē consueuissē, cum illis exemptus esset commeatus: ex eo facile patet quod veterani viæ sternendæ immunitatem non habuerint, c. 4. de vetera. Nec est quod quis obiciat

obiiciat publicæ viæ munitiones inter personalia munera ab Hermogeniano referri, cap. 1. de mun. Illud enim non de eo qui viam sternit, sed de eo accipendum est qui electus est vt compellat eos qui prope viam publicam possident sternere viam. Huiusmodi enim munus personale esse testis est Arcadius Carisius, cap. fin. §. 2. de mun. & honor. eosque qui tali munere funguntur, *magistros pagi* appellat Sculus Flaccus lib. de conditionibus agrorum. Cæterum *officium publicum* quin differat ab officio ciuili non dubitatur, eo non obstante quod inter munus ciuile & publicum vix vllam admittât IC. differentiam. Quis enim credat interuenire esse officium publicum? Et ideò dicendum est omne quidem officium publicum ciuile esse, sed non contra omne officium ciuile publicum. *Magistratum gerere, iudicem esse, munera publica sunt*, hoc est, officia publica & ciuilia simul, cap. 78. de iud. cap. fin. §. 1. de muner. cap. §. in fin. cum seq. de cap. minor. Interuenire, postulare, publica officia non sunt, sed ciuilia. Et ita functio publica aut ex munere publico, aut ex officio publico olim videri potest constitisse. Tertiã publicæ functionis speciem diximus esse *ministerium publicum*, eiusque ministerij inuenio diuersa fuisse genera duo: Vnum honorificum & cum potestate; alterum seruale ac mercenarium. De priore obseruatum est Marcianum sensisse, c. 1. de L. Iul. repet. Per ministerium enim in eo c. 1. intelligit magistratum illū Marcian. qui sub tit. ministerij in prouincias cum potestate & imperio mittebatur. Et hanc quidem interpretationem vehementer probat Valer. Max. sic de M. Catone scribens in Cyprum confiscandæ pecuniæ regis causa misso; *Vnde cum pecunia deportandæ ministerium sustineret tam auersum animum ab omni Venere quàm a lucro habuit.* Alio sensu per ministerium publicum



publicum serui intelliguntur populi Romani aut ciui-  
 ratum publici. Sic ministerium publicum accepit in  
 ea declamatione Quintil. cui. tit. est ; *Prægnans adulte-  
 ra*, his verbis ; *fortiter tamen dicerem omnes leges quacun-  
 que de suppliciis scriptæ sunt , ad eos pertinere qui damnati  
 sunt , qui in iudicio conuicti , qui per ministeria publica &  
 carnificum manus occiduntur.* Et sic quidem satis esse  
 perspicuum puto , qua ratione omnis olim publica  
 functio ex munere publico, ex officio pub. & denique  
 ex publ. ministerio cõstitit. Ab omnibus officiis pu-  
 blicis & ciuilibus fœminæ remotæ sunt , non vtique  
 ab omnibus muneribus publicis. Quatenus enim per-  
 sonalia sunt munera publica , ab iis fœminæ remotæ  
 sunt ; quatenus patrimonialia, nõ omnino sunt remo-  
 tæ. Idque illud est quod sic Vlpian. scribit ; *Corporalia  
 munera fœminis ipse sexus denegat*, cap. 3. §. 3. de muner-  
 ibus. Idem sexus fœminas ad publicum aliquod mini-  
 sterium non patitur admitti ; & sic à muneribus per-  
 sonalibus omnibusque ciuilibus ac publicis officiis, &  
 denique ab omni ministerio publico sexu remoueri  
 fœminæ solent. Nam , vt ait Ambrosius de Paradiso  
 capite vndecimo, *sicut vir publicis officiis ; ita mulier do-  
 mesticis ministeriis habilior æstimatur.* Et hæc quidem  
 adeò vera sunt , vt scripserit expresse Callistratus *ab  
 omni opera virili fœminas remoueri consueuisse , & idcirco  
 ad officium argentarij admitendas non esse*, cap. penul-  
 tim. de edendo. Est etiam Neratius auctor , *fœminas  
 tutores dari non posse , quia munus illud masculorum est*,  
 cap. vltim. de tutel. Quod autem iudices esse non po-  
 tuerint fœminæ , hoc inde euenire testatur Paulus,  
*quia receptum est, vt ciuilibus officiis mulieres non fungan-  
 tur*, cap. 12. §. 2. de iudic. Nec mirum cur id receptum  
 sit , cum iudices olim Romæ aut Equites essent , aut  
 Senatores , Equitem aut Senatorem fœminam nulla  
 vnquam

vnquam vidit ætas, eam si exceperis quæ Helagabali imperium est sortita. Testis est enim Lampridius *Helagabalum ubi primum senatus diem habuit, matrem suam in senatum rogari iussisse, solumque hunc Imperatorem fuisse, sub quo mulier quasi clarissima loco viri senatum ingressa est, cautumque postea, ne vnquam mulier senatum ingrederetur, utque inferis eius caput deuoueretur, per quem id esset factum*. Postulare quoque prohibentur fœminæ. Qui postulabant, in ordine stabant adeuntium Prætores, indeque scurras & improbos homines qui assidue in litibus morabantur, *ordinarios* appellatos fuisse, testis est Festus. Quibus hominibus matronam Romanam admisceri prorsus indecorum est, cui *matrona haberi honorem illam Romani voluerunt, ut eam in ius vocanti corpus eius attingere non permiserunt, ne huiusmodi actoris manus aliena tactu stola violaretur*; quemadmodum auctor est Valerius lib. 2. Est etiam infirmitas fœminarum impedimento quò minùs fœminis intercedere permissum sit, cap. 2. §. 1. Ad S C. Velleian. Intercessio & generis est, & speciei nomen. Nam genere quodam qui fideiubent, quod fieri stipulatione solet, & qui re, verbis, aut quocunque alio contractu pro alio interueniunt, intercedere dicuntur, d cap. 2. §. 2. Ad speciem tunc intercessio referri solet, cum sine stipulatione aut quo alio de intercessione contractu facto interuenitur; quod fieri hac solemni formula solet, *PERICULO MEO CREDE*, cap. 12. §. 9. Mandati. Prohibentur etiam fœminæ procuratores esse. Imperiti non considerantes apud veteres procuratoris, tutoris, & aliorum id genus nominum appellationes communis fuisse generis, loco *Procuratores*, substituere non verebantur *Procuratrices Auctor*, inquit Festus, *communis generis est apud antiquos*. Quod autem Vlpianus ait, procuratores esse fœminas prohiberi;

hiberi ; hoc vt ad patronos, aduocatos, & cognitores etiam referatur, vna eademque ratio suadet. Hæc enim prorsus virilia sunt.

AD §. ITEM IMPVBES.

*Item impubes omnibus officiis ciuilibus debet abstinere.*

C V R impubes omnibus ciuilibus officiis debuerit abstinere, hæc proferri ratio potest, quòd ciuilia officia virilia sint, quæ virilia officia ante sumptam virilem togam iuuentus Romana non subibat. Quod ipsum clarissimè testatur Cicero sic ad Attic. libro septimo scribens ; *Habebamus autem in manibus Antonij concionem, habitam decimo Calendas Ianuarij, in qua erat accusatio Pompeij vsque à toga pura.* Hæc Cicero, indicans omnino Pompeium ab eo tempore quo primum ciuilibus officiis fungi cœperat, repetita narratione, accusatum in concione quadam ab Antonio fuisse : Et idcirco ad postulandum non ante videntur admissi fuisse Romani iuuenes, quàm exuta prætexta bullaque posita induissent virilem togam ; tamdiu enim consilio alterius sic regebantur, vt in forum non prodirent. Idque testatus est euidentissimè Epistolarum libro primo Seneca. Sic enim scribit : *Tenes etique memoria quantum senseris gaudij, cum prætexta posita sumpsisti virilem togam, & in forum deductus es.* Nec aliò spectat illud eiusdem Senecæ de breuitate vitæ ; *Ausus est enim & pupillus adhuc & prætextatus iudicibus reos commendare.* Moris erat, vt impuberes ingenui ad annos vsque pubertatis toga vterentur prætexta, & bulla aurea, quæ prætextatorum puerorum insigne erat, eis à pectore dependeret, qua significabatur eam ætatem alterius regendam esse consilio, auctore Festo de verborum significatione libro secundo. Id quod Cicero etiam euidenter docet, sic in Verrem actione tertia scribens : *Neque te tam commouebat, quod ille cum toga prætexta, quàm*

H quod

quod sine bulla venerat. Vestitus enim neminem commovebat is quem illi mos & ius ingenuitatis dabat; quod ornamentum pueritia pater dederat, hoc ab isto pradone ereptum esse grauiter & acerbè homines ferebant. Hæc Cicero eum morem describens, quo simul cum prætexta etiam bulla suspendi in collo infantibus solet; ingenuis quidem aurea, libertinis verò scortea, vt scribit ad illum Ciceronis locum Asconius Pedianus. Per togam prætextam eam togam intelligebant veteres cui purpura prætexebatur, ad togæ virilis differentiam. Virilis enim toga appellabatur toga pura. Sic enim scribit ad Atticum Cicero libro nono: *Volo Cicroni meo togam puram dare.* Dicebaturque toga pura, quod ei nulla purpura esset prætexta. Nec aliud etiam per bullam scorteam, qua libertini pueri utebantur apud veteres intelligebatur, quàm lorum quod in collo pro bulla decore gestabant pueri libertini, auctore Macrobio, Saturnaliorum libro primo, cap. 6. Puellas quoque vsas esse toga prætexta, testis est in eadem Verrina Cicero. Ait enim: *Eripies igitur pupilla togam prætextam, detrahes ornamenta non solum fortuna, sed etiam ingenuitatis?* Cùm autem huiusmodi prætexta pueri puellæque induebantur, tunc etiam obseruari solet, vt sacrificium aliquod perageretur, quo infirmitas pueritiæ sacra fieret ac venerabilis; illudque sacrificium appellabatur *sacrum prætextatum*. Quo sensu accipiendum est quod in illa declamatione cui titulus est *Novitius prætextatus*, sic scribit Quintilianus; *Ego vobis allego etiam ipsum illud sacrum prætextatum quo sacerdotes velantur, quo magistratus, quo infirmitatem pueritiæ sacram facimus ac venerabilem.* Eratque tanta prætextatorum iuuenum apud Romanos cura, & tam diligens educatio, vt nullo quidem obscæno verbo possent vti, indeque *prætextatus sermo* dicebatur, vt auctor est Festus, qui

nihil

*nihil obscenitatis habebat.* Quòd si obscæno aliquo verbo vti essent prætextati, ab Ædilibus aut Censoribus more cæterorum ciuium mulctari non solebant, sed tergore murenæ, quod tenuissimum erat, verberabantur; & ob id *mulctam prætextatis non esse institutam*, contendit Verrius apud Plinium Natur. Hist. libro nono, cap. 33. Cæterum postea quàm pubertatis annos iam egressi essent pupilli, prætextam exuere, bullamque deponere, & induere virilem togam solebant: anno nimirum ætatis decimo quarto, quinto, vel sexto. Sic enim de Commodò Antonino scribit Ælius Lampridius; *Decimoquarto ætatis anno in collegium sacerdotum assumptus est; cooptatus inter tres solos principes iuventutis, cum togam sumpsit, adhuc in prætexta puerili congiarium dedit.* Est etiam Suetonius auctor, Augustum anno ætatis decimo sexto virilem togam sumpsisse. Sic enim scribit; *Duodecimum annum agens autem Iuliam defunctam pro concione laudavit: quadriennio post virili toga sumpta, militaribus donis triumpho Cæsaris Africano donatus est.* Hinc intelligimus quid sibi voluerit Ulpianus, cum scriberet *prætextatum*, eumque qui proximè prætextati ætatem accedit, apud matremfamilias deponendum esse; & proximè prætextati ætatem accedere eum qui puberem ætatem nunc ingressus est, cap. 3. in fin. de lib. exhib. Sensus enim est, eum qui adhuc prætextatus induit bullam ex collo dependentem gerit, apud aliquam matremfamilias, hoc est, notæ auctoritatis fœminam tunc interdum deponendum esse, cum de eo exhibendo agitur, & prætextatorum ætati pubertatem proximam esse, sic nimirum vt post finitam pubertatem anni, biennij, aut ad summum triennij spatium, ætas etiam finiatur prætextatorum. Quod igitur impuberes omnibus officiis ciuilibus debuerint abstinere, hoc inde est quòd illi cum essent prætextati, ante ad virile officium

non forent idonei,quàm exuta prætexta,depositaque bulla togam sumpsissent virilem. Nec est quod quis obiiciat, ad Tribunatum numerorum pupillos olim admissos fuisse, & sic per consequens officium eos gessisse virile,idque Iustinianum sibi voluisse, cap. ult. C. de test. milit. Eum enim locum vitiosum & aliter accipiendum esse quàm putat vulgus interpretum, est à nobis demonstratum Variorum libro quarto, capite octauo. Nostramque emendationem duobus manuscriptis exemplaribus confirmari, auctor est iuuenis doctissimus Ludouicus Carion.

### III. VLP. LIB. III. AD SABIN.

*Eius est non nolle, qui potest velle.*

VELLE aliquando significat verbis expressis voluntatem suam declarare; idque tunc maximè accidere solet, cùm ei opponitur non nolle. Est enim non nolle, pati & nihil cōtradicere. Eoque sensu non nolle † visus est accepisse Cicero, sic ad Atticum scribens lib. 13. *Proximis tuis literis primum te id non nolle cognoui*, hoc est, pati & non contradicere. Iurisconsulti non nolle & velle, sic etiam interpretati sunt, vt velle eos dicant, qui voluntatem suam declarant, siue quid ventent, siue quid fieri iubeant: non nolle, qui quid scientes dissimulant, hoc est, non declarant se vel nolle, vel quod fit fieri velle, idque ex Vlpiano euidentissimè constat. Cùm enim mercedem peculiarem, etiam si nihil esset in peculio, dominum tributoria obligare, si modò sciente domino seruus negotiaretur, contenderat Vlpianus, hæc verba subiecit; *Scientiam hinc accipimus qua habet & voluntatem; sed vt ego puto non voluntatem, sed patientiam. Non enim velle debet dominus, sed non nolle*, cap. 1. §. 1. & 2. de tribut. act. Quo in loco cum

eum qui sciens non protestatur, aut non contradicit, non nolle, eumque qui quid fieri vetat vel iubet velle interpretatur Vlpianus. *Eius igitur est non nolle, qui potest velle*; hoc est is, dicendus est dissimulare vel pati, qui potest voluntatem suam declarare. Ideoq; si mercedem serui peculiarem apud Vlpianum dominus ignorasset, quia voluisse propter ignorantiam intelligi non poterat, iustam profectò defensionem habuisset, & tributoria conueniri nequaquam potuisset. Nec sanè alia ratione dominus cùm patitur colonum in fundo esse, ex integro locare intelligitur, quam quod voluntatem suam potuerit declarare, cap. 14. Locati. Simili modo colonus reconduxisse videtur vtriusque partis taciturnitate, cap. 13. §. 10. & 11. d. tit. Græci interpretes cùm non satis intelligerent quid significaret non nolle, negationem reiecerunt, & sic legèdam hanc iuris regulam posteris reliquerunt; *Eius est nolle, qui potest velle*. Florentina pandectarum editio, quam ego Græcorum auctoritati longè præferendam censeo, expressè scriptum continet, *Eius est non nolle*. Et quamuis inficiari nequeam ex Græcorum interpretatione regulam hanc cum illo eiusdem Vlpiani responso, quod capite quarto, de acquir. hæredit. extat, non malè coniungi posse, præsertim cùm vtriusque legis epigraphæ aliqua ex parte huiusmodi suadeat coniunctionem; nihilominus tamen retinendam censeo hanc Florentinam lectionem, & nihil in ea mutandum esse, quæ & idoneum sensum præ se fert, & similitum verborum, alio etiam in loco eundem Vlpianum auctorem habet. Nec sanè tanti apud me aut interpretationes Græcorum, aut legum coniunctiones sunt, vt sine alia euidenti & manifesta quadam ratione Florentinam pandectarum editionem existimem vel vna syllaba priuandam esse. Nam si tantum inter-

pretibus Græcis tribuendum est, vt eorum auctoritatem receptis lectionibus præferamus, cur igitur in huius tituli cap. 1. pro *causa coniectio*, non reponimus *causa coniunctio*? Nam sic Græcos legisse, vel vnus esse testis locupletissimus potest Constantinus Hermenopolus.

## IV. VLPIANVS LIB. VI.

## AD SABINVM.

*Velle non creditur qui obsequitur imperio patris vel domini.*

SENSVS huius regulæ est, iis de rebus in quibus parentum filii familias, & dominorum imperio serui auscultare debent, nec filios familias nec seruos intelligi velle, hoc est, vllam habere liberi arbitrij dispositionem; quæ dispositio seruis filiisque familias de iis rebus concessa est, quæ ex parentum & dominorum imperio non dependent. Hæc regula ex Vlpiani ad Sabinum libro sexto desumpta est. In eo libro de acquirenda hæreditate disseruit idem Vlpianus, & in disserendo, tractasse etiam visus est, an filius familias hæres institutus citra iussum patris suo arbitrio pro hærede rectè gerat. In qua tractatione hac utebatur Vlpianus distinctione, vt scriberet, aut de eo filio familias agi qui miles esset, aut de eo qui paganus. Si de pagano, certum esse hunc pro hærede gerere suo arbitrio non posse. Velle enim non creditur, eò quòd obsequi imperio patris debeat. Si quæstio esset de filiofamil. milite, hunc in iis quæ castrensia sunt, velle intelligi, & per consequens imperio patris non obsequi, ac proinde à commilitone hæredem institutum citra iussum patris suo arbitrio rectè pro hærede gerere. Et hæc vera est sententia huius regulæ, quæ cum capite quinto, de castr. pecul. coniuncta hanc interpretationem



nem omnino requirit; eamque coniunctionem ipsa utriusque legis inscriptio euidenter suadet, quæ talis est; *Ulpianus ad Sabinum libro sexto. Certum est filiumfamilias in publicis causis loco patrisfamilias haberi*, cap. 9. de his qui sunt sui vel alien. iur. Et ob id in iis causis sic creditur velle, ut obsequi imperio patris non cogatur, idque eleganter à Quintiliano in ea declamatione expressum est, *Auctor pacis abdicandus*, his verbis traditum est; *Dico igitur certa esse quæ imperant patres navigationem, militiam, quadam excipi, Senatoris Magistratus, indicis sententiam* Cæterum dominorum imperio seruos obsequi debuisse. adeò verum est, ut contenderit expressè Cyprianus inde nomen seruos habuisse. sic enim in libro De singularitate clericorum scribit; *Alioqui nec nos serui adscriberemur, nec ipse dominus haberetur; si secundum voluntatem nostram permetteremur impendere seruitutem.* Et quamuis hæc ita sint, interdum tamen fieri quædam per seruos suos patiebantur domini, sine aliquo imperio speciali; idque tunc accidere solet cum seruus alicui negotiationi præpositus est. Tunc enim suo arbitrio domini negotium tamdiu gerit seruus, donec illud gerere à domino prohibeatur. Eaque prohibitio libello proposito hac fieri solemni formula plerumq; solet, CVM IANVARIO SERVO MEO GERI NEGOTIVM VETO, ut est apud Paulum, cap. 47. in princ. de pecul.

## V. PAVLVS LIB. II. AD SABIN:

*In negotiis contrahendis alia causa habita est furiosorum, alia eorum qui fari possunt, quamvis actum rei non intelligerent. Nam furiosus nullum negotium contrahere potest; pupillus omnia tutore auctore agere potest.*

CERTVM est ad Sabinum libro secundo, ex quo

H 4 hæc

hæc regula desumpta est, de adeundâ hæreditate, inter alia tractasse Paulum, & simul definiuisse pupillum, si fari possit, adire hæreditatem & cernere auctoritate tutoris non prohiberi; eo nihil obstâre quod neque scire, neque decernere talis ætas possit, quæ scientia cretionis formula comprehendendi solet verbis ad hunc modû conceptis, TITIVS HÆRES ESTO, CERNITOQVE IN DIEBUS CENTVM PROXIMIS QVIBVS SCIERIS POTERISQVE, NISI ITA GREVERIT, EXHÆRES ESTO, VT auctor est Vlpianus in fragm. tit. 22. Quamvis igitur scire pupillaris ætas non credatur, nihilominus tamen rectè & adire hæreditatem & cernere auctoritate tutoris pupillus poterit, si modò eius ætatis sit, vt fari possit, hoc est, hæc solemnia verba pronunciare; CVM ME MEIVS HÆREDEM INSTITVERIT, EAM HÆREDITATEM ADEO, CERNOQVE. Hoc enim fauorabiliter pupillis præstari testatur ad Sabinum libro secundo Iulius Paulus, cap. 9. de acq. hered. Et hoc indè potissimùm, quod *in negotiis contrahendis*, hoc est in omnibus legis actionibus, siue solemnibus & legitimis actibus *pupillus qui fari potest, omnia tutore auctore agere possit, quamvis actum rei non intelligat*, cap. 70. de verb. obligat. Et ita eodem illo ad Sabinum libro secundo scribit Paulus id quod hæc nostra regula expressè continet, cuius hæc est sententia. Pupillus in mancipationibus, cessionibus, aliisque legitimis negotiis contrahendis, tutore auctore si fari potest, omnia agere potest, adeò quidem vt rectè hac solenni formula rem acciperet mancipio; HUNC HOMINEM EX IVRE QVIRITIVM MEVM ESSE AIO, ISQVE MIHI EMTVS EST HOC ÆRE ÆNEAQVE LIBRA. Eadem ratione scripsit etiam Paulus, *procuratorem à pupillo rectè constitui,*

*constitui, si eius ætatis pupillus sit ut fari possit, c. 24. de admin. & peric. tut.* Sensus enim est; Si verba quibus procuratores constitui solent, solemnia pronunciare apud acta possit pupillus, quamvis actum rei non intelligat, nihilominus tamen non à tutore, sed ab ipso pupillo debere constitui procuratorem. Hæc si vera sunt, consequi ergo aliqua ratione videtur, sic Paulum ad Sabinum lib. 2. ratiocinatum esse; In mancipationibus, cessionibus, aliisque legitimis negotiis contrahendis tutore auctore, omnia pupillus, si infans non sit, facere potest; ergo & adire quoque hæreditatem potest; id quod in furioso locum non habet certè, quod furiosus fari hoc est, mancipationis, cessionis, aditionis, hæreditatis, cretionisque, & aliarum legis actionum verba solemnia proferre nequeat. Et hæc est vera sententia huius regulæ, præsertim cum cap. 9. de acquiren. hæred. coniunctæ; eamque coniunctionem, & regulæ huius sensus verus, & antiquitatis ratio diligenter expensa omnino requirunt. Est enim ab eodem Paulo alio loco traditum *ad ea que solemnitatem iuris desiderant explicanda opus esse tutore auctore, c. 19. de auct. tut.* Igitur non tutor pupilli nomine, sed pupillus nomine proprio, si fari potest, rem accipiet mancipio, hæreditatem adibit, omniaque legis actionum solemnia adimplebit, tutore auctoritatem suam iisdem legitimis actibus accommodante. Est enim receptum alieno nomine lege agere neminem posse. Idque etiam sibi voluit Vlpianus cum scriberet *tutoris auctoritatem interponi perfecto negotio, cap. 25. §. 3. de acquirend. hæred.* Sensus enim est, post solemnia legis actionum verba ab ipso pupillo pronunciata, tutores auctoritatem suam iisdem negotijs legitimis accommodare consuevisse.

## VI. VLPPIANVS LIB. VII.

AD SABINVM.

*Non vult hæres esse, qui ad alium transferre voluit hereditatem.*

CUM scriberet Vlpianus *questionis fuisse, an is pro herede gerere videatur qui pretium omittendæ hereditatis causa a substituto aut legitimo herede capit, & obtinuisse hunc pro herede non gerere* (cap. 24. de acquirend. hæredit. cap. 2. Si quis omiff. caus. testam. cap. 8. de mort. caus. donat.) hanc visus est rationem idem Vlpianus subiecisse; *Non enim vult hæres esse qui ad alium transferre voluit hereditatem*; eaque transferendæ hereditatis voluntas ex accepto hereditatis omittendæ causa pretio, prorsus dignoscitur. Si igitur is qui hereditatem ad alium transfert, per hoc hæres esse non vult, certè omninò consequens est, nec eum pro herede gerere quicquam posse. Nam qua ratione fieri potest ut is qui hæres non est, pro herede gerat? Nec aliud arbitror huic regulæ exemplum commodius accommodari posse, præsertim cum liquidò ex allegatorum capitum inscriptionibus constet, libro ad Sabinum septimo, ex quo hæc etiam iuris regula desumpta est, huiusmodi questionem accuratissimè Vlpianum tractasse. Quia igitur is qui ad alium transfert hereditatem, hæres esse non vult, utique *nec pro herede potest gerere*, hoc est, rebus hereditariis tanquam dominus uti. *Heredem enim pro domino antiquos posuisse*. auctor est Festus. Vlpianus scribit titulo vigesimo secundo, *eum pro herede gerere, qui rebus hereditariis tanquam dominus vitur, veluti inquit, qui auctiorem rerum hereditariarum facit, aut servis hereditariis cibaria mandat. Quo in loco quid sit cibaria mandare, non facilè dixeris, nisi*

nisi obseruaueris serui actoris, siue dispensatoris officium fuisse reliquis seruis vsitata quædam per canonem certum stipendia, certosque frumenti modios in singulos menses præstare; eumque morem ex Saluiano, Terentio, Donato & Plauto euidentissimè demonstrauimus Variorum lib. quinto. Cuius & Irenæus quoque visus est meminisse, aduersus hæreses lib. 4 cap. 44. Ait enim; *Quis igitur erit fidelis actor bonus & sapiens, quem preponet Dominus super familiam suam, ad danda eis cibaria in tempore?* Et sic quidem si hæres institutus mandauerit dispensatori familiæ restatoris seruis dare cibaria, per hoc pro hærede intelligitur gerere; & per consequens is, qui hæres institutus hæres esse non voluit, ad substitutum transferebat hereditatem, nullam videtur cibariorum mandandorum auctoritatem habuisse. Non enim pro hærede gerere potuit.

## VII. POMPONIUS LIB. III.

AD SABINVM.

*Ius nostrum non patitur eundem in paganis & testato & intestato decessisse. Earumque rerum naturaliter inter se pugna est, testatus & intestatus.*

NECESSVM erat vt vniuersum eius qui testabatur patrimonium testamento ad hæredes transcriberetur, si modò testatus decessisset, suâque voluntatem postremam, vim omnem & nomen habere testamenti testator vellet. Idque illud est quod sic Ambrosius de Noë & arca scribit; *Et homines quidem cum moriuntur, patrimonium suum testamento transcribere solent, nec cedit hereditas donec viuât testator.* Igitur sine hæredis institutione nullum aut esse aut appellari testamentum potuit adeò quidem vt scripserit expressè de Abraham

Abraham lib. 2. idem Ambrosius *testamenta hominum prius hæredem ferre, postea legatum exprimere, melioribus hæreditatem, inferioribus legata*. Imperator Theodosius antè obitum omnes suas in filios transtulerat facultates, regnum, potestatem, nomen Augusti, & idèd cùm moriens testamentum condiderat, dicebatur communi iure testatus non fuisse, eò quòd nullo hærede instituto legata & fideicommissa relinqueret. Idque testatus est etiam Ambrosius sic de obitu Theodosij scribens; *Gloriosius quoque in eo Theodosius, qui non communi iure testatus est. De filis enim nihil habebat novi quod conderet, quibus totum dederat, nisi ut eos presenti commendaret parenti; de subditis sibi & commissis testari debuit, ut legata dimitteret & fideicommissa signeret. Quid dignius quàm ut testamentum Imperatoris lex sit?* Hæc Ambrosius, manifestò docens omne testamentum communi iure hæredis requirere institutionem. Erat etiam moris, ut in vniuersum ius defuncti succederet hæres, quamuis magna hæreditatis pars legatis exhausta esset. In eam enim partem hæredem etiam successisse, ex titulo Pandectarum, *Quod legatorum*, euidentissimè constat. Prætor siquidem interdiceret ad hunc modum solet; **QVOD LEGATORVM NOMINE, NON EX VOLVNTATE HÆREDIS OCCVPASTI, ID RESTITVAS HÆREDI.** Quo spectat illud Tertulliani de præscriptionibus aduersus hæreticos; *Ego sum hæres Apostolorum, sicut cauerunt testamento suo, sicut fideicommisserunt, sicut adiurauerunt, ita teneo.* Et tunc quidem hæreditatis sic fieri delibatio solet, ut hæres ab hæreditate reliqua separaret, quæ legatariis præstanda erant. Eòque sensu *legatum delibatio hæreditatis* dicitur, *qua testatur ex eo quod vniuersum hæredis foret, alicui quid collatum velit*, cap. 116. in princ. de legat. 1. Sic delibatam hæreditatem

tem visus est etiam Ambrosius accepisse ad hunc modum in oratione quadam funebri scribens ; *Inter fratres autem qualis fuerit, licet omne hominum genus benevolentia complecteretur, indiuisum patrimonium docet, nec distributa, nec delibata, sed reſeruata hereditas.* Hæc Ambrosius, per hæreditatem non delibatam, eam haud dubiè quæ legatis non est deminuta, hæreditatem intelligens. Et hæc quidè cum ita sint, nūc intelligimus cur testatus & intestatus decedere paganus non potuerit, nimirum quod appellari testamentum nullum posset, quin illud hæredem hæredèſve contineret institutos, quodque nulli potuerint olim hæredes appellari, qui non succederent in vniuersum ius defuncti ; qua ſucceſſione ceſſante, & hæredum appellatio nulla erat, & nomen quoque testamenti ceſſabat. *Est enim hereditas ſucceſſio in vniuersum ius quod defunctus habuit, cap. 24. de verb. ſignific.* Idque in libro de Cain & Abel fatiſ etiam indicat Ambrosius cum ita ſcribit ; *Testamentum eſt quo deſertur bonorum hereditas.* Et eſt quidem adeò hoc verum, vt in iis etiam testamentis quæ per æs & libram fiebant, non quidem familiæ pars, ſed vniuerſa familia emptori mancipio dari debuerit. Quamuis hæc ita ſe habeant, interdum tamen ex poſtfacto accidere ſolet, vt pro parte testamentum pronunciaretur validum, pro parte inuolidum, & tunc pro ea parte qua declarabatur inuolidum reſcindi testamentum ſolet ; non quidem iure ciuili, ſed benigna interpretatione : non ipſo iure, ſed expreſſa iudicum ſententia ; & ſic qui prius teſtatus deceſſerat, poſtea interpretatione declaratus eſt partim teſtatus, partim inteſtatus deceſſiſſe, cap. 15. in fin. & cap. 24. de in offic. testament. Ad huiuſmodi ſpecies hæc regula trahi non debet. In ea enim de eo teſtatore ſolum agitur qui ab initio de quâdam bonorum parte teſta-

tus

tus est, de reliqua testari nolens. Idque ex eo patet eui-  
 dentissimè, quod dicat hîc Pomponius, *ut quis testatus*  
*decedat & simul intestatus, naturam repugnare.* Nam si  
 hæres testator scripserit, testatus si decesserit sine hæ-  
 redibus institutis, intestatus decessisse dicitur, nec pa-  
 titur natura *testatum & intestatum* quem decedere. hoc  
 est, hæredes instituere, & sine institutis hæredibus  
 mori. Si enim vel vnum instituerit hæredem testator,  
 ad eum ipsa institutione omne suum transtulit patri-  
 monium; eamque translationem nomen hæredis om-  
 nino requirit, etiam si ex semisse tantum institutus  
 esset. Auctor est enim Iustinianus, *si unum tantum ex*  
*semisse hæredem scripserit testator, totum assem in semisse fu-*  
*turum; neque enim eundem ex parte testatum, ex parte in-*  
*testatum decedere posse,* §. Non autem. Instit. de hæred.  
 Instit. per assem intelligit Iustinianus vniuersum te-  
 statoris patrimonium. Idque illud est quod sic in ea  
 declamatione cui titulus est *Duo testamenta*, scribit  
 Quintilianus. *Si confitemini esse testamentum, non potest*  
*videri intestatus decessisse.* Et hæc quidem hac nostra iu-  
 ris ciuilis regula sic definita sunt in testamentis paga-  
 norum. Militibus enim quomodo vellent & quo mo-  
 do poterant, concessum fuit testamenta condere,  
 capit. 1. de testament. mil. Videturque Triphonini  
 temporibus rescriptum fuisse, *ut miles ab initio pro*  
*parte testatus & pro parte intestatus mori potuerit*, cap.  
 penultim. §. 1. de castr. pecul. Addiditque Triphoni-  
 nus, *ab initio*, quia etiam ex postfacto pro parte testa-  
 tus & pro parte intestatus decedere paganus potuit,  
 ut est demonstratum.



## VIII. POMPONIVS LIB. IV.

AD SABINVM.

*Iura sanguinis nullo iure ciuili dirimi possunt.*

PROXIMUM locum à testamentis non iuris solum politici, sed sanguinis etiam ratione habere propinquos in ea declamatione, cui titulus est *Duo testamenta*, demonstrat his verbis Quintilianus; *Proximum locum à testamentis habent propinqui, & ita si intestatus quis ac sine liberis decesserit; non quoniam utique iustum sit ad hos peruenire bona defunctorum, sed quoniam relicta & velut in medio posita, nulli propius videntur contingere; nihil est quod nos onerare tentent nomine isto propinquitatis, iactatione sanguinis, & natura homines binis iam tabulis exheredari.* Hæc Quintilianus, satis indicans propinquos ei qui intestatus ac sine liberis decessit, iure sanguinis & naturæ succedere; eamque successionem tunc cessare, cum huiusmodi propinqui iustè sunt exheredati. Hinc *quisitum fuit an propinquis legitimis capite deminutis detur iure legitimi bonorum possessio. Et respondet libro quarto ad Sabinum Pomponius, iure legitimi possessionem iis bonorum non dari, cap. 5. unde cognati.* Ius enim suicitatis & agnationis, quo iure legitimi vocantur, capitis deminutione prorsus extinguitur, cap. 8. de capitis minut. Et quia iura sanguinis nullo iure ciuili dirimi possunt, ut auctor est eodem illo ad Sabinum libro quarto Pomponius, idcirco qui ut legitimi, propter capitis deminutionem, bonorum obtinere possessionem non poterant, hi gradu cognatorum nudo sanguinis iure ad huiusmodi possessionem rursus vocantur, d. c. 5. Et hæc quidem certissima sunt, nec video qua ratione aptius aut commodius vllum huic regulæ accommodari exemplum possit?

præsertim

præsertim cùm evidentissimum sit ex inscriptione dicti capitis quinti, huiusmodi quæstionem libro ad Sabinum quarto, ex quo hæc regula desumpta est, Pomponium tractasse. Idque illud etiam est quod sic Iustinianus scribit; *Agnationis quidem ius omnibus modis capitis deminutione plerumque perimitur. Nam agnatio iuris nomen est, cognationis verò ius non omnibus modis commutatur, quia civilis ratio civilia quidem iura corrumpere potest, naturalia verò non utique, §. fin. Instit. de legit. agnat. tutel.* Ideò dixit Iustinianus non omni capitis deminutione ius cognationis mutari, quia illud mutari non minima capitis deminutione solet, sed maxima & media tantum. §. Quod autem. *Inst. de cap. demin.* Et quia ut media, sic maxima capitis deminutio iuris civilis est, §. Serui autem *Instit. de iure person. cap. 5. §. 1. de statu homil.* certè hinc etiam consequi videtur, iura sanguinis iure civili dirimi posse; quod tamen posse fieri negat hac regula expressè Pomponius. Proinde diligenter considerandum est, non leges aut alias scripti iuris species per ius civile in hac regula Pomponium intelligi velle, sed eam duntaxat speciem iuris non scripti, quæ ex legis actionibus constabat, veluti adoptionem, emancipationem, & sic deinceps. Ita enim ius civile interdum prudentes accepisse ex eo constat, quod scripserit idem Pomponius *librum, quo legis continebantur actiones, surreptum à Cn. Flacio & populo traditum, appellatum fuisse ius civile Flavianum, c. 2. §. 3. de origin. iur.* Liuius etiam & Valerius auctores sunt, Cn. Flavianum ius civile euulgasse; per ius civile præter fastos & legis actiones nihil intelligentes. Certum enim est præter fastos legisque actiones nihil quicquam euulgasse Flavianum. *Iura igitur sanguinis nullo iure civili dirimi possunt*, hoc est, nulla adoptione, nulla emancipatione, nullâve alia legis actione.

Ad

Ad eam enim actionum legis speciem quæ adoptio dicitur, hanc regulam trahendam esse ex inscriptione c. 5. Unde cognati, cum hoc capite coniuncti omnino constat. Et adoptione quidem iura sanguinis dirimi non consueuisse, ex eo etiam patet evidentissimè quod scripserit libro septimo Valerius Maximus, cum Terentius quidam ex octo filiis quos in adolescentiam perduxerat, ab uno in adoptionem dato exheredatum se ad C. Calphurnium Pisonem Praetorem urbanum querelam detulisset, bonorum adolescentis possessionem Calphurnium patri dedisse; hæredesque lege agere, hoc est, hæreditatem adire passum non esse; motum patria potestate, dono vitæ, & beneficio educationis. Quid enim hoc loco per patriam potestatem & vitæ donum aliud intellexit Valerius, quàm ius naturæ, ius sanguinis adoptione filij non extinctum? Et quamvis nonnulli hîc apud Pomponium per *ius sanguinis* ipsam intelligere naturæ necessitatem videantur; qua natura ita comparatum est, ut is qui pater aut filius est, nullo modo etiam coniectus in seruitutem esse pater filiusve desinat; nihilominus tamen mihi probabilius videtur per *ius sanguinis* ius illud intelligi cognationis, quo Prætor iis propinquis qui legitimi non sunt, bonorum defert possessionem. Huiusmodi enim iura *sanguinis* iure ciuili dirimuntur, & rursus non *dirimuntur* iure ciuili; dirimuntur quidem iure ciuili, cum ius ciuile ad maximam mediamque trahimus capitis diminutionem; non *dirimuntur* iure ciuili, hoc est aliqua legis actione. Et in hac sententia etiam Bulgarus est, & qui ad eum notas scripsit Placentinus.

## IX. VLPPIANVS LIB. XV.

AD SABINVM.

*Semper in obscuris quod minimum est, sequimur.*

HANC regulam cum cap. 14. de legat. 1. coniungendam esse, rectè est obseruatum. Ex illo enim capite desumi exemplum potest huius regulæ interpretationi prorsus conueniens. In eo capite auctor est Vlpianus, *si post plura legata uni sapius adscripta, tandem ante impletum testamentum subiecerit testator se huic legatario præstari semel velle, unum duntaxat legatum deberi; & Papiniano videri cetera legata ipso iure adempta esse. Sed cum hæc legata valdè essent inæqualia, sic ut alia aliis essent longè ampliora; quesitum fuit quodnam ex iis legatum legatario præstandum foret, & quæ legata videri adempta possent. Respondet libro ad Sabinum 15. Vlpianus, existimasse eundem Papinianum exiguius legatum præstandum esse; hæc, ni fallor, verba Papiniani responso subiiciens; *Semper enim in obscuris quod minimum est, sequimur.* Et hæc vera est huius regulæ sententia. Per obscurum intelligit Vlpian. quod Papinianus ait non apparere, hoc est, quod propter legatarum rerum diuersitatem absconditum est & latens. Auctor est enim Paulus, *diuersitatem rerum legatum obscurum facere*, cap. 40. de iure fisci. Hæc regula etiam in nummis legatis locum habet. Ait enim idem Vlpianus, *nummis indistinctè legatis receptum esse, ut exiguiore legati videantur; si neque ex consuetudine patrisfamilia, neque ex regionis unde fuit, neque ex contextu testamenti possit apparere*, cap. 75. de legat. 3. hoc est, si non appareat quo genere nummorum uti solitus fuerit testator, aut cuius generis nummos illius regionis homines in usu habeant, capite 4. de trit. vin. vel oleo legat. Per nummos exiguiore reruntios,*

teruntios, semisses, aut asses more Quiritium intelligit Vlpianus: Et interdum regionis more nummos coriaceos. Sic enim scripsit de beneficiis libro quinto Seneca; *Æs alienum habere dicitur & qui aureos debet, & qui corium forma publica percussum, quale apud Lacedæmonios fuit, quod usum numerata pecunie præstat.* Et hæc quidem sic in omnibus obscuris rebus seruari solent, exceptis iis de quibus aut expressio aliquo principali rescripto, aut alia quadam euidenti ratione aliter est definitum. Semper enim in obscuris quod minimum est, sequimur. Quo fit ut in obscuris rerum diuersitate legatis, penes hæredem electio sit, sique id quod minimum est in eligendo hæres sequutus fuerit, non est quod eo nomine reprehendi possit, quamuis id quod minimum est, non cogatur eligere, eaque vera est sententia capite 37. de legat. 1. & cap. 4. de trit. vin. vel ol. legat.

## X. PAVL. LIB. III. AD SABIN.

*Secundum naturam est commoda cuiusque rei cum sequi quem sequuntur incommoda.*

P A V L V S libro ad Sabinum tertio de tutelis incidenter differens, sic inter alia scripsit; *Tutores non ab hærede, sed à testatore protinus proficiscuntur, simul atque aliquis hæres extitisset. Nam & ipse hæres tutor dari potest, cap. 7. de testam. tutel.* Sensus est, non ab hærede instituto; sed à testatore sic testamento tutorem datum proficisci, ut statim sine aliqua intermissione, mortuo testatore ad tutelæ functionem ipso iure admitti debeat. *Simulatque aliquis hæres extitisset, inquit Paulus, hoc est, simulatque aperto publicatōque testamento hæres institutus aut substitutus declarasset velle se hæredem esse. Eoque sensu extare hæres dicitur*

apud Vlpianum in fragmentis, titulo vigesimo tertio. Si enim nemo exiterit hæres, irritum sit testamentum etiam iure factum, auctore eodem Vlpiano : & per hoc nec testamento tutores dari esse tutores iure possunt, cap. 10. §. 2. de testam. tutel. Cur autem ipse hæres dari testamento possit tutor, rationem expressit eodem illo ad Sabinum libro tertio ipse Paulus, *secundum naturam esse aiens, commoda cuiusque rei eum sequi, quem sequuntur incommoda* : ac per hoc inferens, *quemadmodum tutor rectè institui potest hæres : quia qui sentit incommodum, iniquum non est, ut etiam aliquod commodum sentiat* : sic quoque heredem tutorem rectè testamento dari. Commodum enim hereditatis etiam incertum tutela quodam onere pensari, & aequitas & ratio non dissuadent. Sic enim de tutelis scripsit institutionum libro primo Caius : *Qui proximior fuerit de agnatis, ad ipsum legitima tutela pertinet : quia is qui proximus fuerit ad tutelam, ipse proximus est ad hereditatem*. Illud nunc videndum est, quæ ratione ipse hæres testamento dari possit tutor, cum aliis nullis quàm liberis impuberibus dari tutores testamento soleant : adeò quidem, ut scripserit expressè Caius *lege duodecim Tabularum, parentibus esse permissum liberis suis, siue masculini siue fœminini sexus, non aliter testamento tutores dare, quàm si essent in potestate*, cap. 1. de testam. tut. Hæc si vera sunt, quoniam igitur modo fieri potest, ut hæres testamento dari tutor possit ; cum certum sit liberos impuberes esse necessariò hæredes debere : quæ liberi non tutores dari, sed contra tutores testamento accipere solent : & si prætereantur, rumpunt testamentum, eosque exhæredari toga prætexta bullaque non patiuntur. Et idcirco quod Paulus libro tertio ad Sabinum scribit, ipsum heredem tutorem dari testamento posse, hoc non quidem ad institutum, sed ad heredem referendum est



est substitutum. Hæredem enim substitutum hæredis instituti tutorem dari testamento potuisse, auctor est Cicero, sic libro decimo tertio Epistolarum † familiarium scribens; *Tuto Pinnio familiarissimè me vsum esse scire te arbitror, quod quidem ille testamento declaravit, qui me tum tutorem, tum etiam secundum hæredem instituerit.* Et Suetonius in Galba; *Tutorem, inquit, quod pupillum cui substitutus heres erat, veneno necasset, cruce affecit.* Et idcirco quod Paulus ait, *tutores non ab hærede, sed à testatore protinus proficisci simulatque aliquis heres exitit*, hoc tam de substituto, quàm de legitimo hærede instituto accipiendum est: quasi dixerit Paulus, tutorem testamento datum statim ad functionem tutelæ hæredis instituti admittendum esse, simulatque aut ipse hæres institutus se velle hæredem esse declarauerit: aut eo apud acta, ut fieri solet, abstento, substitutus id idem fecerit. Nam si abstento pupillo substitutus quoque hæreditatem repudiaret, utrique testamentum licet iure factum redderetur irritum, & per consequens nec ipsa quoque datio tutoris testamentaria fortiretur effectum. Cur autem ab hærede non proficiscantur tutores, hanc subiungit Paulus rationem, *quia fieri potest, ut ipse heres detur tutor*: hoc est, non quidem ut institutus hæres, sed ut substitutus detur tutor, quemadmodum ex Cicerone & Suetonio est demonstratum. *Post cuius hæredis substituti mortem, etiam alius eodem contextu testamenti dari tutor permittitur, inquit Paulus: videlicet hoc modo, FILIVS MEVS HÆRES ESTO, SI FILIVS HÆRES NON ERIT, SIVE HÆRES ERIT, ET ANTE MORIATVR QVAM IN SVAM TVTELAM VENERIT, L. TITIVS HÆRES ESTO: EVNDEM TITIVM FILIO MEO TVTOREM DO, ET SI ANTE MORIA-*

TUR TITIVS QVAM IN TVTELAM SVAM  
 FILIVS MEVS VENERIT, TVM C. SEM-  
 PRONIVS TVTOR ESTO. Eaquē vera senten-  
 tia est, capite septimo de testamenti tutela, quam  
 nullus esse videtur assecutus. Hæc regula iuris ci-  
 uilis non in hæredibus solum substitutis testamento  
 tutoribus datis, sed in aliis etiam multis antiqui iuris  
 tractationibus esse vsui solet. Est enim Iustinianus au-  
 ctor eo ipso quod hereditates libertorum libertarumque, si  
 intestati decessissent, iusserat lex ad patronos pertinere, cre-  
 didisse veteres legem voluisse etiam tutelam ad eos pertinere,  
 quia plerumque ubi successionis est emolumentum, ibi & tu-  
 tela onus esse debet. §. vnico de legit. patron. tutel. Est  
 etiam Vlpianus auctor, sicuri lucrum omne ad emptorem  
 hereditatis respicit, ita & damnum quoque debere ad eum  
 respicere, cap. 2. §. 8. de hæred. vel act. vendita. Apud  
 eundem Vlpianum *Aristo refert Cassium respondisse so-*  
*cietatem talem coiri non posse, ut alter lucrum tantum, al-*  
*ter damnum sentiret, & hanc societatem leoninam solitam*  
*appellari*, capite 29. §. 1. Pro socio, nimirum hoc sen-  
 su ut alter socius ei quam simillimus sit, qui leonem,  
 hoc est, prædonem ac deuoratore[m] socium nactus  
 est. Ea profectò ratione qua sic Inst. libro quarto cap.  
 20. scribit Lactantius; *facta est mihi hereditas mea si-*  
*cut leo*; id est, præda & deuoratio factus sum hære-  
 dibus meis. Iniri igitur nulla potest leonina societas,  
 certè propter eandem hac regulam qua traditum est  
 secundum naturam esse commoda cuiusque rei eum  
 sequi quem sequuntur incommoda. Siquidem con-  
 tra naturam est, ut vnus ex duobus sociis omne lu-  
 crum percipiat, & ad alterum damnum omne re-  
 dundet.



## XI. POMPONIVS LIB. V.

AD SABINVM.

*Id quod nostrum est, sine facto nostro ad alium transferri non potest.*

RES ita alienari solent, ut earum dominia aut transcriberentur, aut transferrentur, aut addicerentur, aut denique adicerentur. Transcribebantur, testamento; quemadmodum in libro de Noë & arca expressè his verbis docet Ambrosius; *Et homines quidem cum moriuntur, patrimonium suum testamento transcribere solent.* Transferebantur dominia, aut traditione nuda, aut mancipatione, aut in iure cessione. Addicebantur, aut adiudicatione viua Prætoris vel iudicis voce, aut præconis officio sub corona, sub hasta, de mensa, de lapide, de catasta, ut alio loco propediem demonstrabitur. Et denique per usucapionem adiaci nudæ possessioni rerum dominia etiam solent; nimirum ea ratione quam in nostro libello Ad leges 12. tab. iam dudum demonstrauius. Transcriptio & adiectio dominij nullum requirebant domini solemne factum, sed iure tacito peragebantur: translatio verò dominij, sine facto nequit explicari. Res enim à domino tradi, à domino per æs & librâ mancipio dari, à domino in iure cedi solemniter ad hoc solebat, ut eius dominium emptori iure Quiritium acquireretur.

*Mancipatio species erat alienationis, auctore ad Ciceronis Topica Boëtio, adhibitis quinque testibus civibus Romanis puberibus, & libripende, ad eum modum peragi solita quem libro singulari Ad leges duodecim Tab. latissimè descripsimus; simul explicantes in iure cessionis antiquum morem, veramque rei Mancipi & nec Mancipi differetiam. Res Mancipi, solæ dari Mancipio*

poterant; traditione quoque nuda acquirebantur res nec mancipi mobiles, quales sunt feræ bestiæ, & denique *in iure cessio communis erat alienatio rerum mancipi & nec mancipi*, inquit Vlpianus in fragmentis, tit. 19. Iuris huiusmodi solemnitates Pomponij tempore in usu fuerunt, siquidem eas primus sustulit Iustinianus. Et idcirco facile intelligimus quid sibi his verbis voluerit Pomponius: *Id quod nostrum est, sine facto nostro ad alium transferri non potest*. Nimirum nullius rei dominium sine mancipatione, aut in iure cessione, aut etiam nuda traditione pro cuiusque rei qualitate iure Quiritium à vero domino transferri potuisse; adeò quidem ut si res aliqua mancipi vendita esset, & tradita, neque tamen mancipio data, nec in iure cessa, nec usucapta; in bonis quidem illa emptoris esset usu & fructu, verum mancipio siue nexu remaneret venditoris, teste eodem Vlpiano, in fragm. tit. 1. Id igitur quod nostrum est, *sine facto nostro*, hoc est, sine mancipatione, in iure cessione, & sine traditione nostra ad alium transferri iure Quiritium non potest. Et hæc est huius regulæ vera sententia, quæ regula ex Pomponij lib. ad Sabinum quinto desumpta est, illi fortassis loco eiusdem libri applicata, quo tradidit Pomponius rei commodata & possessionem & proprietatem retineri, cap. 8. Commodati. Nam cum id scriberet Pomponius, hanc videri potest rationem subiecisse; Id enim quod nostrum est, sine facto nostro ad alium transferri non potest; & sic contendisse commodato dominium non transferri, præsertim cum ad dominij translationem opus fuerit olim quodam mancipationis aut in iure cessionis solemniter facto; quod factum commodato explicari nec solet, nec potest.

## XII. PAVLVS LIB. III.

AD SABINVM.

*In testamentis plenius voluntates testantium interpretantur.*

DE vsufructu, vsu, & habitatione accuratissime differuerunt Vlpianus libr. 17. ad Sabinum, & Paulus ad eundem Sabinum libr. 3. Inter alia ab iis tractatum fuit, is cui ædium legatus est vsus quales recipere personas possit; & aiunt quidem Tuberone, La-beone, & Celso auctoribus definitum fuisse, vt hospites, liberti, inquilini, & clientes recipi possent, cap. 2. & 3. de vsu & habit. Cur autem inquilini & liberti potuerint recipi, non tam mirum est, quàm quod hospites aut clientes reciperentur. Nec id etiam mirum videbitur ei, qui non ignorat quantam patronatus & hospitij iuris rationem habuerint Romani. Moris enim erat, vt humiliores ciues totos sese in potentiorum fidem & clientelam dederent; eaque ratione potentiores quidem patroni, humiliores verò clientes dicebantur. Quo spectat illud Sidonij Apollinaris Epistolarum libr. 7. *Quem iure seculari patronum, iure Ecclesiastico filium excolo, vt cliens, vt pater diligo.* Morem hunc expressit euidenter Dionysius Halicarnassæus libr. 2. & Aulus Gellius libr. 5. cap. 13. Eaque dedicatione cum patronis suis hospitium domumque communem habebant clientes, cap. 3. §. 3. de penu legat. Id quod his versibus Terentius etiam manifestum facit in Eunuch.

——— *Tum autem Phadria*

*Meo fratri gaudeo amorem esse omnem in tranquillo:  
una est domus:*

*Thais patri se commendauit in clientelam & fidem,*

I 5

*Nobis*

*Nobis dedit se.*

Quandoquidem igitur domū habuerint cum suis patronis communem clientes, quid mirum cui ædium vsus legatus est, eum clientes suos recipere potuisse? Sed cur hospites recipere potuit? Certū est eum etiam ciues Romanos habuisse morem, vt quò potentiores erant & nobiliores, eò sibi magis potentissimos quosque & nobilissimos tam peregrinos quàm prouinciales, non quidem patrōnatus, sed hospitij iure deuincerent, dextris iunctis, præstito inter præsentēs aut per internuntios sacramento, datisque muneribus mutuis, quemadmodum in Virgilium Seruius, & Donatus in Terentium testantur. Hæc si vera sunt, non est igitur absurdum eum cui ædium legatus est vsus, hospites etiam recipere potuisse. Domum enim hospites cum hospitibus vi & potestate præstiti sacramenti habebant communem. Illud etiam quæsitum fuit si mulieri ædium relictus sit vsus, an cum marito habitare mulier possit. Et respondet eodem illo ad Sabinum libro decimoseptimo Vlpianus, posse eam cum marito habitare, & primum Q. Mutium id admisisse, ne mulieri matrimonio carendum foret cum uti vult domo; idque adeò verum esse, vt etiamsi vidua legatus sit ædium vsus, contractis post usum constitutum nuptiis, mulier cum marito nouo potuerit habitare, cap. 4. De usu & habit. Addiditque Paulus socerum quoque cum nuru, cui ædium legatus est vsus habitare posse, utique cum vir una sit, cap. 5. d. tit. Viri enim ratione inter nurum & socerum affinitas constat, quæ affinitas huiusmodi habitationis interpretationem requirit. Si igitur sic testator mulieri ædium legauerit usum, TULLIÆ MEARVM ÆDIVM VSVM RELINQVO, benigna interpretatione etiam maritum Tullia, inquit Vlpianus, recipere poterit; & præter maritum posse à nuru etiam recipi socerum,

*socerum*, ad Sabinum libro tertio auctor est Paulus, d. cap. 5. hanc, ni fallor, subiiciens rationem; *In testamentis enim plenius voluntates testamentum interpretantur*; de iis nimirum voluntatibus sentiens quæ non plenè aut absolutè satis expressæ sunt. Id quod huiusmodi speciebus quibus de ædium vñ legato disseritur optimè conuenit. Qui enim ædium legat vñ, ea non videtur eius esse intentio, vt velit eũ cui legatus est ædium vñ, solum in iis habitare, sed potiùs eos etiam recipi videtur voluisse testator, quos recipere deberet, si ædium proprietas illius esset, cui ædium legatus est vñ. Atque ita plenius quàm expressum est testamento, huiusmodi legatum interpretari prudentes solent, ad libertos, inquilinos, clientes, hospites, maritum, socerumque illud trahentes. Et hìc verus est huius regulæ sensus. Nam cùm hæc regula ex Pauli ad Sabinum lib. 3. desumpta sit, & cùm huiusmodi quæstiones eodem libro Paulum tractasse omnino constet, quis obsecro dubitabit quin optimè ad testatorum de vñ ædium legato voluntates plenius, quàm vt illæ contextu testamenti expressæ sunt, interpretandas referri hæc regula possit, & per consequens optimè coniungi cum cap. 5. de vñ & habitatione.

## XIII. VLP IANVS LIB. XIX.

## AD SABINVM.

*Non videtur cepisse qui per exceptionem à petitione remouetur.*

H V I V S capitis inscriptio manifestum facit, regulam hanc ad tractatum legatorum omnino referendam esse. Libro enim decimo nono ad Sabinum de legatis disseruit Vlpianus. Et inter alia in eodem libro ab Vlpiano tractatũ fuit, *si creditori meo tutus aduersus*  
eum

*eum exceptione id quod ei debeo legauero, an utile legatum sit.* Et respondet Vlpianus *utile legatum esse, quia remissa creditori exceptio videtur*, cap. 28. de legat. 1. hanc ni fallor subiiciens rationem; *Non enim videtur cepisse qui per exceptionem à petitione remouetur.* Quasi dixerit Vlpianus Si centum acceperim mutua, & postea cum meo creditore pactus fuerim de iis centum non reddendis, hoc pacto mutui contractus sic non extinguitur, vt possit impedire quo minus centum à me iure petantur cap. 4. de constitut. pecun. cap. 5. 1. de pact. sed exceptionem habeo pacti conuenti; qua exceptione à petitione sua remouebitur creditor. Et quia ipso iure contractus mutui exceptione pacti non poterat extinguui, inde etiam euenit vt is qui mutuum dedit & pactus est illud non petere, ipsa pactione à debitore suo *cepisse*, hoc est, recepisse non videatur id quod mutuo datum fuit; siquidem illud petere creditor potest, quamuis à petitione sua, exceptione pacti conuenti remoueat; quod vtique non faceret idem creditor, si ipso iure extinctus esset contractus mutui vtputa acceptilatione. Tunc enim id quod mutuo dederat, omnino videretur à debitore suo creditor recepisse, & per consequens mutui contractus ipso iure extinctus esse, quemadmodum euidentissimè demonstrauimus Variorum lib. 2. cap. 5. & 6. Cùm igitur apud Vlpian. quaesitum esset an utile legatum sit, si creditori meo id quod ei debeo, legauero, tutus aduersus eum exceptione, considerans Vlpian. quidnam appellatione debiti posset contineri, hac videtur distinctione vsus esse, vt contenderit aliud esse si debitum exceptione, aliud si ipso iure tolleretur. Nam si ipso iure debitum extinctum esset, vtique omne quod sibi deberetur, creditor à debitore cepisse videtur. Qui autem exceptione à petitione debiti potest remoueri,

is

is tamdiu videri potest id quod sibi debetur non cepisse, quamdiu nulla petitioni eius obicitur exceptio. Et idcirco debitum ipso iure extinctum legari à debitore creditori inutiliter solet; cum contra, debitum non quidem extinctum, verum ope exceptionis etiamnum extinguendum legetur vtiliter. Quamdiu enim exceptioni locus est, tam diu non videtur id quod sibi debetur creditor cepisse; ac proinde creditori vtiliter potuisse huiusmodi debitum à debitore legari. Nam hoc legato non debitum aliquod nouum constituitur, non verus resuscitatur, sed remittitur duntaxat exceptio; eaque exceptione remissa, esse petitioni locus vtiliter solet, quæ petitiō antea propter exceptionem nullius fuerat auctoritatis. Et rectè quidem verbum *cepisse*, in Florentinis Pandectis sine diphthongo descriptum extat, quod verbum à quibusdam interpretibus expressum diphthongo miram peperit confusionem, & rei per se alioqui dilucidæ incredibilem obscuritatem.

## XIV. POMPONIVS LIB. V.

## AD SABINVM.

*In omnibus obligationibus in quibus dies non ponitur, presenti die debetur.*

STIPVLATIO simul atque effectum sic incipit fortiri, vt quod ea comprehensum est, incipiat deberi, protinus *committi* dicitur. Est enim Nonius Marcellus auctor, inter alia pro initiare *committendi* verbum nonnunquam à Romanis vsurpatum fuisse, hunc proferens Virgilij versum;

*Et tuba commissos medio canit aggere ludos.*

Omnis obligatio aut purè, aut sub conditione, aut in diem, aut ad certum diem, aut denique in diem & sub

sub conditione simul concipi solet, cap. 44. in princ. de obligat. & act. cap. 8. de verb. oblig. Obligatio purè concepta statim committitur. In omnibus enim obligationibus in quibus dies non ponitur, *presenti die debetur*, hoc est, in obligatione purè concepta statim cedit & venit dies, cap. 213. de verb. signifi. Nam, ut ait lib. 3. declamationum Seneca, *quoties tempus non adicitur, praesens intelligitur*. Obligatio sub conditione contracta, antè conditionis euentum non committitur, §. sub condit. Instit. de verb. oblig. quemadmodum nec in ea obligatione quæ in diem concepta est antè statutum diem, dies cedit, d. c. 44. in princ. & d. c. 213. Cæterum si in diem & sub conditione simul aliqua fuerit stipulatio concepta, & antè contigerit euanescere conditionem quam venerit statutus dies, inter Proculianos & Sabinianos agitatum fuit, *an ad conditionem, an verò ad diem constitutum committatur stipulatio*; hoc est, an statim à tempore euanescentis conditionis incipiat effectum sortiri stipulatio sub conditione & in diem simul concepta, an verò ad hoc ut sortiatur effectum necessum fuerit diem expectari. Et Sabinus quidem Proculo visus est adsentiri stipulationem eiusmodi ad hoc effectum à tempore euanescentis conditionis sortiri, ut incipiat deberi id quod ea stipulatione comprehensum est; verum ad hoc ut possit peti, effectum utique ante statutum diem non sortiri, d. cap. 213. Idque illud est quod sibi his verbis voluit Paulus; In illa stipulatione, **SI KALENDIS STICHVM NON DEDERIS, DECEM DARE SPONDES** mortuo homine quæritur an statim antè Kalendas agi possit. Sabinus, Proculus, expectandum diem actori putant, quod est verius. Tota enim obligatio sub conditione & in diem collata est; & licet ad conditionem committi videatur, dies tamen superest, cap. 8.



cap.8. de verb. oblig. Hæc Paulus his verbis, & *licet ad conditionem committi videatur*, antiquam phrasim huius nostri seculi hominibus eruditis prorsus ignotam, exprimens eleganter. Sic enim veteres locuti sunt, *Ea obligatio ad conditionem committitur, ea stipulatio ad diem committitur*, nihil aliud significare volêtes, quàm obligationem aliquam ab ea conditione quæ aut adimplera est, aut qua deficit obligatio, initium sumere iusti debiti. Idque ex Varr. docuit euidentissimè Nonius Marcell. Cum enim ex Virgilio demonstrasset Nonius *committere* pro initiare Romanos posuisse, hunc quoque Varronis locum subiecit; *Discumbimus missati, dominus matura oua ad cœnam committit*. Quo in loco ad cœnam committere eo prorsus sensu visus est Varro posuisse, quo dixit Paulus ad conditionem committi obligationem. Per *dominum* intelligit Varro exhibitorum conuiuij, & per *oua matura* oua cocta. Sic enim hunc Varronis locum interpretatus est idem Nonius in dictione, *dominus*, & in dictione *maturum*. Cuius loci ea esse videtur vera sententia, ut is qui aliquod exhibet conuiuium, ad initium cœnæ oua suis conuiuiis cocta proponat. Simili modo ea rectè dici potest ad conditionem committi obligatio apud Paulum, quæ ad euanescentis conditionis initium relata plenum iusti debiti sortitur effectum; siquidem tunc *committi* dicitur obligatio, cum id quod ea continetur incipit deberi. Quemadmodum igitur ad cœnam committitur id quod ad cœnam mittitur siue proponitur initiû, auctore Nonio; sic etiam obligatio quæ ad initium aut impletæ aut extinctæ conditionis refertur, rectè ad conditionem committi dicitur. Et hæc quidè cum ita se habeant, non est igitur cur hæc Pauli verba, *Et licet ad conditionem committi videatur*, vitiosa esse, virum quendam eruditissimum sequuti,

sequuti, nobis persuadeamus, & sic emendanda, *Et licet ante diem conditio committi videatur.* Quis enim mortalium vnquam legit conditionem committi, de ea potissimum conditione sentiens quæ iam prorsus evanuit, & qua defecit obligatio? Dices; committitur pœna: verum est, sed ita committitur, vt ea incipiat deberi. Nemo enim vnquam dixit evanescentem pœnam committi.

## XV. PAVLVS LIB. IV.

## AD SABINVM.

*Is qui actionem habet ad rem recuperandam, ipsam rem habere videtur.*

POSSESSIO recuperari duobus modis solet, nimirum aut interdicti, aut actionis medio. Non enim nouum est vt de quibus rebus interdicta prodita sunt, de iis quoque actiones interdum decernantur. Interdictum quod vi aut clam competit si quis alienas arbores exciderit; illudque interdictum cum actione legis Aquiliæ, & XII. Tabularum concurrere auctor est Caius, cap. 25. §. 4. Locati. Testatur etiam Vlpianus restituendæ possessionis ordinem aut interdicto expediri, aut per actionem, cap. 1. §. 3. vti possid. Proinde si me vi ex fundo meo deturbasses, recuperandæ possessionis nomine duplex mihi remedium compete-  
bat. Aut enim poteram interdicto, aut recuperatorio iudicio tecum experiri. Interdicto quidem, decreto Prætoris postulans in pristinam meam possessionem restitui; iudicio verò iniuste deiectum me à fundi possessione in iure conquerens, eoque nomine dari recuperatorem postulans, qui de tota possessionis causa cognoscat & aduersarium pœnis ciuilibus mul-  
ctet. Interdum decernebatur hoc modo; VNDE TV

ILLVM

ILLVM VI DEIECISTI, RESTITVAS; & protinus is qui deiectus erat, restitui ex hoc interdicto debebat; in qua restitutione adhiberi vsurpationis solemnia solent ad hunc modum. Qui vi deiectus erat interdicto recuperatorio à Prætore impetrato cōuocabat amicos suos, & cum iis in fundum recuperandæ possessionis gratia deductus, præsentē aduersario furculum defringebar, solemnibus verbis cedere aduersarium, vacuamque relinquere possessionem iubens; defractoque furculo rursus ex fundo per eodē amicos domum deducebatur. Morem hunc euidentissimis aliquot argumentis alio loco demonstrauimus: de quo more visus est etiam sentire Aggenus Urbicus cū ita scriberet; *De loco si possessio petenti firma est, etiam interdicere licet dum cetera ex interdicto diligenter agantur. Magna enim alea est litem ad interdictum deducere, cuius est executio perplexissima.* Nec sanē aliud quidquam continebat interdictum, quā simplicem quandam decreti formulam, quā fieri quid aut non fieri sic à Prætore iuebatur, vt ei parere necessum statim foret, sine aliqua causæ indagatione; ac proinde nullam sententiæ pronuntiationem, nullamque rei iudicatæ vim aut effectum sortiri aliquod interdictum solet, cap. 35. de action. emp. & venditi. Aliud est si neglecto interdicto maluerit iudicio recuperatorio is qui deiectus est in possessionem restitui. Tunc enim non recuperari duntaxat possessio solet, sed tanti etiam aduersarius condemnabatur, quanti ea res esset, hoc est, in duplum, cap. 21. in fine, de hæred. vel actio. vend. habita etiam eius quod interest, ratione. Idque illud est quod edicti quadam perperui antiqua clausula sic apud Valerium Probum notis expressum inuenio; **Q V A N T I E A R E S E R I T, T A N T Æ P E C V N I Æ I V D I C I V M R E C V P E R A T O -**  
**K R I V M**

RIVM DABO, TESTIBVSQVE PVBLICE DVNTAXAT DECEM DENVNCIANDI POTESTATEM FACIAM. Per testes cos intelligit Prator ciues Romanos, qui per vim deiectionem fieri viderant. Et hæc quidem cum ita se habeant, nunc facile intelligimus quid sibi hac regula voluerit Paulus. Per actionem enim, si non iudicium recuperatorium, ipsum saltem intelligit recuperatorium interdictum, ad rem solo coherentem, vnde quis vi deiectus est, recuperandam omnino pertinens, c. 1. §. 2. de vi & vi armata. Siquidem nouum non est actionis verbo interdictum quoque contineri, c. 37. de obligat. actionib. Differuit libro quarto ad Sabinum Paulus de testatore qui res suas alicui legauit, cap. 72. de lega. 3. & in differendo cum quaesitum esset quidnam suarum rerum appellatione contineretur, videtur Paulus respondisse eas etiam res immobiles nomine suarum rerum comprehendendi, quarum possessio recuperari interdicto potest; hanc subiiciens rationem: *Is enim qui actionem habet ad rem recuperandam, ipsam rem habere videtur.* Eaque est huius regulæ vera interpretatio, quam præ se fert ipsa inscriptio, quâ libro Pauli quarto ad Sabinum hæc eadem regula tribuitur.

## XVI. VLP IANVS LIB. XXI,

AD SABINVM.

*Imaginaria venditio non est pretio accedente.*

OMNIS venditio ex re quæ venditur & ex pretio constat. *Pretium* id appellari Varro auctor est, quod *æstimationis emptionisque causa constituitur à solis peritis dictum ac definitum, siquidem hi duntaxat id facere rectè possunt.* Sine pretio nuda venditio est & imaginaria, quod tunc accidere solet, cum res aliqua momenti valorisque

lorisque maximi, addicitur nummo. Huiusmodi enim venditio idcirco vera non est, quia pretium non accedit; siquidem nummus & pretium in iis venditionibus diuersa sunt, quibus ex vno aut altero nummo honestum aliquod rei quæ venditur pretium non constat. Idque sibi visus est Vlpianus voluisse, *conductionem quæ est in vno nummo ab ea conductione quæ ex pretio constat*, omnino distinguens, cap. 10. in fin. de acquir. poss. Sed quia in locum pretij tunc surrogatur nummus, cum nummo quid addicitur, hinc factum etiam est, vt imaginem venditionis res addicta nummo præ se ferat, indeq; nudæ & imaginariæ venditionis nomen acceperit. Imaginarium enim id omne vocabant veteres, quod non iure & more confectum, sed sub aliquo iuris morisque certi prætextu fiebat. Quo sensu eos qui à priuatis per vim obtinebantur fasces, imaginarios fasces Liuius appellat, sic de Horatio Valerioque libro tertio scribens: *Neque enim sibi priuatos aut in curia, aut in concione posse obstare, neque se imaginariis fascibus eorum cessuros esse*. Paulus auctor est nudam & imaginariam venditionem haberi pro non facta, & ideo nec alienationem eius rei intelligi, capite 55. de contr. empt. Et Modestinus, *contractus*, inquit, *imaginarij etiam in emptionibus, iuris vinculum non obtinent, cum fides facti simulatur, non intercedente veritate*, capite 54. de obligat. & actio. Et quamuis ita Paulus ac Modestinus scripserint, nihilominus tamen huiusmodi contractibus iure & licitè Romanos vsos esse satis constat. Est enim expressè Pomponius auctor, *maritum fundi vsum fructum dotalem vendere vno nummo uxori potuisse*, cap. 66. de iure dot. Et idcirco facile mihi persuadeo has difficultates optimè componi posse, si dicamus omnem omnino imaginariam huiusmodi venditionem sic iuris vinculum nō obtinere vt

vendita res nummóque addiéta non tamen tradita,  
 empti iudicio peti ab emptore potuerit; verùm si res  
 omnino addiéta fuerit & tradita, tunc imaginaria  
 hanc venditionem instar inducere donationis eiúsque  
 vim omnem, auctoritatem & nomen obtinere, cap.  
 46. Locati. Erat enim moris, vt omnis ferè donatio  
 venditione quadam imaginaria perageretur, quemad-  
 modum non obscurè demonstrat Iustinianus cap. ult.  
 C. de donat. Eiusque moris antiquissimæ inscriptio-  
 nes duæ meminerunt, quarum vna in musæo Carpen-  
 si, altera in ædibus Benzoniæ Romæ etiamnum  
 extare dicitur. Prior inscriptio sic habet; V T N E  
 QVIS EX HOC AGRO ÆDIFICIOVE QVI-  
 BVS DONATIONIS CAUSA EMANCIPA-  
 TVM ERIT, DE NOMINE ALIENASSE VE-  
 LIT. Altera sic; QVOD SI QVIS ID MONV-  
 MENTVM PARTEMVE EIVS VENDERE  
 VOLET, VEL DONATIONIS CAUSA CUI  
 MANCIPARE VOLVERIT, ALIOVE QVO  
 NOMINE EIVS MONVMENTI PARTEM  
 ALIENARE TEMPTAVERIT, DARE DAM-  
 NAS ESTO ÆRARIO POPVLI ROMANI  
 H-S XV. M. N. Eoque pertinet illud Suetonij de C.  
 Cæsare; *Bello civili super alias donationes amplissima præ-  
 dia ex auctione hasta nummo addixit.* Et id quidem aded  
 verum est, vt hi qui gratuitam operam præstare vo-  
 lebant, sestertio nummo conducentibus eam adice-  
 rent, quemadmodum ex Valerio doceri facile potest,  
 qui ad hunc modum in libro quinto scribit; *Marco Cor-  
 nuto Pratore funus Hirij & Pansa iussu Senatus locante,  
 qui tunc libitinam exercebant, tum rerum suarum usum, tum  
 ministerium suum gratuito polliciti sunt, quia hi pro repub.  
 dimicantes occiderant; perseverant, ique postulatione extende-  
 runt ut exequiarum apparatus sestertio nummo ipsis præ-  
 bentibus*

*ventibus addiceretur.* Eoque sensu nummum sestertium accepit etiam Epistolarum libro decimoquinto Seneca. Ait enim; *Adeoq̃ falleris, vt qua maxima apud nos habentur, dinitia, gratia, potentia, sestertio nummo aestimanda sint.* Huius etiam loci est hæc phrasis antiqua, assis non facere, cuius meminit idem Seneca Epistolarum libro vigesimo secundo his verbis; *Istos tristes & superciliosos aliena vita censes, siue hostes publicos, pedagogos assis ne feceris.* Et quamuis scripserit expressè Paulus, *si quis conduxerit nummo vno, conductionem nullam esse,* d. cap. 46. nihilominus tamen euenire interdum solet, vt locatio addicta nummo, & iustæ & legitimæ locationis vim haberet; idque tunc accidere solet cum ex vno nummo iustum locationis pretium constat: Quælis apud Plautum operarum locatio est, quas nummo conductori addixerat coquus; Sic enim scribit in *Aulularia* Plautus; *Nummo sum conductus, plus iam medico mercede opus est.* Et hæc quidem de iis contractibus imaginariis hætenus qui instar donationis inducebant; de quibus solis hæc regula intelligi debet. Est & alia quædam imaginarij contractus species multum ab illis de quibus hic agimus diuersa; & ea quidem ad seruos pertinet qui suis nummis emuntur. Moris enim erat vt serui peculio sese interdum redimerent ex seruitute, eaque redemptio ad hunc modum fiebat. Seruus hominem liberum subornabat, cuius opera redimi à suo domino posset, & manumitti, seruo, ipso aut pretium ex peculio prorogante, aut se delegante, aut in se recipiente debitum; quemadmodum per fidem contractus inter emptorem & seruum ab initio tractatum fuerat. Huic contractui ante satis non erat ab emptore quàm si emptus seruus manumissus esset, & nummi peculiæres emptionis nomine exoluti; eaque emptio tam imaginaria dicebatur, quàm ea quæ

ſiebat nummo ſeſtertio, cap. 4. §. 1. de manumiff. Non enim verà potuit huiusmodi emptio dici, cùm emptor nullum haberet ſerui acquirendi propoſitum, nulloſque erogaret nūmos proprios; ſed potius aliud agens & aliud ſe ſimulans agere, negotium illius gereret, qui in rem propriam ob omni mancipatione iure ciuili procul arceri debebat. Et hæc quidem imaginariæ emptionis ſpecies etiam antiquiſſima eſt. Sic enim in Aulularia ſeruum Strophilum Plautus loquentē facit;

*Aſt ego partem impartiri malim vnde redimar.*

EMPTIONIS huiusmodi meminit etiam Seneca, ſic Epistoſarum libro vndecimo ſcribens; *Quid autem melius potes velle, quàm excipere te huic ſeruituti, quæ omnes premit, quam mancipia quoque conditionis extrema & in his ſordibus nata omni modo exuere conantur, peculium ſuum quod comparauerant ventre fraudato pro capite numerant.* Nec aliò videri poteſt in Bucolicis Virgilius reſpexiſſe, cùm ita ſcriberet.

—— *Cum me Galatea reliquit*

*Nec ſpes libertatis erat, nec cura peculij.*

SENSVS enim eſt: quia ſpes nulla fuit adipiſcendæ libertatis, idcirco nullam peculij curam habui, quo peculio me aliquando ex ſeruitute redimere poſſem. Et hæc quidem ſi vera ſunt, nunc facilè intelligimus quid ſibi voluerit Vlpianus, cùm ſcriberet, *cum qui nummis ſuis emitur, epistoſa Diuorum fratrum in eam conditionem redigi, vt libertatem adipiſcatur*, d. cap. 4. in principio. Id enim ſic accipere non conuenit, quaſi Diui fratres primi videantur conſtituiſſe eum qui nummis ſuis emptus eſt; poſſe ad libertatem peruenire; ſed ita potius, vt ſeruus nummis ſuis emptus cum emptore, in cuius fidem confugit, conſiſtere poſſit, & queri quod ab eo non manumittatur; Romæ quidem apud Præfectum vrbi, in prouinciis verò apud Præſides.



DE DIVERSIS REGVLIS IVRIS. 151  
des. Ita enim expressè epistolam Diuorum fratrum  
interpretatus est Marcianus, cap. 5. de manumiss. cap.  
67. de iudic. Eaque interpretatio idcirco etiam veri-  
similior est, quod satis constet ante hanc Diuorum  
fratrum epistolam querelæ huiusmodi locum non  
fuisse. Si enim fuisset locus non sic scripsisset libro de-  
cimo quarto Cornelius Tacitus; *Haud multò post præ-  
fectum vr̃bis Pedanium Secundum seruus ipsius interfecit,  
seu negata libertate cui pretium pepigerat, siue amore exo-  
leri insensius, & dominum amulum non tolerans.* Et sanè  
cùm scriberet Vlpianus receptum esse ut serui nummos  
peculiares dando perueniant ad libertatem, cap. 3. circa  
princ. de statu lib. videtur vtique primam huiusmo-  
di contractus imaginarij originem prudentum inter-  
pretationi acceptam tulisse; & sic per consequens  
moribus receptoque iuri potius eam adscripsisse,  
quàm alicui Diuorum fratrum constitutioni, quod  
est verissimum.

## XVII. VLPIANVS LIB. XXIII.

AD SABINVM.

*Cùm tempus in testamento adiicitur, credendum est pro  
herede adiectum, nisi alia mens fuerit testatoris: sicuti in sti-  
pulationibus promissoris gratia tempus adiicitur.*

LIBRO ad Sabinum vigesimo tertio, ex quo hæc  
regula desumpta est, plurima scripsit de eo tempore  
Vlpianus quod in testamento adiicitur, cap. 49. de le-  
gat. 1. cap. l. de legat. 3. cap. 10. de condit. & demonstr.  
c. 10 & 12. Quando dies legat. ced. Et inter cætera vi-  
detur definiuisse legatum in certum diem alicui reli-  
ctum mortuo ante diem legatario deficere sua condi-  
tione, & per hoc sic euanescere, vt ex eo nihil ad hæ-  
redē legatarij cello die transferri potuerit, d. c. 49. §. 1.

K 4

& d. c.

152 IAC. RÆVARD. TOM. I. COMM.  
& d.c.10. de condit. & demonstrat. Idque sic ad Sa-  
binum libro vigesimo tertio tradidit Vlpianus; hanc  
eodem libro proferens rationem; *Cum enim tempus in  
testamento adicitur, credendum est pro hærede adiectum,*  
hoc est, cum aliqua in certum tempus relinquuntur  
legata testamento, sic tempus illud pro hærede, à quo  
legavit testator, adiectum videri, ut mortuo ante tem-  
pus cessum legatario deficiat nondum impleta con-  
ditione legatum, & per consequens, nihil ab hærede  
testamento legatarij hæredibus debeat præstari. Hinc  
quæsitum fuit si sic impuberi filiofamilias legatum  
sit; CVM IS IN TVTELAM SVAM PERVE-  
NERIT, quod tempus in huiusmodi legato spectari  
debeat, an pubertatis, an verò solutionis patriæ po-  
testatis. Et responder eodem illo ad Sabinum libro 23.  
Vlpianus tempus pubertatis duntaxat spectandum es-  
se, nisi mens talis fuisse videatur testatoris, ac si dixis-  
set expressè, IN SVAM TVTELAM ET IN SVAM  
POTESTATEM; tunc enim liberatus patria pote-  
state legatarius etiam impubes, protinus petere lega-  
tum poterat; sique antequam in tutelam potestatem-  
que suam peruenisset mortuus esset, tempus in huius-  
modi testamento adiectum proficiebat etiam hæredi  
testamentario. Et quia in perpetua tutela erant mu-  
lieres, dubitatum hinc etiam fuit, an & quando in  
suam tutelam peruenisse filiafamilias dici posset. A  
pupillari multum differt muliebris tutela, & idcirco  
simul atque viripotens esse cœperat filiafamilias & per  
hoc tutela pupillari liberari, tunc ea quodammodo in  
suam peruenire tutelam dicebatur. Idque ad Sabinum  
lib. 4. sibi videtur Paulus voluisse, cap. 51. de legat. 3.  
Nec id adeò mirum, siquidem à pupillari multum dif-  
fert tutela muliebris. Nam *mulierum tutores non gessisse  
negotia, sed auctoritatem duntaxat interposuisse*, auctor est  
in

in fragmentis Vlpianus titulo 11. Testatur etiam pro Muræna Cicero, *genus quoddam fuisse tutorum quod potestate mulierum continebatur*; satis per hoc indicans quodammodo in suam tutelam mulieres viripotentibus peruenire. Ridet enim Iurisconsultos Cicero, qui cum auctores fuerint muliebris tutelæ, illud efficere non potuerunt, ut mulieres in tutorum essent potestate; siquidem in mulierum potestate tutores potius videntur fuisse, quàm fuerint in tutorum potestate mulieres. *Si quid in annos singulos legatum fuerit, unum legatum non esse, sed plura*, eodem ad Sabinum libro vigesimo tertio auctor est Vlpianus, cap. 10. de condit. & demonstrat. Differt à legato annua, bima, trima die relicto, legatum annuum. Si quid enim in annos singulos fuerit legatum, singulis annis eius, cui ita legatum est, inspicere conditio solet; tempusque in huiusmodi testamento adiectum tamdiu hæredi prodesse testamentario poterat, quamdiu non cessisset postremus annus, c. 35. §. fin. de mort. caus. don. Aliud est in legato annua, bima, trima die relicto. Si enim ita testator dixerit; **CVM AD DECIMVM QVARTVM ANNVM PERVENERIT, ANNUA, BIMA, TRIMA DIE TITIO DARI XXX. AVREOS VOLO**, huiusmodi specie tempus annua, bima, trima die præstationis, ex die completi decimi quarti anni statim cedit, c. 49. §. 1. de leg. 1. Et quia legatum annua, bima, trima die relicto, unum legatum est in tres diuersas pensiones annuas distributum (cap. 3. §. 10. & 11. de statulib. cap. 3. de annuis legat.) idcirco etiam semel duntaxat legatarij in huiusmodi legato spectari conditio solet, nimirum tempore cessi diei. Tunc enim si vixerit legatarius, etiam si antè trimam diem mori eum contigerit, nihilominus tamen rectè ad suum hæredem legatum transmittit; sin contra antè

K 5

cessionem

cessionem diei decesserit legatarius, tempus in hoc testamento adiectum heredi proderit testamentario. Deque huiusmodi vulgari clausula, annua, bima, tri-ma die, arbitror etiam Vlpianum sensisse, cum ita scriberet; *isidem autem diebus*, hoc est, *isidem pensionibus heredi prestabitur legatum*, quibus legatario ipsi prestabatur. cap. 5. quando dies legat. Simili modo si ita stipulatus fuero, *Cum ad tricesimum annum pervenero*, *promittis mihi centum dare?* in huiusmodi stipulatione sic gratia promissoris adiacere tempus intelligitur, ut mortuo antè diem cessum reo stipulandi protinus liberetur promittendi reus. Idque etiam locum habere videtur in stipulationibus mortis causa. In iis enim pro reo promittendi tempus adiacitur. Et sanè ut mortis causa donare, sic etiam stipulari mortis causa veteres solent; & quemadmodum mortis causa donatio perfici non intelligitur antequam donantis mors insequatur, cap. 32. de mort. causa donat. ita quoque stipulatio causa mortis antè promissoris obitum committi non solet. Idque mihi visus est apud Festum Antistius Labeo voluisse. Sic enim scribit Festus libro undecimo; *Mortis causa stipulatio existimatur fieri; ut ait Antistius Labeo, quæ ita sit ut morte promissoris confirmetur.* Eoque sensu mortis causa promissionem videtur Tryphoninus accepisse, c. 76. de iure dot. Hinc etiam intelligimus quid sibi Paulus voluerit his verbis; *Sed qui mortis causa in annos singulos pecuniam stipulatus est, non est similis ei cui in annos singulos legatum est. Nam licet multa essent legata, stipulatio tamen una est, & conditio eius cui expromissum est, semel intuenda est*, cap. 35. §. fin. de mort. caus. donat. Si expromissum tibi mortis causa fuerit in annos singulos certam pecuniæ summam præstari, non es ei similis cui in annos singulos legatum est, inquit Paulus. Eius enim cui quid in annos

legatur

legatur singulos, annis singulis inspicienda conditio est, quia quotannis nouum esse relictum legatum censetur; at qui stipulatur mortis causa in annos singulos quid præstari, stipulationem duntaxat vnam interponit, quæ cum antè promissoris mortem committi non potuerit, sic tandem perficitur morte promissoris; vt indiuiduam quandam sub pensionibus stipulationis iure diuisis, & separatis, in sese complecti videatur obligationem. *Eius enim cui quid mortis causa in annos singulos est expromissum, semel tantum*, inquit Paulus; *conditio est inspicienda*; hoc est, an is qui mortis causa in annos singulos stipulatus est viuatur, an verò exemptus sit rebus humanis, non vt in annuo legato annis singulis, sed vt in legato annua, bima, triuma die relictæ, semel considerari duntaxat solet, nimirum tempore mortis promissoris, sique vixerit eo tempore stipulator, tunc primum vti ex Labeone probatum est, mortis causa committitur stipulatio; sin verò mori eum contigerit antè promissorem, tunc etiam viuentis ipsius promissoris gratia tempus stipulationis instrumento censebitur adiectum esse. Deficit enim morte stipulatoris sua conditio mortis causa stipulatio, quo fit vt promissor omnino liberetur. Hæc regula iis solum stipulationibus est accommodanda; quæ tempori testamentis adiecto simillimæ sunt; alioqui enim si tempus duntaxat respexeris solutionis, dubium non est quin semper in omnibus stipulationibus pro reo sit, non pro stipulatore temporis adiecto, c. 41. §. 1. de verb. obligat. Et idcirco facile adsentior Accursio hæc verba, *pro hærede*, sic in hac regula interpretanti, ad vtilitatem hæredis. Huiusmodi enim interpretationem satis eorum responsorum postulant inscriptiones, quæ admonuimus cum hac regula esse coniungenda.

## XVIII. POMPONIVS LIB. VI.

AD SABINVM.

*Que legata mortuis nobis ad heredem nostrum transf-  
eunt, eorum commodum per nos his quorum in potestate  
sumus, eodem casu acquirimus. Alier atque quod stipula-  
ri sumus. Nam & sub conditione stipulantes omnimodo eis  
acquirimus, etiamsi liberatis nobis potestate domini, con-  
ditio existat.*

SIC à stipulationibus differunt legata conditio-  
nalia, vt stipulatio conditionalis acquiratur patri,  
etiamsi conditio existat post emancipationem filij;  
legatum non item c. 78. de verb. oblig. Dies legati puri  
& post diem relictum protinus cedit à morte testatoris;  
legati conditionalis dies non prius cedit quàm fuerit  
adimpleta conditio; cap. 5. in principio. Quando dies  
legat. ced. Si post diem legati cedentem legatarius de-  
cesserit, ad heredem suum transfert legatum, & à le-  
gatariis qui die legati cedente sui iuris non sunt, iis  
debetur legatum in quorum sunt potestate, d. cap. 5.  
Hinc *quisitum fuit seruo filione familias antè conditionem  
impletam manumisso aut emancipato, cui acquiratur lega-  
tum; patrine an filio; patronone, an liberto.* Pomponius  
respondet *ex legata domino & patri duntaxat deberi, que  
ad heredem legatarij possunt transferri, ac legatum condi-  
tionale mortuo ante conditionem impletam legatario eius  
heredibus non debetur; ergo nec seruo filione familias cui le-  
gatum simile relictum est, antè conditionis euentum manu-  
misso, ad patrem vel patronum transferri legatum potest,*  
d. cap. 5. in fin. & cap. 14. §. fin. Quando dies legat. ced.  
*Aliud est in conditionali stipulatione, d. cap. 78. cap. 144.*  
hoc tit. Et ratio quidem diuersitatis est, quod lega-  
tum ante diei cessionem nihil in sese contineat iuris;  
cùm

cùm contra nulla appellari stipulatio possit, quæ non aliquod sub se complectatur vinculum iuris. Et idcirco antè cessum legati diem, legatum transferri non potuit; eo nihil obstante, quod stipulatio transferri potuerit antè diem stipulationis cessum. Transferri enim non ea quæ sunt facti, sed ea quæ iuris sunt duntaxat solere, nemini non cognitum est. Legatum antè cessum diem nihil continet iuris; ergo nec antè diem cessum ad patronum aut patrem transferri potuit. *Nulla sine iuris nexu subsistit stipulatio; siquidem, ut Vlpianus ait, in stipulationibus ius versatur, cap. 27. §. 2. de pact.* Eaque res efficit ut filiusfamilias & seruus sub conditione stipulati protinus obligationem ad patrem ac dominum transmittat; etiam si mortui, etiam si antè conditionis euentum manumissi fuerint. Nec est quod quis de eo filiofamilias obiiciat, qui quid soluere alterius mandato promisit & emancipatus soluit, cap. 12. §. 3. Mandati. Nam filiusfamilias pro alio soluendi suscipiendi negotium, licet mandati iudicio sit obligatus, antè tamen sibi mandatorem non habet obligatum, quàm si mandato satisfecerit. Et idcirco si soluerit existens in patria potestate, ipsa solutione patri acquirit contrariam mandati actionem; sin verò emancipatus soluerit, sibi acquirit, non patri obligationem eandem. Nihil enim antè emancipationem fuisse in hac specie videtur quod ad patrem, huiusmodi contractus ratione, transferretur. Siquidem contraria mandati obligatio post emancipationem primum contracta fuit; quo tempore patri nihil acquiri per filium moris erat. Similis est ratio filijfamilias, qui cum pro alio fideiusserat, paterfamilias factus soluit, cap. 16. in fine, de hæredib. Instit. ipsa enim solutione contrahitur primum, constituiturque contrarium mandati iudicium, quod fideiussori competere solet.

solet. Et quia huiusmodi solutio post emancipationem facta, obligationis contrariæ causa est & origo prima, idcirco etiam mirum non est cur ea obligatio filio potius quàm patri acquireretur. Idémque dicendum est de accessoria quavis obligatione, quæ etiam ad hanc regulam non pertinet. Accessorium enim naturam sequi conuenit sui principalis, & idcirco cui principalis reus non est obligatus, utique nec ei obligatus fideiussor est; & hoc est quod Paulus ait, *fideiussorem patri non obligari, quia nec reus ei tenetur*, cap. 132. §. fin. de verbor. obligat. cap. 47. de fideiussoribus & mandatoribus.

## XIX. VLPIANVS LIB. XXIV.

AD SABINVM.

*Qui cum alio contrahit, vel est, vel debet esse non ignarus conditionis eius. Hæredi autem hoc imputari non potest, cum non sponte cum legatariis contrahit.*

QUI contrahit debet esse non ignarus conditionis eius cum quo contrahit; hoc est, vtrum is qui quid vendit, qui stipulatus est seruus an liber filiusfamilias an paterfamilias sit emptor aut promissor ignorare non debet. Quare si filiusfamil. vel seruus decem aureos sibi dari stipulatus fuerit, promissor decem illos filiofamilias vel seruo exoluens non liberatur; huiusmodi enim stipulatio statim ab ipso contractus initio acquisita patri & domino fuit, cap. 78. de verbor. oblig. Qua sola de causa patri & domino integra est actio pecunia deperdita, quæ filiofamilias aut seruo stipulatori exoluta fuit. Et id quidem tunc semper obseruari solet, cum tempus & locus plenius deliberandi consilium patiuntur, cap. 1. circa princip. de exercit. actio. Simili modo, si filiofamilias legatum sit ab hærede, hæres soluere patri debet non filio; *nisi nomina-*

tim



*tim filio solui iusserit testator; tunc enim heredi non imputatur cur filio potius soluerit quam patri, & ita Vlpianus scribit ad Sabinum libro 24. cap. 14. §. 2. quando dies legat. ced. hanc subiiciens quæstionem; Si heres ignorans legatarium filium familias esse, ei soluerit, an libereatur. Et ait quidem Vlpianus heredi hoc non imputari, quia non sponte cum legatarius contrahit. Haeres legatorum nomine quasi ex contractu obligatus esse intelligitur, & hæres. Instit. de obligat. quæ ex quasi contr. nasc. Eoque sensu cum legatariis contrahere dicitur. Et quia scripsit expressè Vlpianus, heredem sponte cum legatariis non contrahere; hoc est, sua voluntate legatariis ex quasi contractu obligatum non esse, idcirco, videtur etiam satis perspicuum, tum demum de conditione eius cum quo contrahitur, cum qui contrahit debere certum esse, cum non coactus, sed sua sponte, hoc est, ut Varro interpretatur propria sua voluntate contrahit. Habet enim is qui sponte contrahit & tempus & locum plenius deliberandi, d. capit. 1. de exercit. actioni. quod tempus nec heredi testamentaria, nec ei etiam interdum conceditur cui incumbit nauigandi necessitas, d. cap. 1. in princip. Et hæc quidem vera est huius regulæ sententia, quæ regulæ ex Vlpiani libro ad Sabinum 24. etiam desumpta est, & ei haud dubiè responsio applicata, quo de legato expressa testatoris voluntate filio familias exoluendo discessit. eamque regulæ huius applicationem probat vehementer Iacob. Cuiacius, quam & ego non improbandam, sed omnibus modis esse amplectendam censeo; etiam adijciens verba illa quibus non sponte cum legatariis hæres contrahere dicitur ἐκ τῆς ἐξουσίας in hac regula posita esse, & subaudiendam obligationem. Quasi dixerit Vlp. heredem sponte non contrahere cum legatario obligationem, ea prorsus ratione, qua scripsit Paulus,*

*pupillum.*

*pupillum cum defensore tutoris sponte non contrahere, c. 22. de tutor. & rat. distr. Hoc enim loco contrahere, ἐλλειπτικῶς positum est, pro, contrahere litem. Nec id quoque Papinianus visus est neglexisse, cum de fideiussoria rem pupilli saluam fore obligationem differens scriberet, *pupillum non contraxisse, sed in tutorem incidisse*, cap. fin. rem pup. sal. fore. Haud dubie contrahendi verbo ἐλλειπτικῶς huiusmodi exaudiens obligationem fideiussoriam. Et hic est tertius locus, quo admonuimus hoc Grammaticorum schema quod ἔλλειψις dicitur, admodum fuisse Iurisconsultis familiare.*

#### AD §. NON SOLET.

*Non solet exceptio doli nocere his, quibus voluntas testatoris non refragatur.*

EST & hic §. ex libro Vlpiani ad Sabinum 24. de sumptus. In eo libro de adimendis transferendisque legatis disputans Vlpianus, inter alia definiuit legata & fideicommissa aut expressa aut tacita testatoris voluntate adimi posse; & ad voluntatem testatoris tacitam inimicitias referri capitales, c. 3. fin. de adimen. vel transferendis legat. Tractatum enim fuit, si inimicitia capitales inter testatorem & eum cui quid fideicommissum relictum est, postea intercesserint, an id ademptum videri possit quod testamento relictum est. Et quia placuit tam tacita, quam expressa voluntate fideicommissa & legata adimi, idcirco respondet Vlpianus, *fideicommissum ademptum videri inimicitiis interpositis*; hæc verba subiiciens: *secundum hæc & in legato tractamus doli exceptione opposita*, d. §. fin. Quorum verbortum hæc est sententia: Si cum testatore inimicitias post conditum testamentum ex professo gesserit legatarius, nec contigerit antè mortem testatoris aliquam

quam fieri reconciliationem, tacita testatoris voluntate per huiusmodi inimicitarum professionem legatum ademptum esse. Et idcirco si legatarius legata petere ex testamento non vereatur, repelleretur doli mali exceptione. Nam cum ignorare nequeat legatarius sibi denunciatas fuisse à testatore inimicitias; utique & illud scire debuit denunciatione simultaris legata sibi adempta esse, & idcirco petitione legatorum implicari se dolo malo, eiusque exceptione rectè ab hærede testamentario repelli posse. Aliud est si ante testatoris mortem iterum in amicitiam redierit legatarius, & pœnituerit testatorem prioris offensæ; tunc enim legatum relictum redintegrabitur, c.4. tit. Quamobrem si legata petenti legatario doli exceptionem icirco obiecerit hæres, quod dicat fuisse legatario indictas à testatore inimicitias; & legatarius replicaue-rit, denunciatas quidem inimicitias fuisse, verum se postea in amicitiam rediisse, doli exceptio ab hærede proposita non nocebit legatario; quia voluntas testatoris quæ ante ob inimicitias indictas refragabatur, post factam reconciliationem amplius non refragatur; eaque non refragante nec legatario quoque nocere potest exceptio doli mali. Non enim, solet exceptio doli nocere his quibus voluntas testatoris non refragatur. Et hic verus est huius paragraphi intellectus. Si quæsieris quanam dicantur inimicitia capitalis, illud habeto, moris fuisse apud Romanos, ut si quæ graues inter eos inciderent simultates, amicitias solemniter renunciarent, & inimicitias præsentibus testibus profiterentur. Quæ inimicitia sic denunciata capitalis dicebatur, eò quod sanguinem spirarent ex professo, iuxta Arnobij illud aduersus Gentes libro secundo; *Assumerent ex corporibus causas quibus fera fierent, & immanes simultates atque ini-*

L *micitias*

*niciatias gererent. Morem hunc evidentissimis aliquot argumentis demonstraui Variorum libro quinto, capite 15. Quibus illud etiam adiungi potest quod ita Declamat. libro decimo Seneca scribit; Ne uina quidem uxore per omnia conueniebat; mortua uero, inimicum professus est.*

## XX. POMPONIVS LIB. VII.

AD SABINVM.

*Quoties dubia interpretatio libertatis est, secundum libertatem respondendum erit.*

SI seruo per fideicommissum libertas relicta sit, seruum hæres cogitur manumittere, cap. 11. de manumiss. testam. Sique recusaret eum hæres manumittere, auctoritatem habebat seruus ille hæredem ad Prætozem perducenti, eoque perductus, prætoris imperio seruum cogeatur hæres manumittere, cap. 43. de act. empti. Et id quidem fieri cognitione prætoris solet, si nulla incideret libertatis fideicommissæ dubia interpretatio. Nam si quæ huiusmodi exoriretur interpretationis difficultas, tunc non prætoris cognitione, sed adhibito consilio de libertate per fideicommissum relicta, cognoscebatur. Ad dubiam libertatis interpretationem illud referri potest, quod sic ad Sabin. libro. 7. scripsit Pomponius; SI STICHVS ET PAMPHILVS DECEM DEDERINT, LIBERI SVNTQ, *potest alter quinque dando liber esse, quamuis alter non dederit, d. c. 11.* Videtur enim inter Sabinianos & Proculianos tractatum fuisse, cum sic testamento scriptum esset, SI STICHVS ET PAMPHILVS DECEM DEDERINT, LIBERI SVNTQ; an vno quinque offerendo, & nihil dante altero, is qui obtulit quinque, libertatem consequi possit; an verò necessum

necessum fuerit ambos simul decem offerre, & sic alterum sine altero liberum fieri non potuisse. Si verborum spectaueris energiam, certè ea mens & voluntas testatoris omnino videtur fuisse; sin verò ad fauorem libertatis eadem verba retuleris, nihil minus quàm tale quid voluisse pronunciabitur testator. Fauorem hunc videtur Sabinus secutus esse, & definiuisse alterum quinque offerentem; etiam si alter nihil dederit libertatem consequi debere, hanc subiiciens rationem; Quoties enim dubia interpretatio libertatis est, secundum libertatem respondendum est; quemadmodum hac regula continetur, ex eodem illo ad Sabin. libro 7. desumpta, in quo quæstionem hanc tractauit Pomponius. Et sanè in huiusmodi quæstionibus ad fauorem libertatis respicere Sabinum consueuisse, indicat his verbis Vlpianus ad Sabinum lib. 4. *Si decem heredi dare iussus fuerit, haeres etiam per partes accipere fauore libertatis cogendus est, c. 4. §. 6. de statulib.* Cur autem secundum libertatem potius quàm secundum seruitutem in dubio pronuncietur, hæc potest proferri ratio, quòd libertas naturalis sit, eoque nomine seruitutis iugo longè melior & fauorabilior; quodque *semper quicquid dubium est, humanitas inclinet in melius*; Sic enim Senecam scripsisse accepimus Epistolarum libro 11. *Reus sententiis paribus absoluitur, & semper quicquid dubium est, humanitas inclinat in melius.*

## XXI. VLP IANVS LIB. XXVII.

## AD SABINVM.

*Non debet cui quod plus est licet, quod minus est non licere.*

VARIAS lib. ad Sabinum 27. recenset conditionum species. Vlpianus, quibus testamento liber esse

seruus iuberi solet; & inter conditiones illas, agit de eo seruo qui hæredi seruire quinquennio iussus est. Cum enim *quisitum* esset, si seruus hæredi seruire quinquennio iussus fuerit, & eum hæres aliquamdiu seruire sibi non patiatur, an postea pati possit intra quinquennij tempus; respondit Vlpianus id fieri posse, c. 3. §. 12. de statulib. Nam si hæres quinquennio integro exigere potuerit seruitutem, utique & minus quinquennio videtur etiam exigere potuisse. Non enim debet cui plus licet, quod minus est non licere. Eaque res efficit, ut seruus hæredi quinquennio iussus seruire, etiam si integro quinquennio non seruierit, ad libertatem nihilominus perueniat finito quinquennio; atque ita quidem ad Sabinum libro vigesimo septimo scripsit Vlpianus. d. §. 12. Et cum hæc regula ex eodem illo Vlpiani libro desumpta sit; quis quæso dubitabit, quin ea ad tractatum de statuliberis omnino referri, & cum d. §. 12. verissimè cōiungi debeat; quamuis interim inficiari non velim, & ad alias quoque species plurimas eam non incommodi referri posse.

## XXII. VLPIANVS LIB. XXVIII.

## AD SABINVM.

*In personam seruilem nulla cadit obligatio.*

LIBRO ad Sabinum vigesimo octauo de obligatione iurisiurandi scripsit in hunc modum Vlpianus; *Ut iurisiurandi obligatio contrahatur, libertum esse oportet qui iuret, & libertatis causa iurare.* Proinde si quis liberti suo hac conditione legauerit, ut iuret libertus se decem operarum nomine præstiturum filio suo, dubitatum fuit an obligetur iurando. Celsus obligari eum ait, & Celso acquiescit Vlpianus hæc verba subiiciens; *Iurare autem debet post manumissionem, ut obligetur; in personam enim seruilem nulla cadit obligatio.* Et hanc quidem

dem regulam sic intelligi oportere, euidentissimè demonstrat obligationis iurisiurandi species illa cuius nunc fecimus mentionem ab Vlpiano proposita, c. 7. in princ. de oper. libert. Cùm enim caput illud ex Vlpiani libro ad Sabinum vigesimo octauo repetitum sit, ex quo libro hanc quoque regulam desumptam esse testis est eius epigraphæ; quis dubitabit quin ad obligationem iurisiurandi hanc regulam retulerit Vlpianus? Alioqui enim licet non ciuilitè, naturaliter saltem ex contractibus obligari & obligare seruos dubium non est, c. 14. de oblig. & action. c. 41. de pecul.

## AD §. GENERALITER.

*Generaliter probandum est ubicunque in bona fidei iudiciis confertur in arbitrium domini vel procuratoris eius conditio, pro boni viri arbitrio hoc habendum esse.*

ARBITRORVM duo fuisse genera Proculus ait; unum huiusmodi, ut siue aequum siue iniquum esse, ei parere necessum foret; quod tunc observabatur, cum ex compromisso ad arbitrium ium esset; alterum eiusmodi, ut ad boni viri arbitrium redigi deberet, cap. 76. pro socio. Diciturque vir bonus, vir ad definiendam rem aliquam perplexam & dubiam incertamque, aut naturæ beneficio, aut artificij commendatione, aut etiam negotiationis longo usu experimentoque peritus & idoneus. Qui patrum consulta, leges & iura nouit, is dirimendis quaestionibus iuris perplexis vir bonus est. Quo sensu scripsit Paulus *virum bonum non arbitraturum, ut qui iustam excusationem adfert, cogatur defendere*, cap. 45. de procur. Qui examinandarum & discutiendarum accepti expenque rationum peritus est, is etiam vir bonus rationibus audiendis dici potest. Deque huiusmodi viro bono sensit haud dubiè Iulianus offi-

*cio pratoris contineri scribens, ut virum bonum eligat, cuius arbitrio rationes computentur, cap. 47. §. 2. de fideicommiss. libertat. Rursus cum scriberet Papinianus usus domus relicto viri boni arbitratu cautionem interponi oportere, capite penultim. ususfruct. quemadmodum cau. quid aliud quæso per virum bonum intelligi voluit, quàm peritum aliquem architectum? Idque eo videri potest verisimilius, quod olim in ædibus emendis architecti soleant adhiberi. Sic enim de Otthone scribit Suetonius; Deinde liberto adesse architectos nuntiante quasi venalem domum inspecturus abscessit. Nec fanè generaliter vereor definire, sic viri boni appellationem accommodari consuevisse rei præsentis quæ arbitrium boni viri desiderat argumento, ut in rebus domesticis utilis paterfamilias, in politicis exercitatus pragmaticus, in militaribus miles probatus, in picturis pictor bonus, in architectura architectus peritus, & sic deinceps, nomina idcirco obtinuerint virorum bonorum, quod boni essent, hoc est, utiles & idonei ad ea definienda, quorum singuli peritia censebantur, cap. 20. §. 1. de oper. libert. cap. 137. §. 2. de verb. oblig. cap. 12. & 17. iudicat solui, cap. 21. §. 4. de oper. nou. nunciat cap. 15. §. 19. de dam. infecto. Ea nisi fallor ratione qua sic apud Nonium Lucilius scribit; Caluus Palantino quidam vir nobilis bonus bello. Additurque illud Virgilij; Et bona bello, Cornus. Et hæc quidem verissima esse docet euidentissimè M. Cato de re rustica cap. 148. Sic enim de vino in doleis scribit; Quod neque aceat, neque muceat, id dabitur; in tri-duo proximo boni viri arbitratu degustato. Nec aliam admittit apud Valerium Probum interpretationem hæc formula vetus; QVOD RECTE FACTVM ESSE VIDEBITVR VIRI BONI ARBITRATV. Aliud igitur Iurisconsultis vir bonus est, aliud Philosophis*



Iſoſophis ac Poëtis. Iuriſconſultis quidem, vir eius rei  
 cuius arbitrium ſuſcipit admodum peritus, cuiuſmo-  
 di bonorum virorum nulla non Romæ frequentia  
 fuit; ſiquidem eorum eſſe frequentiffimum uſum (vtri  
 demonſtratum eſt) Iuriſconſulti voluerunt: Philo-  
 ſophis verò & Poëtis vir extra omnem labis & mali-  
 tiæ ſuſpicionem poſitus, qui prodeſt quibus poteſt,  
 nocet nemini, vir bonus dicitur; *qualem vix repperis  
 ullum millibus è cunctis*, vt ait Auſonius. Et Cicero; †  
*Sine vir bonus eſt* ( inquit ) *iſ qui prodeſt quibus poteſt,*  
*nocet nemini*, certè iſtum virum bonum non facile reperie-  
 mus. Nunc videndum eſt quidnam hac regula volue-  
 rit Vlpianus. Tractatum fuit quid ſibi vellent hæc  
 verba conditionalia, *ſi rationes arbitrio domini compu-  
 taſſet*; vtrum ſi ipſe dominus computaſſet ſuo arbi-  
 trio, an verò ſi arbitrio viri boni. Et ait quidem libro  
 ad Sabinum vigefimo octauo Vlpianus *magis in boni  
 viri arbitrium id collum videri, quàm domini*, capite  
 7. de contrahen. empt. hanc eodem loco ſubiiciens  
 rationem; *Generaliter enim probandum eſt ubicunque in  
 bonæ fidei iudiciis confertur in arbitrium domini vel procu-  
 ratoris eius conditio, pro boni viri arbitrio hoc habendum eſ-  
 ſe*; hoc eſt, de arbitrio viri boni hoc eſſe accipiendum.  
 Nam ſi verba illa ad arbitrium domini retuleris, ven-  
 ditio nulla eſt, neque enim debet in arbitrium rei con-  
 ferri an ſit obſtriſtus, d.c. 7. Et hæc eſt vera ſententia  
 huius regulæ, in qua per arbitrium boni viri, eius viri  
 intelligitur arbitrium, qui rationibus diſcutiendis  
 exercitatus eſt & ad eam rem Prætoris officio designa-  
 tus, c. 47. §. 2. de fideic. libertat. Idque benigna quadam  
 interpretatione ſic receptum eſt in iudiciis bonæ fi-  
 dei. Quia enim ſtriſtam verborum cōceptionis ſequi,  
 in iis iudiciis quæ ſtriſti iuris ſunt, interpretationem  
 iudices ſolent, ideoſcirco expreſſam bonæ fidei iudiciorū

mentionem fecit Vlpianus ; satis per hoc indicans in  
strictis iudiciis regulam hanc locum non habere ;  
quod sanè verissimum est. Hæc enim conditio, si  
mentionem domini computasset arbitrio , stipulationi addita,  
strictè accipienda foret , & strictè accepta inutilem  
redderet stipulationem , d. capite septimo.

## XXIII. VLPIANVS LIB. XXIX.

AD SABINVM.

*Contractus quidam dolum malum duntaxat recipiunt,  
quidam dolum & culpam. Dolum tantum depositum &  
precarium: Dolum & culpam, mandatum, commodatum,  
venditum, pignori acceptum, locatum: Item dotis dāto,  
tutela negotia gesta: In his quidem & diligentia, sed & so-  
cietas & rerum communio, & dolum & culpam recepi. Sed  
hac itā: nisi si quid nominatim conuenit vel plus vel mi-  
nus in singulis contractibus. Nam hoc seruabitur quod ini-  
tio conuenit: legem enim contractui dedit excepto eo quod  
Celsus putat non valere, si conuenerit ne dolus prestetur:  
hoc enim bonæ fidei iudicio contrarium esse, & ita utimur.  
Animalium verò casus, mortesque quæ sine culpa accidunt,  
fuga seruorum qui custodiri non solent, rapina, tumultus,  
incendia, aquarum magnitudines, impetus prædonum à  
nullo præstantur.*

GALLVS ille Aquilius qui primus de dolo malo  
formulas protulit, dolum malum definiuit, cùm esset  
aliud actum, aliud simulatum; eaque definitio M. Ci-  
ceroni in tantum placuit, vt scriberet Offic. lib. 3. hoc  
quidem ab Aquilio collega suo sanè luculenter di-  
ctum esse, & ab homine petito definiendi; adeò qui-  
dem vt adiicere non sit veritus idem Cicero, omnes  
aliud agentes, aliud simulantes, perfidos, improbos  
& malitiosos esse. Eodem tempore habuit & alium  
collegam

collegam Gallus Aquilius in hac sua doli mali definitione paululum Cicerone perspicaciorem. Is erat Seruius Sulpitius, admirabili quadam & incredibili ac poenè diuina, in legibus interpretandis, æquitate explicanda, scientia præditus, ipso Cicerone teste Philipp. 9. Is Seruius Sulpitius animaduertens definitioni, quam primus de dolo malo excogitauerat. Gallus Aquilius, latens quoddam subesse vitium, quod nec ab Aquilio ipso, nec etiam à Cicerone deprehensum facile rem definitam subuertere poterat; vir prudens & amici & collegæ honori plurimum consulens, non in eam acerbius quid meditatus est, sed eam adiecta quadam necessaria clausula aduersus quorundam derisorum peruicaciam munivit. Considerans enim Seruius longo rerum usu exercitatissimus, posse & sine simulatione id agi ut quis circumueniatur, posse & sine dolo malo aliud agi, aliud simulari, ac per hoc definitionem Galli omnino subuertere posse; dolum malum machinationem esse quādam scripsit, alterius decipiendi causa, cum aliud simulatur, aliud agitur. Fortassis ni facere conuitium collegæ suo timuisset Seruius, tantum scripsisset dolum malum machinationem esse alterius decipiendi causa. Ea enim vera est & absoluta doli mali definitio; quam tamen honore & singulari quadam erga amicum beneuolentia, iis verbis temperauit, quibus in dolo definiendo Gallus Aquilius usus erat; interim non ignorans ea verba esse superuacua, nec aliqua ratione ad ipsam definitionis substantiam pertinere. Quod cum tandem deprehendisset Antistius Labeo, pro ea qua præditus erat, plurimarum rerum innouandarum auiditate (teste Pomponio) id facere non dubitauit quod amico parcens Seruius attentare non fuerat ausus; nimirum definitioni doli mali à Seruio traditæ ea verba

L 5                      detrahens,

detrahens, quibus integra Galli definitio antea cōcepta fuerat; & sic in effectū non Seruij, sed solam Galli definitionem reprehendens & abolendam censens, eaque vera sententia est capitis primī. §. 1. de dolo malo. Hæc cum non animaduertissent recentiores quidam interpretes, persuadere conati sunt hæc verba; *Machinationem alterius decipiendi causā*; quæ Seruio tribuit Vlpianus, d. §. 1. supposititia esse & ex margine sumpta videri; interim non considerantes iis, quæ auferenda esse censent, deleteris verba reliqua nō ipsi Seruio, sed Gallo Aquilio potiùs tribui debuisse. Siquidem eorum verborum tam manifestus est auctor Gallus Aquilius vt putidæ & intollerabilis negligentia infimulandus veniat Vlpianus, si id ascribere Seruio non dubitauerit, quod omnes norunt acceptum soli Gallo ferendum esse. Et hæc de dolo malo. De culpa sic etiam verè sentiendū est, vt dicamus recepta quadam & communi consensu probata sententia, culpam omnem exemplo adoptionis in culpam specialem & in laram siue latiorē culpam Iurisconsultos olim partitos fuisse; per culpam specialem non leuē aliquam, sed magnam duntaxat negligentiam, per laram culpam malitiam intelligentes. Hanc culpæ differentiam vt verissimam sic antiquissimam esse demonstrat euidentissimè in Alcibiade Æmilius ille Probus, qui librum quendam excellentium Imperatorū Tito Pomponio Attico dedicauit. Sic enim de Alcibiade scribit; *Ex quo fiebat vt omnia minus prosperè gesta culpa tribuerent, cum aut eum negligeret aut malitiosè fecisse loquerentur.* Quibus verbis communem Iurisconsultorum sui temporis de culpa sententiam non ignorans Æmilius Probus, ita in species duas partitus est culpam, vt vna quidem specie magnam negligentiam, altera verò negligentiam dissolutam siue malitiam appellandam

pellendam esse culpam tradiderit. Idque etiam voluisse Paulus videtur cum ita scriberet; *Magna negligentia culpa est, magna culpa dolus est*; cap. 226. de verbor. sign. Hæc enim verba si diligenter exp̄sa fuerint, omnino præ se ferunt parvam negligentiam culpam non esse, & duas duntaxat culparum fuisse species; vnam, quæ culpa simpliciter, & alteram, quæ non culpa solum, sed ad culpæ specialis differentiâ magna lata, siue latior culpa dicebatur; eratque simillima dolo propter malitiam. Sanè appellatione culpæ non parvam, sed magnam duntaxat negligentiam intelligi, satis manifestè idem Paul. & Caius docent, c. 16. & c. 36. de rei vindic. Quis enim est qui non dicat hæc omnia, per insidiosa loca seruum mittere seruo cum bestiis depugnandi potestatem facere, fugitiuū non custodire, nauem aduerso tempore nauigatum mittere, aut eā hominibus minus idoneis committere; non parvæ alicui sed magnæ negligentia adscribenda esse? Quæ cum Caius & Paul. adscripserint culpæ, certè inficiari nemo poterit, rectè eundem Paulum scripsisse *magnam negligentiam culpam esse*, d. c. 226. eamque culpam appellat negligentiam latam Vlpianus, c. 7. §. 2. de administrat. & pericul. tutor. Cum enim eo in loco nihil sordidè, nihil gratosè fecisse, sed non bonam conditionem elegisse dicantur tutores, & ob id solam latam negligentiam præstare; quis est qui non dicat per latam negligentiam non latam quidem, sed leuem duntaxat culpam intelligi, hoc est, negligentia magnā, non malitiam, nō fraudem. Et quamvis *propè fraudem accidere* dicatur *lata negligentia*, cap. 7. in princ. de suspect. tur. ea tamen negligentia fraus dici non potest; si enim fraus esset, utique lata culpa, non negligentia diceretur. Continet enim lata culpa fraudis & malitiæ indicia manifesta, & à fraude separatur perpetuò culpa levis,

leuis, c. 63. de rei vindic. Idque adeò verum est, vt per fraudem apud Valerium Probum lata culpa videatur intelligi, in hac edicti clausula; **DOLI MALI FRÀVDISVE CAUSA IVDICIUM DABO.** Simili modo culpa leuis negligentia dicitur manifesta, cap. 2. C. arbitr. tutel. In eo enim capite doli appellatione comprehenditur lata culpa & negligentia; manifestæ culpa leuis. Idque ex eo patet euidentissimè quod huiusmodi *manifestam negligentiam non quidem latam culpam aut esse aut appellari, sed culpam duntaxat latam comparari posse* scripserit Imperator Antoninus, c. 1. C. de hæred. tutor. Si negligentiam magna & manifesta, lata culpa non sit, ea igitur ad culpam leuem referenda est. Siquidem omnis culpa aut lata aut leuis est; eo nihil obstante quod huiusmodi culpa leuis iusta aliqua iudicis interpretatione possit interdum latæ culpæ comparari, d. cap. 1. Nam inter leues culpas satis cõstat alias esse aliis leuiiores; inter latas item, alias latiores aliis, & quò sunt latiores, eò propinquiiores dolo sunt, quò leuiiores, eò longius recedunt à lata culpa. Idque adeò verum est, vt à culpa leuem omnem negligentiam separauerint perpetuò Iurisconsulti; eam interdum diligentia, interdum custodia, nunquam autem culpæ vocabulo exprimentes, cap. 13. in fine, de pignerat. act. cap. 1. §. 23. cap. 51. §. 23. Depositi, cap. 3. de peric. & commod. rei vendit. Nec id arbitror quenquam inficiari posse, qui non ignoret Vlpianum scripsisse *non solum eam culpam quæ dolo proxima sit, verum eam quoque quæ leuis est appellatione culpa sic contineri, vt interim & exigi diligentia quoque debuerit*, cap. 47. §. 3. de legat. 1. Docet enim hoc responso Vlpianus duas tantum culparum fuisse species; vnã quidem latam, alteram verò leuem, & culpæ nomine negligetiam omnem non comprehendi. Si enim comprehenderetur; certè

certè nō scripsisset hoc loco Vlpianus, *diligentiam quoque exigendam*, sed potiùs culpam leuissimam (eam enim ad diligentiam referunt interpretes) præter latam leuemque culpam præstandam esse. Nec est quod obiicias eundem Vlpianum leuissimæ culpæ alio loco meminisse, cap. 44 ad leg. Aquiliam, & sic videri præter latam leuemque culpam fuisse tertiam aliquam culpæ speciem, quæ leuissima diceretur. Non ignoro id iis facile persuaderi qui non obseruauerunt eum qui leuissimam culpam leuem appellat, idcirco reprehendi non posse, quod certo certius sit leui culpa nullam esse speciem culpæ leuiorem. Et quamuis inter leues culpas aliæ potuerint aliis esse leuiiores; atque ita per consequens inter negligentias magnas, aliis etiam aliæ maiores; nihilominus tamen leuiiores & leuissimas culpas leues esse nemo potest inficias ire. Id si verum est, ad eam igitur speciem quam culpam leuem appellarunt Iurisconsulti, referri debet leuissima culpa; omnis enim leuissima culpa leuis est, sed non è contrario omnis culpa leuis leuissima est. Quo sensu accipiendum est quod sic Vlpianus scribit; *Culpam omnem accipimus non utique latam*, cap. 3 l. §. 11. de ædilit. edict. hoc est, omnem culpam leuem. Sunt etiam inter latas culpas aliæ aliis latiores; & quò sunt latiores, eò proximiores dolo sunt; omnis enim lata culpa dolo non est; Nam ex culpis latis quædam comparari dolo malo dicuntur, cap. 1 l. §. 1. si mensor. fal. mod. dix. quædam dolo malo proximæ sunt, cap. pen. de incen. ruin. naufr. cap. 29. Mandati. quædam à dolo sunt remotissimæ; cap. 7. ad l. Corn. de sicar. & quædam denique, doli mali nomine continentur, c. 32. depositi. Atque ita quidem aliquando appellatione doli continentur lata culpa, aliquando non continentur, c. 2. §. 4. de hæredit. vel actio. vend. Contineri docet his verbis Vlp.

Si

*Si sine dolo omni reddat, hoc est, ut nec culpa quidem suspicio sit, cap. 11. depos.* Et rursus non contineri idem Vlpianus auctor est, eum scribens *mandatarium dolo non emere, qui pecunia accepta alij cessit ut emeret; & lata culpa id ipsum ab eo mandatario negligi, qui gratia ductus passus est alium emere, cap. 8. §. 8. mandati.* Hinc intelligimus quid sibi voluerit Celsus, cum scriberet inter Neruam & Proculum tractatum fuisse, an latior culpa dolus sit, c. 32. depositi. Quandoquidem enim interdum doli appellatione latam culpam contineri, interdum non contineri liquidò satis constabat; illud duntaxat inter Proculum & Neruam videtur agitatum fuisse, an his verbis: *Quod dolo malo eius factum esse dicetur,* quæ in eo edicto continentur quod de deposito proposuit Prætor, etiam lata culpa comprehendatur. Et cum Nerua latiore culpam dolum esse diceret, id Proculo displicuit, inter dolum & latam culpam in causa depositi (de ea enim sola contenditur) nonnullam esse differentiam statuendam existimanti. Neruæ sententiam Celsus veriore esse putat, eò quòd *salua fide non minor depositis quàm propriis rebus diligentia præstari debeat*; eam diligentiam qui non præstat, fidem frangit, eaque fracta dolo malo obnoxius est. Et ita in deposito à lata culpa non separatur dolus, immò nec levis culpa separatur à dolo, eaque vera sententia est dicti capituli trigesimali secundi. Et idcirco quod Vlpianus ait *contractus quosdam dolum malum duntaxat recipere, quosdam dolum & culpam*, hoc non sic accipiendum est quasi in nonnullis contractibus solus puniatur dolus, sed ita potius, ut in nonnullis contractibus à dolo non seiungatur, non separetur lata aut levis culpa; in nonnullis, non separetur quidem dolus à lata culpa, sed à dolo & lata culpa separetur culpa levis, & separatim vindicetur. In deposito à dolo non  
separatur



separatur culpa, quia si eam diligentiam non præstiterit depositarius in custodiendis rebus depositis quam seruat in propriis rebus, siue id leui siue lata culpa contigerit fraude non caret, eoque nomine implicat sese dolo malo, d. cap. 32. Idque illud est quod Cyprianus lib. *de singularitate clericorum*, ad hunc modum scribit; *Oportet enim damno perstringi vel dispendio sarcinarum, apud quem sub intuta custodia fratres sarcinae perierunt: quia quidquid in domo nostra sub minus idonea tutela perditum fuerit, aut latrones effregerint, nostrum est, & à nobis exigitur quicquid per inertiā nostrā malè commissum est.* Cui autem precarium recipiat etiam duntaxat dolum, ea reddi ratio potest, quod precarium beneficium sit; quod quidem beneficij nomen tanti est, ut si non maiorem, saltem omnino æqualem cum deposito requirere diligentiam videatur. Tertullianus aduersus Hermogenem; *Hi tribus modis res aliena sumuntur, iure, beneficio, impetu*, id est, dominio, precario, vi, dominio non suppetente. In contractibus qui dolum & culpam recipere dicuntur doli appellatione continentur etiam lata culpa, & appellatione culpæ; culpa levis, c. 5. & cap. 33. de rei vind. cap. 52. §. 1. & 2. pro soc. cap. 10. commod. Cui autem mandati, commodati, locati, venditi, & alij qui hac regula exprimuntur contractus similes non aequè recipiant dolum duntaxat. atque depositum aut precarium, ea potest reddi ratio, quod ex natura sui aliquem doli & culpæ separationem requirere videatur, cap. 10. commodati. Quam separationem ex sui natura non patitur, uti dictum est, aut depositum aut precariū. Qui enim mandatum suscipit, potest in exequendo mandato valdè interdum negligens esse, & tamen fraude carere, c. 27. §. 7. manda. Ac proinde alia ratione vindicanda venit mandatarij negligentia magna, hoc est,

culpa

culpa levis, alia item dolus eiusdem & lata culpa. Addit Vlpianus *in mandati, commodati, locationis, venditionis aliisque qui sequuntur contractibus præter dolum & culpam præstari etiam negligentiam*, ex quo euincitur verissimum esse, quod diximus, omnem negligentiam culpam non esse. Si enim esset culpa, eam haud dubiè à culpa leui in hac regula non separasset Vlpianus, id quod Paulus etiam fecit, cap. 3. de peric. & commod. rei vend.

## XXIV. PAVLVS LIB. V.

AD SABINVM.

*Quatenus cuiusque intersit in facto, non in iure consistit.*

AUCTOR est Seneca de beneficiis libro quinto, multa legem non habere nec actionem; eaque omnia ex facto constare solent. Nam quæ nullo iure definita sunt, ea ex solo Prætoris arbitrio prorsus dependebant, sin aliquo iuris civilis subsidio; siquidem *Prætor viua legis vox dicebatur*, cap. 8. de Iustit. & iure. Nimirum tam ad ea quæ legibus obscurè tradita fuerant declaranda, quàm ad ea quæ deesse legibus videbantur, supplenda. Idque illud est quod scripsit idem Seneca *ad plurima ex iis quæ legem non habent nec actionem, vita humana consuetudinem lege omni valentior aditum dare*. Proinde quæ nullis legibus erant definita, ex Prætoris iurisdictione substantiam capere, & quæ ex iure civili constabant, legitimam habere causam dicebantur. Si quæramus an quis sit libertus an seruus, solam tractamus facti quæstionem: quærimus enim in effectu, an seruus manumissus sit. Et quandoquidem hæc quæstio ex Prætoris iurisdictione substantiam capere dicatur, §. Præiudiciales. Instit. de actio. utique &

& illud videtur etiam dici , ex eadem iurisdictione facti quæstiones sine aliquo iuris subsidio dependere; easque quæstiones viua iudicis (quem Prætor decernebat) voce solere definiri. Sic etiam *factum in pactis, & in stipulationibus ius versatur*, cap. 27. §. 2. de pactis. Sic denique eius quod interest æstimatio non iure, sed in facto consistere dicitur. Dabat enim Prætor iudicem interdum expressa taxatione addita, interdum taxatione religioni & arbitrio dati iudicis relicta. Addita quidem taxatione dabat iudicem, *si res taxanda iure quodam certò esset definita; tunc enim sic iudicem arbitrumve dabat Prætor, ut præscriberet quoad ei ius esset statuendi*, quemadmodum docet eleganter Festus de verborum significatione libro decimo octauo; hæc etiam verba subiiciens; *Taxatio dicitur qua fit certa summa*. Ex quibus patet euidentissimè incertæ summæ nec dici posse taxationem, nec iudicem arbitrumve addita taxatione dari consueuisse, id quod in eius quod interest æstimatione fieri consuevit; ea enim æstimatio incerta est, cap. 5. de hæred. vel act. vend. cap. 8. §. 5. cap. 26. §. 7. & cap. 17. §. 2. mandat. cap. 1. de action. empti. Eoque nomine ex facto constabat & iudicis officio relinquebatur, c. 19. de act. empti. qui iudex non præscripta quadam taxatione, sed addita eiusmodi clausula solebat dari; **QVANTI EA RES ERIT, TANTI CONDEMNATIO FIAT**, cap. 71. & 68. de rei vendic. cap. 3. & 13. rem rat. hab. cap. 179. de verb. sign. Eoque etiam referri possunt hæc edicti verba apud Valerium Probum; **QVANTI EA RES ERIT, TANTÆ PECUNIÆ IUDICIUM RECUPERATORIUM DABO**. Et erat quidem eius quod interest æstimatio olim adeò incerta, ut interdum datus iudex officium implorare cogeretur *boni viri*, hoc est, ciuis ad eius rei quæ taxanda erat æstima-

M                      tionem,

tionem, admodum idonei. Idque sibi visus est Labeo voluisse per *bonum virum* peritum intelligens architectum, c. § 8. § 1. locati. Nec alia ratione ad officium boni alicuius viri eius quod interest æstimationem Papinianus etiam reieciſſe videtur, c. 6 in fine de ſeruis export. Et hæc quidem uſque ad Iuſtiniani tempora ſic videntur in uſu fuiſſe; ſiquidem hanc veterem eius quod intereſt æſtimandi rationem omnium primus nonnihil viſus eſt immutaſſe Iuſtinianus. Statuit enim *in omnibus iis caſibus qui certam habent quantitatem vel naturam, hoc quod intereſt dupli quantitatem minime excedere; in aliis caſibus qui incerti ſunt, per ſubtilitatem requirere indices, ut hoc quod reuera inducitur damnum, reddatur*, cap. vnic. C. de ſenten. quæ pro eo quod intereſt. Certum caſum id appellat Iuſtinianus, quod Iuriſconſulti veteres certum dicunt, de certi condictiōe diſferentes. Certum autem duobus modis videtur in eo edicto accipi poſſe cui titulus eſt, *SI CERTVM PETETVR*. Vno enim modo certum petitur, cū id omne quod petitur deberi certum eſt; altero cum certum etiam eſt quid debeatur & quantum. Et id quidem deberi certum eſt, quod *expenſi latione, menſa rationibus, chirographi exhibitione, teſtium ſignatorumque interceſſione deberi probat aduerſarius*, ut eſt apud Gellium libro decimo quarto, capite ſecūdo. Quibus etiam addi poteſt obligatio quæ nominibus fieri dicebatur, de qua Variorum libro tertio, capite primo accuratè diſſeruimus. Eſt & illud certum cuius ſpecies vel quātitas qualis quantaque ſit oſtenditur, cap. 6. ſi cer. pet. *Stipulationes, emptiones, aliquo contractus certa plerumque inſtrumenti formula comprehendendi ſolent*, capite 92. de reg. iur. cap. 72. de euiſt. cap. 1. §. 1. de eden. cap. 5. ſub ſi. de auct. & conſ. tut. Ex qua formula ſi lex conuentionis non ſeruaremur, ita ius ſolet dici, ut eius tenorem

tranquara

tanquam certum & definitum argumentum iudex sequeretur. Qui enim suum agnoscit chirographum, utique & illud quod chirographo continetur inficiari nequit; ac proinde actor ex chirographo rei ius dici postulans certum petit, eoque nomine & certi quoque condictione uti potest, etiam si causa contractus legitima sit, ut puta ex empto, locato, stipulatu, & sic deinceps. Si igitur fundum à te emerim Tusculanum, & tu intra spacium anni promiseris soluere, atque id chirographo quodam expresseris, anno finito, duplex mihi tecum experiundi patet via; aut enim ex empto, aut certi condictione tecum agere possum. Ex empto quidem contractus ratione, certi verò condictione non contractus, sed solius chirographi habito respectu. Idque illud est quod Ulpianus ait, *certi condictionem competere ex omni causa, ex omni obligatione ex qua certum petitur*, c. 9. Si cer. pet. Hoc est, ex qua id petitur, quod aut expensilatione, aut mensa rationibus, aut chirographi exhibitione, aut testium signatorumque intercessione, aut etiam stipulationis instrumèto probatur deberi. Eoque arbitror Quintilianum respexisse, cum sic Institutionum libro quarto, capite secundo scriberet; *Satis est dixisse certam creditam pecuniam peto ex stipulatione; legatum peto ex testamento*. Moris etiam erat ut omnis pecunia certis nominibus aut incertis mutua daretur. Certis quidem nominibus, per chirographum; incertis verò per syngrapham. Auctor est enim Asconius Pedianus hanc inter chirographum & syngrapham veteres differentiam constituisse, ut in chirographis ea tantum quæ gesta essent scriberentur: in syngraphis verò etiam contra fidem veritatis pactio veniret, & non numerata quoque pecunia, aut non integrè numerata; pro temporaria hominum voluntate scribi solerent, more institutoque Græcorum. Hæc Asconius evidenter

demonstrans ex certis nominibus chirographum & ex incertis syngrapham olim constituisse. Vnde etiam satis intelligi potest de syngrapha Vlpianum sensisse, cum scriberet *Macedonem quendam incertis nominibus pecuniam credidisse*, capite 1. de Senatusconf. Macedon. Quemadmodum & de chirographo tunc etiam visus est Horatius sensisse, cum sic ad Augustum scriberet;

— Et solempne reclusa

*Mane domo vigilare, clienti promere iura,*

*Cautos nominibus certis expendere nummos.*

De eo enim agit Horatius, qui accepto chirographo pecuniam dare mutuam solet. Et quia *moribus institutisque Græcorum* syngraphas Asconius acceptas refert, hinc etiam mihi videor quodammodo intelligere, quid apud Aufonium sit *Græca fide mutuari*, sic Paulino suo scribit;

*Mercatur rem quoquo foro venatium,*

*Mutuatur ad Græcam fidem.*

Ad syngraphas enim (nisi vehementer fallor) hoc in loco *Græcam fidem* refert Aufonius. Et hæc quidem cum ita se habeant, nunc satis intelligimus *per casus natura vel quantitate certos*, eas intellexisse Iustinianum contractuum conventionumque species, quæ & certum debitum, & non dubiam debiti quantitatem qualitatemque certis nominibus instrumento quodam expressam continerent. Nec aliud per *incertos casus* videri eundem Iustinianum intelligi voluisse, quàm eas conventiones quarum nomine quid & quantum deberetur, prorsus incertum erat.

## XXV. POMPONIVS LIB. XI.

AD SABINVM.

*Plus cautionis in re est quàm in persona.*

*Ei tantum videri dicimus, nisi non reis aut pignori-*  
*ribus.*

DE DIVERSIS REGVLIS IVRIS. 181  
*ribus, saltem de re aliqua persequenda, restituenda, aut præstanda instrumento quodam securitas est repromissa, c. 21. de rei vendic. Quo sensu plus cautionis in re esse, quàm in persona scripsit hac regula Pomponius. Non enim ea est Pomponij sententia, vt velit dicere iis rectius & tutius cautum esse qui pignoribus, quàm qui sponzoribus acceptis securi sunt, vt putant interpretes; sed ea potius, vt hi quibus de re ipsa præstanda cauetur, plus in ea re cautionis habere dicantur, quàm illi habent in persona quibus de pretio rei exoluendo personaliter cautum est. Veluti si rei commodatæ nomine actum sit, & commodati, ideo commodatarium damnari per iudicem contigerit, quod res commodatâ non appareat, aliter commodatarius ei qui commodauit, rei commodatæ, quæ deperdita est nomine satis facturus non est, quàm si commodator cautionem præstiterit, nō quidem de rei pretio, se de ipsa re commodata aliquândo reperta ipsi commodatario præstanda. plus enim cautionis in ipsa re est, quàm in persona, hoc est, quàm in exolutione pretij, quæ exolutio personalis est. Et ita quidem Pomponius scribit libro ad Sabinum vndecimo, quemadmodum indicat epigraphe capitis decimi tertij, commodati præsertim cum inscriptione huius regulæ coniuncta.*

XXVI. VLPIANVS LIB. XXX.

AD SABINVM.

*Qui potest inuitis alienare; multo magis & ignorantibus & absentibus potest.*

DE societate scripsit Vlpianus ad Sabinum libro trigesimo eiusque contractus ratione quædam in eodem libro de eriscunda familia & comuni diuidundo in medium attulit, c. 43. famil. erisc. cap. 3. cap. 21.

M 3 commun.

commun. diuid. In tractatu familiae erciscundae obtinuit hæredem absente cohærede partem suam posse alienare, cap. 44. §. 2. fam. ercisc. cap. 28. de hæredit. vel act. vend. Eiusque definitionis cum ab Vlpiano ratio peteretur, videtur ille respondisse, hæredem posse vel inuito cohærede partem suam alienare, ergo multò magis ignorante & absente eodem cohærede. Qui enim potest inuitis alienare multò magis & ignorantibus & absentibus potest. Ex quo illud etiam effici viderur, vt quibus inuitis non licet alienare, vti que nec ignorantibus iis, aut absentibus liceat. Quæ sola de causa scripsit etiam eodem illo ad Sabinum libro trigésimo Vlpianus, *pupillum possessionem quatenus quidem facti est, sine tutoris auctoritate amittere posse; quatenus verò iuris non utique*, capite 29. de acquir. possess. Non enim potest aliquid iuris in alium pupillus transferre inuitis tutoribus, ergo multò minus iis aut ignorantibus aut absentibus potest, & huic quidem regulæ locum extra alienationis causam non semper fuisse expressè demonstrat eodem libro Vlpianus. *Inuitis enim cohæredibus vel vnum hæredem familiae erciscundae arbitrum petere posse ait, non tamen ignorantibus iis aut absentibus, sed presentibus*, d. cap. 43. famil. ercisc. Ideo petere absentibus aut ignorantibus cohæredibus arbitrum hæres non potest, quia *consensu litigantium* † *solent arbitri iudicesque dari*, vt auctor est Cicero pro Cluentio Auito. Moris enim erat, vt is qui nominationem iudicæ aut arbitrum petebat, interrogaret aduersarium suum præsentem, an huiusmodi iudice arbitroue contentus esset, & non potius alium posceret; quemadmodum ex Festo demonstrauius Protribunaliu libro singulari cap. 11. Et sic quidem quamuis consequi rectè videatur, vt quibus inuitis licet alienare, liceat etiam ignorantibus & absentibus iis, non tamen



DE DIVERSIS REGVLIS IVRIS. 183  
men consequi aliqua ratione potest, quibus inuitis arbitri peti potest iis absentibus aut ignorantibus peti etiam arbitrum posse. Eiusque argumenti ratione videtur quoque ad Sabinum libro 30. Vlpianus interpretari voluisse, quinam absentes dicerentur. Ait enim *Qui extra continentia urbis est, eum abesse; ceterum usque ad continentiam, non abesse videri*, c. 173. de verb. sign.

## XXVII. POMPONIVS LIB. XI.

AD SABINVM.

*Nec ex Pratorio, nec ex solemnī iure priuatorum conuentione quicquam immutandum est; quamuis obligationum causa pactioe possint immutari & ipso iure, & per pacti conuenti exceptionem. Quia actionum modus vel lege vel per Pratorem introductus, priuatorum pactio- nibus non infirmatur, nisi tunc cū inchoatur actio inter eos conuenit.*

CONVENTIO generis nomen est, non speciei, cap. 1. §. 1. de pact. Pactum siue pactio interdum idem est quod conuentio, interdum à conuentione tanquam species à suo genere seiungitur ac separatur. Decem- uiri, Oratores & Grammatici inter conuentionem & pactum nullam statuunt differentiam; Iurisconsulti & Pratores, hi de pactis edicentes, illi edictum interpretantes sic ab aliis conuentionibus distinguunt pactum, ut omnes conuentiones ex nudo facto constan- tes, ad earum conuentionum differentiam, quæ iure ciuili certis modis certoque numero sunt introductæ, appellauerint *pacta conuenta*, cap. 27. §. 2. de pactis interim non ignorantes alio sensu accipiendum esse pacti pactioisq; vocabulum cū de legitimis agitur cō- uentionibus. Et sic quidem satis intelligimus qua ratione *conuentionem legitimam pactum esse, actionemque*

M 4

ex 60.

*ex eo pacto nasci; & rursus in pactis nudum versari factum; ac proinde ex iis actionem non dari scripserit vnus idemque Paulus, cap. 6. & 7. circa princ. c. 17. §. 2. de pact.* Alio enim sensu tunc pactum accipit Paulus, cum ait ex eo dari actionem; alio item cum actionem ex eo negat competere. Nam cum scribit ex pacto actionem dari Paulus, ad legem aliquam omnem suam intentionem dirigit; in qua lege pacti vocabulo pro omni conuentione legitima suo more posuerant legumlatores; eamque legem interpretans Paulus, pacti etiam vocabulo pro ea conuentione vsus est, quæ lege confirmatur: non quidem ex Prætoris, sed ex legumlatoris intentione. Aliud erat si de Prætorij edicti ageretur interpretatione. Prætores enim in suis edictis per pactum, non legitimam aliquam conuentionem, sed eam duntaxat intelligebant in qua factum nudum versabatur. Et idcirco Paulus alique iurisconsulti edictum perpetuum de pactis interpretantes, alia prorsus ratione de pactis sentiebant, quam tunc sentirent cum lex aliqua de pactis differens opus habebat eorum interpretatione. In edicti enim interpretatione, sicut Prætores, sic & ipsi quoque interpretes, de pactis sentiebant; & in earum legum quibus de pactis etiam tractabatur explicatione, simili modo intentionem suam legumlatoris voluntati accommodabant Iurisconsulti de pactis differentes. Ex quibus patet euidentissimè in hac regula pactiois conuentionisque vocabulo Pomponium promiscuè vsus esse pro omni conuentione, tam ea quæ legitima erat, quam quæ ex facto nudo constabat. Nec mirum; cum enim istud Pomponij responsum aut ad Prætoris edictum, aut ad certam legem aliquam directo non pertineat; certè nihil causæ est cur aut de legitima sola aut de ea etiam sola conuentione quæ ex facto nudo constabat,

stabat, hoc in loco pactionis vocabulum acciperetur. *Conuentione* igitur *sive pactione priuatorum* nihil quicquam ex *Prætorio* aut *solemni iure* immutari potest, Per *ius solenne* intelligit Pomponius *ius vſitatum* & *communi quodam ciuium consensu receptum*; id enim quod *certum*, *vſitatum* & *familiare* est, dici *solemne* consuevit. Quo sensu scripsit Suetonius, *Augustum*, *quoties magistratum comitiis interesset, supplicasse more solenni*; *Tiberium* *solemnibus cœnis pridiana sæpè obsonia proposuisse*, haud dubiè per *solemnem supplicandi morem*, *vſitatum* prehensandi rationem, & per *cœnas solennes* certas consuetasque festorum dierum epulationes intelligens. Quibus etiam consentaneum est quod ad hunc modum aduersus Marcionem lib. 3. scribit Tertullianus; *Sed quomodo irreperet in Iudæorum fidem, nisi per solenne apud eos & familiare nomen?* Et sic quidem satis esse arbitror perspicuum id omne *solemne* dici, quod *certum*, *vſitatum* & *familiare* est, eoque sensu *solemne ius* hoc loco accipiendum esse. Quod autem Pomponius nec ex *Prætorio*, nec ex *solemni iure priuatorum* *conuentione* quicquam ait immutari posse, id ipsum his verbis expressit Papinianus; *Ius publicum priuatorum pactis mutari non potest*, cap. 38. de pactis. Dubium enim non est, quin per *ius publicum*, *prætorium* & *solemne ius*, hoc est, *ius omne ciuile* intellexerit hoc loco Papinianus. *Iure publico* proditæ sunt iniuriarum & furti pœnæ; & idcirco qui paciscitur ne iniuriarum, si quas facturus est, aut furti quod aliquando est commissurus, conueniatur, is certè huiusmodi pactione iuri *Prætorio* & *solemni* fraudem facit; si quidem timeri plurimum expedit furti & iniuriarum pœnas, c. 27. §. 4. de pactis. Et hac quidem ratione nihil olim ex *iure publico* potuit immutari, quamuis interim obligationum causæ mutari potuerint pactione

ctione. Idque sic accipiendum est; vt quamuis antè illatam iniuriam furtumve factum pacisci de iniuriis aut furto non licuerit, *post tamen admissa hæc rectè pactioni locus esset*, d. §. 4. *Etiã lege duodecim tabularum auctore Gellio lib. 20. cap. 1. Ante illatam iniuriam antè commissum furtum nullæ iniuriarum aut furri obligationum subsistunt causæ. Siquidem huiusmodi causæ ex furtis & iniuriis admissis protinus fortiuntur originem, non antè. Et idcirco qui antè illatam iniuriam pactus est, ius publicum lædit, eoque nomine nullius esse momenti censetur pactum; qui verò paciscitur post iniuriam illatam, is publico iure saluo & illæso causam immutat obligationis iniuriarum; quæ causa ad actionem impetrandam satis iusta & efficax erat. Non enim actionem aliter dabat Prætor quàm cognita prius & examinata obligationis cuiusque causa, quemadmodum ex his edicti perpetui vulgari-  
bus clausulis satis constat; CAVSSA COGNITA ACTIONEJM DABO; CAVSSA COGNITA ACTIONEM DENEGABO. Atque id quidem illud est quod in hac regula sibi voluit his verbis Pomponius; *Quia actionum modus vel lege per Prætorem introductus, priuatorum pactionibus non infirmatur, nisi tunc cum inchoatur actio inter eos convenit. Per modum enim actionum eas intelligit Pomponius actionum formulas, quæ ad futuram aliquam controuersiam iure expediendam proditæ sunt, & per actionem inchoatam iustas obligationum causas. Huiusmodi causas auctor est idem Pomponius pactionibus immutari, aut ipso iure, aut per pacti conueni exceptionem. Demonstrauimus Variorum libro secundo, capite 6. id ipso iure tolli quod per se absque exceptionis, aut quo alio aduentitio auxilio tollitur. Est etiã Vlpianus auctor, pacta quadam talia esse, vt actionem ex sui natura omnem tollant;**

*tollant ; quadam vt tollere nequeant actionem, cap. 27. §. 2. de pact. Pactum iniuriarum, quia legitimum est, actionem tollit, d. §. 2. & sic ipso iure, hoc est, eodem illo ipso iure ex quo suam sortitur originem, obligationis iniuriarum causa mutatur. Si centum tibi mutua dederim, & pactus sim ea non petere, huiusmodi pactum legitimum non est, sed ex facto nudo constat, eaque de causa, nec ipso quidem iure mutui contractum tollere potest, sed per exceptionem pacti conuenienti cap. 3. & 30. de pecun. constit. Et hæc quidem latius à me nunc exponerentur, nisi de iis Variorum lib. 2. latissimè disseruissem.*

## XXVIII. VLP IANVS LIB. XXXVI.

AD SABINVM.

*Dius Pius rescriptit, eos qui ex liberalitate sua conueniuntur, in id quod facere possunt condemnandos.*

VLP IANVS ait esse nonnullos, qui in id quod facere possunt conueniuntur; hoc est, non deducto ære alieno, cap. 16. de re iudic. Quæ verba eam videntur habere sententiam, vt personæ quædam in id quod facere possunt ante conueniri potuerint & condemnari, quam deduceretur æs alienum, quam conuocarentur, etiam eiusdem conditionis creditores, cap. 19. d. tit. *id quod editis creditorum nominibus fieri consuevit*, quemadmodum docet Seneca de beneficiis libro secundo. Inter eas personas quæ in id quod facere possunt conueniuntur, numerari solent omnium bonorum socius, parens, patronus, patrona, liberique eorum & parentes, item maritus dotis ratione, d. cap. 16. & 17. de re iudic. Paulus auctor est eos qui ex causa donationis conueniuntur, etiã in id quod facere possunt condemnari, sed ratione paululum ab iis diuersa qui sic ex  
contra

contractibus conueniuntur, c. 19. §. 1. de re iudic. Illi enim contractus, & cum eo beneficij cuiusdam personalis simul concurrentis ratione non deducto ære alieno sic conueniebantur, vt occupantis & præuenientis creditoris melior esse causa iudicaretur, d. c. 19. & cap. 13. solut. matrim. hi verò antè ex causa donationis non poterant conueniri quàm editis creditorum nominibus deductum esset æs alienum; eoque deducto, sic in id quod facere poterant qui ex liberalitate sua conueniebatur, solebant condemnari, vt non totum quod supererat extorqueretur, sed potius aliqua ipsorum haberetur ratio, ne egerent, d. cap. 19. in fine, cap. 173. hoc tit. De iis qui ex contractibus in id quod facere possunt, condemnantur, disseruit ad edictum Vlpianus lib. 63. & 65. De iis qui ex liberalitate in id etiam conueniuntur, quod facere possunt, scripsit ad Sabinum lib. 36. idem Vlpianus. Et quia in eo libro de dotis repetitione, donationibus inter virum & vxorem, rebûsque dotalibus ab Vlpiano tractatum est ex professo, vtrique obscurum non est quid idem Vlpianus hac regula voluerit, quæ ex eius libro ad Sabinum trigesimo sexto est repetita. Non enim dubium est, quin de marito in quantum facere potest condemnando, disseruerit eo libro Vlpianus; siquidem id ex epigraphe capituli duodecimi solut. matrim. omnino constat. Et quia Modestinus auctor est, maritum non dotis tantum nomine, sed ex aliis quoque contractibus ab vxore iudicio conueniri, & in quantum facere potest condemnari solere, cap. 20. de re iudic. certè dubium non videtur, quin id ipsum traderit etiam Vlpianus ad Sabinum libro 36. Ait enim Modestinus huiusmodi contractuum ratione, maritum in quantum facere potest, condemnandum esse ex D. Pij constitutione, cuius constitutionis meminit  
expressè

expresſè in hac regula Vlpianus, ex lib. eius ad Sabinum 36. in hunc locum translata. Nec id mirum; plerumque enim ex mera liberalitate huiusmodi inter virum & vxorem contractus constabant. Cuius generis fuisse videtur contractus annui præbendi, in quo contractu donationem verti scripsit eodem ad Sabinum lib. 36. Vlpian. c. 33. de donat. inter vir. & vx. adiiciens insuper annui etiam nomine maritum in id quod facere potest condemnandum. Diuum enim Pium reſcripſiſſe eos qui ex liberalitate ſua conueniuntur, in id quod facere poſſunt condemnandos eſſe; eaque vera eſt huius regulæ ſententia. Stipulatio ſiue contractus annui ad eum morem referri debet, quo vxor à marito certam pecuniæ ſummam ex mariti bonis præſtari ſingulis annis ſtipulabatur. c. 15. & 28. §. 5. de don. inter vir. & vxor. c. 1. de annuis legatis. Quo ſenſu *annua præbita* viſus eſt etiam Suetonius accepiſſe, cùm ſcriberet *Tiberium vxorem Iuliam relegatam pecuniæ conſeſſo à patre, annuiſque præbitis fraudafſe.*

## XXIX. PAVLVS LIB. VIII.

## AD SABINVM.

*Quod initio vitioſum eſt, non poteſt tractu temporis conualeſcere.*

AD Sabinum lib. 8. diſſeruit Paulus de tutelis, & de eo tractauit qui quid à pupillo ſine tutoris auctoritate aut falſo tutore auctore comparauit, cap. 27. de contrah. emption. Quærebatur enim, ſi pupillus ſuæ ætatis factus comprobauerit huiusmodi emptionem, an valeret contractus. Sabinus inſpici contractus initium hac ratione viderur voluiſſe, vt ſi quis bona fide rem à pupillo emerit, nullo, aut falſo tutore auctore, valeret contractus à pupillo ſuæ ætatis facto comprobatus;

batus ; sin mala fide, vtrique non valeret, d. cap. 27. & cap. 5. §. 2. de auctor. & conf. tut. Qui sine tutoris auctoritate à pupillo sciens emit, non videtur bona fide emere, ac per consequens nec ab initio huiusmodi contractus iure substituisse ; qua sola de causa nec per consequentem pupilli ratihabitionem potest confirmari. Id enim quod ipso iure aut exceptionis medio ab initio nullum est, nuda pupilli, licet suæ ætatis facti, voluntas firmum reddere non potest ; non magis hercle quàm ex mala fide facere fidei bonam. Et ita Paulus scribit ad Sabinum lib. 8. quemadmodum ex dicto cap. 27. cum hac regula coniuncto omnino probatur. Atque ita quidem ex Sabini sententia, vt quid dicatur bona vel mala fide comparatum, inspicere necessum est initium contractus. Cùmque dubitarent veteres, vtrum emptionis, an verò traditionis initium, per initium contractus accipi deberet, obtinuit eiusdem Sabini & Cassij sententia existimantium traditionis initium spectandum esse, cap. 10. in princip. de usurpat. Eoque sensu accipienda sunt hæc Pauli verba ; *Quod initio vitiosum est, non potest tractu temporis conualescere.* Nihil enim aliud sibi voluit hac regula Paulus, quàm contractum *initio vitiosum*, hoc est, contractum, si non ipso iure, saltem exceptionis auxilio traditionis tempore prorsus inualidum, non posse tractu temporis alicuius priuati hominis facto, aut approbatione, sine aliquo legitimi, vel Prætorij iuris subsidio conualescere.

## XXX. V L P I A N V S   L I B. XXXVI.

A D   S A B I N U M.

*Nuptias non concubitus, sed consensus facit.*

MATRIMONIUM aliud est iustum, aliud iniustum. Iustum quidem, quod iure & licitè ; iniustum verò,



verò , quod iniustè in fraudem legum Romanarum contrahebatur. Iustum matrimonium alio nomine *connubium* vocabatur. *Est enim* ( vt Vlpianus definit ) *connubium uxoris iure ducenda facultas*. Eamque facultatem extraneis hominibus vnà cum ciuitate interdum concedebat populus Romanus. Qua sola ratione auctor est Lilius libro vigesimo sexto *Campani ciues Romanos affinitatibus pleròsque, & propinquis cognationibus ex connubio vetusto coniunctos fuisse*. Idque illud etiam est quod ad hunc modum in fragmentis titulo quinto Vlpianus scribit, *Connubium habent ciues Romani cum ciuibus Romanis, cum Latinis autem & peregrinis ita si concessum sit*. Obseruari etiam Romæ solet, vt ciuis Romanus , si cum ingenua muliere consuetudinem habere vellet , aut eam solemniter domum duceret vsu, farre, vel coemptione; aut sine aliqua solemnitate, eam vxoris animo & pleno honore in ædes reciperet, testatione quadam manifestum faciente, hanc ingenuam mulierem non concubinam, sed iustæ vxoris loco haberi sola animi destinatione, cap. vltim. in fine. de diuort. cap. 4. in fine. de fide instrum. Et hoc quidem illud est quod Martianus & Paulus aiunt, *mulierem honesta vitæ & ingenuam in concubinatum haberi sine testatione hoc manifestum faciente concessum non esse , concubinam ex sola animi destinatione estimari oportere , c. 3. & cap. 4. de concub.* Ex his enim locis patet euidentissimè , ingenuam mulierem haberi in concubinatum posse , cum tamen ea in concubinato non possit retineri; nec id mirum. Aliud enim est , habere in concubinatum mulierem; aliud item in concubinato. In concubinatum Martiano ea dicitur haberi mulier, quæ ad concumbendum loco iustæ vxoris ducitur; in concubinato verò cum qua quotidiana consuetudo cuiquam est sine vxoris titulo, sine matrimonio, c. 46.

de

de oper. lib. Vxor quam in concubinatum quis domum duxit, sine aliqua in manus conuentione, honore pleno, maritali honore & affectione diligi; vxorisque animo haberi dicitur, cap. 16. §. 1. De his quib. vt indig. cap. 31. in princip. de donation. cap. 13. §. 2. ad L. Iul. de adulter. Eoque sensu accipienda sunt hæc Pauli verba, *TITIAE AMICAE MEAE CVM QVA SINE MENDACIO VIXI, AVRI PONDO QVINQUE DARI VOLO*, cap. 35. de auro arg. legat. Dixit enim Paulus *sine mendacio*, pro eo quod est, restatione maritalem animum manifestum faciente. Et ad hanc quidem sine in manus conuentione vxoris speciem Suetonius etiam respexisse videtur, sic de Caligula scribens; *Mox Lucio Cassio Longino consulari collocatam abduxit, & in modum iusta vxoris propagalam habuit*. Et sanè, matrimonium quoddam ex sola animi destinatione olim constituisse, adeò verum est, vt scripserit expresse Vlpianus de portatione matrimonium non dissolui, hanc subiiciens rationem; *Nam cum libera mulier remaneat, nihil prohibet & virum mariti animum, & mulierem vxoris animum retinere*, c. 5. de bon. damnat. Et sic quidem verissimum apparet, vxores olim aut conuentione in manus domum solemniter duci; aut sine conuentione, vxorem nomine sola animi destinatione censeretur consueuisse. Concubinam solent *amicam* veteres appellare, cap. 144. de verbor. signif. Vocabant amicam quoque mulierem sine conuentione in manus, vxoris loco habitam, d. cap. 35. Vxorem quæ in manu viri mancipioque erat, non amicam, sed *dominam* nuncupabant, cap. 41. in princ. de legat. 3. cap. 19. §. 1. de annu. legat. Nec mirum eam *dominam* vocari. vxores enim quæ in manum conuenerant, sic in manu mariti erat mancipioque, vt inter suos hæredes primo gradu mariti eas numerarent; auctore in

in fragmentis Vlpiano, tit. vigesimo secundo, & Aulo Gellio libro decimo octauo, cap. 6. Vxor quæ solo mariti honore & affectione sine aliqua in manus conuentione diligebatur, nec in manu erat mariti, nec eam inter suos hæredes numerabat maritus; sed duntaxat testamento mariti decimam accipere poterat. Hi sunt mariti illi & vxores quibus inter se matrimonij nomine capere decimam permissum est, de quibus tractat in fragmentis Vlpianus titulo decimo quinto. Nec de aliis vxoribus maritisque iustis accipi potest titulus Pandect. VNDE VIR ET VXOR. Auctor est enim Iustinianus, fuisse olim bonorum quandam possessionem, quæ VNDE VIR ET VXOR appellabatur, & nono loco inter veteres bonorum possessiones collocabatur, §. Aliam verò. Instit. de bonor. possell. Quandoquidem igitur euidentissimum sit vxorem, quæ in manu mariti erat, apud maritum sui hæredis loco fuisse, eoque nomine vt suum hæredem primo gradu, qui *suorum* dicitur, marito successisse; quis quæso tam insipidus est, vt non intelligat titulum VNDE VIR ET VXOR ad huiusmodi vxores nullo modo referendum esse; sed de iis solum vxoribus accipi debere, quæ sine in manus conuentione iustarum vxorum loco habebantur? Hæc si vera sunt, consequens etiam videtur olim Vlpiani aliorumque similibus Iurisconsultorum temporibus nuptias clandestinas omnino prohibitas non fuisse. Nec est quod inuearis Apuleij auctoritate, qui sic de Asino libro sexto scribit; *Impares nuptia, & praterea in villa sine testibus & patre non consentiente facta, legitima non possunt videri.* Ex hoc enim Apuleij loco non rectè probatur, nuptias in villa contractas velut clandestinas inuvalidas fuisse. Idem enim Apuleius euidentissimè docuit potuisse in villa nuptias contrahi; nam sic in Apolo-

gia secunda scripsit; *Lex quidem Iulia de maritandis ordinibus nunqua scilicet ad hunc modum interdicit; Vxor in villa ne ducito; immo si verum velis, vxor ad prolem multò auspiciùs in villa quàm in oppido ducitur* Et hæc quidem cùm ita se habeat, nunc demum intelligimus quid sibi voluerit hac regula Vlpianus, nimirum aliud nihil quàm non tabulas nuptiales, non concubitum nuptias facere, sed *consensum*, hoc est, solam animi destinationem, maritalem affectionem solam, cap. 25. de condic. & demonst. cap. 5. de bon. damnato. cap. 31. de donat. Sic enim scripsit expressè idem Vlpianus ad Sabinum libro 33. *Non coitus matrimonium facit, sed maritalis affectio*, cap. 32. §. 9. de donat. inter vir. & vxor. Et Quintilianus Instit. orat. lib. 5. cap. 11. *Ex contrario, inquit, nihil obstat, quominus iustum matrimonium sit mente coeuntium, etiamsi tabula signata non fuerint. Nihil enim proderit signasse tabulas si mentem matrimonij non fuisse constabit.*

## XXXI. VLPIANVS LIB. XLII.

## AD SABINVM.

*Verum est neque pacta, neque stipulationes factum posse tollere. Quod enim impossibile est neque pacto neque stipulatione potest comprehendere, ut utilem actionem, aut factum efficere possit.*

Hæc regula referenda est ad edictum ædilitium; quo edicto prodita fuit stipulationis quædam species, qua facile & expeditè venditorum fallaciis occurrebatur, deceptisque succurrebatur emptoribus. Non enim contenti fuerunt Ædiles in *mancipiorum venditionibus titulum proscribi singulorum seruorum*, ita ut intelligi rectè posset quid morbi vitique cuique esset, quemadmodum tradidit libro quarto, capite secundo

Aulus

Aulus Gellius; sed etiam venditorem voluerunt interposita quadam solemnī stipulatione, emptori cauere, sanum, furtis noxisque solutum, & non esse fugitiuum venale mancipium, cap. 2. de rer. permutat. cap. 11. §. 4. de act. empti, c. 32. in prin. de euietion. de hac stipulatione scripsit ad Sabinum libro quadragesimo tertio Vlpianus, & ait; *Si quis ita stipulanti spondeat, SANVM ESSE, FVREM NON ESSE, VISPELLIONEM NON ESSE, inutilem stipulationem quibusdam videri; quia si quis in hac causa est, ut fur sit, ut sanus non sit. ut sit vispellio, impossibile est quod promittitur.* Et ita quosdam sentire Vlpianus auctor est, à quibus tamen dissentiens addidit; *Licet verum sit, neque pacta neque stipulationem factum posse tollere (quod enim impossibile est, neque pacto, neque stipulatione potest comprehendere, ut utilem actionem aut factum efficere possit) interim tamen verius dici hanc stipulationem utilem esse. Non enim eam factum tollere, quod est impossibile, sed hoc duntaxat continere, quod interest horum quid esse, vel horum quid non esse.* Atque ita quidem scripsit expressè ad Sabinum libro 43. Vlpianus, quemadmodum ex hac regula cum capite 31. de euiet. coniuncta euidentissimum est.

## XXXII. VLPIANVS LIB. XLIII.

## AD SABINVM.

*Quod attinet ad ius ciuile, serui pro nullis habentur. Non tamen & iure naturali; quia quod ad ius naturale attinet, omnes homines aequales sunt.*

SCRIPSIT Vlpianus, nec seruum quicquam debere posse, nec seruo posse deberi; sed cum eo verbo abutimur, inquit, factum magis demonstramus, quam ad ius ciuile referimus obligationem. *Quod enim attinet ad ius ciuile serui pro nullis habentur, non tamen & iure naturali: quia*



*quod ad ius naturale attinet, omnes homines aequales sunt, quemadmodum, cap. 41. de pecul. ex Vlpiani lib. 43. traditum est, nulla huius regulæ mentione facta, quam tamen cum eo capite iungendam esse, etiam imperitissimus quisque fateri cogitur. Ex eo enim capite cum hac regula coniuncto patet eidentissimè naturali iure obligari seruos ipso facto, quod factum ex quadam animi libertate constat: cui libertati quia deest sola iuris ciuilis approbatio, idcirco etiam fit vt serui qui iure ciuili pro nullis habentur, ex facto suo nec obligent, nec obligentur ciuilitè, sed naturaliter tantum. Quà dere scripsit eleganter Seneca de beneficiis libro tertio hanc inter seruorum corpus & animum differentiam constituens: Corpus itaque est quod domino fortuna tradidit. Hoc emit, hoc vendit. Interior illa pars mancipio dari non potest. Ab hac quisquid venit, liberum est. Non enim aut nos omnia iubere possumus, aut in omnia parere coguntur. Contra rempublicam imperata non facient, nulli sceleri manus commodabunt. Hæc Seneca, liquidò demonstrans quo sensu illud accipi debeat quod ad hunc modum Venuleius Saturninus scribit; Si seruus reus postulabitur, eadem obseruanda sunt, quasi liber esset, ex S. C. Cotta & Messala Consulibus capite 12. §. 3. de accusatione. Nullam enim inter seruum & liberum hominem ratione delicti seruari conditionis differentiam videtur Senatus voluisse. Certè quod animus sit qui delinquit corporis ministerio, quò animo aequalè cum liberis hominibus obtinent serui libertatem, ac proinde aequaliter veniunt puniendi, hoc est, iisdem legibus, eodem more ac ritu accusationis, non iisdem pœnarum generibus, non apud eosdem magistratus; siquidem inter seruorum & hominum liberorum supplicia, magnam obseruare solent Romani differentiam.*

XXXIII.

## XXXIII. POMPONIVS LIB. XXII.

AD S ABINVM.

*In eo quod vel is qui petit, vel is à quo petitur lucri facturus est, durior causa est petitoris.*

HÆC regula referenda est ad conditionis indebiti tractatum; quem latè persecutus est libro ad Sabinum 22. Pomponius. In eo tractatu de hærede agebatur qui cum debuerat quartam retinere, totam hereditatem restituit, nec curit sibi stipulatione proposita, ut id quod amplius solutum esset fideicommissi nomine, quam per legem Falcidiam capere licuisset, redderetur, c. penult. §. 5. de iuris & facti ignor. Hunc heredem respondit Aristo illis similem esse qui retentiones quas solus habent, omittunt; & posse eum rerum hereditariarum possessionem vel repetere, vel nancisci, capite 21. ad S C. Trebell. Eamque heredi scripto restituere fideicommissarius prorsus cogebatur. In eo enim quod is qui fideicommissum petijt, vel is à quo petitur fideicommissum, lucrifactorus est, durior est causa petitoris, hoc est, in eo quod is cui hereditas fideicommissa est restituta quarta ab hærede scripto non deducta, lucrifactorus erat ex huiusmodi errore deductionis; & in eo quod hæres scriptus lucrifactorus etiam erat per deprehensum errorem, consulum aut prætoris fideicommissarij beneficio in pristinam rerum hereditariarum petitori traditam possessionem restitutus; ut iniquior, sic durior est causa petitoris. Huiusmodi enim petitor agens & integrum fideicommissum petens ab hærede doli mali exceptione poterat excludi. Siquidem beneficio Falcidie tam est norum & omnibus manifestum, ut qui eo neglecto sciens quartam non deductam totum fideicommissum ausit petere, obnoxius esse dolo malo censeatur, eiusque exceptione

N 3      repelli

repelli possit. Et hæc quidem vera est sententia huius regulæ ex Pomponij libro ad Sabinum 22. in hunc locum translatæ, & cum d. c. 21. ad eum modum quem nunc demonstraui, coniungendæ. Potest & illud etiam huic regulæ coaptari, quod sic idem Pomponius scribit; *Faciendi verbo, reddendi etiam causa continetur*, cap. 175. de verb. sign. Id enim ex eod. lib. ad Sabinum 22. desumptum est, & ad scripti hæredis causam videtur pertinere. Nam alia ratione in hac regula lucrum facere fideicommissi petitor dicitur, alia item is à quo petitur fideicommissum; petitor enim lucrum facere intelligitur fideicommissio sibi quarta ab hærede non deducta tradito; hæres verò scriptus etiam lucrum intelligitur facere eadem hæreditate propter errorem deprehensum recuperata, sibi que à petitore magistratus imperio reddita: quia sola ratione faciendi verbo in hac regula etiam reddendi causa continetur. Vlpianus auctor est in fragmentis titulo 25. *fideicommissa, non ut legata per formulam peti solere, sed cognitionem de fideicommissis Roma quidem consulum aut prætoris fuisse, qui fideicommissarius dicebatur; in provinciis verò præsidum provinciarum*. Idque sic accipere convenit, ut de summis certis Prætor fideicommissarius, & Consules etiam de certis summis iisque maioribus fideicommissio relictis cognoscerent. Nam sic inuenimus Quintilianum scripsisse Instit. orator. libro tertio, capite 8. *Non debes apud Prætorem petere fideicommissum, sed apud Consules; maior enim prætoriam cognitione summa est*. Et idcirco quod Pomponius de hærede scribit, *qui possessionem fideicommissi repetere vel nancisci potest*, d. capite 21. id rectè videmus ad Consulum vel fideicommissarij Prætoris cognitionem retulisse. Siquidem de huiusmodi causis Prætorem fideicommissarium cognovisse, Paulus etiam & Papinianus



DE DIVERSIS REGVLIS IVRIS. 199  
nus satis demonstrant, capite 78. §. 6. de legat. 3.  
capite 41. de bon. libert.

XXXIV. VLP IANVS LIB. XLV.

AD SABINVM.

*Semper in stipulationibus & in ceteris contractibus id sequimur quod actum est: aut si non pateat quid actum est, erit consequens ut id sequamur quod in regione in qua actum est frequentatur. Quid ergo si neque regionis mos appareat quia varius fuit? ad id quod minimum est, redigenda summa est.*

VIDETVR Vlpianus libro ad Sabinum quadragésimo quinto, de fideiussoribus ex professo, & quædam obiter de mandato, deque negotiis gestis tractasse; quemadmodum intelligi facîle potest ex inscriptione capitis 4. de negot. gest. & capite 4. de fideiussor. Si meo iussu negotia mea gesseris suscipiens mandatum, sic obligaris ut etiam si non gesseris, mandati possis conveniri, cap. 6. §. 1. mandati. Eaque mandati actio in hoc ab actione negotiorum gestorum discerni solet, quod actio mandati compereret ei qui iussu alicuius negotia administravit; negotiorum verò gestorum ei, qui non iussus eadem administravit bona fide, cap. § 8. in princ. d. tit. Proinde si tibi mandauero ut Titio soluas centum nummos sestertios, si mandato velis satisfacere, exsolues Titio nummos illos sestertios centum. semper enim in stipulationibus & ceteris contractibus id sequi convenit quod actum est, c. 2. §. 1. de hered. vel act. vend. c. 4. de fid. instrum. c. 27. §. 2. de pact. Quibus etiam consentaneum est quod sic Quintilianus in ea declamatione scribit cui titulus est, *Ager communis; Stare verò ei quod sit actum, & conventioni pactorum oportet.* Si cum deberem nummos centum.

N 4

iussim.

iusserim centum nummos solui, nec constiterit quales nummi deberentur, nummorum varietas debitum huiusmodi obscurum facit. Et quia non pareretur siue non apparet ( sic enim Iurisconsultos esse locutos præter Festum testatur expressè Petronius Arbitrator ) quid actum sit respondet Vlpianus, *consequens esse, ut id sequamur quod in regione in qua actum est frequentatur*, hoc est, consuetudo regionis illius in qua actum est diligenter erit examinanda, & inquirendum sedulò an quid usu receptum fuerit in ea regione quo huic obscuritati posset occurri, c. 50. §. 3. de legat. 1. Quid si regionis mos non appareat quia varius fuit? *Ad id quod minimum est*, inquit Vlpianus, *redigenda summa est*, hoc est, nummi exiguiores debebuntur, c. 75. de legat. 3. *Semper enim in obscuris id quod minimum est sequimur*, cap. 9. hoc tit. & ita ad Sabinum libro quadragesimo quinto scripsit Vlpianus, videturque eodem libro quaesitum fuisse, si alia ratione huiusmodi creditori satis fecerit mandatarius, quam nummorum exolutione, an liberetur mandato; & Vlpianus respondisse eum liberari, hanc subiiciens rationem; *Solutionis enim verbo satisfactionem quoque omnem accipiendam placet*, cap. 176. de verb. signific. Illud nunc videndum est de quibus regionibus senserit in hac regula Vlpianus. Diuiditur enim Roma in regiones quatuordecim, & totam Italiam descripsit in undecim regiones D. Augustus auctore Plinio naturalis historiae libro tertio, cap. 5. Erant & aliae regiones quæ suburbicariae dicebantur, cap. 9. C. Theodos. de Annon. & tribut. Erant & provinciae quoque singulae in regiones certas distributae, easque regiones libro de conditionibus agrorum definiuit ad hunc modum Siculus Flaccus; *Regiones autem dicimus intra quarum fines singularum coloniarum aut municipiorum magistratibus ius dicendi, coercendique est libera potestas.*

*potestas.* Huiusmodi regionum fines interdum latissimi fuerunt, adeò quidem vt scripserit expressè idem Plinius lib. 4. cap. 5. *in Achaia regionem Messeniam duodeviginti montium fuisse.* Nec ad alias quàm ad has regiones arbitror Vlpianum respexisse, in hac regula de regionis more differentem.

## XXXV. VLPIANVS LIB. XLVIII.

## AD SABINVM.

*Nihil tam naturale est, quàm eo genere quidque dissolvere quo colligatum est. Ideò verborum obligatio verbis tollitur; nudi consensus obligatio contrario consensu dissolvitur.*

NON solum per æs & liberam alienari res mancipi olim solent, sed etiam obligari. Quo sensu scripsit Festus *Ælium Gallum nexum definiuisse quodcumque per æs & libram geritur; eiusque generis esse testamenti factionem, nexi dationem, nexi liberationem;* addiditque Festus *nexum æs apud antiquos dici pecuniam quæ per nexum obligabatur.* Ea nimirum ratione, quæ eos qui se suæque omnia creditoribus obligabant, *nexum inire dixit* lib. 6. Liuius his verbis; *Nam & si vnciario fœnore factò leuata usura erat, sorte ipsa obruebantur inopes, nexumque inibant.* Solent etiam sine stipulatione, sine aliquo nexu res obligari; obligabantur etiam nudo consensu ex contractibus iuris gentium. Et quia nihil est tam naturale, quàm vnumquodque eo modo dissolui quo colligatum est: hinc factum videri potest, vt id quod per æs & libram nexu erat obligatum, contrario nexu per æs & libram stipulatio sine nexu, contraria sine nexu stipulatione, & denique nudi consensus obligatio, contrario consensu tolleretur, cap. 27. §. 2. & c. 58. in princ. de pact. Est & aliud quoddam civile

remedium à Gallo Aquilio Ciceronis collega excogitatum; quo plures etiam mutuae obligationes, ex scripturis & instrumentis diuersis constantes, vno comprehendi obligationis instrumento solent, & sic comprehensae vna formula. vnoque stipulationis contextu dissoluebantur, quemadmodum eleganter demonstrat Florentinus, cap. 18. de acceptilat. Et quia dubium non est quin Modestini tempore vsu fuerit nexus & mancipatio (siquidem primus mancipationum nexusque solemnia sustulit Imperator Iustinianus) idcirco nunc facile intelligimus quid sibi voluerit idem Modestinus, acceptilationem hoc modo definiens; *Acceptilatio est liberatio per mutuam interrogationem, qua utriusque contingit ab eodem nexu absolutio*, cap. 1. de acceptil. Hac enim definitione nexi liberationem & stipulationis dissolutionem, atque ipsam quoque Aquilianam formulam simul complectitur Modestinus. Cum enim ait *acceptilationem esse liberationem*, certè & illud quoque dicere videtur verborum obligationem, cui acceptilatio directo contraria est, ipso iure per acceptilationem eo modo tolli, quo per stipulationem ipso iure stipulatio tollitur, d §. 2. & cum addit per mutuam interrogationem utriusque contingere absolutionem, Aquilianam stipulationem etiam acceptilationis verbo contineri, euidenter indicat; & denique his verbis, *ab eodem nexu*, quis est quæso mortalium qui non dicat ad nexi liberationem per æs & libram acceptilationem quoque à Modestino referri? Idque eo verisimilius est, quòd res *nexas*, hoc est, per æs & libram obligatas non verbis nudis, non sola debita pecuniæ numeratione, aut acceptilationem nuda, sed etiam per æs & libram dissolui consueuisse præter Aelium Gallum euidenter testatus sit Liuius lib. 7. sic de Marco Manlio scribens; *Inde rem creditori palam*  
populo

*populo soluit, libræque & ære liberatum emittit.* Nec alio sensu in acceptilationis definitione *nexum* videtur Modestinus accepisse, d. cap. 1. Atque ita quidem accipiendum est quod Vlpianus ait hac regula, *eo genere quidque dissolui quo colligatum est.* De acceptilatione scripsit ad Sabinum libro quadragesimo octauo Vlpianus. Et cum dixisset in eo libro acceptum ferri non posse, nisi quod verbis colligatum est, quia verbis tolli non potest quod non verbis contractum est, cap. 8. §. 2. de acceptil. hanc videtur regulam subiecisse; *Nihil enim tam naturale est*, &c. id quod ex inscriptione eiusdem regulæ licet suspicari.

## XXXVI. POMPONIVS LIB. XXVII.

AD SABINVM.

*Culpa est immiscere se rei ad se non pertinenti.*

EMPTOR hæreditatis ad hunc modum stipulari solet, *QUANTA PECVNIA AD TE PERVENERIT, DOLOVE MALO TVO FACTVM EST, ERITVE QVO MINVS PERVENIAT, TANTAM PRÆSTARI*, c. 50. de verb. oblig. Et quia dubitabatur ad venditorem hæreditatis quando videretur pecunia peruenisse, hanc stipulationis formulam interpretatus Vlpianus respondit, *si rerum venditarum ante hæreditatem venditam pretia fueris venditor hæreditatis consecutus, palam esse pecuniam*, hoc est pretia rerum *ad eum peruenisse*, cap. 2. §. 3. de hæred. vel act. vend. Hinc etiam quæsitum fuit, si venditor hæreditatis exactam pecuniam perdidisset, an eo nomine emptori teneretur. Hæc quæstionem libr. ad Sabinum 27. tractans Pomponius sic putavit dirimendam esse, *ut si quidem dolo aut culpa venditoris pecuniam esse deperditam constaret, emptori venditor teneretur*, cap. 3. d. titul.

Et

Et cum dubitaretur quid per venditoris culpā in hac quaestione deberet exaudiri, addidit eodem lib. Pomponius, *venditorem hereditatis ad quem aliqua post venditam hereditatem, & cessam pecunia peruenit, quia scire debui non sibi amplius sed emptori debitam hereditati pecuniam exoluendam esse, pecunia deperdita culpam non effugere, eoque nomine damnandum esse*; hac subiiciens rationem; *Culpa enim est immiscere se rei ad se non pertinenti.* Atque ita quidem ad Sabinum lib. vigesimo septimo scripsit Pomponius, quemadmodum ex hac regula cum dicto cap. 3. coniuncta, euidenter apparet.

## XXXII. VLPIANVS LIB. LI.

AD SABINVM.

*Nemo qui condemnare potest, absolvere non potest.*

VLPIANVS ad Sabinum libro quinquagesimo primo de iurisdictione differens ait, *eum qui iudicare iubet, magistratum esse oportere*, cap. 13. de iurisdic. adijcens insuper *eum iubere iudicare qui liberam non condemnandi, non etiam absoluendi tantum, sed condemnandi & absoluendi simul dato iudici facit potestatem*; *neminem enim qui condemnare potest, absolvere non posse.* Eoque pertinet illud Tertulliani aduersus Marcionem libro quarto; *An eius sit absolvere, cuius non sit etiam damnare?* Et paulò post, *Qui enim iudicat, & absoluit.* Hinc etiam intelligimus quo sensu scripserit Iustinianus vulgò dici *omnia iudicia absolutoria esse*, §. fin. Inst. de perper. & tempor. actionibus. Si enim libera tam absoluendi quàm condemnandi dato iudici soleat potestas fieri, quid mirum est *omnia iudicia esse absolutoria*, hoc est, iudicem eum etiam qui tempore accepti iudicij condemnandus videbatur, absolvere potuisse; praesertim aduersa parte condemnationem nullam urgente. Quod tunc

tunc accidere solet, cùm antè rem iudicatam reus auctori satisfacit, d. §. fin. Et hoc inde. ni fallor, *quod auctor litem detulit, eam perferre cogi non soleat*, c. 1. de condict. caus. data. quodque ex officio suo, etiamsi lis non perferatur, nihilominus tamen iudex soleat pronuntiare, cap. 34. in fine de iureiurand. *Defertur lis ipsa contestatione, perfertur pronuntiatione sententia*, cap. 6. de dor. collat. cap. 57. de vsufr. *Soletque lis non perferri aut compositione, aut donatione negotij*, auctore in Caligula Suetonio. Et sic quidem absolutoria esse omnia iudicia solent, auctore ob satisfactionem, aut etiam delationem iusiurandi ab incœpta lite desistente, & iudice ex officio pronuntiante, suaque pronuntiatione debitorem absolvente, hoc est, debito liberante, d. c. 34 in fine, & cap. penult. de confess.

## XXXVIII. POMPONIVS LIB. XXIX.

AD SABINVM.

*Sicuti pœna ex delicto defuncti hæres teneri non debeat, ita nec lucrum facere, si quid ex ea re ad eum peruenisset.*

PLACUIT non in furti tantum, verùm in cæteris quoque actionibus, quæ ex delicto oriuntur, *noxam caput sequi*, cap. 1. in fine de priuat. delic. cap. 20. de pœnis. Eaque ratio est cur pœna ex delicto defuncti hæres non teneatur, quamvis scripserit expressè Pomponius libro ad Sabinum vigesimo nono, *ex causa depositi, commodati, mandati, tutela, aut negotiorum gestorum ob dolum defuncti hæredem in solidum teneri*, cap. 12. de oblig. & action. Id enim sic potius accipiendum est, ut hæres lucrum facere non potuerit, si quid ex delicto defuncti ad eum peruenisset, quàm ut actione pœnali aut famosa ex defuncti delicto posset conueniri. Nam *sicut pœna ex delicto defuncti hæres non tenetur, sic nec lu-*  
crum

*crum quoque ex eodem delicto facere potuit*, quemadmodum eodem illo ab Sabinum libro vigesimo nono auctor fuit hac regula Pomponius. Et idcirco hæres nullis pœnalibus, nullisque famosis actionibus ex delicto defuncti, sed ciuilibus minimèque famosis ita solet conueniri, vt ex causâ depositi, mandati, tutelæ, & similibus, ad exhibendum actioni aduersus hæredem possidentem locus esset, & re exhibita vindicatione idem hæres teneretur; sed & condictio aduersus eum competeret, c. 1. de priu. delict. Eoque sensu scripsit Paulus *ex contractibus venientes actiones, in hæredes dari, licet delictum quoque versetur*, cap. 49. de oblat. & action. Certum est furri doli mali, pro socio, tutelæ, depositi iudicia famosa esse, cap. 1. de his qui notant. infam. eaque de causâ nec iis iudiciis potuit ex delicto defuncti hæres conueniri, sed potius ad exhibendum, vindicatione, aut etiam conductione. Est enim Vlpianus auctor *cessare ignominiam in conductionibus, quamvis ex famosis causis pendeant*, capitulo trigesimo sexto dicto titulo.

## XXXIX. POMPONIVS LIB. XXXII.

AD SABINVM.

*In omnibus causis pro facto accipitur id, in quo per alium mora sit, quo minus fiat.*

MORIS erat vt fundi venditor emptorem in vacuum possessionem solemnî quodam ritu, quem à veteribus vsurpationem appellari demonstrauius suo loco induceret, aut eum induci per amicum curaret. Cuius mortis meminisse videtur Pomponius libr. 32. ad Sabinum, *de fundi venditore differens qui mandauerat amico vt emptorem in vacuum possessionem induceret*, c. 33. de acquir. possess. *Et cum quæsitum esset, si amicus venditoris*



*venditoris mortuo eo antequam id sciret, aut non prohibentibus heredibus id fecisset, an rectè possessio tradita diceretur;* scripsit Pompon. *eam rectè traditam videri, d. c. 33.* hanc subiiciens rationem; *In omnibus enim causis pro facto accipitur id, in quo per alium mora sit quo minus fiat;* hoc est, in omnibus causis pro eo quod rectè factum est, accipitur id, quod ab eo cui data est faciendi auctoritas factum est, si in eo ipso per alium ius prohibendi nactum, mora sit, quo minus fiat quod fieri necessum est. Nimirum vt hîc apud Pomponium, heredibus id ipsum quod amicus facere iussus erat, nec facientibus, nec amicum defuncti facere prohibentibus, & sic in mora existentibus, quo minus fieret quod debuit fieri. Atque ita quidem ad Sabinum l. 32. scripsit Pomponius, eaque vera est huius regulæ sententia.

## XL. POMPONIVS LIB. XXXIV.

## AD SABINVM.

*Furiosi, vel eius cui bonis interdictum est, nulla voluntas est.*

SCRIPSERAT ad Q. Mutium Pomponius l. 14. *si patiente vicino opus faciam ex quo ei aqua pluvia noceat, Labeonem dixisse non teneri me actione aqua pluvie arcende, cap. 19. de aqua, & aquæ pluui. arcen.* Idem Pomponius ad Sabinum lib. 34. *hoc ita verum esse ait, si non per errorem aut imperitiam deceptus fuerit vicinus. Nullam enim voluntatem errantis esse, cap. 20. d. tit.* Addiditque eodem libro Pomponius, *eorum qui per errorem vel imperitiam decipiuntur numero, furiosos cum iis quibus bonis interdictum est contineri, hanc rationem adiiciens; Furiosi enim vel eius cui bonis interdictum est, nulla voluntas est.* Eaque etiam ratio est cur sic l. 5. de providentia Dei scripserit Saluianus; *Voluntas crimen non habet, ubi furore peccatur.*

## XLI. VLP IANVS LIB. XXVI:

## AD EDICTVM.

*Non debet auctori licere quod reo non permittitur.*

LIBRO ad edictum 26. scripsit Vlpianus de iureiurando, de certi, ob turpem causam, indebiti, aliisque conditionibus. Et differens quidem de iureiurando ait Prætores sic edixisse; EVM A QVO IVSIVRANDVM PETETVR, SOLVERE AVT IURARE COGAM. *Et idcirco alterum, inquit Vlpian. eligat reus, aut soluat, aut iuret; & si nõ iuret, solvere cogendus erit à Pretore, cap. 34. §. 5. de iureiurand. Ea quoque reo dari facultas dicitur, ut si malit referat iusiurandum. Non enim debet auctori licere quod reo non permittitur; hoc est, auctori non debet licere aliquid reo deferre iusiurandum, quod iusiurandum reo non permittitur auctori referre, quemadmodum ad edictum libro vigesimo sexto scripsit Vlpianus, d. §. 5. Et idcirco iurare debebat reus aut referre auctori iuramentum. Manifesta enim turpitudinis & confessionis est, nolle nec iurare, nec iusiurandum referre, cap. 38. d. tit. Moris erat ut actor reo deferens iusiurandum, interdum exprimeret quonam modo illud concipi vellet, interdum eius conceptionem arbitrio iurantis relinqueret. Et si de qualitate iurisiurandi inter partes non satis conveniret, tunc eius cõceptio in arbitrio iudicantis erat, d. c. 34. §. 4. Solet etiam eo modo iurari quo delatum erat iusiurandum. Proinde si reo actor detulisset, ut per Iovem iuraret, & ille per alicuius caput, aut per salutem suam iurasset, non erat iuratum habendum iusiurandum, cap. 3. in fine & cap. 33. de iureiur. Eiusque rationem libro 5. Variorum reddidimus. Et plerumque sic ab actoribus deferri solet iusiurandum, ut aut per Iovem,*

Iouem, aut per ipsius rei salutem specialiter iurari vel-  
lent. Per Iouem quidem solemnī formula, quam his  
verbis cōceptam fuisse, Festus auctor est; **SI SCIENS  
FALLO, TVM ME DIESPITER, SALVA VR-  
BE ARCEQVE, BONIS EIICIAT VT EGO  
HVNC LAPIDEM.** Per salutem suam, hoc modo;  
**ITA MIHI DEOS VELIM PROPITIOS.** Erat  
& alia quādam formula solēmnis qua per Iouem &  
simul etiam per salutem suam iurabatur, verbis ad hūc  
modum conceptis, **SI SCIENS FALLO, TVM  
ME IVPITER OPT. MAXIM. DOMVM, FA-  
MILIAM, REMQVE MEAM PESSIMO LE-  
THO AFFICIAS.** Eamque iurissurandi antiquam  
formulam recenset Liuius libro vigesimo secundo.

#### AD §. IN RE OBSCVRA.

*In re obscura melius est fauere repetitioni, quā ad-  
uentitio lucro,*

**PLVTARCHVS** auctor est *M. Lucullum aduersus  
fœneratorum auaritiā & voracitatē ea forma vrbibus  
Achaia bello attritis succurisse, vt supra duplum nihil solui  
permiserit, debitoresque absoluerit, qui tantundem vsura no-  
mine soluissent, quantum sors ipsa esset.* Quod quidem Lu-  
culli institutum adēdō Romanis placuit, vt tandem &  
illi quoque definierint supra duplum vsuras, & vsura-  
rum vsuras nec in stipulationem deduci, nec exigi li-  
cere; solutaeque repeti posse, quemadmodum ad edi-  
ctum libro 26. expressē testatus est **Vlpianus**, capite  
26. §. 1. de condic. indeb. Eoque videtur etiam **Taci-  
tus** respexisse **Annalium** libro quinto. Ait enim **Tibe-  
rium Caesarem** disposito per mēsas millies sestertio mutuandi  
copiam sine vsuris per triennium fecisse, si debitor populo in  
duplum praediis canisset: satis demōstrans vsurarum legi-  
timum

timum modum etiam imperante Tiberio duplum  
 non excessisse; Soletque ad duplum excrescere sortis  
 modus, non quidem triennio, sed singulis duobus  
 lustris. Sic enim libro quarto Epistolarum scripsit Si-  
 donius Apollinaris; *Vt chirographo facto docetur, cauta*  
*centesima est fœneratori, quæ per bilustre perducta tempus*  
*modum sortis ad duplum adduxit.* Addiditque eodem  
 loco Sidonius *ad duplum adducta sorte reformari debi-*  
*tum consueuisse.* Quo sensu legitimum vsurarum modum  
 idem Vlpianus & Paulus accepisse videntur, capite 11.  
 §. 2. de pignor. act. capite 44. de vsur. Et hæc quidem  
 adeò vera sunt, vt scripserit etiam Vlpianus, *si ante sors*  
*fuerit soluta, vsuras vsurarum quasi indebitam sortem re-*  
*peti solere. sique un i cum sorte ipsa, soluta essent vsurarum*  
*usura, dici posse, & tunc etiam conductionem locum habe-*  
*re, d. capite 26. in princ.* In re enim obscura melius esse  
 fauere repetitioni, quam aduentitio lucro; hoc est, vtilius  
 esse vsurarum vsuras tanquam indebitas condici,  
 quàm aduentitio illi lucro fauere, quod ex vsurarum  
 vsuris non repetitis contra ius & æquum obueneret  
 fœneratoribus. Et ita ad edictum scripsit Vlpianus  
 libro 26. dixitque *aduentitium lucrum* eo sensu, quo  
 pecuniam aduentitiam *pro pecunia fœnebre*, & ea quæ  
 † ex vectigalibus cogitur, accepisse videtur Cicero, sic  
 pro Rabirio Posthumo scribens; *Atque eo magis si ad-*  
*uentitia pecunia petitur ab eo, cui sua non redditur.* Sen-  
 sus enim est; si vsuræ perceptæ C. Rabirio extorquen-  
 tur, cui sors ab Alexandrino rege nunquam fuit per-  
 soluta. Pecuniam quæ cogitur ex vectigalibus, etiam  
 † dici aduentitiam, euidenter docuit idem Cicero, sic  
 ad Articum scribens Epist. libro primo. *Vnam ratio-*  
*nem non reijciebam, vt ager hac aduentitia pecunia eme-*  
*retur, quæ ex nouis vectigalibus per quinquennium reci-*  
*pereitur.*

## XLII. CAIVS LIB. IX. AD

## EDICTVM PROVINCIALE.

*Qui in alterius locum succedunt, iustam habent causam ignorantia an id quod peteretur, deberetur. Fideiussores quoque non minus quàm heredes iustam ignorantiam possunt allegare.*

CAIVS ad edictum prouinciale libro 9. de naturali interitu rei depositæ disserens ait, *sive cum ipso apud quem res deposita est actum fuerit, sive cum herede, eius & sua natura res ante rem iudicatam inciderit, veluti si homo mortuus fuerit, Sabinum & Cassium respondisse, absolui debere eum cum quo actum est; equum enim esse naturalem interitum ad actorem pertinere, cap. 14. §. 1. depositi. Eodem loco videtur idem Caius addidisse ex causa depositi alio modo cum ipso depositario agi, alio item cum eius hæredibus; cum depositariq; quidem actione depositi directæ. frequenter in duplum; cum eius verò hæredibus, aut ad id quod depositum est exhibendum, & sic in simplum; aut conditione, cap. 1. de priuat. delict. capite 67. in princ. de furt. cap. 1. §. 1. depositi. Depositarius damnatus depositi infamis efficitur, cap. 1. de his qui not. infam. hæres verò etiam ex causa depositi damnatus nullam sustinet infamiæ notam. Differentiæ rationem hanc refert eodem libro 9. Caius, quòd depositarius nullam allegare possit ignorantia causam iustam, cum contra eius hæres id facere possit. Qui enim alterius locum succedunt, iustam habent causam ignorantia, an id quod petitur debeatur, quemadmodum hac regula auctor est Caius ex eius ad edictum prouinciale libro nono repetita. Idque etiam illud est quod ait Prætor, eos infamia notari qui depositi suo nomine damnantur, d. c. 1. de his qui not. infamia. His enim verbis*

*suo nomine*, hæredes excluduntur, qui non suo sed defuncti nomine ex causa depositi condemnationem sustinent. Nec mirum depositi suo nomine damnatum infamia notari. Sic enim in ea Declamatione cui titulus est *Hæredes de deposito*, scribit Quintilianus; *Et inficiandi quidem depositam pecuniam manifesta ratio est cupiditatis lucri*. Ex quo loco intelligi facile potest, inficiatorem depositi à fure aut prædone aliisque infamibus personis non longè habitum dissimilem fuisse. *Est enim propè furum*, ut Celsus ait; *depositi inficiatio*, cap. 67. in princ. de furt. Hinc & illud tractari video cur non æquè infamia notetur damnatus commodati aut mutui. Et dici quidem potest, id in mutuo mirum non videri. Eum enim habebant Romani morem, ut pecunia aut sub pignoribus, aut accepto chirographo, semper mutua daretur; quemadmodum eleganter tradidit Sidonius Apollinaris, sic libro quarto Epist. scribens; *Pecuniam pater tuus Turpio vir Tribunitius mutuam pridem, si recordaris, à maximo Palatino postulat, impetravitque, nihil quidem fiducia pignorisque vel argenti sequestrans, vel obligans prædiorum; sed ut chirographo facto docetur, tanta centesima est fœneratori*. Quibus consentaneum est illud Tertulliani de idololatria; *Pecuniam de Ethnicis mutuantes, sub pignoribus fiduciati iurati cavent*. Eoque videtur etiam Gaius respexisse, de eo differens *qui sub pignoribus solebat mutuas pecunias accipere*, cap. 12. de pignor. act. Hæc si vera sunt, consequens ergo est, in mutui causa nullum prorsus relictum fuisse inficiationi locum, quæ quidem inficiatio sola in depositi iudicio ad infamiam irrogandam sufficiens erat. Cur autem damnatus commodati etiam non fiat infamis, ea proferri ratio potest, quod is à quo petitur aliquid commodato, instrumento sibi, pignore, aut testibus, possit de securitate prospicere,

prospicere, sique id non fecerit ex commodati inficiatione *sua culpa*, hoc est, magna negligentia damnum sentit. Aliud est in deposito; siquidem depositi causæ tam sunt interdum subitanæ & necessariae, ut aut ad scribendum aliquod chirographum, aut ad testium euocationem nulla superesse temporis commoditas videatur, capite 1. §. 1. depos. Et tunc quidem non hominibus sed Diis testibus sic deponi solet, ut qui depositum huiusmodi inficiaretur, is omni exitio, omnique infamia dignus iure optimo censeretur. Quæ de re scripsit etiam ad hunc modum Quintil. eadem quàm modò laudavi declamatione, *Cum quidem aliquis dicit; Deposui apud te, scis ipse; quid aliud videtur aduocare quàm Deos testes.*

## AD §. HÆC ITA.

*Hæc ita de hærede dicta sunt, si cum eo agatur: non etiam si agat. Nam planè qui agit certus esse debet, cum sit in potestate eius, quando velit experiri: & ante debet rem diligenter explorare, & tunc ad agendum procedere.*

AVCTOR ad Herennium lib. 1. scribit eum causa cadere qui non quemadmodum oportet egerit. Admonuimus etiam suo loco Quintilianum in quadam declamatione scriptum reliquisse, eum qui egerit aliter quàm oportuerit agere, tunc excidisse formula, cum ostenditur ius aliud quo agendum sit. Est & Iulius Paulus auctor sentent. lib. 1. tit. de plus peten. causa veteres cecidisse aut loco, aut summa, aut tempore, aut qualitate; quod ipsum à Iustiniano quoque traditum est, §. Si quis agens. Instit. de act. Eoque etiam illud accedit, quod Quintilianus Instit. orator. lib. 3. c. 3. ad hunc modum scribit; Neque ignoro multa transferri, cum in omnibus fere causis quibus cecidisse quis formula dicitur, hæc sunt quæ-

O 3

stiones,

*stiones, in huic, an cum hoc, an hac lege, an apud hunc, an hoc tempore liceat agere, & si quæ sunt talia. Quibus si addideris pœnam temerè litigantium, omnino perspicuum erit quid hoc loco sibi voluerit Caius. Temerè autem litigare dicebatur actor qui nullum litigij titulum, siue iustam causam proferre poterat. Et erant quidem olim causæ iustæ expensæ latio, mensæ ratio, chirographi exhibitio; tabularum obligatio; testium intercessio, ex quibus si nullam repetitam pecuniam deberi probaretur, dimitti reum oportebat, auctoremque de calumnia in decimam litis partem condemnari, auctore Gellio libro 14. cap. 2. & Iustiniانو. §. Hæc autem. Instit. de pœn. tem. litig. Hæc si vera sunt, non est igitur mirum hæredem agere volentem certum esse debuisse an id quod petiturus esset, deberetur; & ante diligenter eum explorare etiam consuevisse rem totam, & sic ad agendum procedere, ne si temerè litigaret, damnaretur in decimam partem litis, si plus peteret, aut alio iure quàm quo utendum foret, usus esset, excidens formula integram causam perderet. Quæ quidem pericula actor euitare commodissimè potuit. Erat enim in eius potestate quando vellet experiri, eique nihil temporis deerat ad deliberandum.*

# XLIII. VLP IANVS LIB. XXVIII.

## AD EDICTVM.

*Nemo ex his qui negant se debere, prohibetur etiam alia defensione uti, nisi lex impendit.*

CERTVM est libro ad edictum vigesimo octauo ex quo hæc regula desumpta est de actione institoria. Vlpianum accuratissimè differencem de minore viginti quinque annis in medium quædam attulisse. Ait enim; *Si minor viginti quinque annis puerum puellamve taberna sua proposuerit, & institoria conueniatur, auxilio*  
*etatis*



*ætatis cum usurum, non sine causa cognitione, cap. 11. in princ. de instit. actione. Nec ei necesse est uti alia defensione, quia Lex Latoria, quo minus id fieri necessum sit, impedire videtur. Nemo enim ex his qui negant se debere, alia uti defensione prohibetur, nisi lex aliqua impediatur. Nam si legis beneficio satis esse minor viginti quinque annis soleat tutus, certè & eadem lex etiam videtur non quidem prohibere, sed impedire quò minus aliis uti defensionibus minori necessum sit; ad quas defensiones iis confugere prohibitum non est quorum ætati aut errori nulla lex patrocinator, cap. 5. & cap. 8. de except. Sanè Latoria lege fuisse olim minori contrahere prohibitum, ex Suetonio constat. Ait enim Priscianus, Suetonium libro quarto Prætorum passim stipulandi verbum sic protulisse; Latoria que vetat minorem viginti quinque annis stipulari. Eoque sensu scripsit etiam libro tertio de Officiis. Cicero, lege Latoria vindictam fuisse iuuenum circumscriptionem.*

## AD §. QVOTIES.

*Quoties concurrunt plures actiones eiusdem rei nomine, una quis experiri debet.*

AD edictum libro vigesimo octavo, cui & hæc quoque regula tribuitur, de institutoria actione Prætoris edictum interpretans Ulpianus, ait; si libitinarium servum habuerit pollinctorem, isque mortuum spoliauerit, dandum in eum quasi institutoriam actionem, quamvis & furti & iniuriarum actio competere, cap. 5. §. 1. de instit. act. Si que actum fuerit quasi institutoria, non poterit aut furti agi, aut iniuriarum. Nam quoties concurrunt plures actiones unius eiusdemque rei nomine, una quis experiri debet, capite 25. §. 4. locati. Intelliguntur enim relique omnes ita consumptæ, ut amplius iis, aut per exceptionem, aut

*ipso iure locus non sit*, c. 14. de rei vind. c. 13. in prin. de inst. actione, c. 34. §. 1. de oblig. & act. Et id quidem hac ratione fieri solet, vt actiones omnes simul eiusdem rei nomine concurrentes apud Prætorem ab actore vno contextu proponerentur propositæque actori postulanti decernerentur; & simul atque ad datum iudicem lis esset translata, vnam eligeret actor, eaque electa, cæteræ officio iudicis omitterentur, d. §. c. 3. in fin. Nautæ, caupones. Rectè addidit Vlpianus *eiusdem rei nomine*, hac enim ratione fit, vt actio pro socio concurrens cum actione communi diuidundo, non consumatur per communi diuidundo actionem; siquidem iudicium pro socio & nominum habet rationem, & adiudicationem non admittit, cap. 43. Pro socio. Hinc etiam est quodd furti actione cum actione bonæ fidei concurrente altera alteram non consumat, c. 45. d. tit. Nam actio bonæ fidei ad rei restitutionem respicit, furti autem iudicium ad pœnam, cap. 50. d. tit. Quod ipsum etiam semper verum est, quoties plura delicta simul concurrunt, c. 2. de priuat. delict. c. 130. hoc tit.

## XLIV. VLPIANVS LIB. XXIX.

## AD EDICTVM.

*Torrens in heredem damus de eo quod ad eum peruenit, quotiens ex delicto defuncti conuenitur, non quotiens ex suo.*

EDICTVM Prætoris de tributoria actione interpretatus est ad edictum lib. vigesimo nono Vlpianus. Ad eam actionem hoc ordine procedi solet. Si seruus peculiari merce negotiaretur, sciente & non contradicente domino, eoque nomine pluribus creditoribus esset obligatus, creditores Prætorem adibant, & Prætor serui dominum cogebat id omne quod in mercibus

cibus erat , quodque eo nomine fuerat receptum , in medium proferre, vt inter ipsum dominum si quid ei deberetur , & creditores ceteros distributio rata fieret, auctore Theophilo & Caio, c. pen. de tribut. act. Si dominus tribuendi molestiam peculio vel mercibus cedere paratus suscipere non vellet, Pedius refert eum audiri solere , & plerunque arbitrum in hanc rem à Prætore dari consueuisse, cuius interuentu merces peculiare inter creditores tribuebantur, c. 7. in princ. de tribut. act. Ceterum si ipse dominus mercium auctore Prætore suscepisset distributionem , easque distribuens aliquas suppressisset, nec omnes protulisset in medium, aut si in distribuendo pretio mercis, edicto Prætoris non satisfecisset, maiorem partem debiti sui deducens quam tribuerat creditoribus , aduersus dominum creditoribus dabatur actio tributoria , per quam cogebatur dominus quicquid mercium dolo occultauerat , aut sibi tribuerat mala fide in medium adferre, & distribuere, auctore Iustiniano eiusque interprete Theophilo, §. Introduxit, Instit. quod cum eo qui in aliena potest. & Iuliano, cap. vlt. de tribut. act. Idque verissimum esse ex eo patet etiam euidentissimè, quod scripserit Sabinus, *tributoria actione pupillum ex dolo tutoris conueniendum, si tutor per iniquam distributionem pupilli rationibus fauit*, cap. 3. quando ex fac. tutor. Hinc tractatum fuit, si negotiatori seruo antequam facta esset aliqua inter creditores distributio, testamento domini manumisso legatum sit peculium, an hæres tributoria debeat teneri. Et teneri quidem eum negat Labeo, quia neque ad hæredem quicquam peruenit , cuius nomine ex dolo defuncti posset conueniri , neque hæres quicquam fecit quo teneri posset ex suo dolo, si modo (vt ait Pomponius) *caueri sibi à seruo de intributione diligenter curaret hæres , aut id omne à*

*ferui peculio deduceret quod creditoribus erat tribuendum; sique id non fecisset, tenebatur hæres tributoria, non quidem ex defuncti, sed ex suo dolo. Auctor enim doli est hæres qui id egit sciens prudens ne debita iustaque fieret intrituitio, eaque de causa tributoria ex suo dolo conueniendus, etiam si ex ea re ad eum nihil perueniret. Toties enim dari in hæredem solet actio de eo quod ad eum peruenit, quoties ex dolo defuncti conuenitur, non quoties ex suo, cap. 9. de tribut. act. Et ita libro vigesimo nono ad edictum scripsit Vlpianus his verbis, in hæredem damus, eadem prorsus ratione usus qua cum hæredibus contrahere admonuimus eundem Vlpianum scripsisse, cap. 19. hoc titulo.*

XLV. GAIUS LIB. X. AD  
EDICTVM PROVINCIALE.

*Neque pignus, neque depositum, neque precarium, neque emptio, neque locatio rei sua consistere potest.*

P A V L V S auctor est non posse pignus perseverare domino constituto creditore, cap. penul. in fine de except. rei iudicatae. Et idcirco si rem alienam mihi bona fide pignori dederis, deinde me dominus hæredem instituerit; definit pignus esse, c. 29. de pigner. act. Est & Tryphoninus auctor rei propriae depositionem non valere, c. 30. in fine, de pos. Vlpianus etiam scribit non posse consistere precarium rei suae, si modo exceperis rem datam pignori, Tunc enim pœnes pignoratitium creditorem rei pignorate possessio est, nec prohibetur eandem possessionem debitori creditor precario concedere, capitulo sexto in fine, de precario. Eoque sensu scripsit Florentinus posse & precario & pro conductore rei suae debitorem vii, capite trigesimo quinto in fine de pign. act. Emptionem quoque suae rei non valere, præter Vlpianum Pomponius ac Diocletianus

clitianus auctores sunt, cap. 16. de contrah. emptio. cap. 4. C. de contrah. empt. Et denique *inefficacem etiam esse rei propria locationem*, ab eodem Diocletiano rescriptum est, cap. 20. C. de loc. & cond. Cur autem neque pignus neque precarium neque emptio & sic deinceps, rei suæ consistere possit, elegans est à Seneca ratio prodita. Sic enim de beneficiis libro quinto scribit; *Nunquid non demens videbitur qui aliquid vendidisse sibi se dicet? quia venditio alienatio est, & rei suæ, iurisque sui in alium translatio. Atqui quemadmodum vendere, sic dare aliquid à se dimittere est, & id quod habueris habendum alteri tradere. Quod si est beneficium, nemo sibi dedit. Duo contraria in vno coeunt, ut idem sit dare & accipere. Et paulò post; Frater sum alterius. Nemo enim est suus frater. Par sum sed alicui. Quis enim est par sibi? Quod comparatur sine altero non intelligitur, quod iungitur sine altero non est; sic & quod datur sine altero non est, & beneficium sine altero non est. Idem Seneca sic de beneficiis libro septimo scribit; Dicunt, nemo rem suam emit, omnia autem sapientis sunt, ergo sapiens nihil emit; sic vetant & mutuum sumere, quia nemo usuram pro pecunia sua pendit.*

#### AD §. PRIVATORVM.

*Privatorum conventio iuri publico non derogat.*

PRÆTORIS edictum de deposito interpretans Ulpianus libro ad edictum trigesimo ait, *si conuenerit non esse præstandum dolum malum, conventionem hanc contra bonam fidem, contraque bonos mores esse, & per consequens iuri publico videri derogare, atque ideo nec sequendam esse*, cap. 2. C. Hermog. de pactis & transact. c. 3. C. Greg. de pactis & transact. Privatorum enim conventio iuri publico derogare non potest, cap. 1. §. 5. de pos. Certum

Certum est vt leges sic etiam mores inter alias iuris publici species numerari , cap. 31. & 32. de legibus cap. 2. de vulg. & pupil. substit. Id quod à Quintiliano etiam traditum est, lib. 5. cap. 10. Pro certis enim haberi scribens Quintilianus quæ legibus cautæ sunt, quæ persuasione eius ciuitatis aut gentis in qua res agitur, in mores recepta sunt, hæc verba subiecit; *Pleraque in iure non legibus sed moribus constant. Et idcirco quod contra mores bonos attentatur, id ipsum ad publici iuris derogationem tendere videtur. Mores enim iuris publici species sunt, multoque magis boni mores.* Vt igitur iuri publico, sic & bonis moribus conuentio priuatorum non derogat; hoc est, iuri ciuili; cap. 27. §. 3. cap. 28. in principio, & cap. 38. de pactis, cap. 23. & cap. 27. hoc titulo. Eoque sensu ius publicum accepit Lactantius lib. 6. cap. 23. cum ait; *Non enim, sicut iuris publici ratio est, sola mulier adultera est.*

XLVI. GAIUS LIB. X. AD  
EDICTVM PROVINCIALE.

*Quod à quoquo poena nomine exactum est, id eidem restituere nemo cogitur.*

PAPINIANVS ait, *si debitor pignus surripuit quod actione furti soluit, nullo modo recipit, c. 79. de furt.* Hanc Papiniani sententiam laudat Vlpianus, & sic interpretatur, *vt quod ipse debitor furti actione prestitit creditori, debito imputari non debeat*, cap. 22. circa princip. de pign. act. c. 19. §. fin. de furt. Qua de re viderur etiam Caius ad edictum prouinciale lib. 10. scripsisse, idipsū ad locatorem rei locatæ furem referens, quod Papinianus & Vlpianus de eo debitore scripserunt qui pignus abstulerat furto. Ait enim Caius, *eum qui rem conduxit, non cogi restituere id, quod rei nomine actione furti consecutus*



*consecutus est*, cap. 6. locati, videlicet ab ipso locatore, cap. 1 §. 1. cap. 59. & cap. 61. §. 5. de furt. Huiusmodi enim interpretationem omnino requirit ratio illa; quam eodem loco subiecit his verbis Gaius; *Quod enim à quoquam pœna nomine exactum est, id eidem restituere nemo cogitur*. Idque eo etiam videri potest verisimilius, quod ad pœnam referri soleat iudicium furti, cap. 50. Pro soc. Huc spectat illud Senecæ de benefic. lib. 7. *Nec conductum meum, quanquam sis dominus, intra bis; nec seruum tuum, mercenarium meum, abduces*. Quasi dicat Seneca, si seruum quem certa mercede à te conduxisti, inuito & nescio me abduxeris, dubium non esse, quin furtum committas, cap. 28. Rer. amot. Nec mirum si verum est quod ad hunc modum pro Cecinna Cicero scribit, *Si seruus tuus nullus fuerit, & omnes alieni ac mercenarii; tamen & ipsi tue familia & genere & nomine continebuntur*; quod ipsum Vlpianus quoque videtur adnotasse, capitulo quinto §. sexto. Quod vi aut clam.

## XLVII. VLPIANVS LIB. XXX.

## AD EDICTVM.

*Consilij non fraudulentæ nulla obligatio est. Ceterum si dolus & calliditas intercessit, de dolo actio competit. Socij mei socius, meus socius non est.*

H V I V S capitis inscriptio mendosa est. Nam pro libro trigésimo legendum est, libro trigésimo primo. Siquidem ex eo libro partem huius capitis posteriorem desumptam esse, ἀπὸ τοῦ cap. 20. pro soc. euidenter demonstrat. Viderur apud Romanos certum quoddam hominū genus fuisse, qui nominis faciendi causa in consilium à priuatis ciuibus aduocabantur, cap. 42. mand. Idque Senecam arbitror sibi voluisse, cū sic  
libro

libro primo de benefic. scriberet; *Nomina facturi diligenter in patrimonium & vasa debitoris inquirimus.* Huiusmodi homines appellari solent proxenetæ; & emptionibus, venditionibus, commerciis, contractibus quod licitis vtilis se præbebant, c. 2. & cap. 3. de proxenet. De quibus scripsit ad hunc modum idem Seneca Epistol. libro vigesimo primo; *Æs alienum facias oportet; sed malo per intercessores mutueris, nolo proxeneta nomen tuum iactent.* Vlpianus auctor est, *proxenetas monstrare magis nomen quam mandare, quamvis laudent;* hoc est, ut Seneca loquitur, *quamvis eius qui æs alienum facere vult, iactent nomen.* Et idcirco nec mandati nec ex locato conducto eos; *etiam si aliquid philanthropij nomine acceperint, conveniri posse, nisi dolo circumvenerint creditorem;* nam tunc de dolo tenentur, capitulo secundo de proxen. nisi etiam ijs mandatum esset, ut excuterent vires futuri debitoris, d. cap. 42. Et ita ad edictum libro vigesimo primo scripsit Vlpianus, hanc rationem eodem loco subiiciens; *Consilij enim non fraudulentis nulla obligatio est. Caterum si dolus vel calliditas intercesserit, de dolo actio competit, cap. 7. §. 5. de dolo.*

## XLVIII. PAVLVS LIB. XXXV.

## AD EDICTVM.

*Quidquid in calore iracundie vel fit vel dicitur, non prius ratum est quam si perseverantia apparuit iudicium animi fuisse. Ideoque brevi reuersa vxor nec diuertisse videtur.*

LIBRO ad edictum 35. scripsit Paulus de diuortiis; & cum dixisset *diuortium non esse nisi quod animo perpetuam constituendi dissensionem fit*, hæc verba subiecit; *Itaque quicquid in calore iracundie vel fit, vel dicitur,*

NOT



non prius ratum est, quàm si perseverantia apparuit iudicium animi fuisse; ideoque breui reuerfa vxor, nec diuertisse videtur, c. 3. de diuort. Quo in loco ausim dicere hæc verba, per calorem misso repudio, quæ rectè in hac regula non exprimuntur, Triboniani esse non Pauli. Poruit enim vxor & iurgij causa discessisse, & rursus breui domum redijisse, etiam nullo per calorem repudio misso. Certum est moris olim fuisse, vt quoties grauius aliquod inter virum & vxorem iurgium inciderat, à viro discederet ad amicos vxor. Hunc enim morem præter Plautum in Menechmis & Amphitruone, tradidit expressè Papinian. c. 3. de iure dot. c. 27. de pact. dotal. & Paulus, c. 5. de donat. inter vir. & vxor. Eoque etiam spectare videtur quod Seneca de remediis fortuitorū differens, ad hunc modum scribit; *Nonimus veterum matrimoniorum repudia, & fœdiore diuortio malè coherentium rixas; quam multa quos in adolescentia amauerunt, in cōmuni reliquere senectute: quoties anile diuortium risimus?* Nec aliò referendum videtur quod Gellius lib. 17. c. 6. ait, *Catonem in suasione legis Voconia sic scripsisse, Principio mulier nobis magnam dotem attulit, tum magnam pecuniam recepit, quam in viri potestate non committit; eam pecuniam mutuam dat viro, postea vbi irata facta est seruum receptitium sectari, atque flagitare virum iubet.* Sensus enim est, vxorem iratam & ob iurgium à marito discedentem peculium suum quod viro mutuam dederat, per peculiarem seruum à viro repetere, & antecedentem dominam seruum illum cum peculio sectari. Atque ita sectari verbum apud Catonem esse accipiendum omnino videtur. Vt enim sine sectatore appellari nullus antecessor potest, sic nec sine antecessore sectator est, qua de re scripsimus alio loco latiùs. *Observari etiam solet, vt vxor & maritus ob iurgium quod inter eos sine diuortio intercesserat,*

*cum*

*cum amicis in sacellum deæ Viriplacæ, quod erat Roma in palatio, venirent, ibique inuicem loquuti quæ voluerant, contentione ob quam discessio facta erat, animorum deposita, concordēs reuenterentur, quemadmodum auctor est Valerius libro 2. adijciens Deam nomen hoc à viris placandis affectum esse, quotidiana ac domestica pacis custodem, atque ob id præcipuis exquisitisque sacrificiis colendam. Et huiusmodi quidem vxoris discessio appellari à Iuriconsultis frigusculum, aut fortè rectius (vt emendauit ex veteribus libris Haloander) frigusculum solet, certè quod vxoris discessu frigeat maritalis affectio, frigeat rei familiaris cura, frigeant denique mariti & vxoris officia donec tandem beneficio Deæ Viriplacæ (vt erat olim opinio) concordēs domum reuenterentur. Eoque referendum est quod de frigusculo Vlpianus, quoque de reconciliatione Marcellus, scripsit, c. 32. §. 8. de donat. int. virum & vxor. c. 33. de rit. nupt. Nec alio sensu scripsit hac regula Paulus breui reuersam uxorem diuertisse non videri. Dicebaturque frigusculum ea ratione, quæ non leue interrogantis frigus dixit Quintilianus de eo qui probè testium interrogationibus nequit fungi, differens lib. 5. cap. 7.*

## XLIX. VLPIANVS LIB. XXXV.

AD SABINVM.

*Alterius circumuentio alij non prabet actionem.*

CERTVM est lib. ad edictum 35. de tutelis tractasse Vlpianum, ex quo libro desumpta est hæc regula; quam ad tractatum rutelarum referendam esse hinc perspicuum est, quod eo lib. scripserit Vlpianus, *rei pupillaris à tutoribus distracta, quam lex distrahi non prohibet, venditionem valere, etiamsi grandi damno circumscripti tutores pupillum affecterint; sed distractionem illius rei*

rei per in integrum restitutionem reuocandam esse, capite  
49. de minoribus. Eoque spectare videtur quod satyra  
15. Iuuenalis de humana natura disserens, ita scribit;

*Plorare ergo iubet causam lugentis amici,  
Squaloremque rei, pupillum ad iura vocantem  
Circumscriptorem.*——

Nec erat cur aduersus tutores pupillo daretur aliquod iudicium. Bona enim fide negotium pupillare gerentes fuerant circumscripti, id quod diligentissimo cuius patrifamilias interdum contingere solet; qua sola de causa æquum fuisse non videtur, ut ea circumscriptio aliquam pupillo aduersus tutores suos præberet actionem. *Alterius enim circumuentio alij non præbet actionem.* Atque ita ex eo quod tutores negotium pupillare bona fide gerentes fuerant circumscripti, nulla pupillo solet aduersus tutores actio tribui; sed potius aduersus circumscriptorem.

## L. PAVLVS LIB. XXXIX.

## AD EDICTVM.

*Culpa caret qui scit, sed prohibere non potest.*

SVMPTA est hæc regula ex Pauli lib. ad edictum  
39. ex quo lib. desumptum etiam est cap. 9. de nox.  
act. In eo capite de familia communi agitur, quæ altero  
dominorum sciente furtum fecit. Et quia eum qui sciuit fieri  
furtum, & cum prohibere potuisset non prohibuit, nomine  
totius familia teneri, nec à socio quidquam consequi debere  
scribit Paulus, certè dubium non videtur quin hanc  
addiderit eodem loco rationem; *Culpa enim caret  
qui scit, sed prohibere non potest*, & sic in effectu con-  
tenderit ideo dominum, quo sciente commissum est  
furtum, familiæ totius nomine teneri, quia culpa non  
caret, & ideo culpa eum non carere, quia sciens fur-  
tum

226 IAC. RÆVARD. TOM. I. COMM.  
tum fieri non prohibuit, cùm facilè poterat prohibere Siquidem is demum culpa caret, qui scit quidem, sed prohibere non potest.

L I. G A I V S L I B. X V. A D  
E D I C T V M P R O V I N C I A L E .

*Non videtur quisquam id capere, quod ei necesse est, alteri restituere.*

MARCELLVS ait, eum qui legatum perceperit non rectè de inofficioso testamento dicturum, nisi id totum alij administravit; c. 10. de inoffic. test. Certum etiam est ex edicto Prætoris si testamento factò sic moriatur libertus, ut aut nihil, aut minus quàm partem dimidiam bonorum patrono reliquat, contra tabulas testamenti partis dimidia bonorum possessionem patrono dari, auctore in fragmentis Vlpiano tit. 29. & Iustiniano §. 1. de success. libert. Eoque sensu testamentum patrono deberi in ea declamatione scripsit Quintilianus, cui titulus est. *Ania testis; Huic* ( inquit ) *debeo munus, operas, testamentum.* Et id quidem observari solet, si modò patronus secundum voluntatem mortui liberti hæreditatem non adiisset, legatumve non percepisset. Nam si tale quid fecisset patronus, ad contra tabulas bonorum possessionem admitti non poterat, cap. 6. in fin. de bon. libert. *Absurdum enim videbatur licere eidem partim comprobare iudicium defuncti, partim euertere*, idque ad edictum provinciale libro 15. testatur expressè Caius capite 7. d. tit. omnino demonstrans patronum secundum liberti voluntatem hæreditatem adeuntem aut percipientem legatum renunciare iuri suo, nisi id totum alij administraverit; d. c. 10. in fine. Nam tunc percepisse legatum non videtur. Non enim videtur quisquam id capere siue percipere quod ei necessum est alij restituere,

DE DIVERSIS REGVLIS IVRIS. 227  
tuere, cap. 71. de verb. sign. Atque ita quidem eodem  
illo ad edictū provinciale libro decimoquinto Caium  
scripsisse, testis est huius regulæ vera sententia.

LII. VLPIANVS LIB. XLIV.

AD EDICTVM.

*Non defendere videtur non tantum qui latitat, sed & is qui præsens negat se defendere, aut non vult suscipere actionem.*

DE eo quod in fraudem patroni à libertō factum est, & de actione Fabiana tractauit ad edictum libro 44. Vlpianus, cap. 1. Si quid in fraud. patr. Diciturque actio Fabiana per quam quæ in fraudem patroni sunt alienata patrono liberisve eius reuocantur, cap. 39. §. 3. de vsur. cap. 16. §. 1. de iur. patron. Hinc cum dubitaretur, quænam dici possent in fraudem patroni alienata, scripsit eodem lib. Vlpianus inter alia quæ in fraudem alienantur id quoque numerari, quod volens in lite vinci libertus, apud Prætores confessus est, & cuius nomine condemnatus est data opera, capite 1. §. 5. si quid in fraud. patr. Addiditque eodem loco Vlpianus eum data opera videri cōdemnatum, qui se non defendit, eumque se non defendere. videri non solum qui latitat, sed & qui præsens negat se defendere, aut non vult suscipere actionem, quemadmodum demonstrat hæc Vlpiani regula ex eodem lib. 44. desumpta. Huius etiam loci est eremodiciū, si litem data opera deseruerit libertus & ex eremodicio in fraudem patroni sententiam fuerit passus, c. 7. §. fin. de minor. cap. 13. in princ. Iudicatum solui, Soletque huiusmodi libertus eremodiciū contrahere aut tanquam actor, aut tanquam reus, siquidem in eremodiciū tam reus quàm actor olim incidebat, non vt Goueanus existimat, actor solus, cap. 1. §. fin. autem reus. C. de iudiciis.

Id quod libellus quidam antiquissimus quem habeo, his verbis liquidò demonstrat: *Est autem eremodiciū ab alterutra parte desertum indicium.*

## LIII. PAVLVS LIB. XLII.

## AD EDICTVM.

*Cuius per errorem dati repetitio est, eius consulto dati donatio est.*

PERTINET & hæc quoque regulà ad actionem Fabianam. Donare in fraudem patroni nihil potest libertus, nec interest vtrum is cui donatur acceperit ipse, an verò alij iusserit dari id quod sibi donabatur. Repetitur enim reuocaturque donatio actione Fabiana. cap. 5. Si quid in fraud. patr. Et idcirco plurimum errat tam qui donat, quàm is cui donatur, si firmam esse persuaserint sibi, nec reuocari posse donationem à liberto in fraudem patroni factam; quæ quidem donatio omnino valeret, si non per errorem, sed consultò nec in fraudē patroni, nec inuito patrono eam fieri contigisset. *Cuius enim per errorem dati repetitio est, eius consulto dati donatio est.* Et ita Paulus scribit de actione Fabiana differens ad edictum libro 42. ex quo libro constat cum d. cap. 5. hanc regulam sumptam esse. Ideque *per errorem non facti* quidem, sed *iuris* in hac regula errorem intelliges.

## LIV. VLPIANVS LIB. XLVI.

## AD EDICTVM.

*Nemo plus iuris ad alium transferre potest quàm ipse haberet.*

FEMINÆ consideratione quadam generis gentisque civilis propriam nullam ducebant familiam, sed in mariti familiam.

*miliam transgrediebantur, quemadmodum ex Antistio Labeone aliisque auctoribus demonstratum à nobis est Variorum libro 5. Diximus enim Labeonem sic scripsisse; Soror appellata est, quod quasi seorsum nascitur separaturque ab ea domo in qua nata est, & in aliam familiam transgreditur; eamque esse causam addidimus, cur femina nec suos hæredes, nec agnatos habere soleant. Hinc intelligimus quid sibi ad edictum libro 46. ex quo hæc regula sumpta est, voluerit Vlpianus cum scriberet mulierem familia sua & caput & finem esse, cap. 195. in fin. de verb. sign. Si enim femina nullam ducere familiam propriam potuerint, hoc est, si familiæ suæ duces & principes esse non soleant, certè omnino necessarium etiam est, mulierem eius familiæ in qua nata est, & caput esse, hoc est, principium, & finem. Siquidem liberi ex ea legitime procreati patris sui, non matris familiam sequuntur, familiæque paternæ nomen ferunt, non maternæ. Et cur id ita soleat observari ea potest adferri ratio, quod ad fœminam transire non consueverit ius agnationis, ex quo iure omnis constat familiæ propagatio; quodque præter nudum ius sanguinis siue cognationis, nihil ex sua familia ad liberos transferat mater; siquidem ius agnationis transferre nequit, cum illud non habeat; Nemo enim plus iuris ad alium transferre potest, quam ipse habet. Et ita lib. 46. scripsit Vlpianus. Quibus addi poterit, nullam fœminam aut habere suos hæredes, aut desinere habere propter capitis diminutionem, idque Caium scripsisse, cap. 13. de suis & legit. Suos hæredes non habet fœmina, tum quod familiam nullam ducat propriam, tum etiam quod mulieres esse in perpetua tutela soleant, & idcirco nec liberos habeant in potestate, nec per consequens suos hæredes. Si enim dicuntur, qui sunt in potestate. Si non habeat suos hæredes fœmina, ergo nec desinit*



habere propter capitis diminutionem. Fieri enim non potest ut aliquo modo id habere definamus, quod nunquam habuimus. Idque eò referri debet, quòd *fœmina si in manum viri conuenissent, recederent à tutoris potestate, essentque capite diminuta*, auctore in Topicis Cicerone, & eius interprete Boëtio; quòdque *per in manus conuentionem in manu essent mariti mancipiòque*, quemadmodum refert Gellius libro 18. cap. 6. Hinc quæsitum fuisse videtur, an mulier in manu existens mariti, habere definat suos hæredes, & Caius respondisse eam suos hæredes non habere, nec per consequens definire habere *propter capitis diminutionem*, hoc est, propter diminutionem, hoc est, propter conuentionem in manus, d. c. 13. Non enim potest quis definire id habere, quod nunquam habuit, c. 208. hoc tit.

L V. GAIUS LIB. II. DE TESTAMENTIS AD EDICTVM VRBICVM.

*Nullus videtur dolo facere qui suo iure utitur.*

DE iis qui omiſſa testamenti cauſa ab inteſtato vel alio modo poſſident hæreditatem, quædam annotaſſe videtur Caius lib. 2. de teſtamentiſ ad edictum Prætoris urbani, quemadmodum intelligi facile poſteſt in epigraphe, cap. 14. & cap. 16. Si quiſ omiſſ. cauſ. teſtament. Qui omiſſa dolo malo teſtamenti cauſa ab inteſtato hæreditatem eiùſve portiunculam vel minimam poſſidebant, iure prætorio perinde haberi ſolent, atque ſi ex teſtamento hæreditatem adiſſent, c. 13. & cap. 18. d. tit. Hinc dubitarum fuit de filio hærede inſtituto, ſi legitima portione contentuſ eſſe, eamque ab inteſtato voluerit obtinere, an in edictum Prætoris incidat, quaſi dolo malo cauſam omiſerit teſtamenti. Et videtur quidem Caius eodem libro 2. ſcripſiſſe



scripsisse eum non incidere, siquidem suo iure vitur,  
ac per hoc nec dolo quidquam facere videtur, c. 8. §. 6.  
& §. 9. de inoffic. test. Nullus enim videtur dolo facere  
qui suo iure vitur. Ea profectò ratione qua scripsit  
idem Caius patrono qui ex asse heres institutus est ab inte-  
stato hereditatē possidenti commodum patris debita saluum  
esse, c. 19. Si quis omiff. caus. test. vitur enim suo iure.

## LVI. GAIUS LIB. III. DE LEGATIS

AD EDICTVM VRBICVM.

*Semper in dubiis benigniora preferenda sunt.*

CAIVS lib. 3. de legatis ad edictum prætoris urba-  
ni de usufructu differens, municipibus legato quasitum  
fuisse ait, quousque in eo municipes tuendi essent. Nam si quis  
eos perpetuò tueatur, nulla utilitas erit proprietatis, semper  
abscedente usufructu. Et idcirco refert idem Caius centum  
annos (is enim finis vitæ longissimus est) potius tuendos esse in  
huiusmodi usufructu municipes, quam eum perpetuò reli-  
ctum censeris; idq; in hac dubia questione tanquam benignius  
receptum esse. Semper enim in dubiis benigniora preferenda  
sunt, c. 8. de usufruct. leg. Festus auctor est, supra Aquilo-  
nis flatum habitantes idcirco Hyperboreos dictos esse, quod  
humana vitæ modum excedant viuendo ultra centesimum  
annum. Et sanè longævi hominis vitæ centum annos  
tribui adeò verum est, vt scripserit etiam Arnobius ad-  
uersus Gentes libro 2. ultra centenos & videnos annos ho-  
minis vitam produci non posse. Vultis, inquit, Latinus,  
Faunus & Picus annis vixerint videnis atque centenis?  
Vltra enim negatur posse hominis vita produci, æstimatio  
iusta & liquida est. Quibus etiam consentaneum est  
quod Seruius Honoratus scribit, natura, fortuna, fato  
humanam vitam contineri; nec ultra centum & viginti  
annos solstitiales natura concessum esse.

P 4

LVII.

LVII. GAIUS LIB. XVIII. AD  
EDICTVM PROVINCIALE.*Bona fides non patitur, ut bis idem exigatur.*

IN iis testamentis quibus instituuntur & substituantur hæredes, duæ intelliguntur diuersæ hæreditates contineri, c. 2. §. 2. de hæredit. vel act. vend. Eaque sola ratione pupillares tabulæ in prudentum responsis tabulæ secundæ, hæredesque substituri secundi hæredes appellantur, c. 2. §. 2. de statulib. c. 1. Si cui plus, c. 2. §. 1. Testam. quemadmodum aperiantur. *Secundus hæres dicitur*, inquit Boëtius, *qui hæredi instituto substituitur*. Hinc intelligimus, quid sibi voluerit Caius, cum scriberet in duplicibus testamentis eam solam substantiam spectari, quam pater cum moreretur habuerat, capite 79. Ad legem Falcidiam. Sensus enim est, in iis testamentis quibus filius à patre hæres instituitur, ei que instituto, alij rursus substituuntur hæredes, eam tantum ratione Falcidiæ substantiam spectari, quam pater cum moreretur habebat. Et ita libro ad edictum prouinciale decimo octauo scripsit Caius, hanc eodem loco subiiciens rationem; *Bona enim fides non patitur ut bis idem exigatur*. Quod utique fieret, si tam ex secunda quàm ex prima hæreditate Falcidia detraheretur. Licet enim alia atque alia in duplicibus testamentis hæreditas sit, vna tamen eademque substantia est, ex qua hæc duplex hæreditas constat; indéque vulgò dici in patris & filij tabulis vnâ Falcidiam seruari, testis est Papinianus, cap. 11. §. 5. Ad legem Falcid.

## LVIII. VLPIANVS LIB. II.

## DISPUTATIONVM.

*Ex pœnalibus causis non selet in patrem de peculio actio dari.*

VLPIANVS

VLPIANVS lib.2. Disputationum de eo tractauit filiofamilias qui se patremfamilias mentitus est, vt cum eo contraheretur: eumque in dolo esse ait; cap.6. quod cum eo. Et cum quasitum esset qua ratione doli nomine posset hac specie filiusfamilias conueniri, scripsit eodem loco Vlpianus, eum in solidum conueniendum esse, nec in patrem qui, vt ait Sat. 16. Iuuenalis, omne peculij non tamen castrensis regimen tenere solet, de peculio dandam actionem, ex pœnalibus enim causis non solere actionem de peculio in patrem dari, inter quas causas hanc mendacij fraudem referri testis est idem Vlpianus; cap.4. quod cum eo. Id quod & D. Ambrosius etiam liquidò demonstrat, sic offic. lib.3. capite decimo scribens; Nonne honestatis formula sunt. DOLUM MALUM ABESSE eumque cuius dolum fuerit deprehensus dupli pœna obnoxium fore; Eodem disputationum lib. 2. de filiofamilias tutore à Prætorè dato differens etiam Vlpianus, patrem ait in solidum teneri, si tutelam agnouerit, & duntaxat de peculio si non agnouerit cap.7. de tutel. addiditque id ita accipiendum esse, vt filijfamilias tutoris negliger circa tutelam versati, non autem pupillum dolo malo fraudatis nomine potuerit de peculio pater conueniri; certè quod ex causis pœnalibus non soleat in patrem de peculio actio dari. Quarum appellatione iudicium tutelæ contineri, ex eo constat, quod scripserit Tryphoninus tutela iudicium ex duodecim tabulis in duplum competere, cap.55. de administr. & peric. tut. Et idcirco filiusfam. tutelæ iudicio ob dolum condemnatus, iudicatum facere debebat, c.35. de nox. act. sique per inopiam facere non posset, nec fideiussores daret, nec ei succurreret pater; in carcerem deduci solet, quemadmodum ex iis facillè intelligi potest quæ lib.4. Variorum, cap.18. scripsimus.

## LIX. VLP IANVS LIB. III.

## DISPUTATIONVM.

*Heredem eiusdem potestatis iurisque esse, cuius fuit defunctus, constat.*

VLP IANVS libro 3. Disputationum auctor est, si maritus expenderit idè ex dote, ut à latronibus redimeret necessarias mulieri personas, vel ut mulier vinculis vindicaret de necessariis aliquem, reputari id ei quod expensum est, c. 21. Solut. matrim. Cur autem id reputetur, ratio obscura non est; siquidem Lactantius libro sexto Diuinarum institutionum cap. 12. ad hunc modum scribit. *Qui bonum facit consanguineo vel proximo vel amico, aut nullam, aut certè non magnam laudem meretur, quia facere debet, sitque impius ac detestabilis, nisi fecerit id quod ab eo & natura ipsa & necessitudo exigit; & si facit, non tam gloria assequenda, quàm reprehensionis vitanda gratia facit.* Hæc Lactantius. Quibus etiam addi poterit quod sic De beneficiis lib. tertio Seneca scribit; *Sunt enim qui ita distinguant quadam beneficia esse, quadam officia, quadam ministeria; beneficium esse, quod alienus dat; alienus est, qui potuit sine reprehensione cessare; officium esse, filij, uxoris, & earum personarum quas necessitudo suscitât, & ferre opem iubet; ministerium esse serui.* Hæc cum ita sint, non est nunc obscurum quænam in iure nostro personæ appellentur necessariae, d. cap. 21. cap. 1. In ius voca. ut eant. c. 2. §. vltim. quan. appell. sit. In quibus personis definiendis interpretes vehementer solliciti sunt, ignorâtes sic ex Ælio Gallo Festum scripsisse; *Necessarii sunt, ut Gallus Ælius ait, qui aut cognati aut affines sunt, in quos necessaria officia conferuntur præter ceteros.* Et hanc quidem Ælij Galli definitionem vehementer confirmat libro 2. his verbis Valerius;

*Continuum*

*Conuiuium etiam solemnne maiores instituerunt, idque charistia appellabatur, cui prater cognatos & affines nemo interponebatur, ut si qua inter necessarias personas querela esset orta, apud sacra mensa & inter hilaritatem animorum, fautoribus concordia adhibitis tolleretur. Sanè quod in redemptionem necessariarum mulieri personarum ex eius dote expensum est, id marito reputari adeò verum est, ut scripserit Vlpianus etiam de dote agente socero deberi rationem haberi eius quod ex dote in ipsum socerum expensum est; nec interesse utrum pater cum filia, an verò post patris mortem filia sola de dote ageret. Si enim agente patre ratio huiusmodi reputationis haberi soleat, ergo & eo mortuo habebitur agente filia. Haredem enim eiusdem potestatis iurisque esse, cuius fuit defunctus, constat; quemadmodum auctor est Disputationum lib. 3. Vlpianus, dicto cap. 21. Solut. matrim. cum hac regula coniuncto.*

## LX. VLPIANVS LIB. X.

## DISPUTATIONVM.

*Semper qui non prohibet pro se interuenire, mandare creditur. Sed & si quis ratum habuerit quod gestum est, obstringitur mandati actione.*

NON solum qui fideiubet intercedere siue interuenire dicitur, sed & qui pro alio res suas obligat, etiam interuenit cap. 7. §. 2. de minorib. multoque magis qui pro alio soluit. Quod ab ijs plerumque fieri solet, qui donationis causa interueniebant, c. 6. §. 2. Mandati. Si debitor pro suo creditore interueniens soluerit, uti aduersus creditorem compensatione poterit, si modò creditum tale sit quod admittit compensationem; sin aliter sui crediti habebit creditor petitionem, & creditum consequutus debitori negotiorum gestorum

ex

ex causa interuentionis agenti tenebitur satisfacere cap. 2. de negot. gest: nec ad rem pertinebit si dixerit creditor pro se sine mandato suo interuentum esse, cap. 5. d. tit. Semper enim qui non prohibet pro se interuenire, mandare creditur. Atque ita quidem Disputationum libro decimo scripsit Vlpianus, quemadmodum ex hac regula constat coniuncta cum c. 30. de condict. indeb.

## LXI. VLPIANVS. LIB. III.

## OPINIONVM.

*Domum suam reficere unicuique licet, dum non officiat iniurio alteri, in quo ius non habet.*

SARTATA tecta uti sint opera publica, publicè locari solent, inquit Sosipater lib. 2. Est etiam Festus auctor, opera publica qua locantur ut integra præstentur, sartata vocari; esse enim sarcire, integrum facere. Quo sensu scripsit Macer in acceptum ferri non posse opus publicum faciendum frumentum publicandum, sartata tecta tuenda antequam perfecta, probata, præstita lege erunt, cap. 7. §. 1. de lege Iulian. repetund. Cura propria sartorum tectorum exigendorum dari Romæ Censoribus consuevit; verum ea tueri ac procurare, cum ceteris cum publicis, tum priuatis operibus adiliam cura annua erat, Prætoresque nisi Senatus decreuisset, ea de re minus laborabant, quemadmodum refert Alconius Pedianus; facta interim nonnunquam arbitro viro bono & intelligenti dubias sartorum tectorum controuersias dirimendi ab iisdem magistratibus potestate, cap. 7. §. 1. de usufr. cap. 18. de usu & habit. Et ita sartorum tectorum Romæ haberi à Censoribus Ædilibusque cura solet, non Pediano solum, sed Varrone etiam & Festo auctoribus; in prouinciis verò hæc eadem cura Præsidum & Proconsulum propria

propria fuisse videtur, cap. 7. de offi. Procons. Ait enim Opiniorum lib. 3. Vlpianus, à *Præside provincie inspectis aedificiis dominos eorum causa cognita reficere ea compellendos esse*, cap. 7. de offic. Præsidi. dixitque Vlpianus, *causa cognita* quia domum suam reficere; eo inaudito qui contra refectionem dicere vult, etiam iubente Præsidi cuiquam non licet; id quod hac regula ex eodem Opiniorum lib. 3. sumpta, expressè testatur Vlpianus. Solet & illud observari, ut provinciae Praeses non compelleret solum dominos reficere aedificia, sed etiam aduersus detractantes competenti remedio deformitati auxilium ferret, d. cap. 7. de offic. Præsidi. Quale fuerit competens illud remedium, ab iis ignoratur, qui ad pignoris apprehensionem denuntiationemque poenae arbitrantur remedium competens referendum esse. Auctor est Iulius Capitolinus, *curatores D. Marcum multis ciuitatibus, quo latius senatorius tenderet dignitates, à Senatu dedisse; eosque curatores appellatos fuisse Reipubl. curatores; & ad eorum officium spectasse, ut diruta domus extruerentur à dominis*, testis est Iulius Paulus, cap. 46. de dam. infect. Ideoque si quas viderent aedes in ciuitatibus ruinosas, solent illi adire Praesidem, & postulare ut deformitati auxilium ferret; tum Praeses euocari iubebat aedificij dominum, eique refectionem imperabat, & eadem aduersus detractantem decernebat Reipubl. curatori competens remedium. Eoque remedio impetrato, aedificium ruinosum publico sumptu reficiebat curator Reipubl. & si dominus post opus refectionem intra quatuor menses sortem cum usuris non persolueret, eius dominio priuabatur, & iure aedificium Reipubl. distrahebat, d. c. 46. Et hoc quidem illud competens remedium est quo deformitati auxilium ferebatur à D. Marco introductum, d. cap. 7. de offic. Præsidi. c. §. 2. §. 8. Pro soc. eadem fortassis

fortassis oratione qua ciuitatibus idem Imperator curatores dedit.

## LXII. IULIANVS LIB. VI.

## DIGESTORVM.

*Hæreditas nihil aliud est quàm successio in vniuersum ius quod defunctus habuerit.*

DVBIVM non est, quin voluerint Iurifconsulti aliud interdum hæreditatem esse, aliud item id quod in hæreditate continetur. Sic enim scripsit de beneficijs lib.6. Seneca; *Iurifconsultorum ista acuta ineptia sunt, qui hæreditatem negant vsucapi posse, sed ea quæ in hæreditate sunt; tanquam quicquam aliud sit hæreditas, quàm ea quæ in hæreditate sunt.* Et id quidem adeò verum est, vt scripserit etiam Iulianus libro sexto, Digestorum, *si is qui pro hærede possidebat, vi fuerit deiectus, peti ab eo hæreditatem posse quasi à iuris possessore; eumque qui deiecit, petitione hæreditatis etiam teneri, quia res hæreditarias pro possessore possidet*, vt est apud Vlpianum cap. 16. §. 2. de petit. hæred. Ex quo perspicuum satis est quid eodem libro voluerit Iulianus *hæreditatem*, definiens *successionem in vniuersum ius quod defunctus habuit.* Videtur enim scripsisse eo loco Iulianus hæredem etiam vi deiectum conueniri potuisse, quasi iuris possessionem; eaque ratione hæredem debitoris, id quod defunctus pignori dederat, hæreditatem petendo consequi etiam potuisse, eo nihil obstante quod rei pignoratæ possessio penes creditorem esset. Hæreditatem enim nihil aliud esse, quàm in vniuersum ius defuncti, successionem, d. §. 2. & cap. 44. §. 1. de petit. hæred. Atque ita quidem hæreditatem definiuit etiam Celsus, capitulo vigesimo secundo de verbor. signific. Quo sensu scripsit libro quinto cap. decimo Quintilianus,

*aliam*



*aliã esse conditionem heredis, aliã victoris, quia ad illam ius, ad hunc res transeat.*

## LXIII. IVLIANVS LIB. VII.

## DECIMO DIGESTORVM.

*Qui sine dolo malo ad iudicium pronocat, non videtur moram facere.*

SCRIPSIT Digestorum libro decimo septimo Iulianus de iure dotium, de donationibus inter virum & uxorem, de mortis causa donationibus, eiusque decimus octauus liber Digestorum ferè nihil aliud tractatum continet, quàm de diuortiis & de dotis repetitione. Ideoque caput decimum quartum tituli de mortis causa donationibus, verisimile est lib. potiùs decimo septimo, quàm decimo octauo Digestorum Iuliani adscribendam esse, & cum hac regula coniungendum. Illo enim capite de donationibus agitur causa mortis, deque eo dissertitur, cui mortis causa fundus donatus est, in quem impense necessaria viresque facta sunt à possessore. Et ait quidem Iulianus donatarium fundum dotalem vindicantem doli mali exceptione submo- uendum, nisi pretium restituat impensarum; nec moram facere videri percussorem, si protinus vindicanti domino fundum sine iudice non restituat. Qui enim sine dolo malo ad iudicium pronocat, non videtur moram facere, siue is reus fuerit, siue actor, cap. 14. de iud. Siquidem reus in exceptione actor est, cap. 1. de except.

## LXIV. IVLIANVS LIB. XXIX.

## DIGESTORVM.

*Ea quæ raro accidunt, non temerè in agendis negotiis computantur.*

AUTOR est lib. Digestorum 29. Iulianus, filium sub ea conditione heredem institutum, quàm ultimo vitæ testatoris

*testatoris tempore certum est existere non posse, si illa pendente testator decesserit, non ex testamento, sed intestato patri heredem esse, c. 5. de hæred. Inst. hanc eodem loco subiiciens rationem; Ea enim quæ raro accidunt, non temerè in agendis negotiis computantur, multoque minus computari ea solent, quæ quodammodo certum est accidere non posse, aut saltem rarissimè. Quasi in effectu dixerit Iulianus iustam esse & mirè fauorabilem causam olim debuisse, ob quam in agendis aliquibus negotijs eorum quæ rarissimè accidunt rationem haberi necessum erat. Nam ad ea potius debet (ut Celsus ait) aptari ius, quæ frequenter & faciliè, quàm ad ea quæ perraro eveniunt, cap. 5. de legibus. Et sic quidem cum scripsisset lib. ff. 29. Iulianus, apud eum notavit Marcellus, si tamen nouissimo tempore posset aliquo modo impleri conditio, ei parendum esse, & valere testamentum, d. cap. 5. de hæred. Instit. Dixitque in hac regula non temerè Iulianus, ea prorsus ratione, quæ non temerè interdiu Augustum bibisse testis est Suetonius; Maximè, inquit, delectatus est Rhetico, neque temerè interdiu bibit. Quibus addi potest illud eiusdem Suetonij de Claudio; Quasdam insidias temerè illatas adeò expauit, ut deponere imperium tentauerit.*

## LXV. IULIANVS LIB. LIV.

## DIGESTORVM.

*Ea est natura cauillationis, quam Græci ΣΩΠΙΘΗΝ appellant, ut ab euidenter veris per breuissimas mutationes disputatio ad ea quæ euidenter falsa sunt perducatur.*

*Si is qui hominem stipulatus est, Stichum accepto tulerit, acceptilationem aliquid egisse, sustulisseque totam obligationem, auctor est Iulianus lib. ff. 54. quemadmodum refert Vlpianus, cap. 13. de acceptil. dixitque Iulianus,*  
*huiusmodi*

*huiusmodi acceptilationem aliquid egisse, satis indicans eam multorum cauillationibus expositam esse. Certum enim est id quod verbis ligatum est, verbis contrariis dissolui per acceptilationem, capite 35. hoc tit. cumque qui hominem stipulatur de genere sentire, non de specie, cap. 27. §. 5. vers. Sed si generaliter. De pactis. Id si ita est, genus igitur acceptilationis formula comprehendere etiam debet, non species: & per consequens, qui hominem stipulatus est, generaliter hominem acceptum feret, non specialiter Stichum aut Pamphilum. Huiusmodi ratiocinationi negat Iulianus hunc locum esse, quia stipulatori inuito solui à promissore Stichus potest: satis per hoc indicans argumentum illud nulli obnoxium cauillationi ea specie censeretur, quia inuito stipulatori Stichus promissor soluere non potest, cap. 2. §. 1. de reb. cred. Si promissor sic potuit soluere, ergo & acceptilatione etiam potuit liberari. Quod enim inuito stipulatori promissor soluere potest, id acceptum latum liberationem parit, d. §. 4. Videtur eodem loco Iulianus addidisse eos qui aliter sentiunt, cauillari magis quam arguere probabiliter; eamque esse naturam cauillationis, ut ab euidenter veris per breuissimas mutationes disputatio ad ea quæ euidenter falsa sunt perducatur. Qua de re scripsit eleganter Seneca de benefic. libro 7. ad hunc modum; *Is, inquit, cuius prostituta sunt, leno est; Omnia autem sapientis sunt; Inter omnia autem prostituta sunt; ergo & prostituta sapientis sunt: Leno autem est cuius prostituta sunt. Ergo sapiens est leno. Sic illum vetant emere. Dicunt enim; Nemo rem suam emit; Omnia autem sapientis sunt; Ergo sapiens nihil emit. Sic vetant & mutuum sumere, quia nemo usuram pro pecunia sua pendit. Innumerabilia sunt per quæ cauillantur, cum pulcherrimè quid à nobis dicatur intelligant. Haec Seneca.**

## LXVI. IULIANVS LIB. LX.

## DIGESTORVM.

*Marcellus: Desinit debitor esse is, qui nactus est exceptionem iustam, nec ab aequitate naturali abhorrentem.*

CERTVM est deberi quædam iure ciuili quæ Prætorio iure non debentur, cap. 3. & cap. 30. de pecun. const. cap. 1. §. 2. quod falso tut. auct. eumque qui spondit, etiamsi nulla stipulationi subesset obligationis causa iusta, si nihilominus obligari consueuisse iure ciuili, vt vocari in ius, & aduersus eum ciuilis actio decerni potuerit, ex Varrone aliisque auctoribus demonstratum à nobis est Variorum libro 2. Et dabatur quidem huiusmodi actio ciuilis non purè, sed addita exceptione, certè quod Prætorio iure is qui sine causa sponderat, obligatus non esset, cap. 2. §. 4. de dol. mal. & met. except. Hinc intelligimus quid sibi voluerit Iulianus sic lib. 60. ff. scribens; *Si ei quem creditorem putabas, iussu tuo pecuniam quam me tibi debere existimabam, promiserò, petentem doli mali exceptione submouebo*, cap. 2. §. 1. de donat. Sensus enim est; Si iussu tuo pecuniam ei quem creditorem tuum putabas promiserò cum eam me tibi debere existimarem, ex sponso iure ciuili sum obligatus, & idcirco agenti stipulatori denegari non poterit ex sponso actio; sed quia huic stipulationi iusta obligationis causa deest, ac per hoc iure prætorio eam esse inuvalidam constat; idcirco non purè quidem, sed addita doli mali exceptione dabatur à Præторе ex sponso actio, d. §. 3. Eaque exceptione posita & probata obligationis nexu ciuili liberabatur promissor, capite 17. §. 1. Solut. matr. Atque ita quidem scripsisse videtur Iulianus lib. ff. 60. hanc eodem loco ex Neratio subiiciens rationem;

Desinit

Definit enim prætorio iure debitor esse is, qui nactus est exceptionem iustam, nec ab æquitate naturali abhorrentem, etiamsi iure ciuili obligatus sit, dicto capite 17. §. 1.

## LXVII. IULIANVS LIB. LXXXVII.

## DIGESTORVM.

*Quoties idem sermo duas sententias exprimit, ea potissimum excipitur, qua rei gerenda aptior est.*

Eòs qui non agebant quemadmodum agere oportebat, causa olim cecidisse variis Rhetorum monimentis expressum est. Testatur etiam Quintilianus lib. 7. cap. 4. si ab actore vno in verbo sit erratum, tota causa eum cecidisse videri. Idque non ignorans Iulianus cum de eo ageretur qui in actionis formula usus erat oratione ambigua, respondit commodissimum esse id accipi quo res qua de agitur magis valeat quam petat, cap. 12. de reb. dub. Dubitabatur enim an actor oratione usus ambigua non æquè caderet causa atque si in aliquo verbo errasset; & sic per consequens an non res de qua agebatur, hoc est, lis ab actore instituta, perire potius deberet quàm valere. Sed aliud est errare verbo, aliud item ambigua vti oratione. Qui enim verbo errat, is errat formula, idque intollerabile esse, ex Quintiliano admonuimus suo loco; qui verò ambigua utebatur oratione, formula non errabat, nec per cōsequens causa cadebat, sed conceptam ambiguè formulam interpretationi iudicis relinquebat; qui quidem iudex eam eligere ex illa ambigua formula sententiā solet quæ rei gerendæ aptior erat; vt auctor est hac regula idem Iulianus. Simili modo cum in testamento ambiguè aut etiam perperam quid scriptum est, benignè illud interpretari conuenit, & secundum id quod credibile est à

Q 2 testatore

244 IAC. RÆVARO. TOM. I. COMM.  
 testatore fuisse cogitatum, cap. 24. de reb. dub. *Semper enim quicquid dubium est, humanitas inclinatur in melius*, inquit Seneca Epist. lib. 11. Est etiam Vlpianus auctor, quoties in stipulationibus ambigua oratio est, commodissimum esse id accipi, quo res, qua de agitur, in tuto sit, cap. 80. de verb. oblig. cap. 33. de contrah. empr.

## LXVIII. PAVLVS LIB. SINGVLARI DE DOTIS REPETITIONE

*In omnibus causis id observatur, ut ubi persona conditio locum faciat beneficio, ibi deficiente ea, beneficium quoque deficiat: Vbi verò genus actionis id desiderat, ibi ad quemvis persecutio eius deuenerit, non deficiat ratio auxilij.*

SUMPTA est hæc regula ex Pauli de repetitione dotis libro singulari, & idcirco dubium non videtur quin ea ad dotis priuilegium tota referri debeat. Et sanè priuilegium dotis quo mulieres utuntur in actione de dote, ad hæredes non transire, auctores sunt Seuerus & Antoninus Imperatores, cap. vnic. C. de priuil. dot. Certè quia personæ conditio locum facit huic beneficio, qua persona deficiente deficit & beneficium. Idque de eo beneficio, accipiendum est quo præferri creditoribus cæteris in dotis repetitione solet, cap. vltim. §. ad hæc. C. qui potior. in pign. habeantur. Id enim fieri consueuisse, testatur in declamationibus Quintilianus, qui de dotali quadam nurus & focrus controuersia differens, sic scribit; *Dos est si à viro aut ab hærede eius repetatur, tu amisso viro cum dotem non petisti, fecisti creditum ex dote.* Hæc Quintilianus, indicans his verbis, non crediti, sed dotis rationem tunc primam habendam esse, cum in crediti naturam ipsa dos non denegauerit; quod fieri interdum videtur potuisse negligentia mulieris dotem à marito eiusve hærede

rede idoneo tempore non repetentis; alioqui dotis haberi semper prima ratio solet. In quod ex eiusdem dotalis controuersia summa omnino constat, quæ talis est; PRIMA RATIO DOTIS HABEATUR. Vtebatur etiam aduersus vxorem dotem soluto matrimonio repetentem beneficio quodam maritus. In id enim quod facere poterat, condemnari duntaxat solet, non in solidum; eratque beneficium illud personale; & idcirco nec præstabatur hæredi, sed cum persona extinguebatur, c. i 2. & i 3. Solut. matrim. de quo beneficio quædam verisimile est eodem de dotis repetitione lib. singulari Paulum tractasse, quamuis ille ad Sabinum lib. 7. ea de re plenissimè scripserit. Siquidem beneficium eiusmodi ad dotis repetitionem omnino pertinet, nec ad hæredem transit; quia locum ei conditio personæ facit, non vt actioni funerariæ genus actionis, capite penultimo de religios. Eoque referri etiam poterit huius tituli cap. 196.

LXIX. PAVLVS LIB. SINGVLARI  
DE ADSIGNATIONE LIBERTORVM.

*Immo beneficium non datur.*

SOLENT patroni libertos adsignare epistola, testamento, chirographo, aut verbis quibuscunque testificantes cuius vel quorum ex liberis libertum libertosve suos esse vellent, cap. 107. de verb. sign. cap. 1. & cap. 7. de adsign. libert. Eaque adsignatione omne ius libertorum adsignandorum ad eum cui id pater tribuerat ex S C. transferebatur, cap. 48. in fin. De ritu nupt. *A liberto munus, operas & testamentum patrono deberi*, ex Quintiliano demonstrauimus suo loco. Eoque sensu scripsit Cornelius Fronto, *munus esse quod amicus vel cliens, vel libertus officij causa mittunt*. Est etiam Vlpianus auctor *operas, donum, munus prestare libertos*,

Q 3

cap. 7.



cap. 7. in princ. & cap. 47. de oper. libert. Quibus si addideris legitimam ab intestato successionem, intelliges quæ beneficia fuerint olim adsignationis. Hæc enim muneris operarum, testamenti, successionisque iura illius fuerunt propria cui à parente libertus adsignatus erat cap. 1. in fine, de legit. tut. cap. 5. de adfig. liber. Quamvis interim operarum petitio interdum maneret etiamsi ius patroni non esset, *ut evenit*, inquit Paulus, *in fratribus eius cui libertus adsignatus est*, capite ultimo de oper. libert. Hæc si vera sunt, consequens igitur est, eum cui libertus adsignatur honorari, ipsamque adsignationem singulare quoddam beneficium fuisse. Et idcirco filius adsignatum sibi libertum inuitus suscipere cogi non solet. Inuito enim beneficium non datur, quemadmodum libro singulari de adsignatione libertorum scripsit Paulus. Cui consentaneum est Vlpiani illud; *Non potest liberalitas nolenti acquiri*, capite 19. §. 2. de donat.

## LXX. VLPIANVS LIB. I.

## DE OFFICIO PROCONSULIS.

*Nemo potest gladij potestatem sibi datam, vel cuius alterius coërcitionis ad alium transferre.*

SCRIPSIT Domitius Vlpianus de officio Proconsulis libros decem, eosque ita scripsisse mihi persuadeo, ut prius septem duntaxat libros ederet, & postea tres reliquos adiiceret. Sic enim scripsit Lactantius Diuinarum institutionum libro quinto, capite 11. *Quin etiam sceleratissimi homicida contra pios iura impia condiderunt. Nam & constitutiones sacrilega & disputationes iurisperitorum leguntur iniuste. Domitius de officio Proconsulis libris septem rescripta Principum nefaria collegit, ut doceret quibus pœnis affici oporteret eos qui se cul-*  
tores



cores Dei confiterentur. Hæc Lactantius, omnino demonstrans Vlpianum de officio Proconsulis libros septem separatim edidisse, aut certè (quod mihi verissimilius videtur) libro eiusdem operis septimo rescripta Principum aduersus Christianos collegisse. Atque ita emendandus videtur hic Lactantij locus, & in eo pro *libris septem*, reponendum *libro septimo*, quasi notis iis vsus fuerit Lactantius, quibus & septem libri & simul liber septimus significabatur. Hæc coniectura eò mihi probatur magis, quòd certò sciam de officio Proconsulis libro septimo Vlpianum docuisse, qua ratione curare congruat Præsidi, *ut pacata atque quieta provincia sit quam regit?* quod ait *non difficile Præsidem obtenturum, si sollicitè agat, ut malis hominibus provincia careat, eosque conquirat*, cap. 13. de off. Præs. Cum enim hæc ita scriberet Vlpianus, videtur eodem libro ea quoque nefaria Principum rescripta comprehendisse, quibus Christiani conquiri iubebantur. Scripsit igitur Vlpianus non septem, sed decem libros de officio Proconsulis. Et primo quidem libro ea ferè tractauit quæ Proconsuli prouinciam ingresso imprimis essent facienda, quorum numero continebatur custodiarum recognitio; ad quam recognitionem referenda est hæc regula iuris, quemadmodum patet euidentissimè ex cap. 6. de off. Procons. Certum est prouincias singulas Præsides aut Proconsules singulos habuisse; adeò quidem, ut si amplior esset aliqua prouincia & latius patens quàm ut ab vno Præside commodè regi posset, ea soleat Imperatoris arbitrio in duas aut tres prouincias diuidi, & singulis ita diuisis dabantur Præsides aut Proconsules singuli, capite 3. de off. assel. Id quod ex Innocentio probari potest, qui sic ad Alexandrùm Episcopum Antiochenum scribit, *Sciscitaris vtrum diuisis Imperiali iudicio prouinciis, ut dua metropoles fiant;*

*sic duo metropolitani Episcopi debeant nominari.* Et hæc sunt prouinciæ illæ quæ eiusdem nominis dicuntur, cap. 9. de postul. qualis erat *Rhetia prima, Rhetia secunda, Germania prima, Germania secunda*; quibus addi etiam poterunt *Siria tres: totidem Pannonia, & Armenia due* quarum meminit aduersus Parmenianum libro secundo Optatus Afer. Eaque diuidendarum prouinciarum antiqua ratio ad Alexij vsque tempora videtur fuisse obseruata. Hunc enim Imperatorem edicto prohibuisse, *ne amplius in duas una prouincia diuideretur*, testis est Theodorus Balsamon, canonem explicans trigessimum octauum Synodi quæ fuit in Trullo. Cur autem ita diuidi prouinciæ soleant, euidenter docet in epistolis Diuus Hieronymus his verbis; *Imperator vnus, iudex vnus prouinciæ, Roma ut condita est, duos fratres simul habere non potuit, & parricidio dedicatur.* Solent etiam singulæ prouinciæ in varia municipia diuidi; quæ municipia proprium habebant magistratum curiamque municipalem. Et quia omnium vnus prouinciæ municipiorum negotiis commodè non potuit vno tempore & simul vno in loco Proconsul iure dicundo præesse, ea ratione factum est, vt ei adesset legatus à crebris de vno in aliud municipium legationibus hoc nomen sortitus. Huic legato ingressus prouinciam mandabat Proconsul iurisdictionem, eumque mandata iurisdictione per municipia singula dimittebat, prouincialium desideria & querelas auditurum, ac de iis non Principem sed Proconsulem suum consulturum, c. 6. §. 2. de off. Procons. Habebant enim singula municipia carceres, siue custodias proprias, in quas præter obæratos coniciebantur facinorosi. Idque videtur sibi Vlpianus voluisse de Duumuiro aliisque differens, qui potestatem habebant de carcere vel custodia dimittendi, cap. 5 2. §. 6. de furt. Qui ex ciuili debito,

bito, aliisque leuibus causis, quæ magis erant iurisdictionis, quàm imperij carceribus inclusi tenebantur, eos duntaxat de carcere dimitti habebant Diuindui potestatem. Est enim Paulus auctor, *ea quæ magis imperij sunt quàm iurisdictionis, facere magistratum municipalem non potuisse*, cap. 26. Ad municip. Ex quo patet euidentissimè, facinorosos homines dimitti à Duumuiris non potuisse. Et idcirco simul atque ingressus provinciam erat Proconsul, statim per singulas suæ provinciae ciuitates legatum mittebat, qui de custodiis singulis cognosceret & præauditas custodias ad se remitteret. Eoque sensu *custodiarum cognitione mandare legatis* Proconsules dicebantur, cap. 6. in principio, de offic. Proconsul. eratque genus illud mandati extraordinarium, inquit Vlpianus, hanc rationem subiiciens; *Nec enim potest quis gladij potestatem sibi datam, vel cuius alterius coercitionis ad alium transferre*, d. capitulo 7. in principio. Et dicitur quidem extraordinarium huiusmodi mandatum, quia nullo accusationis solemniter ritu in publicis ordinariisque iudicijs obseruato de custodijs cognoscere pro tribunali legatus potuit, sed auditis duntaxat examinatisque testium allegationibus, eos qui dimittendi viderentur ad Proconsulem remittere, eosque qui digni essent iusto supplicio & animaduersione publica, in arctiorem conijcere custodiam, ut tandem adueniente Proconsule solemniter è vinculis causam dicerent, promeritasque pœnas luerent; quas pœnas exigere ne volente quidem Proconsule potuit legatus. Siquidem in legatum suum gladij potestatem Proconsul transferre non potuit. *Quæ enim specialiter lege vel S. C. vel constitutione Principum tribuntur, mandata iurisdictione non transferuntur*, c. 1. princ. de offic. eius cui mand. est iurisdic. Et id quidem sic accipiendum est, ut Præsides & Prætores quædam

Q 5

habuerint

habuerint olim magistratus iure propria, quædam iure imperij specialia. Iure imperij habebant specialiter lictores, viatores, fasces, secures, hastas & gladios, auctore Gellio libro decimo tertio, cap. 12. & 14. Est etiam Festus auctor, *insigne imperij & armorum hastam fuisse*. Et idcirco obseruari in prouincijs solet, vt Proconsules de ciuilibus prouincialium causis cognoscentes pro tribunali hastam, & in facinorosos homines animaduertentes non hastam sed gladium erigerent. Id quod ex Cypriano primùm animaduerti, qui sic Epistolarum lib. secundo scribit; *Sauit inuicem discordantium rabies, & inter togas pace rupta forum litibus mugit insanum, hasta illic & gladius & carnifex præsto est*. Atque ita quidem satis esse perspicuum puto, cur ius gladij, hoc est, ius tribunal ascendendi, & in eo gladium erigendi, nō potuerit transferri: nam si eam potestatem non magistratus, sed imperij iure Proconsul habere soleat, certè omnino consequens est, non magis eam potuisse transferri, quàm ipsum transferri imperium potuit. Vt igitur imperium nulla ratione, sic multo minus in suum legatum potuit gladij ius transferre Proconsul. *Cum imperio enim dicebatur esse*, inquit Festus, *apud antiquos, cui nominatim à populo dabatur imperium*. Aliud erat in ijs quæ Proconsuli iure magistratus esse quodammodo propria videbantur. Ea enim mandari poterant, vt suo loco demonstrabitur latius.

LXXI. VLPIANVS LIB. II. DE  
OFFICIO PROCONSULIS.

*Omnia quæcunque causæ cognitionem desiderant, per bellum expediri non possunt.*

HÆC regula desumpta est ex capite nono, de officio Proconsulis, & idcirco adscribenda videtur Vlp. de

de offic. Proconsulib. primo, aut certè caput illud novum secundo eiusdem operis libr. Moris erat, vt quid à Principe desideraturi Principem etiam præsentem adirent scripto. Eiusque moris meminisse videtur Suetonius sic de Iulio Cæsare scribens; *Libellumque insidiarum indicem ab obvio quodam porrectum libellis ceteris quos sinistra manu tenebat quasi mox lecturus commisit* Et de Caligula; *Libellum, inquit, de salute sua oblatum non recepit.* Obseruari etiam solet vt lectis libellis rescriberent Principes, cap. 32. §. 13. de recept. arb. Id quod ex eodem Suetonio constat, qui sic de Augusto scribit; *Patrem Cæsarem vulgo reprehensum commemorabat, quod inter spectandum epistolis libellisque legendis ac rescribendis vacaret.* Eoque sensu ad libellum rescribere dixit Iunius Mauritanus cap. 23. de vsu leg. & Macer libellum Principi dare, ac sacrum rescriptum expectare, capit. 4. de appell. recip. Solet etiam libellorum magister Principibus adesse, isque ex iurisperitorum numero sumebatur, & Promagister dicebatur, qui Principis rescripto diem & Consulem subijciebat; quemadmodum ex antiquissima libelli cuiusdam formula constat, qua corporum fictili sarcophago ad tempus commendandorum principalis auctoritas postulatur. Hæc enim formulæ illius sollemnia verba, *Sepulchrum fieri placet*, verba rescripti sunt. Quibus statim adiungitur hæc clausula subscriptionis; *Inbentius Celsus Promagister subscripsi* 3. Non. Nou. Antio Pollione & Opiniano Consf. Erat & illud quoque solemne ac Principibus familiare, vt libellum subscriptum signarent anulo, signatumque restitui iuberent ijs qui illos porrexerant. Quò pertinet quod ait Suetonius in diplomatibus libellisque & epistolis signandis Augustum initio Sphinge usum esse. Et hæc quidem libellorum supplicium antiqua ratio apud Prætores etiam & prouinciarum Præsides

Præfides olim in vſu fuit, cap. 25. de in ius voc. Vnde perſpicuum eſt, quid ſibi hac regula voluerit Vlpianus; nimirum aliud nihil, quàm per libellum id peti non poſſe, quod opus habet cognitione aut decreto. Siquidem illud in poſtulationum cognitionumque dies reiſci olim conſueuiſſe, argumentis aliquot euidentiffimis demonſtrauimus Protribunalium libro ſingulari. Quibus addi poterit illud Suetonij de C. Claudio, *Cognitionibus magiſtratum ut vnus e conſiliariis frequenter interſuit.* Per decretum autem conſilij definitionem intelligi, adeò verum eſt, vt expreſſè in quadam Cypriani martyris paſſione ſcriptum inueniam, *Galerium Maximum Proconſulem collocutum cum conſilio ſententiam vix agè dixiſſe, & tandem decretum ex tabella ad hunc modum recitaſſe, THASCIVM CYPRIARVM GLADIO ANIMADVERTI PLACET.* Ex quo loco pro conſilij definitione ſpecialiter decreti nomine veteres vſos eſſe, euidentius apparet, quàm vt diutius negari poſſit.

## LXXII. IAVOLENVS LIB. III.

EX POSTERIORIBVS LABEONIS.

*Fructus rei eſt, vel pignori dare licere.*

IAVOLENVS de fructibus poſt ſententiam vnà cum re principali reſtituendis diſſerens libro tertio ex poſterioribus Labeonis *fructus rei eſſe ait, vel pignori dare licere*, cap. penultim. & cap. vltim. de vſuris. Quod ſic videtur accipiendum, vt aliquis fructus intelligatur ex ea re prouenire, quàm pro ſuo arbitrio alicui licet opponere pignori; & eius idcirco inter fructus alios rationem habendam eſſe; cap. 67. in fine, de rei vindicat.

LXXIII.



LXXIII. QVINTVS MCVIVS SCÆ-  
VOLA LIB. SINGVLARI OPΩN.

*Quò tutela redit, eò hereditas pervenit, nisi cum fœminæ heredes intercedunt.*

LEGITIMÆ tutelæ agnatis lege duodecim tabularum deferri solent, c. 1. de leg. tut. Eadem lege cautum etiam erat, vt eius qui intestatus sine suo hærede moritur, familiam haberet agnatus proximus. Et quia nullam admiserat lex sexus differentiam, eius videntur prudentes rationem primi habuisse: id quod hæc Scævolæ verba præ se ferunt, *Nisi cum fœminæ heredes intercedunt.* Fœminæ igitur hæredes poterant esse, non tutores; cap. 1. §. 1. & cap. penult. de legit. tut. *Tutelam enim officium esse virile* ex interpretatione iurisperitorum rescripsit Imperator Alexander, cap. 1. quando mulier. Idque primum ita fuisse definitum Scævolæ temporibus ex eo suspicari licet, quod scripserit l. 39. ad hunc modum Liuius, *Publ. Ebutius cuius pater publico equo stipendia fecerat pupillus relictus, mortuis deinde tutoribus sub tutela Dironia matris & vitrici T. Sempronij Rutili educatus fuerat.* Hæc Liuius, indicans eo tempore fœminis ademptam omnino non fuisse administrationem tutelæ; quæ administratio Mucij temporibus matri aliisque fœminis denegabatur, etiam si ea vitrico relinqueretur, cap. 32. de adopt. Et quamvis administrare tutelam fœminæ tunc prohiberentur, penes matrem tamen esse pupilli educatio poterat, si vitricum pupillo mater non induxerat, cap. 1. C. vbi pupil. educ. Eoque pertinet illud Apuleij de Asino aureo lib. 10. *Huic infantula quòd leges necessariam patris successionem deferrent, sustinebat agerrimè, inthiansque toto filie patrimonio imminebat.*

Ad

## AD §. NEMO POTEST.

*Nemo potest tutorem dare cuiquam, nisi ei quem in suis heredibus cum moritur habuit, habiturusve esset, si vixisset.*

TUTORES testamento dati lege duodecim tabularum confirmantur, auctore in fragmentis Vlpiano tit. 11. & Pomponio. cap. 120. de verb. sign. Cum enim dubitatum esset, quidnam sibi vellent Decemuiri his verbis, TVTELAVE SVÆ REI, videntur Iuriconsulti definiuisse tutores ijs qui tempore mortis in testatoris erant potestate, liberisque posthumis datos verbis illis confirmari; & sic lege 12. tab. permixtum videri parentibus liberis suis etiam posthumis testamento tutores dare, cap. 1. de test. tut. Eoque spectat illud Suetonij de Iulio Cæsare; *Caium Octavianum etiam in familiam nomenque adoptavit, plurisque percussorum in tutoribus, si quis sibi nasceretur, nominavit.*

## AD §. VI FACTVM.

*Vi factum id videtur esse, qua de re quis, cum prohibetur, fecit; clam, quod quisque cum controuersiam haberet, habiturusve se putaret, fecit.*

Si quis in nostro ædificare vel in nostrum immittere vel proijcere vellet, prohiberi aut per prætorem, aut per manum, id est, lapilli iectum, aut noui operis nuntiatione solet, cap. 5. §. 10. de noui oper. nuntiat. Per prætorem quidem, iure ordinario, medio interdicti; nuntiatione verò noui operis, speciali quodam ac priuato denuntiationis testationisque iure; & per manum denique, ipso facto; c. 1. §. 2. d. tit. Liberum enim fuit domino in cuius fundo ædificabatur, ex eo quod  
ædificatum



ædificatum erat propria manu lapillum vnum aut alterum præcipitare, censebaturque iactu vel minimi lapilli ædificationem prohibuisse, cap. 1. § 2. & cap. 20. quod vi aut clam. Et huiusmodi quidem per manum prohibitio ea ratione *lapilli ictus* appellabatur, qua per *ictum* intellexit præcipationem Vlpianus, de eo scribens qui de ponte præcipitatus ipso ictu periit, cap. 7. §. 5. ad leg. Aquil. Nec alio sensu in edicto de his qui deiecerunt vel effuderunt scripsit ad hunc modum prætor, *SI EO ICTV HOMO LIBER PERISSE DICETVR*; c. 1. de his qui effud. vel deiecit. Et ita per manum ictus lapilli intelligitur; hoc lapilli præcipitatio, d. §. 10. Est & alia per manum prohibendi ratio quæ per manus oppositionem solebat fieri, d. c. 20. De quæ ea suspicor sensisse Pomponium, c. 50. de acquir. rer. dom. Nec aliò spectat *vitæ præcisio*, cuius apud Vlpianum mentio fit, c. 3. §. 3. vt possid. Quod igitur Quintus Mucius ait, vi factum id videri quod quis prohibitus facere perseverat, hoc de eo accipiendum est, qui aut interdicto, aut noui operis nuntiatione, aut denique per manum quid facere prohibitus facere perseverat, c. 1. §. 1. quod vi aut clam.

#### AD §. QVÆ IN TESTAMENTO.

*Qua in testamento ita scripta sunt vt intelligi non possint, perinde sunt ac si scripta non essent.*

*QVÆ in testamento scripta sunt*, inquit Alfenus Varus Q. Mucij auditor, *neque intelliguntur quid significant*, ea perinde sunt ac si scripta non essent, cap. 2. de his quæ pro non scriptis habent. Et ita videtur prudentum interpretatione Mucij temporibus receptum fuisse, hac potissimum ratione, quod satis cõstaret testamentum omnino vitiosum pro non scripto habendũ esse, cap. 1.

256 IAC. REYARD. TOM. I. COMM.  
cap. 1. & cap. 3. d. tit. Id quod in ea Declamatione, cui  
titulus est, *duo testamenta*, docuit Quintilianus. *Si eum,*  
inquit, *videri vultis intestatum qui vitiosum scripsit testa-*  
*mentum, hoc confiteamini necesse est, vitiosum testamentum*  
*esse pro non scripto.*

#### AD §. NE PACISCENDO.

*Nec paciscendo, nec legem dicendo, nec stipulando quis-*  
*quam alteri cauere potest.*

INVENTÆ enim sunt obligationes ad hoc ut  
vnusquisque sibi acquirat quod sua interest, cap. 38.  
§. 12. de verb. oblig. cap. 11. de oblig. & act. Excipiun-  
tur seruus & filius familias, d. §. 12. & cap. 17. in fin. de  
pactis. Seruus quidem, quia nihil proprium habet; fi-  
lius verò familias, quia iure ciuili pater & filius vna  
domus, & vnus dominus nominantur. Sic enim Diui-  
narum Institut. lib. 4. cap. 29. scripsit Lactantius, *Cum*  
*quis habet filium quem vnicè diligit, qui tamen sit in do-*  
*mo & manu patris, licet ei nomen domini potestatemque*  
*concedat, ciuili tamen iure & domus vna, & vnus domi-*  
*nus nominatur.* Hæc Lactantius, docens euidenter cur  
patri potuerit filius stipulari, & simul vnde suus hæres  
iure ciuili filius familias dicatur, cap. 1. §. 2. de suis &  
leg. cap. 11. de lib. & post.

#### LXXIV. PAPINIANVS LIB. I.

##### QVÆSTIONVM.

*Non debet alter per alterum iniqua conditio inferri.*

SCRIPSIT lib. 1. Quæstionum de iurisdictione  
& imperio Papinianus, eiusque argumenti occasione,  
de arbitris differens sumptis compromisso, ait *arbi-*  
*trum ita sumptum, ut diem proferre possit, hoc quidem facere*  
*posse;*

posse; referre autem contradicentibus litigatoribus non posse, cap. 33. de receptis. Solent iudices ita nonnunquam dari, ut intra diem certum iuberentur pronuntiare, auctore Vlpiano cap. 32. de iudic. & Aulo Gellio, libro 12. cap. 13. Ait enim Gellius se à consulibus Romæ iudicem extra ordinem datum pronuntiare intra calendas iussu fuisse. Eumque morem arbitri etiam videntur obseruasse, interdum tamen non sine diem proferendi expressa clausula; eaq; clausula alia dabatur arbitro facultas nulla, quam diem prorogandi, c. 25. de receptis. Et idcirco referendi diem arbitri nullam habebat contradicentibus litigatoribus auctoritatem, d. c. 33. *Proferre & prodere diem*, eadem sunt, *proferre & referre diem*, contraria. *Dies enim certi & constituti*, qui in longius aliquod tempus prorogantur, *prodi & proferri veteribus dicebantur*, auctore in Terentium Donato. Aliud est referre diem. Obseruatum enim est ab homine doctissimo scripsisse Festum *referri diem prodictam*, id est, *anteferri religiosum esse*. Dies igitur qui prolatatur, *proferri*; & qui anteuertitur, *referri* dicebatur. Vnde perspicuum est quid sibi uoluerit de proferendo & referendo die Papinianus, d. c. 33. Sensus enim est arbitrium compromisso ita sumptum ut diem possit prorogare, litigatoribus etiam inuitis id facere posse; *non tamen posse referri diem*, id est, anteuertere iisdem contradicentibus; nec interesse an ambo contradicant simul, an verò consentiente altero alter duntaxat contradicat. Non enim debet alteri per alterum iniqua conditio inferri. Atque ita quidem Quæstionum libro primo scripsit Papinianus.

## LXXV. PAPINIANVS LIB. III.

## QVÆSTIONVM.

*Nemo potest mutare consilium suum in alterum iniuriam.*

R

AUCTOR

AVCTOR est in fragmentis Vlpianus titulo 28, emancipatis liberis ex edicto dari bonorum possessionem, si parati sunt cauere fratribus suis qui in potestate manserunt, bona quæ moriente patre habuerunt, se collaturos. Quod ipsum à Iuliano quoque traditum est, cap. 3. §. 2. de collat. bon. Addiditque eodem tit. Vlpianus, bonorum possessionem parentibus & liberis dari intra annum ex quo potiore potuerunt; cæteris intra centum dies. Quo sensu scripsit Africanus bonorum possessionem ab alio agnitam non posse post diem centesimum ratam haberi, cap. 24. rem ratam haberi. Hinc tractatum fuit, an filius emancipatus, qui de bonis conferendis cauere fratribus noluit, mutare consilium possit, ac postea, ante annum delatæ possessionis elapsam, cauere volens audiri debeat. Et ait quidem lib. 3. Quæstionum Papinianus, plerisque existimasse eum postea audiendum si vellet oblata cautione beneficium bonorum possessionis exercere: quamuis dici possit, videri eum possessionem repudiasse, & sic quodammodo in iniuriam fratrum mutare consilium, eoque nomine admitti non oportere, neminem enim mutare consilium suum in alterius iniuriam posse. Et hæc quidem licet verissima sint, nihilominus tamen scripsit eodem loco Papinianus, benigniorem esse diuersam sententiam, maximè cum de bonis parentibus inter fratres disputetur capite 8. de collat. bon.

## LXXVI. PAPINIANVS LIB. XXIV.

## QVÆSTIONVM.

*In totum omnia quæ animi destinatione agenda sunt, non nisi vera & certa scientia perfici possunt.*

QVÆSTIONVM libro 24. de legato differens Papinianus à quo Romæ vxor diuertit, dotis nomine

virum

*virum, ait Romæ defendendum esse, cap. 42. de iud. Huiusmodi responso causam dedisse videri potest utilitas publica. Utile siquidem publicè est, cum qui in legationem Romam missus est, calore & iracundia coniugis domum ad causam dicendam non reuocari. Proinde si necessaria mariti mora periclitari de dote metueret vxor, poterat à marito Romæ diuertens Romæ repetere dotem, d.c. 42. Si modò declararet certa quadam animi destinatione perpetuam constituendi dissentionem se à viro diuertisse; cap. 3. de diuortiis. In totum enim omnia quæ animi destinatione agenda sunt, non nisi vera & certa scientia perfici possunt; vt auctor est Papinianus ex eius libro Quæstionum vigesimo quarto desumpta.*

## LXXVII. PAPINIANVS LIB. XXVIII.

## QVÆSTIONVM.

*Actus legitimi qui recipiunt die vel conditionem, veluti mancipatio, acceptilatio, hæc iatis aditio, serui optio, datio tutoris, in totum vitiantur per temporis vel conditionis adiectionem. Nonnunquam tamen actus superscripti, tacitè recipiunt, quæ expressè comprehensa vitium adferunt. Nam si acceptum feratur ei qui sub conditione promisit, ita demum egisse aliquid acceptilatio intelligitur, si obligationis causa extiterit; quæ si verbis nominatim acceptilationis comprehendatur, nullius momenti faciet actum.*

PER actus legitimos legis intelliguntur actiones, hoc est, actus quidam ritusque solemnes certis verborum formulis ex lege descendentes; cuius generis sunt mancipatio, in iure cessio, adoptio, hæreditatis aditio, cretio, vsurpatio, acceptilatio, manus confertio, manumissio, serui optio, datio tutoris, & sic deinceps.

R 2

Huiusmodi



Huiusmodi actus ex natura sui nec diem admittunt, nec conditionem. Quamobrem si diem vel conditionem receperint, in totum vitiantur. Et certum quidem est mancipationem, in iure cessionem, hæreditatisque aditionem diem non recipere aut conditionem. Huiusmodi enim legis actionibus nihil agitur quàm ut legitimum ex Quiritium iure dominium transferatur, quemadmodum in fragmentis Vlpianus tit. 19. & in Topicis Cicero, eiusque interpretes Boëtius euidenter demonstrant. Res quæ datur mancipio, aut in iure ceditur, protinus ex iure Quiritium eius efficitur qui eam mancipio accipit, aut cui cessa est. Quamobrem si mancipationi diem adieceris aut conditionem, vitias actum. Id enim moliris quod per rerum naturam fieri non potest. Nam transferre dominium vis, & illud non pateris transferri. Transferre quidem vis, rem dans mancipio, & rursus quò minus transferatur videris impedire diem adiiciens aut conditionem. Nam sine dominij translatione nulla aut esse aut appellari mancipatio potest, quæ translatio per temporis & conditionis adiectionem omnino impeditur: eaque impedita, desinit esse mancipatio, desinit esse in iure cessio, hæreditatisque aditio vitatur, nec optio serui legitima censetur; cap. 41. in fi. de acquir. hæred. Testis est enim M. Varro de re rust. lib. 2. *legitimum perfici dominium, si quis hereditatem iustam adiit, si mancipio acceperit ab eo à quo iure civili potuit, aut si in iure cessit cui cedere potuit, & id ubi oportuit.* Manumissio quoq; vindicta fieri in diem vel sub conditione non potuit. *Moris enim erat auctore Festo, ut dominus servum manumittere volens, caput eius aut aliud membrum tenens, hæc verba solemniter pronuntiaret; HUNC HOMINEM LIBERVM ESSE VOLO, & emittebat eum è manu.* Eaque emissio omnem excludebat diem

diei conditionisq̃ue adiectionem, quam nec ipsa quidem vindictæ natura pariebatur Siquidem *momento temporis*, vt Persius ait, *iusta conferri libertas vindicta solet*. Vt igitur sine translatione dominiij nulla fieri mancipatio, in iure cessio, aut hereditatis aditio potuit; sic quoque sine iusta libertate nulla imponi vindicta solet, cap. 2. C. si aduers. lib. Acceptilatio actus etiam legitimus est, mancipationi contrarius, nexi continens liberationem; ideóque eiusdem esse conditionis censetur, cuius est mancipatio. Et quamuis acceptilationis actus conditionem non admittat, nihilominus tamen id quod sub conditione promissum fuit, rectè potuit acceptum ferri. Actus enim legitimus acceptilationis huiusmodi conditione tacita non vitatur. Nam siue defecerit, siue euentum conditio tacita sortita fuerit, semper ipso actu liberatio contingit; quæ liberatio impediri videretur aliqua conditione expressè addita. Dationem tutoris legis etiam actionem esse hac regula docet Papinianus. Eaque fieri idcirco in diem non solet, quod certus dies tempusque certum iure publico functioni tutelæ esset definitum; quodque magistratus nullam haberent suo arbitratu ampliandi aut coarctandi temporis lege definiti auctoritatem. Quominus autem dari tutor sub conditione potuerit; sola legitimi actus impediēbat natura. Nam si conditionem illi actui adieceris, dici non poteris tutorem dare; nec per consequens lege apud te quicquam censebitur agi; cū præsertim id exigat legis actio, *vt tutor detur*, hoc est; vt administratio tutelæ in præsentem tutorem, aut necessariis de causis absentem, amicis postulantibus, decreto solemni à Prætore vel Præsīde ad tempus vsque pubertatis transferatur, cap. ultimo vbi pupil. educ. Atque ita quidem actus legitimi, id est, legis actiones verbis

formulisque solemnibus comprehensæ, diem aut conditionem non admittebant.

## LXXVIII. PAPINIANVS LIB. XXXI.

## QVÆSTIONVM.

*Generaliter cùm de fraude disputatur, non quid habeat actor, sed quid per aduersarium habere non potuerit, considerandum est.*

Si quis ædes suis ædibus seruientes emerit, traditasque sibi acceperit, confusam esse sublatamque seruitutem, rectè à Paulo traditum est; c. 30. de seruit. vrb. præd. Id enim ni ita esset consequi videretur neminem ipsum sibi seruitutem posse non debere, quod est absurdum, cap. 10. com. præd. Et idcirco si dominium rei seruientis ad eum cui seruitus debebatur aliquo modo perueniret, consequenter seruitutem extinguere dicebatur, d. cap. 10. Idque adeò verum est, vt ipsa etiam hæreditatis aditione seruitutes confunderentur, cap. 18. de seruit. Hinc quæsitum fuit, si testator qui me hæredem scripsit, domum aliquam meis ædibus seruientem legauerit Titio, an aditione mea confusa esse huiusmodi seruitus censeatur. Et ait quidem lib. 31. Quæstionum Papinianus, *seruitutem aditione hæreditatis ipso iure confundi, eamque exceptionis medio iterum imponi.* Prædium enim legatum ab hærede vindicanti legatario, opposita doli exceptione tradere hæres non aliter cogebatur, quàm si pateretur legatarius seruitutem aditione confusam rursus imponi, d. c. 18. Censebaturque dolo & fraude non carere legatarius actor impedire volens data opera quominus id hæres seruitutis iure obtineret, quod eum habere ratio suadebat æquitatis. Generaliter enim cùm de fraude disputatur, non quid ipso iure habeat actor, sed quid medio exceptionis per



DE DIVERSIS REGVLIS IVRIS. 263  
per aduersarium suum habere æquitatis intuitu non  
potuerit, considerari solet, quemadmodum scripsit  
libro 31. Quæstionum Papinianus.

LXXIX. PAPINIANVS LIB. XXXII.

QVÆSTIONVM.

*Fraudis interpretatio semper in iure civili non ex euentu  
dumtaxat, sed ex consilio quoque desideratur.*

DOCT Suetonius solitos à censoribus notari  
orbo & cœlibes. De censura enim diui Claudij dis-  
ferens ait; *Plures notare conatus innoxios ferè reperit, qui-  
buscunque cœlibatam aut orbitatem, aut egestatem obiiceret,  
maritos, patres, opulentos se probantibus.* Eoque pertinet  
illud Ambrosij in tertium caput Lucæ; *Erat enim de-  
forme liberos non habere, quod etiam legum civilium fuit au-  
thoritate multatum,* videnturque ita multari cœlibes  
consueuisse, vt vxorium populo penderent. Festus  
enim auctor est vxorium pependisse eum dici, qui quod  
vxorem non habuerit as populo dedit. Eoque videri po-  
terit Dio respexisse, cum ait cœlibes a maritis multa  
secreuisse diuum Augustum. Hinc intelligimus quo sensu  
tradiderit Papinianus quod in fraudem legis ad inpedien-  
das nuptias scriptum est, nullam vim habere, cap. 79.  
in fine de cōdic. & demonst. Dubium enim non  
est, quin ille de lege Iulia & Papia senserit. De qua  
lege tunc etiam idem Papinianus sensisse videtur, cum  
de eo differeret, qui in fraudem legis mulieri vsum-  
fructum legauerat, SI EA NON NVPSERIT. Et  
ait quidem libro trigesimo secundo Quæstionum;  
*tantum beneficio legis ex legato concessum esse mulieri,  
quantum haberet si conditioni paruisset,* capite 74. d. ti-  
tul. Adiciens insuper id ita obseruari propter fraudem,  
quam legi Iulia & Papia satis constat à testatore fa-

*Etiam esse, quamvis sortita non esset euentum conditio. Fraudis enim interpretationem non ex euentu duntaxat, sed ex consilio quoque desiderari. Et idcirco non tunc solum legi fraudem fecisse videbatur testator, cum cœperat parere mulier conditioni, sed tunc etiam cum aperiebatur testamentum, solius consilij non euentus habita consideratione: cuiusmodi considerationem fraudis interpretationi omnino conuenire, testis est hac regula Papinianus, sumpta ex eius libro Quæstionum 32.*

LXXX. PAPINIANVS LIB. XXXIII.  
QVÆSTIONVM.

*In toto iure generi per speciem derogatur, & illud potissimum habetur quod ad speciem directum est.*

FVERVNT olim variæ missionum militarium species. Erat enim iusta missio, erat causaria, erat etiam ignominiosa, c. 2. §. 2. de his qui not. inf. c. 13. §. 2. de re milit. Dicebaturq; *honestæ missio*, auctore Macro, *quæ tempore militia impleto dabatur*: siue, ut eam Vlp. definit, *quæ emeritis stipendiis vel ante ab Imperatore indulgebatur*, d. cap. 2. & d. c. 13. Moris erat ut milites sacramento rogati in rempublicam iurarent, haberentque plenam militiam. Nam, ut Seruius Honoratus ait, *viginti quinque*, aut, ut alij volunt, *viginti annis tenebantur vinculo militia*. Et idcirco dubium non videtur quin impletum militiæ tempus emeritaque stipendia ad hunc morem Macer & Vlpianus retulerint. De quo tempore videtur etiam Modestinus sensisse cum ita scriberet; *Qui militia tempus in desertione impleuit, emeritò priuatur*, cap. 3. §. 3. de re milit. Nec aliò spectat quod de militibus *præmia & missionem poscentibus* scripsit in Augusto Suetonius. Solebant enim legitimo militiæ

militia tempore finito milites adsumere nomen vetera-  
 norum, & missionem vnà cum emeritis premijs  
 postulare. Id quod sic de Tiberio scribens docet Sue-  
 tonius; *Missiones veteranorum rarissimas fecit, ex senio*  
*mortem, ex morte compendium captans.* Quibus & illud  
 adiungi poterit quod adhunc modum idem Sueto-  
 nius de Augusto refert; *Quicquid autem ubique militum*  
*esset, ad certam stipendiorum premiorumque formulam ad-*  
*strinxit, definiens pro gradu cuiusque & temporibus militia,*  
*& commodis missionum. ne aut etate aut inopia post missio-*  
*nem sollicitari ad res novas possent.* Eoque sensu emerita  
 emeritorumque premia accipere dicebantur veterani, cap. 3.  
 §. 5. & cap. 5. §. 2. de re milit. Cæterum causaria missio  
 tunc dicebatur, inquit Macer, cum quis vitio animi vel cor-  
 poris minus idoneus militia renuntiatur: vel, vt eam defi-  
 nit Vlpianus, causaria missio est, qua propter valetudinem  
 laboribus militia soluit, cap. 4. de testam. milit. Eaque  
 missio ita solet impetrari, vt is qui se morbo vellet ex-  
 cufare, militiam eiuraret. Id enim fieri solere docet  
 libro sexto Liuius, his verbis; *Exacta iam ætatis Camil-*  
*lus erat, comitisque iurare parato in verba excusanda va-*  
*letudini solita, consensus populi restiterat.* Quibus consen-  
 taneum est illud Festi; *Eiuratio significat id quod deside-*  
*ratur non posse præstari.* Plautus; *Eiurauit malitiam.* Et  
 Cicero ad Atticum libro duodecimo; *Quod si erit du-*  
*rius, inquit, veniam, & ipse perpetuum morbum iurabo.*  
 Nec arbitror hunc Ciceronis locum mendosum esse.  
 Vtrumque enim dixisse veteres reperio; iurare & eiur-  
 rare morbum: vt apud Varronem *iurare bonam copiam,*  
 quod doctis vitiosum videtur. Est & tertia missionum  
 species, cum quis propter delictum sacramento sol-  
 uitur, eaque dicitur ignominiosa, d. cap. 13. §. 2. Solet  
 illud etiam obseruari, vt ijs qui iusta vel causaria mis-  
 sione soluti essent sacramento, annus concederetur

missionis, cap. 17. §. 4. de testam. milit. cap. 7. de iniurto rupt. irrit. test. Testamenta enim eorum qui ignominia causa missi erant, statim desinebant militari iure valere; tribuebatúrque anni spacium eorum testamentis qui honestam vel causariam missionem meruerant, cap. 21. & cap. 26. de testam. milit. Eúmque annum, *militia annum* appellat Vlpianus, cap. 15. §. 4. d. tit. Hinc satis perspicuum est quid sibi libro *Quaestionum* trigésimo tertio voluerit Papinianus. Ait enim *mulierem qua stupro cognita in contubernio militis fuit, etsi sacramento miles solutus intra annum mortem obierit, non admitti ad testamentum iure militia factum*, cap. 14. de his quæ vt indig. Sensus autem est mulierem quam miles in contubernio habuit, hæredem iure militari institui posse; sique intra missionis annum mortuus fuerit miles, validum esse testamentum eius iure militia: idque generaliter sic olim in omnibus militum testamentis obseruatum fuisse. Et cum de ea militis ageretur contubernali quæ fuerat cognita stupro, non obstante hac priuilegij militaris obseruatione generali, respondit Papinianus eam iure militia ad testamentum non admitti, & id quod relictum est ad fiscum pertinere, d. cap. 14. hanc eodem loco subiiciens rationem; *In toto enim iure generi per speciem derogatur, & illud potissimum habetur quod ad speciem directum est.* Genus est iure militari fœminas contubernales hæredes instituere; species contubernalem stupro cognitam instituere hæredem. Genus iustum est & licitum; species improba, ac prorsus iniusta. Et quia nouum non est in toto iure generi per speciem derogari (c. 41. de pœnis, c. 41. §. 3. & cap. 99. §. fin. de legat. 3.) idcirco non generis sed speciei solius sic voluit hoc loco haberi rationem Papinianus, vt illæso inuiolatoque genere, hæc improba species priuilegio militari exueretur, eoque

DE DIVERSIS REGVLIS IVRIS. 267  
eoque modo generi per speciem derogaretur. Atque  
ita quidem scripsit Quaestionum lib. 33. Papinianus.

LXXXI. PAPINIANVS LIB. III.

RESPONSORVM.

*Qua dubitationis tollenda causa contractibus inferuntur, ius commune non laedunt.*

DE ijs libro tertio responforum inter alia scripsit Papinianus, qui de iure, quo conueniri fideiussores solent, dubitantes, ea inferi contractibus fecerunt, quæ cum iure communi certa essent, omnibusque nota, temerè contractus instrumento exprimebantur. Videturque quaesitum fuisse an ius commune superfluis huiusmodi clausulis non læderetur, & respondisse Papinianus ea quæ dubitationis tollendæ causa contractibus inferuntur, non lædere ius commune, cap. 56. mandati, videlicet eo modo quo ex Pomponio Paulus refert, *in pignoribus dandis adycti solere, ut quo minus pignus venisset, reliquum debitor redderet, idque superuacuum esse, quia ipso iure ita se res habet, etiam non adiecto eo, c. 9. de dist. pig.* Diciturque ea ratione superuacuum, quia tradidit Seheca *superuacuum esse in natura ius impelli, de benefic. lib. 4. cap. 17.*

LXXXII. PAPINIANVS LIB. IX.

RESPONSORVM.

*Donari videtur quod nullo iure cogente conceditur.*

NON debere prætorem pati donum, munus, operas imponi ei qui ex fideicommissi causa manumittitur, auctor est Valens, cap. 47. de oper. libert. Et idcirco si testator ita scripserit; CERDONEM SERVVM MEVM MANVMITTI VOLO, ITA VT OPERAS MANVMISSVS

MISSVS PROMITTAT, manumissus operas promittere non cogitur. Nam iuri publico derogare non potuit qui fideicommissariam libertatem dedit; quod utique facit testator ille qui operas ex fideicommissi causa manumissis imponit, quemadmodum libro nono Responsorum testis est Papinianus, cap. 42. d. tit. Quid ergo si ex causa fideicommissi manumissus operas promiserit, an obligabitur? Certè in eum actionem dari negat Papinianus, d. cap. 42. Inuitus enim *publico iure*, id est; iure ciuili nequit obligari, cap. 95. de legat. 1. Aliud est si cùm sciret huiusmodi libertus id se reculare posse, obligari se nullo iure cogente passus fuerit. Siquidem hac specie non est inhibenda operarum petitio, quia donasse videtur. *Id enim donari videtur, quod nullo iure cogente conceditur*, quemadmodum fideicommissorum libro sexto Valens, & lib. 9. Responsorum Papinianus definiuerunt, d. cap. 42. & 47. cum cap. 29. de donat. cuius capituli 29. inscriptio vitiosa est.

## LXXXIII. PAPINIANVS LIB. II.

## DEFINITIONVM.

*Non videntur rem amittere quibus propria non fuit.*

QVOTIES aut diffusa negotia sunt, aut dignitas, ætas, vel valetudo tutoris postulat actor decreto prætoris, aut procurator constitui solet. Actor quidem si pupillus infans vel absens esset; procurator verò si præsens fari posset, cap. 24. de ad. & per. tut. §. fin. Instit. de curat. Et quia periculo tutoris actor decernebatur, dubitatum fuit sententia secundùm actorem pronuntiata, actio iudicari ad quem transferretur, an ad pupillum, an verò ad tutorem. Papinianus lib. 2. Definitionum auctor est, ad pupillum eam transferri, non ad tutorem; quia si tutor ipse obtinuisset, utique sic transfer

transferretur: siquidem res controuersa non tutoris sed pupilli propria fuit, c. 6. quand. ex fact. tut. Quo fit vt nec eam videatur amittere tutor huiusmodi translatione. *Non enim videntur rem amittere quibus propria non fuit.* Simili ratione manumissus à filio voluntate patris non filij, sed patris libertus efficitur, cap. 22. de manumiss. Seruus enim patris erat, non filij ac proinde nec manumissione quicquam amittit filius. *Siquidem non videntur rem amittere quibus propria non fuit.* At enim Papinianus quamuis precarium hæredem ignorantem non teneat, nec interdicto rectè conueniatur; tamen id vsucapere cum non possè quod defunctus non potuit, cap. 11. de diuers. temp. præscript. Et quia precarium non defuncto propria non est, ac per consequens nec hæredi esse res propria potest, certè non videbitur rem amittere hæres, si ab eo precarium auferri contigerit. *Non enim videntur rem amittere quibus propria non fuit;* auctore Papiniano Definitionum l. 2. ex quo libro hæres diuersæ species vnà cum hac regula desumptæ sunt.

## LXXXIV. PAVLVS LIB. III.

## QVÆSTIONVM.

*Cum amplius solutum est quàm debebatur, cuius pars non inuenitur qua repeti possit, totum esse indebitum intelligitur, manente pristina obligatione.*

**SOLUTIONE** extinguatur obligatio. In eius enim locum rei solutæ dominium surrogatur, cap. 4. de public. in rem act. Et idcirco quamdiu dominium rei solutæ translatum non est, vtrique nec obligatio videri extincta potest. Proinde si cum centum deberes, ducentos nummos solueris, quia centum qui in obligatione sunt, sine incommodo ab alijs qui non debentur,

tur,



tur, centum nummis possunt separari, certè solutioni centum inferuient, extinguéntque obligationem, & reliqui centum, vt indebiti, condicentur, cap. 26. §. 5. de condict. indeb. Aliud est si centum debens, quasi ducenta deberem, fundum soluerim ducentorum. Hac enim specie competere repetitionem fundi totius, pristina manente obligatione, auctor est Marcellus, d. cap. 26. §. 4. Ideò non extinguitur obligatio quia huiusmodi solutione dominium rei solutæ non transfertur in creditorem; siquidem totum esse indebitum censetur. Non enim fieri potest ex falsa debiti quantitate cõfusio partis alicuius rei cum pecunia, d. §. 4. Et idcirco incerta fundi portio loco pecuniæ rectè in solum dari à debitore sine sponte sua non solebat. *Nemo* enim ad communionem compellitur inuitus, d. §. 4. Nescio an etiam hac specie admitenda sit differentia interesse putantium, id ipsum quod solum est, an tantundem repetatur. Vt si quidem tantundem fuerit repetitum, extincta videri obligatio possit; sin idem, utique non videatur extincta. In ea autem sententia omnino videtur Marcianus fuisse, cap. 25. de præscript. verb. quam tamen in fisci causa non admisit Iulius Paulus lib. 3. *Quæstionum*, ex quo hæc regula desumpta est; c. 21. de iure fisci.

#### AC §. IS NATURA DEBET.

*Is natura debet, quem iure gentium dare oportet, cuius fidem sequuti sumus.*

POST Tuberonem inter prudentes iuris maximæ auctoritatis fuerunt, inquit Pomponius, Ateius Capito, & Antistius Labeo. Capito in iis quæ ei tradita erant perseverabat; Labeo, ingenij qualitate & fiducia doctrinæ plurima innouabat. Atque ita hi  
duo



duo primum velut diuerſas ſectas fecerunt. Capitonis ſectæ principes fuerunt Maſſurius Sabinus, C. Caſſius Longinus, Cælius Sabinus, Priſcus Iabolenus, Aburnius Valens, Tuſcianus, Saluius Iulianus; Labeonis, Nerua pater, Proculus, Nerua filius, Longinus, Pegaſus, Celfus pater, Celfus filius, Neratius Priſcus. Capitonis ſectatores à Caio Caſſio Caſſiani, & à Sabino appellati ſunt Sabiniani, Labeonis verò, Proculeiani vel Proculeij à Proculo, & à Pegaſo Pegaſiani. Eoque ſenſu Caſſianæ ſcholæ meminit Plinius Epistol. lib. 7. ſic Geminio ſuo ſcribens; *Lator etiam quod domus aliquando C. Caſſij huius, qui Caſſiana ſcholæ princeps & parens fuit, ſeruiret domino non minori.* Et hi quidem diuerſæ ſectæ auctores non ita præceptoribus addicti erant, quin ab eorum traditionibus nonnunquam recederent. Id enim Iaboleno videmus accidiſſe, qui cum Sabinianus eſſet, Labeonis tamen diuerſæ ſectæ principis ſententiam probat, cap. 2. §. 14. de hered. vel act. vendita. Accidit id ipſum etiam Iuliano. Is enim Sabinianus erat, & nihilominus à Sabini ſententia interdum reſceſſit, cap. 11. de in diem addict. Sic Celfus Proculeianæ ſcholæ deſenſor acerrimus, nonne Labeonis interdum; & Sabini ſententias laudat? capite 13. d. titul. Eaque de cauſa Proculeij & Sabiniani dicti videntur, qui non quidem in omnibus, ſed in plerisque iuris controuerſi articulis; Sabinianæ aut Proculeianæ ſcholæ definitionibus acquieſcebant. Inter illos articulos numerari ſolet, obligatio naturalis. Proculeiani enim eam ad ius illud naturæ videntur retuliſſe, quod omni humano generi eſt innatum; Sabiniani, ad nudum ius gentium. Eaque ratio eſt cur ſcripſerint Neratius & Ruſinus, *pupillum nec natura debere*, cap. 41. de condict. indeb. cap. 59. de oblig. & act. quem

tamen

tamen sine tutoris auctoritate obligari naturaliter, Vlpianus, Paulus, Scauola, & Papinianus testantur, cap. 1. de nouat. c. 127. de verb. oblig. cap. 21. in princ. ad leg. Falcid. cap. 25. quando dies legat. Erat enim Neratius Proculianus, & ob id scholæ suæ traditiones secutus negauit propter ætatis imbecillitatem natura æquum esse pupillum obligari; quem contra Vlpianus, Scauola, & Papinianus contendunt obligari naturaliter iure gentium posse, Sabinianos secuti. Iure gentium enim obligationes sunt introductæ nulla personarum, nulla ætatis, sed rei solius quæ obligatur habita ratione. Proinde si quid in bonis habuerit seruus aut pupillus, Sabinianis quidem obligari posse dicentur naturaliter, solam obligationis, quæ iuris gentium est, originem intuentibus; Proculianis verò non omnino videbuntur obligati naturaliter non tam ius gentium nudum, quàm æquitatem naturalem expendentibus. Idque illud esse omnino videtur quod Vlpianus sibi voluit, cùm scriberet *si filius familias vel seruus pro aliquo fideiussent, tractatum fuisse, an sit de peculio actio; & Celsum definiuisse, causam fideiubendi spectandam esse*, cap. 3. §. 3. de peculio. Quia enim Proculianum constat Celsum fuisse, certè verisimile videtur hanc quæstionem inter Sabinianos & Proculianos tractatam fuisse; & cùm Sabiniani contenderent nudum ius gentium inspiciendum esse, obtinuisse Celsum, hoc est, Proculianos non factum, siue ius gentium nudum (ita enim *factum* accipit Vlpianus, c. 41. de peculio.) *sed causam siue naturam esse inspiciendam; & per causam, naturalem iusti debiti causam eundem Celsum intellexisse. Eamque causam naturam appellari*, ex eo patet, quod *natura operis deberi* scripserit Vlpianus, cap. 26. §. 12. de condict. indeb. Per naturam enim causam obligationis operarum naturalem eo modo

modo intellexit Vlpianus, quo ex Neratio pupillum ostendimus natura non obligari, quo item Vlpianus ait *ad remunerandum naturaliter aliquem obligari*, cap. 41. de condict. indeb. cap. 25. §. 8. de petit. hæredit. Huius loci & illud est quod ait Vlpianus, *Nervæ filio & sibi videri ex compromisso serui non dandam esse de peculio actionem*; cap. 3. §. 6. de pecul. Inter Sabinianos enim & Proculeianos hac de re fuit agitatum; & Sabinianis videtur placuisse de peculio actionem dari; Proculeianis, non dari: illis quidem nudum ius gentium, siue factum nudum; his verò æquitatis vinculum siue obligationis causam urgentibus. Si nudum respexeris gentium ius, certè cùm Sabinianis rectè dices, dandam de peculio actionem. Peculium enim hac specie substantia est quæ concurrit cum consensu; iisque duobus simul concurrentibus locus esse obligationi iuris gentium solet; & sic per consequens naturali obligationi; quia nihil aliud Sabinianis quibusdam est naturalis obligatio, quàm obligatio iuris gentium, cap. 1. Locati, cap. ult. de act. empt. Si causam respexeris obligationis huiusmodi naturalis, certè nihil minus quàm de peculio dandam esse actionem cum Proculeianis hac specie concesseris. Obligationis enim causa compromissi causa est; quæ causa tam gentium quàm civili iure in seruum non cadit. Et quia sine causa nullam omnino obligationem voluerunt subsistere Proculeij; mirum non est, eodem contra Sabinianos definiuisse, ex compromisso serui non dandam esse de peculio actionem, idque Nervæ qui Proculeianus erat, placuisse, d. §. 6. Quod ipsum in nouationibus interuentu serui factis, etiam Iuliano visum fuit. Licet enim ille Sabinianus esset, in hoc tamen Proculeianis omnino subscripsit, causam obligationis iustam non factum nudum expendentibus, cap. 30. §. 1. de pactis.

S

Eadem

Eadem quoque ratione videntur Proculeiani, quibusdam ex Sabinianis dissentientibus definiuisse, ex iureiurando quod seruus obtulit auctori in dominum de peculio actionem non dari, cap. 22. de iureiurand. Ex huiusmodi enim iurisiurandi delatione, si nudum respexeris factum, nascitur actio de peculio; si causam obligationis iustam, evanescit eadem actio. Causam huiusmodi omnes ferè Proculeiani semper examinant, ad quam non respicit schola Sabiniana. Et quamvis hæc ita diuersa sint, in eo tamen videntur cum Sabinianis Proculeij conuenire, quod seruus, qui nullum peculium habet, non possit fideiubendo naturaliter obligari, cap. 19. & cap. 20. de fideiussoribus. Non enim rerum natura patitur, ut re & persona deficientibus aliqua subsistere possit obligatio. Persona seruilis omni exempta est personali obligationi; ea enim sui iuris non est. Iam si nec peculium habuerit seruus, quinam quæso poterit fieri, ut huiusmodi seruus naturaliter obligetur? Hæc si vera sunt, mirum igitur non est Iabolenum & Iulianum, qui Sabiniani erant, cum Celso diuersæ scholæ sectatore in hac specie omnino consentire, d. cap. 19. d. cap. 20. & cap. 3. §. 3. de pecul. Cæterum composito Iuliani industria, & auctoritate Hadriani Imperatoris proposito perpetuo edicto, diuersæ scholæ sectatores esse tandem desierunt: adeò quidem ut Papinianus, Paulus, Vlpianus, Caius & alij qui deinceps subsequerantur prudentes iuris, nullius omnino sectæ ex professo nomen darent, sed interdum Sabinianorum, interdum etiam Proculeianorum traditionibus acquiescerent; nonnunquam ab utraque schola recederent; nonnunquam utriusque sententias, licet diuersas, speciebus tamen diuersis accommodarent, eaque ratione sola factum est ut Papinianus & Tryphoninus, ferè semper ad naturalem



turalem obligationis causam, Proculeianos secuti, obligationem retulerint naturalem, cap. 95. §. 3. de solut. cap. 64. de condict. indebiti. Quo sensu scripsit etiam Pomponius *nudam rationem non facere aliquem debitorem*; cap. 49. in fin. de pecul. Per nudam enim rationem, ius gentium nudum, sine vlla naturali causa, sine vinculo aequitatis, intelligit Pomponius. Paulus contra & Marcianus, magis Sabinianorum sententiæ videntur acquieuisse, c. 13. de condict. indeb. cap. 11. de acq. rer. dom. cap. 25. de præscrip. verb. cap. vlt. de actionib. empti. Vlpianus deniq; modò ad naturalem æquitatis causam, modò ad ius gentium nudum, prout aut ad Sabinum aut ad Proculum scriberet, naturalem retulit obligationem. Et id quidem ex eo patet evidenti-  
tissimè, quod ille sic ad Sabinū lib. 30. scripsit; *Etiam quod natura debetur venit in compensationem*, cap. 6. de compensat. Dubium enim non est quin per naturam hoc in loco ex Sabini sententia ius gentium intellexerit Vlpianus. Rursus cū scriberet idem Vlpianus *eos quibus natura debetur non esse loco creditorum*, cap. 10. de verb. signif. nonne ex Proculeianorum definitione per naturam causam aliquam intellexit naturalem à gentium & ciuili iure seiunctam ac separatam? Nam si naturam cum Sabinianis hoc loco retuleris ad ius gentium, certè omnino erunt creditorum loco quibus natura debetur: siquidem id quod ita debetur, venit in compensationem, dict. cap. 6. quod vtrique non fieret existente credito nullo. Est enim compensatio debiti & crediti inter se contributio, cap. 1. de compensat. Et sanè interdum tam Sabinianos, quàm Proculeianos in definiendâ naturali obligatione secutum esse Vlpianum, ad eò verum est, vt scripserit ille naturales obligationes non eo solo aestimari, si actio aliqua earum nomine competit; videlicet, vt Sabiniani putant,

iure gentium ; verùm etiam eo, si soluta pecunia repeti non possit ; hoc est , si, vt contendunt Proculeiani, aliqua naturalis existat causa , quæ licèt à iure gentium remota sit, impediatur tamen soluti repetitionem, c. 10. de oblig. & act. Et hæc cùm ita se habeant, nunc quid de hac regula sentiendum sit , videmus. Paulus lib. 3. Quæstionum de vero debitore scripsit qui post litem contestatam manente adhuc iudicio soluebat; & ait hunc debitorem id quod ita solutum est repetere non posse, quia nec absolutus nec condemnatus repetere posset : siquidem verus debitor est , si non civili, saltem gentium iure obligatus , & idcirco licèt absolutus esset, natura tamen debitor permanebat, cap. 48. & 49. de cond. indeb. Is enim natura debet quem iure gentium dare oportet, cuius fidem secuti sumus; vt auctor est hac regula idem Paulus ex eius libro 3. Quæstionum desumpta. Atque ita naturalem obligationem ad ius gentium retulit Paulus Sabinianos eo modo secutus, quo scripsit Vlpianus debitum, vel natura sufficere vt constitui possit , cap. 1. §. 5. de constit. pec. Sic naturam videtur etiam accepisse Pomponius, cap. fin. de act. empti. Porro quemadmodum in obligatione naturali definienda, sic etiam in naturali possessione alienanda videntur à Proculeianis Sabiniani dissensisse , capite 12. de acq. rer. do. Eaque de re latius hîc differere , instituti nostri ratio non patitur : disseremus autem suo loco , Deo fauente , latissimè.

## LXXXV. PAVLVS LIB. VI.

## QVÆSTIONVM.

*In ambiguis pro dotibus respondere melius est.*

CONSTANTE matrimonio dos in bonis mariti erat , & matrimonio per diuortium soluto , cum sua causa

causa recuperabatur, cap. 21. §. 4. ad municip. capite  
 81. pro socio. Eaque recuperatio aut directa, aut vtili  
 actione fiebat. Directa quidem per ipsam mulierem  
 quæ sui iuris est, aut si patrem habeat, per patrem ad-  
 iuncta persona filia, vt est apud Vlpianum tit. sexto;  
 vtili verò, per mulierem interdum, & interdum per  
 patrem specie quadam singulari & fauorabili: directa,  
 ordinario iure; vtili extra ordinem, cap. 46. & cap.  
 59. solut. matrim. Si enim proponas auum maternum  
 nepti quæ est in patris potestate dotem dedisse, & in-  
 strumento dotali stipulatum esse, diuortio sine culpa  
 mulieris facto, dotem omnem nepti vel sibi restitui;  
 mortuo auo & diuortio facto cui dices actionem  
 competere, neptine an eius patri, an verò hæredi aui  
 materni? Nepti non videtur potuisse competere, alte-  
 ri enim stipulari non potuit auus. Ergo nec suæ ne-  
 pti potuit, multoque minus eius patri. Quod cum ita  
 est, hæredi stipulatoris actio competere videtur. Cer-  
 tē si ius respexeris commune & ordinarium, nihil dici  
 verius poterit, quàm hæredi auito directam compete-  
 re dotis in hac specie repetitionem. Sed fauore nu-  
 ptiarum & maximè propter affectionem personarum  
 ad hoc decurri extra ordinem voluit libro sexto Que-  
 stionum Paulus, vt permittatur nepti, ne cōmodo do-  
 tis defraudetur, ex hac auita stipulatione vtilis actio;  
 ac si sibi aut illi dari stipulatus fuisset auus maternus:  
 hanc subiiciens rationem; In ambiguis enim pro do-  
 tibus respondere melius est, d. cap. 45. cap. 70. de iure  
 dot. nimirum quod reipublicæ intersit mulieres dotes  
 saluas habere. Dotatas enim esse fœminas ad sobolem  
 procreandam, replendamque liberis ciuitatem maxi-  
 mē necessarium est, cap. 1. soluto matrim. cap. 2. de iure  
 dot. Hæc cum non intelligeret Duarenus, non rectē  
 existimauit ideo vtilem actionem nepti hac specie da-

ri, quod eius patri directâ competeret. Directam enim auito hæredi, non patri competere, euidenter demonstrat Iulius Paulus, d. cap. 45.

#### AD §. NON EST NOVVM.

*Non est novum ut qua semel utiliter constituta sunt, durent; licet ille casus extiterit, à quo initium capere non potuerunt.*

TRIA onera tutelæ præstant à quarta vacationem, §. item tria Instit. de excusat. tut. cap. 3. cap. 5. & cap. 31. de excusat. modo ex tribus nulla sit adfectata, modò nulla defunctoriè suscepta sit, d. §. item tria, & cap. vnico. C. qui nu. tut. Affectare tutelam quid sit, vulgo notum est: quid autem sit defunctoriè suscipere, audio ignorari; eaque ignorantia quibusdam videri locum emendandum. Sed frustra. Is enim suscipit tutelam defunctoriè qui data opera se alicuius tutorem simulat, cùm tutor non sit, eamque dicis causa ad hoc administrat, ut hac simulatione à noua tutela excusetur. Diciturque defunctoriè suscipere tutelam ea ratione; qua *matrē coerceri* scripsit Vlpianus *qua filiis tutores petiit defunctoriè data opera*, c. 2. §. 16. de S C Tert. Tres igitur tutelæ non adfectatæ non defunctoriè susceptæ à quarta præstant vacationem. Et idcirco tutor trium tutelarum onere grauatur, cui quarta offerebatur, rectè solet excusari; eamque excusationem si negligeret, ac transferri ad se tutelam quartam solemnî decreto pateretur, postea volens excusari non audiebatur. Non enim nouum est, ut quæ de tutelis semel utiliter decreta sunt; durent, licet ille casus extiterit, à quo initium capere huiusmodi decreta non potuerunt. Nam si ante decretum se excusasset huiusmodi tutor, certè casus ille extitisset, à quo initium capere  
non



DE DIVERSIS REGVLIS IVRIS. 279  
non potuisset quarta tutela. Et ira libro sexto Quaestio-  
num, ex quo hæc regula sumpta est, scripsit Pau-  
lus, capite 3 i. circa princip. de excusat. Eaque vera  
est sententia huius regulæ.

AD §. QVOTIES ÆQVITATEM.

*Quoties æquitatem desiderij, naturalis ratio aut dubita-  
tio iuris moratur, iustis decretis res temperanda est.*

EST & hic §. ex Pauli libro sexto Quaestio-  
num, illi haud dubiè responso applicandus, quo tradidit  
idem Paulus rectè facturum prætorem, si etiam unam tu-  
telam sufficere crediderit, si tam diffusa & negotiosa sit, ut  
pro pluribus cedat; cap. 3 i. §. 2. de excusat. Quamobrem  
si tutor huiusmodi tutela grauatus, à secunda velit  
excusari, quia naturalis ratio, & dubitatio iuris huius-  
modi desiderij moratur æquitatem, censet Paulus rem  
omnem iustis decretis temperandam esse. Ad dubita-  
tionem iuris referendæ sunt tres tutelæ non adfecta-  
tæ; quæ solæ videntur præstare iure communi vaca-  
tionem. Cum hac iuris dubitatione, concurrat ratio  
naturalis, qua æquum omnino videtur unam aut alte-  
ram tutelam negotiosam loco trium aliarum tutela-  
rum censeret. Atque ita ratio naturalis cum dubitatio-  
ne iuris concurrens, desiderij tutoris excusari postulā-  
tis æquitatem moratur. Et idcirco cum dubitaretur  
quid agendum esset, respondit Paulus, eam rem iustis de-  
cretis temperandam esse, hoc est, rem illam prætoris tute-  
laris eiusque consilij arbitrio esse relinquendam. Qui  
quidem prætor non pupillorum duntaxat numerum,  
sed difficultatem etiam conficiendarum rationum  
considerabit, eaque consideratione fratres consortes  
plurium loco non habebuntur; neque rursus plurium  
loco habebuntur pupilli, qui cum fratres non sint;

S 4      idem

idem tamen patrimonium habent, & ita quoque consortes sunt, si ratio administrationis pariter reddenda sit, cap. 31. in fine Festus auctor est, *sortem patrimonium significare, indeque consortis dici*; satis indicans eos consortes appellari, qui pro indiviso commune aliquod patrimonium habent, nec referre, fratres sint, propinqui, an extranei. Inter hos enim omnes esse potuit consortioni locus. Ac de fratribus quidem illud argumento est quod ait Suetonius, *Vespasianum à primo imperij die fratrem suum consortem successoremque testari perseverasse*. Sidonius Apollinaris Epist. lib. 4. *Non est cur dicere incipias, habeo consortes, necdum celebrata divisio est, auariorum constat me esse tractatum, quanquam cohæredes frater & soror sub annis adhuc tutelariis agant*. Testis est etiam Tertullianus cohæredes omnes esse consortes posse. Sic enim de resurrect. carnis scribit, *Caro dum ministra & famula animæ deputatur, consors & cohæres inuenitur*. Eoque pertinet hæc inscriptionis antiquæ clausula; Q. DOMITIVS ADIVTOR HÆRES CONSORTI SVO BENE MER. FECIT ET SIBI POSTERISQVE SVIS. Scripsit quoque in Tiberio Suetonius *Titum Tatium Romani fuisse consortem*. Nec aliud est quod in Declamatione quadam cui titulus est. *Multati socius*, ait ita Quintilianus; *Consortes enim potest facere casus*. Nam his verbis demonstrat Quintilianus euidenter eos qui casu in patrimonium aliquod incidunt pro indiviso commune, siue fratres, siue propinqui, siue etiam extranei sint, rectè consortes dici. Consortioni disortiones contrariæ sunt. Siquidem *disortiones*, auctore Festo, *divisiones dicuntur patrimoniorum inter consortes*. Solentque ita fieri disortiones, ut imprimis coerceretur commune patrimonium, ac deinde ciceretur. Idem enim his verbis, ERCTVM CITVMQVE, legum Rom. tabulis

*bulis contineri, & in iis erētum à coërcendo, citum à ciendo dictum esse, testatur idem Festus. Eoque accedere videtur illud Seruij in 8. Æneidos; Vt est in iure E R C T O N O N C I T O, id est, patrimonio vel hereditate coërcita, non diuisa. Ita enim arbitror eum locum ex Festo sup-  
plendum esse. Siquidem antè coërceri subductis examinatisque singulorum consortium rationibus, hereditatem oportebat, quam ea ciceretur, hoc est, in certas iustasque portionēs diuideretur. Hæc de consortibus, quibus Pauli responsū, cui hanc regulam applicandam esse diximus, mirum in modum illustratur, d. cap. 31. in fin.*

## LXXXVI. PAVLVS. LIB. VII.

## QVÆSTIONVM.

*Non solet deterior conditio fieri eorum qui litem contestati sunt, quàm si non, sed plerumque melior.*

LITIS contestatione domini litis constituuntur actor & reus, & cap. 1. C. de sentent. & interloc. omn. iud. cap. 76. de procurat. Eaque ratione *non solet deterior conditio fieri eorum qui litem contestati sunt, quàm si non essent, sed plerumque melior, adeò quidem ut fructus, quorum antè litis contestationem nulla solet haberi ratio, post accipium iudicium ex equitate præstandos esse putauerint Sabinus & Cassius, cap. 28. §. 4. de vsuris. Si enim reus & actor litis domini sunt, utique & eorum quoque fructuum videntur quodammodo domini esse, qui ex re litigiosa post contestationem litis prouenerunt. Simili modo in rem suam procuratorem datum, post litis contestationem, si vice mutua conueniatur, equitate compensationis uti posse auctor est Papinianus, cap. 18. de compensat. Ait enim Macer procuratorem litis contestata dominum litis effici, capit. 1. §. fin. de appellat. c. 1. §. 8.*

S s

quando

quando appell. Nec alia ratione pretij vel rei electio  
 seruatur ei, qui prior de legato litem contestatus est;  
 quàm quòd prior eo ex omnibus legatarijs nemo litis  
 dominus factus sit, capitulo trigesimo tertio in fin.  
 de leg. 1. Atque ita quidem eorum qui litem conte-  
 stati sunt, plerumque melior esse conditio solet. Re-  
 ctè addidit Paulus *plerumque*. Interdum enim accide-  
 re potuit, vt litem contestantis conditio redderetur  
 deterior, vel culpa ipsius contestantis vel etiam negli-  
 gentia, culpa quidem, si causa pendente supplicauerit,  
 c. 2. C. vt lite pendente: negligentia verò, si noxali iu-  
 dicio prouocatus litem potius serui communis no-  
 mine contestari maluerit, quàm antè iudicium acce-  
 ptum parte sua cedendo securitatem consequi, cap. 8.  
 de noxalib. act. Et quamuis litis contestatione actor  
 & reus constituentur domini litis, neque tamen actor  
 rei litigiosæ dominus dici potest, neque etià reus. Si-  
 quidem dominium illud in suspenso est, & aliter in  
 bonis esse alicuius non intelligitur, quàm iudicis pro-  
 nuntiatione lite secundum actorem vel secundum  
 reum data, ca. 3. in fin. de public. in rem act. Et idcirco  
 in sacrum dedicari non potuit, res de qua controuer-  
 sia est, c. fin. de litig. *Nam in manumissione sacrorum cau-  
 se dici consuevit*, inquit Festus, PVRI, PROBI,  
 PROFANI, SVI AVRI. Nec potuit etiam res li-  
 tigiosa venundari, cap. 1. de litig. Ne videlicet eo mo-  
 do duriores aduersarij conditionem facere liceat,  
 capite 2. d. tituli. Qui rem litigiosam in sacrum de-  
 dicat, dupli pœnam pati dicitur, cap. vltim. d. tit. Quod  
 ipsum de eo etiam dicendum suspicor, qui rem ven-  
 dit litigiosam. Ita tamen vt re litigiosa in sacrum de-  
 dicata, duplum non fisco præstetur, sed aduersario, d.  
 cap. vlt. & contra litigiosa re venundata, non aduer-  
 sario sed fisco acquiri duplum solet. Idque illud esse  
 omnino

DE DIVERSIS REGVLIS IVRIS. 283  
omnino videtur quod ait Calistratus, *nuntiationem ad  
fiscum fieri solere, si rumor esset rem litigiosam venundari,*  
cap. 1. de iure fisci.

LXXXVII. PAVLVS LIB. XIII.

QVÆSTIONVM.

*Nemo enim in persequendo deteriore causam, sed me-  
liorem facit : Denique post litem contestatam heredi quoque  
prospiceretur, & heres tenetur ex omnibus causis.*

VLPIANVS auctor est semel litem contestata iniuria-  
rum actionem etiam ad successores pertinere, quæ alioqui nec  
heredi, nec in heredem dari consuevit, cap. 13. in princ. de  
iniurijs, cap. 111. hoc tit. diuersitatis ratio non alia est,  
quàm quod defunctus litem contestans iniuriarum,  
efficeretur dominus litis. Et quia heres in ius defun-  
cti succedit vniuersum, certè consequens etiam est  
eius litis dominum censi heredem, cuius defunctus  
dominus fuit. Eaque ratione heres, vt ait Festus, *apud  
antiquos pro domino ponebatur.* Quod autem Paulus ait,  
*post litem contestatam heredi prospici, & heredem teneri  
ex omnibus causis,* ei prorsus consentaneum est illud  
Mæciani; *Honoraria quoque actiones quæ intra certum  
tempus à pratore promittuntur, cum bonis actoris defun-  
cto eo, augmentum rei decessionemve (si tales erunt vt in ha-  
redem quòque transeant) præstabunt,* cap. 32. in princ. ad  
l. Falc. Sensus enim est, actiones honorarias litis con-  
testatione vel alio modo in heredem transeuntes, rei  
hereditariæ, & per consequens quartæ leg. Falcid.  
augmentum aut decessionem cum bonis reliquis præ-  
stare : augmentum quidem, si lis fuerit secundum hæ-  
redem data ; decessionem verò, siue diminutionem,  
si contra heredem fuerit iudicatum : eoque sensu  
teneri heres, heredi que prospici hac regula dicitur.

Er

Et quidem ad eò vera sunt ac perspicua, vt satis mirari nequeam Goucano, P. Fabro, aliisque eruditis hominibus, hunc Mæciani locum vitiosum videri. Sed refellit eos dictio REI, quam illi ad reum ex præcedentibus referunt, cùm ea ad rem hæreditariã verè pertineat. De rei enim alicuius augmento vel diminutione sensit omnino Mæcianus, qua diminui vel augeri hæreditas, & per consequens quarta Falc. posset, lite aut secundùm, aut aduersus hæredem data.

## LXXXVIII. SCÆVOLA LIB. V.

## QVÆSTIONVM.

*Nulla intelligitur mora ibi fieri, ubi nulla petitio est.*

SABINIANOS videtur Scævola secutus esse Quæstionum lib. 5. Ait enim, *si pupillus sine tutoris auctoritate Stichum promiserit, & fideiussorem dederit, propter moram pupilli fideiussorem non obligari, si post moram à pupillo factam seruus decedat: esse autem fideiussorem obligatum ad hoc, ut viuo homine possit ex stipulatu conueniri, vel etiam ex sua mora, si posteaquam conuenitus est, decesserit seruus*, cap. 127. de verb. obligat. Hæc Scævola, satis manifestum faciens se Sabinianos sequi, naturaliter sine tutoris auctoritate pupillum obligari, contendentes. Id enim ni ira esset, certè inutilis foret hac specie fideiussio, & ipso iure nulla; ac proinde nec conueniri potuisse huiusmodi fideiussor, quemadmodum Caius & Marcellus apud Vlpianum expressè definiunt, Proculeianorum sententiæ aduersus Sabinianos in hac specie acquiescentes, cap. 6. de verb. oblig. cap. 25. & cap. 70. §. 1. de fideiuss. Ait Scævola *si seruus post moram à pupillo factam decedat, obligatione liberari fideiussorem: nullam enim intelligi moram ibi fieri, ubi nulla petitio est*, d. cap. 127. Aliud nihil in effectu volens quàm mul-

tum

tum interesse; vtrum mora facta sit ab ipso pupillo, an verò à fideiussore. Nam si pupillus in mora fuerit, illius moræ respectu non potuit fideiussor conueniri. Siquidem pupillus naturaliter duntaxat est obligatus; eaque naturalis obligatio nullam parit iure ciuili petitionem, & per hoc nulla intelligitur mora per pupillum facta. Nulla enim mora ibi intelligitur facta, vbi nulla petitio est. Quod certè non diceretur, si pupillus ciuilitè esset obligatus. Tunc enim mora per pupillum facta fideiussori quoque noceret, cap. 88. de verb. obligat. Aliud est si fideiussor ipse conuentus in mora fuerit. Obligatus enim ciuilitè est ex stipulatu, ac per hoc petitioni etiam locus sit vtiliter ex mora fideiussoris, cap. 32. in princ. de vsuris. *Cuiuslibet enim ciuilitè obligato sua mora nocet iure ciuili; siue ea ciuilis obligatio conditionalis & accessoria sit; siue etiam pura & principalis*, cap. 115. de verb. oblig. c. 5. C. de contrah. stipulat.

## LXXXIX. PAVLVS LIB. X.

## QVÆSTIONVM.

*Quandiu possit valere testamentum, tamdiu legitimus non admittitur.*

VALERE testamentum dicitur, quamdiu ex eo adiri hæreditas potest; nec ab intestato defertur hæreditas, hoc est, *legitimus admittitur*, quamdiu valere possit testamentum, cap. 39. de acq. hæred. Est & illud certum de inofficioso testamento, aliisque hæreditariis causis centumuiros cognouisse, cap. 13. & 17. de inoff. testam. cap. fi. C. de petit. hæred. Hinc tractatum apud Paulum fuit libro 10. Quæstionum, *si hæres à Titio institutus tanquam possessor aut petitor eiusdem hæreditatis damnauerim hæredem meum, ne aduersus legitimum*

Titij

*Tuij hæredem iudicium exerceat centumvirale, quidnam de effectu legati eodem testamento relictī sentiendum sit. Et ait quidem Paulus, ita demum utile videri legatum si legimus heres Tuij malam causam habuerit: tamdiu enim valere testamentum; & quamdiu possit valere testamentum, tamdiu legitimum non admitti, & per consequens utilia legata esse. In bona enim hæredis legitimi causa nihil videtur esse in legato. Atque ita quidem lib. 10. Quæstionum scripsit Paulus, cap. 30. de lib. legat.*

XC. PAVLVS LIB. XV.  
QVÆSTIONVM.

*In omnibus quidem, maximè tamen in iure æquitas spectanda est.*

IN omnibus, inquit Paulus, maximè tamen in iure æquitas spectanda est: videlicet quæ in causis paribus paria iura desiderat. Eam enim præcipuam esse æquitatis facultatem demonstrat in Topicis Cicero. Ait enim; *Valeat æquitas quæ paribus in causis paria iura desiderat.* Et pro Cecinna; *Omnibus, inquit, in causis idem valebit in quibus perspicitur una atque eadem causa æquitaris.* Et hoc inde, ni fallor, quod nomen æquitatis interdum generis loco poni soleat, interdum non generis sed speciei. Generis quidem loco ponitur cum ea in merum ius gentium, præcepta ciuilia & præcepta prætoris distribuitur, c. 31. depositi. Atque ita prætoris edictum quo stricti iuris emendatur asperitas nonnullis aliter sentientibus rectè appellari videtur æquitas scripta, iustitiæ respectu, quæ scripta non est, c. 8. C. de iudiciis. Ait etiam Vlpianus *edicti de pactis æquitatem naturalem esse*, cap. 1. de pactis. Edictum autem illud scriptum erat. Cur igitur negabimus aliquam inueniri æquitatem scriptam? Cæterum speciei loco  
sumitur



sumitur æquitas cum in paribus causis exiguntur paria iura. Et huiusmodi quidem æqui bonique species, æquitas, æquitas iudicis ac nonnunquam par appellatur, c. 8. §. 6. mandati. cap. 2. §. 3. de hered. vel act. vend. c. 2 §. de legib. c. 3 2. de peculio. c. § 2. in fin. de pactis. c. 2. §. 5. de aqua & aquæ plu. arc. Auctor est enim libr. 2. de Inventione Cicero, *quodam genera iuris certa consuetudine facta esse, veluti pactum, par, indicatum, illudque par dici quod inter omnes æquabile est.* Quod ipsum à Lactantio quoque traditum est lib. 5. cap. 15. his verbis; *Deus enim qui homines generat & inspirat, omnes æquos, id est, pares esse voluit.* Et paulò post; *Vbi enim non sunt vniuersi pares, æquitas non est, & excludit inæqualitas ipsa iniustitiam.* Eoque sensu à iure in hac regula separatur æquitas, non aliter quàm species à suo genere. Et ad hanc quidem æquitatis interpretationem videtur etiam in eo edicto monitorio prætor respexisse, cui titulus est; **QVOD QVISQVE IVRIS IN ALTERVM STATVERIT, VT IPSE EODEM IVRE VTATVR.** Liuius lib. 27. *Si quid iniungere inferiori velis, id prius in te ac tuos, si ipse iure statueris, facilius omnes obedientes habeas.* Nec aliò spectat quod ita Lampridius de Alexandro scribit; *Clamabatque sæpius quod à quibusdam siue Iudæis siue Christianis audierat. & tenebat, idque per præconem, cum aliquem emendaret, dici iubebat: QVOD TIBI NON VIS, ALTERI NE FECERIS.* Cuius sententiæ meminit etiam in sua diuinarum institutionum epitome Lactantius.

## XCI. PAVLVS LIB. XVII.

## QVÆSTIONVM.

*Quoties duplici iure defertur alicui successio, repudiatio non iure, quod ante defertur, supererit vetus.*

HÆRE.

HÆREDITAS ad nos pertinet aut vetere iure aut nouo: vetere, è lege 12. tab. vel ex testamento quod iure factum est; nouo iure fiunt hæredes omnes qui ex S C. aut ex constitutionibus ad hæreditatem vocantur, c. 1. & c. 3. de petit. hæred. cap. 1. §. 7. ad S C. Tertul. c. 11. de suis & legit. Est & illud certum edictum prætoris Orphitiano S C. antiquius esse. Siquidem S C. illud Antonino & Commodo tribuit Vlpian. tit. 26. Hinc intelligimus quod libro Quæstionum 17. voluerit Paulus, cum scriberet *in metallum damnata mulieri ac deinde à principe restituta*, etiam cognationis iura restituta videri, cap. ult. de sentent. pass. Id enim ad filij successionem pertinet, quem eadē mulier prius quàm in metallum daretur; conceperat, & postea edidit, ac recuperato cognationis iure hæredem reliquit, d. cap. ult. Addiditque eodem loco Paulus *huiusmodi filio duplici iure maternam deferri successionem, nouo ac veteri: nouo quidem, Orphitiano S C. veteri verò, prætoris beneficio* VNDE COGNATI. Et cum dubitaretur repudiato nouo iure, an veteri locus esset, respondit Paulus nouum ius antè deferri, eoque repudiato vetus superesse: per nouum ius haud dubiè Senatusconsultum intelligens Orphitianum. Siquidem eo S C. *liberi matris intestatæ, quæ in mariti manu non erat, præferuntur consanguineis & agnatis in materna successione cum antea ipsis liberis in eadem successione agnati præferrentur & consanguinei*, auctore in fragmentis Vlpiano tit. 26. Diciturque ante deferre nouum ius, eò quod Orphitiano Senatusconsulto primo gradu ad successionem maternam liberi admittantur, cum illi veteri iure à gradu primo excluderentur, & beneficio prætoris gradu duntaxat cognatorum admitterentur, cap. 2. vnde cognati. Atque ita quidē filius matris intestatæ, hæres proximus est Senatusconsulti Orphitiani iure nouo; quod ius si repudiauerit

DE DIVERSIS REGVLIS IVRIS. 289  
diauerit filius, matris suæ consanguineis & agnatis  
locum facit; iisque non extantibus, aut eandem suc-  
cessionem repudiantibus, rursus defertur filio mater-  
na successio gradu cognatorum, d. cap. 2. Eoque sen-  
su *nouo quod ante defertur, iure repudiato superesse* in hac  
regula *vetus dicitur.*

## XCII. SCÆVOLA LIB. V.

### RESPONSORVM.

*Si librarius in transcribendis stipulationis verbis erras-  
set, nihil nocere quo minus & reus & fideiussor tenerentur.*

STIPVLATIONES aliique contractus certa qua-  
dam instrumenti formula solent comprehendere, cap.  
71. de euiet. cap. 5. in fin. de auct. & cons. tut. cap. 1.  
§. 1. de edend. Quam formulam qui concipiebant, aut  
notarij erant, aut librarij: notarij quidem, si notis; li-  
brarij si literis vterentur, cap. 1. §. 2. de varijs & extra-  
ord. cog. Augustinus de doctrina Christiana libro 2.

*Ex eo genere sunt notæ, quas qui didicerunt, propriè iam no-  
tarij appellantur.* Illudque formularum concipienda-  
rum officium ciuile, iis videtur solis exercere liberum  
fuisse, qui turbæ forensi adscripti erant. cap. 9. §. 1. de  
pœnis. Quemadmodum ex hac inscriptionis Nolanæ  
clausula licet suspicari, T. TECIENIVS FELIX

AVGVSTALIS, SCRIBA LIBRARIVS ÆDI-  
LIS CVRVLIS, VIATOR ÆDILIS PLEBIS,  
ACCENSVS CONSVLII. Est & alia quædam in-  
scriptio vetus, id ipsum confirmans, quæ in Via Iulia  
extare dicitur, his verbis concepta; HERCVLI ET  
SILVANO SANCTO SACRVM, L. IVNIVS  
LYCO SCRIBA LIBRARIVS ÆDILIVM  
CVRVLIVM D. D. Moris etiam erat, vt concepta  
formula transcriberetur, adiectis loco, die, & con-

T                      fule,

fule, c. 9. §. 1. de pœnis, c. 1. de edend. Huc spectat quod Ambros. in Luc. libro 2. de tempore ortus Saluatoris differens, sic ait; *Nam si consules adscribuntur tabulis emptionis, quanto magis redemptioni omnium debuit tempus adscribi; Habes ergo omnia quæ in contractibus esse consueverunt, vocabulum summam illic potestatem gerentis, diem, locum, causam, testes quoque adhiberi solent.* Concepta formula, authenticum dicebatur; transcripta, index vel exemplum: index quidem, si res gesta breuiter enarraretur; exemplum verò, si plenè & absolutè transcriptū esset instrumentum; c. 2. de fide instrum. c. ult. testam. quemad. aper. *Illud etiam solet obseruari, ut authenticum tabellionis manu signatum, in archio, quod Roma in atrio libertatis erat, deponeretur, cap. 9. §. 1. de pœnis, videlicet ut si quando eius intercidisset exemplum, esset undè peti posset, auctore Paulo sentent. lib. 4. tit. 6.* Et idcirco mirum non est, reum & fideiussorem teneri, etiamsi in transcribendis stipulationis verbis errasset librarius. Ex authentico enim, quod in grammatophylatio custodiebatur, veritas depromi poterat. Atque ita quidem non de authentico, sed de contractus alicuius exemplo accipiendus videtur hic Scæuolæ locus; eamque interpretationem omnino postulat transcribendi verbum.

† Sic enim pro Cluentio scripsit Cicero; *Ne lituris coargui posset, testamentum in alias tabulas transcriptum signis adulterinis obsignauit.* Huc etiam spectat illud Senecæ controuers. libro 2. *Ego, inquit, dictaui. Duplum dabo si manus non pracideritis; librario una syllaba excidit non & scripsit, si pracideritis.* Hæc ille.

## CXIII. MÆCIANVS LIB. I.

## FIDEICOMMISSORVM.

*Filius familias neque retinere, neque recuperare, neque adipisci possessionem rei peculiaris videtur.*

ISIDORVS

ISIDORVS ait *peculium esse quod pater vel dominus filium vel seruum pro suo iure tractare patitur: hoc est, quod filius vel seruus patris dominique permisso à rationibus dominicis paternisque habet separatum, c. 5. in fin. de peculio. Hæc peculij definitio etiam Senecæ nota fuit. Ait enim de benefic. libro 7. cap. 4. Nunquid dubium est quin seruus cum peculio domini sit? Dat tamen domino suo munus. Non enim ideo nihil habet seruus, quia non est habiturus si dominus illum habere noluerit: nec ideo non est munus, cum volens dedit, quia potuit eripi, etiam si noluiisset. Et paulò post; Omnia patris sunt quæ in liberorum manu sunt. Quis tamen nescit donare aliquid & filium patri? Hæc Seneca, liquidò demonstrans id quod esse in peculio dicitur, in dominio non esse filijfamilias, nec ab eo ciuilitè possideri. Quod enim acquiritur filio, id protinus sic esse patri acquisitum censetur, ut ne momento quidem id quod ex causa peculiari quæsitum est, intelligatur filius possidere, cap. 44. §. 4. de usurpat. cap. 4. de acquir. poss. cap. 13. de iure patronat. Eoque sensu auctor est hæc regula Mæcianus, filiumfamilias nec retinere, nec recuperare, nec etiam adipisci possessionem rei peculiaris, atque ideo patrem teneri de peculio ex contractu filij, non autem ipsum filium, cap. 5. & cap. 44. de peculio. Si modò peculium illud castrense non fuerit, cap. 52. §. 6. pro socio, cap. 2. de contrah. empt. cap. 17. §. 1. ad municipalem. Auctor est enim idem Mæcianus, castrense peculium à patris bonis separari, nec cogendum esse patrem propter as alienum peculij castrensis nomine factum de peculio actionem pati, cap. 18. §. 2. de castr. pec. Idque illud est quod his versibus exprimit eleganter Iuuenalis sat. vlt.*

*Solis præterea testandi militibus ius*

*Vino patre datur; nam quæ sunt parta labore*

*Militia, placuit non esse in corpore census*

T

2

Omne

*Omne tenet cuius regimen pater.*

Si filiusfamilias nullam rei peculiaris retineat aut etiam adipiscatur possessionem, certè nec ullam patre mortuo intelligitur recuperare. Siquidem id demum recuperamus, quod semel amisimus. Proinde si frater à fratre cum in eiusdem patris essent potestate, pecuniam mutuatus post mortem patris soluerit, quæsitum fuit an repetitioni locus sit, cap. 38. de condict. indeb. Et quia nullam frater ille qui pecuniam fratri mutuam dedit, intelligitur peculij possessionem morte patris recuperare, sed potius ita peculium reliquis admisceri bonis paternis, ut tant illius quàm aliarum rerum hæreditariarum frater censeatur fieri cum fratre consors ( cap. 65. de rei vindic. ) idcirco respondit Africanus pro ea parte repetitioni locum esse, quia hæres patri exiturus est frater ille qui sumptam viuo patre mutuam à fratre pecuniam soluit post patris mortem: pro ea verò parte qua frater cui solutum est hæres exitit, ita repetiturum fratrem qui soluit, si non minus ex reliquo peculio suo ad fratrem cui solutum est peruenisset, d. cap. 38. Atque ita recuperari nulla rei peculiaris possessio intelligitur.

#### XCIV. VLP IANVS LIB. II.

##### FIDEICOMMISSORVM.

*Non solent quæ abundant vitare scripturas.*

QVEMADMODVM ex iis quæ superuacua sunt, nulla solet obligatio nasci, cap. 2. in princ. mandati, ita nec in testamentis quæ abundant, vitiant scripturas, cap. 17. & cap. 34. de manumiss. testam. cap. 34. de hæred. instit. Eoque videri potest beatus Augustinus respexisse, de ciuitate Dei lib. 4. cap. 27. cum ita scriberet; *De superuacuis non magna causa est. Solet enim à*  
*uiris*

DE DIVERSIS REGVLIS IVRIS. 293  
*viris peritis dici, Superflua non nocent.* Hæc Augustinus,  
 regulam proferens iuriconsultis familiarem. Et idcir-  
 co pro *viris peritis*, suspicor *iuris peritis*, eo in loco re-  
 ponendum esse. Similis error apud eundem Augusti-  
 num reperitur in epist. quadam ad Macedonium his  
 verbis; *Nec ideo sanè frustra instituta sunt potestas regis, vis*  
*gladij cognitoris, vngula carnificis, arma militis.* Dubium  
 enim non est quin pro *vis gladij cognitoris*, omnino  
*ius gladij cognitoris*, hoc in loco legendum sit.

## XCIV. VLPIANVS LIB. VI.

### FIDEICOMMISSORVM.

*Nemo dubitat soluendo videri eum qui defenditur.*

FIDEICOMMISSORVM libro 6. scripsit de  
 petitione fideicommissi Vlpianus, & de hærede tra-  
 ctavit, qui satisfacere cogitur, ne mittatur aduersarius in  
 possessionem fideicommissi seruandi causa, cap. 6. vt  
 legat. seu fideicom. cap. § 2. in fin. de iudic. Huiusmo-  
 di decretis tunc esse locum addidit Vlpianus, *cum nul-*  
*la incidit de fideicommissio controuersia.* Nam si agente eo  
 cui quid fideicommissio relictum est, idoneum constituerit hæ-  
 res defensorem, in possessionem cessabit missio. Siquidem ido-  
 neus esse defensor nullus intelligitur, qui solitam non  
 præstat satisfactionem IUDICATVM SOLVI, cap.  
 40. §. 2. de procurat. Eaque satisfactione hæres cum de-  
 fenditur, esse intelligitur soluendo, & per consequens  
 integra fideicommissi æquè seruatur causa, atque, si in  
 possessionem missus esset aduersarius. *Nemo enim du-*  
*bitat, soluendo videri eum qui defenditur.* Nam alienæ  
 litis idoneus defensor sine satisfactione nemo intelli-  
 gitur, cap. 46. §. 2. de tit. Et hoc nimirum illud est quod  
 ait idem Vlpianus, legatorum nomine in possessio-  
 nem missum, si litem eo nomine contestatus est, de-

T 3 cedere

cedere cogi possessione, simul atque ei pro lite fuerit cautum, capite §. 20. vt in poss. legat. Nec interest hæres ipse conueniatur, an eius procurator, quemadmodum pro P. Quintio docuit Cicero.

# XCVI. MÆCIANVS LIB. XII.

## FIDEICOMMISSORVM.

*In ambiguis orationibus maximè sententia spectanda est eius qui eas protulisset.*

HÆC conditio, FILIÆ MEÆ CVM NUPSERIT TANTVM DARI VOLO, ambiguum continet orationem. Nam si iniuste semel nuptam, iterum nubere contingat legitimè, an legato locus sit, dubitatur. Et quia in ambiguis orationibus maximè sententia spectanda est eius qui eas protulit; idcirco respondit Vlpianus, *si apparere possit de primo nuptiali iugo sensisse testatorem, conditionem defectam esse; sin minus, benignè dicendum non impletam conditionem defectam*, cap. 10. de cond. & demonst. Simili modo si ita scriptum fuerit; TITIVS SI STATVAS IN MVNICIPIO POSVERIT, HÆRES ESTO, nihil ambiguitatis continet hæc oratio. Certè quod cuius non liceret statuas suo arbitrio in municipiis ponere. Et idcirco si eas non poneret hæres, eò quòd locus non daretur, dubitabatur, an valeret institutio. Et tandem in eo videntur cum Sabinianis Proculeiani conuenisse, vt dicerent hæredem eum fore, cap. 14. de cond. & demonst. sententiam nimirum testatoris in ambiguis orationibus spectandam secuti, quæ talis fuisse videtur, vt vellet hæredem ponere statuas, si modò posset impetrare locum. Huiusmodi enim conditiones etiamsi non exprimantur, subintelligi tamen tacitè solent; quemadmodum demonstrat eleganter



DE DIVERSIS REGVLIS IVRIS. 295  
 ganter Seneca de benefic. libro quarto. Sanè, in municipiis locum ponendis statuis à Duumviris & decurionibus impetrari debuisse, non Pomponius solum, sed Paulus etiam expressè testatus est, d. cap. 14. & cap. 2. de loco publico fru. Extatque hac de re apud Fabricium & P. Appium elegans decreti formula, cuius hæc est præcipua clausula; PLACERE HVIC ORDINI AVCTORITATEM IN EAM REM ANTE HANC DIEM FACTAM, CONFIRMARI; PERMITTIQUE ANNIO ADIECTO LIBERTO EIVS STATVAM PONERE ANNIO MODESTO, LOCO ADSIGNATO A II VIRIS NOSRIS, QVO TESTATIO SIT ERGA EVM AFFECTVS REIPVBLICÆ NOSTRÆ. Est & alia quædam inscriptio vetus huic consentanea, quæ Tarraconæ in Hispania etiamnum extare dicitur, his verbis concepta; M. FABIO M. F. GAL. PAVLLINO, EQVO PVBLICO DONATO AB IMPERATORE CÆS. HADRIANO AVG. ILLERDENSES CIVI OPTIMO OB PLVRIMAS LIBERALITATES IN REM PVBLICAM SVAM LOCO A PROVINCIA IMPETRATO POSVERVNT. Atque ita quidem in orationibus testamentorum ambiguis eius spectari sententia solet, qui eas protulit; hoc est, benignè interpretari solet testamentum ambigüe scriptum, & secundum id quod est credibile esse cogitatum à testatore, cap. 24. de reb. dubiis. Nam, vt ait Plinius Epist. libro 4. religiosissime custodienda est defunctorum voluntas, quam bonis heredibus intellexisse, pro iure est.

# XCVII. HERMOGENIANVS LIB. III. IVRIS EPITOMARVM.

*Ea sola deportationis sententia aufert, quæ ad fiscum perueniunt.*

T 4 HERMO

HERMOGENIANVS iuris Epitomarum libro tertio de iis tractauit, quæ amitti deportationis sententia solent. Et ait quidem *sive patronus, sive libertus restituitur deportatus amissum recipi ius patronatus. Ea enim sola deportationis sententiam auferre quæ ad fiscum perueniunt*; quorum appellatione non potest ius patronatus comprehendi, cap. 21. de iure patronar. cap. 3. §. 3. de bon. liber. Ius igitur patronatus licet amittatur deportatione, sententia tamen deportationis non auferitur. Amittitur enim deportatione quatenus vinculum est iuris ciuilibus Romanis proprium; quatenus verò *obsequium* dicitur *verecundiæ* (ut est apud Papinianum cap. 41. de oper. libert.) per sententiam deportationis, exemplo patriæ potestatis, non auferitur. Eoque videri potest Plinius Epistol. lib. 10. respexisse, *cum liberis cuiusdam Chrysippi ciuitatem à Traiano ita petit, ut sint in patris potestate, utque iis in libertos seruetur ius patronorum*. Dubium enim non est, quin de eo patronatus iure senserit Plinius, quod solis Romanis ciuibus proprium erat iure Quiritium; non autem de eo, quod gentium iure ad nudum referebatur obsequium verecundiæ. Eiusque obsequij ratione scripsit etiam Vlpianus *magis esse ut non extinguat seruitas ius patronatus*, cap. 1. de sentent. pass. Referri etiam hæc regula potest ad ius consanguinitatis. Certum est eorum bona qui capitali iudicio condemnantur, publicari. Nam malè meritis publicè, ut exemplo aliis ad deterrenda maleficia sit, etiam egestate laborare debet, capite 31. depositi. Eandemque cum parentibus calamitatem subire liberi intelligebantur, si non exilio aut morte, saltem bonis publicatis; quemadmodum auctor est libro Epistol. ad Brutum Ciceron. Ait enim; *Nec verò me fugit quàm sit acerbum parentum scelera filiorum pœnis lvi. Sed hoc præclarè legibus comparatum*

*comparatum est, ut charitas liberorum amiciores parentes Reipublica redderet.* Hanc legum acerbitatem nimiam nonnihil videtur Iulius Cæsar mitigasse. Testatur enim Suetonius, *parricidas, bonis omnibus; reliquos dimidia parte Cæsarem multasse.* Eoque tandem res deuenit, ut interdum omnia bona relinquerentur damnatorum liberis, interdum certæ portiones, ac nonnunquam etiam portiones incertæ id quod libro quodam singulari De portionibus quæ liberis damnatorum conceduntur, euidenter demonstrat Iulius Paulus, c. 7. de bon. damnat. Huiusmodi portiones separari ab ea bonorum parte solent, quæ ad fiscum pertinebat. Et quamuis hæredes patri deportato non extarent liberi, quia tamen ius retinent inter se consanguinitatis, rectè suas singuli consanguinitatis iure portiones ferrent, non quidem ut hæredes, ut non ut liberi, sed *gradu legitimorum*, hoc est, ut consanguinei & agnati eiusdem familiæ: quod utique non fieret, si patris deportati sententia, huiusmodi consanguinitas censeretur extincta. Cum igitur ea extincta non sit, & transire ad fiscum nequeat, certè nec liberis auferri per sententiam deportationis videtur. *Ea enim sola deportationis sententia liberis auferuntur, quæ ad fiscum perueniunt*, non alia; quemadmodum Epitomarum iuris lib. 3. ex quo hæc regula sumpta est, scripsit Hermogenianus, cap. 6. unde legitimi.

## XCVIII. HERMOGENIANVS LIB. IV,

## IVRIS EPITOMARVM.

*Quoties utriusque causa lucri ratio vertitur, is praferendus est cuius in lucrum causa tempore præcedit.*

HÆC regula ad vulgares quasdam legatorum & fideicommissorum seruandorum causa possessiones

T 5

cautio

cautionesque omnino pertinet. De huiusmodi enim cautionibus & possessionibus libro iuris Epitomarum 4. Hermogenianum deferuisse testis est epigraphæ cap. 11. vt in poss. leg. Si ex causa fideicommissi apud aliquem esset hæreditas, nec legatorum satisfaceret, in possessionem aduersus eum legatarius mitti solet, c. 3. vt legat. vel fideicom. Non quidem vt expellendi hæredem ius haberet, sed potius vt simul cum hærede possideret, & tandem rædio perpetuæ custodiæ extorqueret hæredi cautionem. cap. 5. in princ. vt in poss. legat. Et quia plures legatarij simul in possessionem poterant mitti, dubitatum fuit ex duobus legatariis quibus sub conditione legatum erat, in possessionem simul missis, vter præferendus sit, hoc est, vter prior possit legatum persequi. Respondit Epitomarum iuris lib. 4. Hermogenianus, eum esse præferendum, *in cuius lucrum iusta legati petendi causa tempore præcedit*: hoc est, cuius conditio, sub qua legatum relictum est, prior impleta est; d. cap. 11. Idque dicendum esse addidit, generaliter quoties aliqua vertitur lucri ratio causa vtriusque simul in possessionem missi; hoc est, quoties de lucro duorum quæritur, qui simul in possessionem legatorum seruandorum causa missi sunt. Solet enim vulgo dici, *Qui prior est tempore, potior est iure.*

## XCIX. VENVLEIVS LIB. XII.

## STIPVLATIONVM.

*Non potest improbus videri, qui ignorat quantum soluere debeat.*

Qui fidem violabat, non ignorans quantum deberet soluere, is appellari improbus solet, cap. 51. de re iudic. cap. 31. de rei vendic. certè quod in litibus moretur

moretur assidue dolo malo. Festus enim auctor est *ordinarium* hominem dici solitum *scurram & improbum*, qui assidue in litibus moraretur. Sique improbitatis huiusmodi nomine aut à censore notatus, aut expressa lege iudicisque pronuntiatione damnatus esset, non improbus solum, sed etiam *intestabilis* erat, ut est apud Gellium lib. 15. c. 13. & lib. 7. cap. 18. Eoque sensu bellum enarrans Iugurthinum sic de Metello scripsit Salustius; *Improbus intestabilisque videtur Metellus, postquam de rebus Vacca actis competit*. Et tunc quidem nec eius recipi, nec ei dici testimonium poterat, cap. 26. de testamentis, c. 21. de testibus. Porro, quem Iurisconsulti improbum vocant ac intestabilem, eum intestabilem & sacrum appellat Horatius serm. lib. 2. Satyr. 3. his verbis, *Intestabilis & sacer esto*: non ignorans hominem malum & improbum veteribus sacrum dici; quemadmodum à Festo traditum est de verb. sign. lib. 16.

## C. GAIUS LIB. I. REGVLARVM.

*Omnia quæ iure contrahuntur, contrario iure pereunt.*

**OBLIGATIONI** solutio contraria est. Eoque spectare videtur illud Terentij in Adelphis; *Ego ad forum ibo ut hunc absolvam: Id est*, inquit Donatus, *ad forum ibo ut hunc reddito illi pretio dimittam*: nam veluti ligati sunt quibus debetur aliquid, & qui aliquid debent, & idcirco qui debitam pecuniam reddunt, solui dicuntur; etiam si non pecunia numerata, sed verbis aut nudo consensu fieri contigerit liberationem. Quod enim verbis contractum est, verbis tolli posse testis est Ulpianus, cap. 35. hoc tit. cap. 8. §. 2. de acceptilatis. Siquidem omnia quæ iure contrahuntur, contrario iure pereunt. Idque illud est quod Seneca de benefic. libr. 6. cap. 5. ita scribit; *Pecuniam dicimur reddidisse,*

300 IAC. RÆVARD. TOM. I. COMM.  
*reddidisse, quamvis numeravimus pro argenteis aureos,  
quamvis non interuenerint nummi, sed delegatione, & ver-  
bis perfecta solutio sit.*

CI. PAVLVS LIB. SINGVLARI  
DE COGNITIONIBVS.

*Vbi lex duorum mensium facit mentionem, & qui se-  
xagesimo & primo die venerit audiendus est: ita enim Im-  
perator Antoninus, cum dino patre suo rescripsit.*

EXTANT Pauli responsi quædam sub hac epigra-  
phe: PAVLVS Imperialium sententiarum in cognitio-  
nibus prolatarum, siue Decretorum ex libris sex libro pri-  
mo; cap. ult. de iure patron. c. 41. famil. erciscund. cap.  
ult. de hæredib. inst. Et quia singularem quendam De  
cognitionibus, & alium De iure singulari librum sin-  
gularem scripsit idem Paulus; certè dubium non vi-  
detur, quin hæc tria, Decretum, Cognitio, & Ius sin-  
gulare, diuersa sint. Nec mirum. Quædam enim iuris  
esse dicuntur ordinarij, quædam iuris singularis, &  
quædam denique cognitionis. Ordinarij iuris ea sunt  
quæ à magistratibus vel à principe decernuntur se-  
cundùm tenorem & ordinem iuris. Ad singulare ius  
ea referuntur quæ contra ius ordinarium æquitatè  
non dissuadente, fauorabiliter recepta sunt, c. 3. §. 1.  
de acq. poss. cap. 44. §. 3. de vsurp. c. 23. §. 3. de fideicom.  
libert. Et denique cognitionis ea dicuntur esse, quæ  
supra ordinarij iuris dispositionem indulgentur prin-  
cipali rescripto, cap. 2. C. de in ius voc. cap. 1. de con-  
stit. princip. Cuius generis est ciuiliū publicorū-  
que munerum vacatio, legitimi temporis prorogatio,  
induciæ egenis creditoribus concessæ, & sic deinceps;  
de quibus Paulum libro singulari De eo cognitioni-  
bus tractasse, partim ex hac regula manifestum est,  
partim

partim ex epigraphæ capitis vlt. de excusat. & cap. 5. de vetera. Nec aliò spectat quod Symmachus Epist. lib. 1. sic ad Imperatorem Theodosium scribit; *Sed multis prouocationibus; variisque tracta iudiciis intra metas iusti temporis nequiuit exequi propositas actiones. Vt res monebat amissum beneficium remedio integritati supplicationis. Sed idem mulierem casus, etiam rescripti humanitate fraudauit.* Hæc Symmachus, id haud dubiè appellans supplicationem, quod ad cognitionem Paulus refert, non quidem causæ, litis, siue controuersiæ, sed soliùs supplicis libelli. Ita enim à decretis quæ causæ requirunt cognitionem cerni principalia cognitionis rescripta solent. Eaque etiam ratione cum libellorum magistro sacrarum cognitionum magister iungitur in quadam inscriptione quæ ad ædem D. Lucie Romæ etiamnum extare dicitur, his verbis; **DIS MAGNIS MATRI DEVM ET ATTIDI SEXTILIVS AGESILAVS ÆDESIVS V. C. CAVSARVM NON IGNOBILIS AFRICANI TRIBVNALIS ORATOR, ET IN CONSISTORIO PRINCIPVM, ITEM MAGISTER LIBELLORVM ET COGNITIONVM SACRARVM, MAGISTER EPISTOLAR. MAGISTER MEMORIÆ.** Eoque etiam referri poterit illud Arnobij in Psal. 123. *Pium est, ut iudicem videas, ut causam defendas, ut libellum porrigas, preces effundas.* Hanc iuris ordinarij & cognitionis differentiam vehementer confirmat Suetonius ad hunc modum de Claudio scribens; *Alium interpellatum ab aduersariis de propria lite, negantemque cognitionis rem, sed ordinarij iuris esse, agere causam confestim apud se coëgit.* Sensus enim est, rem illam per libellum sola cognitione rescriptoque principali expediri non posse, sed in ea definienda ordinem iuris sequendum esse, qui ordo auditis vtrimque partibus

partibus causæ requirit sedulam examinationem. Eaque ratione ab in ius vocatione libelli oblationem seiungit Paulus, cap. 25. de in ius vocand. Nec alio sensu dicitur *excusari non posse tutor per libellum*, cap. 25. de excusat. Est enim excusatio tutoris non res cognitionis, sed ordinarij iuris. Certum est mensibus duobus integros tribui dies sexaginta, cap. 30. ad leg. Iul. de adultr. Et idcirco quòd lex intra duos menses iubet fieri, ordinario iure intra dies sexaginta videtur faciendum, nisi tempus illud principali rescripto fuerit ampliatum. Vnde perspicuum omnino est, quidnam hac regula voluerit Paulus, ex eius lib. singulari De cognitionibus sumpta. Nimirum aliud nihil quàm tutorem agentem in prouincijs & excusare se volentem, *intra menses duos*, hoc est, dies sexaginta (triginta diebus intra quos fieri à magistratibus certior debebat, simul comprehensis, capite vltimo de tut. & curat. dat.) id eum facere oportere. Et cùm de eo quæreretur qui die sexagesimo primo venerat, an audiendus esset, respondit Paulus; iure quidem ordinario eum audiendum non esse, sed cognitionis iure vtique audiendum. *Imperatorem enim Antoninum cùm D. patre suo quadam cognitione generaliter rescripisset, vbi lex duorum mensium facit mentionem, qui sexagesimo primo die venerit, audiendum esse: illudque rescriptum legis vigorem habere*, cap. 1. de constit. princip. Atque ita quidem non ordinario, non singulari, sed solo cognitionis iure duorum mensium appellatione dies comprehenditur sexagesimus primus. Quòd cùm Græci interpretes non intelligerent, frustra regulam hanc suspicari sunt vitiosam esse.



## CII. VLPIANVS LIB. I.

## AD EDICTVM.

*Qui vetante prætore fecit, hic aduersus edictum fecisse propriè dicitur.*

PRINCIPES, prætores, præfides, aliique maiores magistratus & duces belli cum quid palam iubebant aut vetabant fieri, id facere solent edicto, quemadmodum in Nerone testatur Suetonius. Ait enim, *munus gladiatorum edidisse Neronem tanta sanctia, ut necesse fuerit Augusto, clam frustra monitum, edicto coercere.* Donatus etiam auctor est edictum prætoris dici & Imperatoris; hunc explicans in Eunuchio Terentij locum; *Miles nunc adeò edico tibi, ne vim facias ullam in illam.* Cui consentaneum quoque est illud Suetonij de Augusto; *Nec post bella ciuilia aut in concione, aut per edictum ullos militum commilitones appellabat, sed milites.* Nec alio sensu scripsit idem Suetonius *Augustum edicto, se dominum vocari prohibuisse; eumque iocis quibusdam inuidiosis aut petulantibus lacescitum, contradixisse edicto: equestrem ordinem à Caligula inuitatum fuisse per edictum: viatores ne per Italiae oppida nisi aut pedibus, aut sella, aut lectica transirent, edicto monuisse Diuum Claudium: & denique Aulum Vitellium prætorianas cohortes uno edicto exauctorasse.* Sic & prætor si quid fieri iuberet aut vetaret, uti solet edicto; cap. 5. §. 4. cap. 16. & cap. 18. de noui operis nuntiat. Et idcirco qui vetante prætore fecit; mirum non est cum aduersus edictum fecisse propriè dici, d. cap. 16. Idque adeò verum est, ut mandata præfidis ad prouinciales de eius aduentu missa, eadem prorsus ratione nomen etiam haberent edicti; cap. 4. §. 2. de offi. præsid. Eoque pertinet illud Liuij l. 38. *Inde præmissa edicto, ut triduo*

*post*

*post frequens senatus ad eadem Bellona adesset, omni multitudine obuiam effusa, ad urbem accedere.*

# AD §. EIVS EST.

*Eius est actionem denegare, qui possit & dare.*

ALITER liberum non erat ad agendum actori procedere, quam si actionem impetrasset, ca. 6. in prin. de inoffic. testam. cap. 3. in princ. quod quisque iuris, cap. 3. de sep. violato. Nam si actione denegata aduersario molestus esse non desineret actor, exceptione non impetrata actionis eo modo solet excludi, quo per rei iudicata exceptionem repellebantur illi, qui de re iudicis pronuntiatione semel definita nouam rursus litem mouere non verebantur. Atque hoc sensu de benefic. lib. 2. cap. 8. sic scripsit Seneca; *Ad iudicem missus sum, ut impetrarem, causam dixi.* Per iudicem enim prætorem vel præsidem intelligit Seneca, non iudicem datum, d. c. 6. in princ. Nec aliò spectat quod act. 5. in C. Verr. ait Cicero *C. Gallium senatorem à L. Metello, ut ex edicto suo iudicium daret in Apronium, QVOD PER VIM AVT METVM ABSTVLISSET, postulantem, non impetrasse.* Et quia impetrante Diocletiano ordinaria iudicium datio desijt in vsu esse, cap. 2. C. de ped. iudicib. certè & ipsa quoque actionum impetratio per consequens inutilis esse & minus necessaria cœpit. Quæ res in causâ fuit, ut vulgarem non impetrata actionis exceptionem sustulerint tandem Theodosius & Valentianus Imperatores, cap. 2. C. de for. & impet. act. sublat. Moris etiam erat, ut non à magistratibus alijs, quàm qui ius haberent dandorum iudicium actiones possent impetrari: quod quidem ius magistratus municipales non habebant. Et idcirco si ab ijs actio damni infecti nomine competens

DE DIVERSIS REGVLIS IVRIS. 305  
petens peteretur,actorem ita reiicere non poterant,vt  
dicerent actionem se denegare. Eius enim est actio-  
nem denegare qui possit & dare. Idque illud est quod  
scripsit ad edictum libro primo Vlpian. *iudicium dam-  
ni infecti nomine competens certam habere conditionem* S I  
P O S T V L A T V M F V E R I T ; & *postulare propriè duci  
pro tribunali petere, non alibi*, capite 4. §. 6. de damno  
infecto.

### CIII. PAVLVS LIB. I.

#### AD E D I C T V M.

*Nemo de domo sua extrahi debet.*

P L E R I Q V E putauerunt nullum de domo sua in  
ius vocari licere, quia domus tutissimum cuique re-  
fugium est ac receptaculum, cap. 18. de in ius voc. cap.  
28. de fideicom. libert. cap. 5. §. 2. de iniur. Si modo nec  
aditum ad se præstaret, nec è publico conspiceretur,  
cap. 19. de in ius vocand. Aliter enim solemnè denun-  
tiatione vocari in ius poterat, non tamen de domo sua  
inuitus extrahi, cap. 4. §. 3. de dam. infecto, capitulo vi-  
gesimo primo de in ius voc. Nemo enim de domo sua  
extrahi debet. Qua de re scripsimus Protrib. lib. sing.  
cap. 3. Quintilianus lib. 7. cap. 9. *Ex domo in ius edu-  
cere non licet; extra tabernacula eduxit.*

### CIIII. VLP IANVS LIB. II.

#### A D E D I C T V M.

*Si in duabus actionibus alibi summa maior, alibi infam-  
ia est, preponenda est causa existimationis. Vbi autem  
equiparant famosa iudicia, etsi summam imparem habeant,  
pro paribus accipienda sunt.*

D V A S actiones de vnà eademque re simul con-  
currere

V

currere nouum non est : ex quibus alteram contingit interdum famosam esse, alteram non, c. 14. §. de præf. verb. Sic cum actione iniuriarum concurrat actio legis Aquiliæ, c. 5. §. 1. ad leg. Aquil. Sic etiam qui hominem furripuit & occidit, quia furripuit furti, quia occidit, lege Aquilia tenetur, c. 2. in princ. de priuat. delictis. Sic denique cum actione bonæ fidei concurrere dicitur actio furti, cap. 45. pro socio Et quia per alteram altera non tollitur, dubitatum fuit, vtræ præponi debuerit, an famosa, an verò ea quæ cum famosa non sit, maiorem tamen summam continet, atque ita videtur præferenda, c. vlt. C. de ord. cog. c. 54. de iudic. Præsertim cum sic scripserit in Lucam lib. 2. beatus Ambrosius. *Non est tamen irrationabile ut minor cedat causa maiori.* Respondit Vlpianus, præponendam esse causam existimationis velut maiorem. Quia enim famosæ iudicio damnatum famosum esse dubium non est, certè & illud quoque videtur esse rationi cōsentaneum, vt in huiusmodi speciebus primo loco dispiciatur de aduersarij existimatione, tanquam de causa maiore, cap. 5. de pœnis, cap. 5. de variis & extraord. cog. Quod vtique fieri non poterat: si duo famosæ iudicia simul concurrerent. Ea enim etiam si imparem summam contineant, pro paribus tamen accipiendæ sunt; quo fit, vt in arbitrio actoris sit vtro velit experiri. Videlicet eo modo quo in aliis non famosis simul concurrentibus iudiciis, esse huiusmodi electio penes actorem solet, cap. 14. de rei vind. cap. 10. §. 5. mandati.

## C. V. PAVLVS LIB. I.

## AD EDICTVM.

*Vbicunque causa cognitio est, ibi prætor desideratur.*

IVRISDICTIONEM etiam in Italicis municipiis exercuisse prætorem vrbānum, testis est Vlpianus, cap. 4.

cap.4. §.3. de dam. inf. Est etiam Gellius auctor lib.10. cap.3. *maiores populi Romani magistratus non ea solum quæ iurisdictionis erant, in municipiis Italicis facere potuisse, sed etiam quæ erant imperij.* Quod ipsum ad Edictum libro primo videtur Paulus quoque tradidisse, & simul definiuisse, quid vrbis, quid item Romæ appellatione contineatur, cap.2. de verbor. signific. Eodem enim lib. 1. scripsit Paulus, *magistratibus municipalibus non permitti in integrum restituere, aut in possessionem mittere rei vel dotis seruanda, vel etiam seruandorum legatorum causa,* cap. 26. ad municipal. Et idcirco à præside in provinciis aut si vicinum vrbi Romæ esset municipium, à prætore cognita causa in possessionem mitti solet non à magistratu municipal. d. cap.4. §.7. tum quod ea quæ magis imperij sunt quàm iurisdictionis municipalis magistratus facere non possit, d. cap.26. & cap.4. de iurisdic. tum etiam quod in possessionem missio solemnem requirat causam pro tribunali cognitionem siue decretum, cap. 4. §.2. de damno infect. quo fit vt & prætoris requirat præsentiam. *Vbicunque enim solemnis causa cognitio est, ibi prætor desideratur.* Et sic quidem ad edictum lib.1. scripsit Paulus. Idque adeo verum est, vt hac sola ratione nec dare nec denegare potuerit municipalis magistratus actionem, d. cap. 4. §.6. Non enim aliter dari actiones solent, quàm causa solemniter cognita.

## C VI. P A V L V S L I B. I I.

## A D E D I C T V M.

*Libertas inestimabilis res est.*

MODESTINVS auctor est, *liberum hominem non posse in stipulationem deduci, quia estimatio eius præstari non potest,* cap. 103. de verb. oblig. Ea enim sola

V 2 consistunt

308 IAC. RÆVARD. TOM. I. COMM.  
 consistunt in obligatione, quæ pecunia lui præstari-  
 que possunt, cap. 9. §. penult. de statulib. Atque ira fit,  
 vt nulla de corpore libero contrahatur obligatio. Nam  
 libertas cum sit inæstimabilis, pecunia lui aut repa-  
 rari nequit, d. §. penult. Et hoc est, quod ait titulo 2. Vl-  
 pianus, *pretij computationem pro libertate fieri non posse;*  
 quodque Caius scribit *liberum corpus æstimationem non*  
*recipere*, capite 3. si quad. pauper. fec. dicat.

## CVII. GAIUS LIB. I. AD EDICTVM PROVINCIALE.

*Cum seruo nulla actio est.*

Si seruus pactus fuerit ne ipse peteret, inutile pa-  
 ctum est, cap. 28. de pact. Cum seruo enim actio non  
 est. Nam vt ait in Phormione Terentius.

*Seruum hominem causam orare leges non sinunt;*

*Neque testimonij dictio est.*

Quo sensu scripsit Vlpianus *seruum personam non esse*  
*qua in ius vocari possit*, c. 3. ne quis eum qui in ius voc.  
 est. Et quia lis nulla nobis esse potest cum iis quos in  
 potestate habemus, præterquam ex castrensi peculio,  
 cap. 4. de iudic. hinc etiam videtur hæc regula sic acci-  
 pi posse, quasi contenderit Caius cum seruo nostro  
 nullam nobis actionem esse. Hæc enim duo exempla  
 ex eodem Caij ad Edictum prouinciale lib. 1. desum-  
 pta sunt, & huic regulæ omnino conueniunt.

## CVIII. PAVLVS LIB. IV.

AD EDICTVM.

*Ferè in omnibus pœnalibus iudiciis & ætati & impru-  
 dentie succurritur.*

Si reus in ius vocatus sequi actorem nollet, libe-  
 rum actori medio attestationis erat reum manu con-  
 ferta

ferata in ius ducere, & si calueretur reus pedemve strueret, etiam ei collum torquere, eumque adstricta ceruice in ius rapere. Id enim lege duodecim tabularum expresse contineri ex Gellio, Festo & Porphyrione admonuimus aliquando, his verbis; **SI IN IUS VOCET, ATQUE EAT. SI MORBUS AEVI TASVE VITIUM ESIT, IVMENTVM DATO; SI VOLET ARCERAM, NE STERNITO. SI VIS VOCATIONI, TESTAMINI; IGITUR EM CAPITO ANTESTARI. SI CALVITUR PEDEMVE STRVIT, MANVM ENDO IACITO.** Varro auctor est de lingua Latina libro sexto, *in multis verbis in quibus antiqui dicebant S, eos postea dixisse R*, ut in carmine Saliorum Casauli, *dolosi, eso.* Et idcirco apud Gellium pro **VITIUM ESSET**, rectè mihi videor reposuisse **VITIUM ESIT**; non, ut alij volunt, **VITIUM ESCIT**. Atque ita quidem si vis fieret vocationi, locus erat antestationi, & manu conferta in ius ducebatur aduersarius. Eoque visus est Hieronymus Epistolarum libro decimo sexto respexisse, cum ait; *Conferta manu in ius vocas, & satyricum scriptorem in prosa arguis.* Et quia Liuius libro tertio scribit *Virginij filiam in ius fuisse vocatam auctoribus qui aderant*; videtur sanè eo in loco antestationis mentio fieri, quam non itò dudum suis legum tabulis decemuiri promulgauerant. Nec satis erat antestationis medio reos prehendi. Nam si caluerentur, rapi in ius poterant obtorto collo. Idque illud est quod apud Nonium sic ait Lucilius;

*Si non it, capito inquit eum, & si caluitur, ergo  
Fer dominum.*

Malè vulgò legitur, *Ergo fur dominum.* Vt enim hunc locum emendemus, sensus & antiqui iuris ratio postulant, praesertim cum eidem loco illud quodammodo

do consentaneum sit, quod sic Iuuenal. Sat. 10. scribit,

*Sed videant serui ne quis neget, & pauidum in ius  
Cervice adstricta dominum trahat.*

Nec aliò spectat quod ita Hieronymus ait Epistol. libro 2. *Oborto collo me in ius trahis, ut aut probem quod nolo, aut multorum invidiam subeam.* Dixit Hieronymus *oborto collo* pro eo quod apud Iuuenalem est *cervice adstricta*. Nam cui adstringebatur ceruix, ei collum torqueri dicebatur; quemadmodum auctor est Liuius libro quarto, his verbis; *Hoc decreto consul armatus cum paucis appellantis tribunum, collum torisset, metu ceteri sacramento dixerunt.* Sed quorsum hæc? Nimirum ut intelligamus quidnam voluerit sibi hac regula Paulus. Et certum quidem est libro quarto ad Edictum ex quo hæc regula sumpta est de pœnalibus iudiciis prætoris differuisse Paulum, eiusque generis esse illud iudicium pœnale quod aduersus eos datur, qui parentem aut patronum sine venia in ius vocant, cap. 9. & cap. 11. de in ius voc. Modestinus & Ulpianus auctores sunt quinquaginta aureorum in eos iudicium dari, aut si inopia dinoscerentur laborare, à præfecto urbis eos castigari tanquam inofficiosos; cap. penultim. & cap. ultim. de in ius voc. Et quamvis non adiecerit prætor se causa cognita huiusmodi pœnale iudicium daturum, nihilominus tamen benigna interpretatione esse poterat veniæ locus. Nam si pœniteret libertum, & actionem remitteret quàm vel temerario quodam ætatis impetu, vel etiam imprudentia aduersus patronum sine venia in ius vocatum instituere decreuerat, aut si patronus vocatus non veniret, aut non inuitus vocatus esset, Paulus ait ad Edictum libro quarto moderandam prætoris iurisdictionem. Ferè enim in omnibus pœnalibus iudiciis ætati & imprudentiæ succurri, cap. 11. d. tit. Et rectè quidem ad-

didit



didit particulam ferè. Nam si libertus patronum, aut filius patrem in ius vocasset inuitum, quod fieri manu conferta, aut adstricta ceruice solebat, in ea causa erant, vt nullam eorum ætas, aut imprudentia veniam mereretur, sed potius à præfecto vrbi grauitè essent puniendi, d. c. vlt. & cap. 1. de obseq. par. & pat. præst. Nam vt ait eleganter Vlpianus, *liberto & filio semper honesta & sancta persona patris ac patroni videri debet*, c. 9. d. tit. Eaque ratio est cur scripserit Imperator Gordianus *nec rusticitati hac in re veniam præberi*, cap. 2. C. de in ius voc. eo nihil obstante, quod aliis edicti partibus succurri soleat rusticitati, cap. 7. de iurisd. cap. 2. si quis in ius vocat. Quod autem Paulus ait, ætati in omnibus pœnalibus iudiciis ferè succurri, id etiam ad publica & criminalia iudicia referendum videtur. Sic videlicet vt impuberibus & infantibus succurratur, puberibus verò non succurratur, cap. 10. d. quæstionibus, capite 1. C. si aduers. delictum, cap. 37. de minorib. cap. 38 ad leg. Iul. de adulter. cap. 22. de in ius vocand. Prudentius *ὁ σέφαιρος* hymno decimo.

*Stupuit tyrannus sub pudore fluctuans,*

*Nec vim decebat innocenti atatula*

*Inferre lege, nec loquenti talia*

*Furor sinebat efferratus parcere:*

Esse autem in publicis iudiciis aliquam imprudentiæ veniam, satis ea lege demonstrat Numa, quā ita de paricidis concepit; **SI QVIS HOMINEM LIBERVM DOLO SCIENS MORTI DVIT, PARICIDA ESTO**: per paricidam non vtrique eum qui parentem, sed eum qui hominem qualemcunque occidisset intelligens, auctore Festo libro 14. Vim vt opinor, legemque naturæ qua omnes homines pares siue æquales sunt, intuitus, cap. 32. hoc tit. Hanc Numæ legem videtur Sylla in ea lege secutus esse, quam

312 IAC. RÆVARD. TOM. I. COMM.  
de ficiariis edidit, scientiam requirens & dolum ma-  
lum, cap. 7. ad leg. Cor. de ficiar. videlicet eo sensu  
quo Declamat. libro quinto sic scripsit Seneca, *Ex to-  
to noluisse debet, qui imprudentia defenditur.*

C I X. P A V L V S L I B. V.

A D E D I C T V M.

*Nullum crimen patitur is qui non prohibet. cum prohi-  
bere non potest.*

T E S T A T V R Suetonius à Tyberio Casare interdi-  
ctum fuisse ne capite damnatos propinqui lugerent. Illudque  
interdictum ita videtur Vlpianus accepisse, quasi de  
hostibus & perduellionis damnatis, deque suspensio-  
sis, & iis qui mala conscientia sibi intulerant manus,  
fenserit duntaxat Tiberius, cap. 11. §. 1. de his qui no-  
tant. inf. Per suspensiosos eos intelligit Vlpianus,  
qui furcillis suspensi laqueo vitam finierant. Nam, vt  
Festus ait, *furcilles sine furcilla sunt quibus homines suspen-  
debant.* Et quamvis huiusmodi homines non lugeren-  
tur, nihilominus tamen eos elugeri propter sangui-  
nis turbationem moris erat. Adeò quidem vt si eorum  
viduæ intra luctus legitimum tempus nuberent, nota-  
rentur infamia: nec non & illi quoque infames es-  
sent, qui eas duxerant, si modò ignorantia non ex-  
cusarentur, d. capite 11. §. 1. Et quia filij familias sine  
patris consensu nec ritè nec iure matrimonium con-  
trahunt, hinc certè euenit, vt excusetur filius qui pa-  
tris iussu & auctoritate intra tempus legitimum quo  
mariti solent elugeri, viduam duxit: ipse autem pa-  
ter qui passus est ducere, notetur capite 11. in fin. cum  
cap. seq. de his qui not. inf. Aliud est si infcio patre  
huiusmodi nuptias contraxerit filius. Tunc enim filius  
notari, & excusari debuit pater. *Nullum enim crimen  
patitur*

*patitur is , qui non prohibet , cùm propter ignorantiam prohibere non potest , quemadmodum auctor est ad Edictum lib. 5. Iulius Paulus. Vndè à contrario sensu rectè concludi videtur , patrem non esse excusandum , si cùm sciret & posset prohibere , noluit tamen prohibere. Nam , vt ait in Troade Seneca ,*

*Qui non vetat peccare cùm possit , iubet.*

Eadè que ratio est cur hi qui salutare auxilium denegabant morituris , plecterentur. Id quod ab Apuleio traditum est ; De asino libr. 6. *An ignoras , inquit , eos etiam qui morituris auxilium salutare denegarint , quod contra bonos mores id ipsum fecerint , solere puniri ?* Huc etiam spectat verus proquiritandi ratio. Moris enim erat , vt populi indigentes auxilio , Quirites conclamerent , indè que quiritare & quiritari dicebantur , què admodum Varro , Arnobius , Donatus , & Nonius testati sunt. Id quod in vi maiore à Romanis obseruatum perpetuò fuit. Seneca Epistol. lib. 2. *Nemo statim Quiritium fidem implorat.* Quintilianus in Declam. cui titulus est , *Dines à parasito sacrilego reus cædis.* Deinde , inquit , *quemadmodum rapio ? de publico ? non clamat , non Quiritium fidem inuocat.* Nec aliud est quod de eo Vlpianus scribit , qui turbam concitauit dum misericordiam prouocat , cap. 4. §. 4. vi bon. rapt. Ait enim lib. 3. Liuius ; *Ad clamorem nutricis fidem Quiritium implorantis , fit concursus.* Dè que huiusmodi concursu visus est etiam Vlpianus sensisse , de seruo tractans qui clamauit vt ad auxilium domini sui conueniretur , vel qui turbam conuocauit , c. 1. §. 19. & c. 19. de S C. Sillan. Nec etiam arbitror clamorem illum quem in occidendo fure nocturno Decemviri requirunt , Gaium alio retulisse , cap. 4. ad leg. Aquil. Quod autem Paulus ait , nullum erimen eum pati , qui non prohibet cùm prohibere non potest , id eam videretur interpre-

tationem recipere, vt huiusmodi persona nequeat accusari. Esse enim crimen accusationem, & accusatorem alio nomine criminatorem dici notius est, quàm vt probari necessum sit. Eaque interpretatio huic regulæ mirè conuenit. Moris enim erat, vt eius qui vel famoso iudicio, vel alia ratione infamis erat, nomen ad censores deferretur; hac videlicet intentione, vt eius nomini nota in censualibus tabulis apponeretur. Idque illud est quod sic de diui Claudij censura dilferens, Suetonius scribit; *Et cum orantibus familiaribus dempsisset cuidam appositam notam, Litura, inquit, extabit.* Eodem loco ait Suetonius, *eum à censore notari, qui sibimet vim ferro intulisse arguebatur.* Cur igitur non etiam à censore notaretur, qui personæ huiusmodi infamis viduam intra luctus legitimum tempus vxorem duxerat. cum eum æquè famosum esse Vlpianus testatur cap. 11. de his qui not. infam. Nec id mirum, præfertim cum adiecerit ibidem Suetonius, *censores inquisitorum opera vsos esse.*

## C X. P A V L V S L I B. V I.

## A D E D I C T V M.

*In eo quod plus est, semper inest & minus.*

SI seruus actoris, domino sciente, & cum posset non prohibente, dolo fecerit quominus in iudicio sistam, aduersus dominum mihi dabitur exceptio, quia si id ignorante domino factum esset, competeret noxale iudicium,, vt auctor est Paulus ad Edictum lib. 6. c. 2. de eo per quem fact. est, hanc subiiciens rationem; *In eo enim quod plus est, semper inest & minus.* Nam ita fit, vt qui actionem habet, quia plus habet, habeat & quod minus est, videlicet exceptionem. Plus autem esse actionem habere quàm exceptionem, adeò verum est,

DE DIVERSIS REGVLIS IVRIS. 315  
est, vt scripserit Vlpianus; cui damus actionem, eidem &  
exceptionem multo magis competere, c. 1 § 6. hoc tit. c. vnic.  
§. 4. de superf.

AD §. NEMO ALIENÆ.

*Nemo alienæ rei expromissor idoneus videtur, nisi si cum  
satisfactione.*

AUT fideiussoribus, aut reis siue expromissoribus,  
aut etiam pignoribus caueri solet, c. 9. §. 3. & c. 10. de  
pignor. act. c. 7. §. 3. de dolo. c. 5. §. 2. de iure dot. c. 1. §. 7.  
de collat. c. 37. in fin. de oper. libert. Et differt quidem  
fideiussor à reo. Fideiussor enim vnà cum debitore  
obligatur, reus verò siue expromissor, debitore per ac-  
ceptilationem liberato, solus manet obligatus. Est  
enim Vlpian. auctor, si conuenerit vt expromissor detur,  
solere debitori acceptio ferri, c. 4. de condict. causa dat. c. 8.  
§. 6. ad S C. Velleian. Eoque sensu videri potest Ælius  
Gallus apud Festum scripsisse non solum qui suo nomine  
quid promissit, reum promittendo dici, sed etiam qui pro alte-  
ro quid promissit. Et cum alienæ rei nemo videatur ex-  
promissor idoneus esse, nisi satisfactione, cumque is  
qui idoneus non est, habeatur pro non dato (c. 6. qui  
satisfd. cog.) certè non ita protinus debitor liberaba-  
tur acceptilatione, quin aduersus eum condictiōni  
locus esset, c. 4. de cond. caus. dat. Vt igitur debitor ex-  
promissorem dans liberetur acceptilatione, omnino  
necessum est idoneum dari, c. 8. §. 6. ad S C. Velleian.  
eumque qui satisfdedit idoneum videri expromisso-  
rem, definit hac regula Iulius Paulus.

AD §. PUPILLVS.

*Pupillus pari posse non intelligitur.*

AD Edictum lib. 6. ait Paulus, si tutor pupillo nolit  
auctor

*auctor fieri, non debere eum à pratore cogi; quia tutela iudicio iacturam hanc consequitur pupillus, nullam enim concordia vel fraude tutoris iacturam pati posse pupillus intelligitur, cap. 17. de auct. tut. cap. 5. de dolo malo. Et hoc est quod eodem libro scripsit Paulus, pupillum pati posse non intelligi.*

## AD §. VBI VERBA.

*Vbi verba coniuncta non sunt, sufficit alterutrum esse factum.*

EODEM ad Edictum lib. 6. de noxalibus actionibus differens, scripsit Paulus, *si absens sit servus pro quo noxalis actio alicui competit, dominum in cuius est potestate, vel iudicio eum sisti promittere, vel iudicium accipere compellendum, non autem simul utrumque facere. Vbi enim verba edicti coniuncta non sunt, sufficere alterutrum esse factum, cap. 2. §. 1. si ex noxali causa, c. 78. §. 1. de condict. & demonst. cap. 22. §. 4. de noxalib. act. Ius electionis ad hanc regulam non pertinet; quod ius in eius arbitrio plerumque solet esse, cuius contemplatione disjunctivè quid scriptum est, c. 23. & c. 43. §. 2. de leg. 2. cap. 1. §. 1. de effractoribus.*

## AD §. MULIERIBVS.

*Mulieribus tunc succurrendum est, cum defendantur, non ut facilius calumnientur.*

DECEPTIS enim mulieribus non decipientibus iura subueniunt, cap. 2. §. 1. ad S C. Velleian. Siquidem infirmitas earum, non autem calliditas meretur auxilium, d. §. 1. cap. 2. C. ad S C. Velleian. Esse autem ad calumnias mulieres natura admodum proclives, docet eleganter Satyr. 6. Iuuenalis. Ait enim,

*Nulla*

*Nalla fere causa est, in qua non foemina litem*

*Monerit, accusat Manilia, si rea non est.*

*Componunt ipsa per se formantque libellos*

*Principium atque locos Celso dictare parata.*

Et ideò succurrendum ijs est cùm opus habent defensione, non autem cùm volunt calumniari.

## CXI. CAIVS LIB. II. AD

### EDICTVM PROVINCIALE.

*Pupillum qui proximus pubertati sit, capacem esse & furandi & iniuria faciendæ.*

PROXIMVS pubertati dicitur qui annum decimum tertium ingressus est. Id quod Ecloga 8. videtur hoc versu Virgilius voluisse;

*Alter ab undecimo tum me iam ceperat annus.*

Ad hunc enim locum scripsit Seruius; *Id est, tertius decimus. Alter enim de duobus dicitur, ut unus sit ab undecimo, duodecimus, alter, tertius decimus. Nam pubertati vicinum se fuisse significare vult, quod de duodecimo anno procedere non potest.* Hæc Seruius, eum haud dubiè appellans vicinum pubertati, quem pubertati proximum aut prope pubertatem esse Iurisconsulti dicunt, cap. 13. §. 1. de dolo malo, cap. 4. §. 23. de doli mali & met. excep. Huiusmodi impuberes fictione quadam pro puberibus, in furtis, iniurijs, fraudibusque cunctis haberi solent, d. §. 23. c. 23. de furtis, c. 13. §. 1. de dol. mal. Certè quia, ut Caius hac regula testatur, *pupillus pubertati proximus, & furandi & iniuria faciendæ capax est.* Id quod à Cypriano etiam in quadam de cardinalibus Christi operibus præfatione, traditum est, his verbis; *Omnino rarum est & difficile fieri bonum; facile & primum est, esse malum: & hac sine magistro, sine exemplo doctrina, statim à pubescentibus annis imbuimur & docemur.* Vnde apparet

318 IAC. RÆVARD. TOM. I. COMM.  
ret *admodum impuberem* Vlpiano dici, qui necdum  
egressus est duodecimum ætatis annum, c. 3. §. 1. de se-  
pulchro violato. Sunt enim anni pubescentes, in fœ-  
minis quidem vndecimus & duodecimus, in masculis  
verò decimus tertius & decimus quartus; quemad-  
modum probari ex Seruio potest.

#### AD §. IN HÆREDEM.

*In hæredem non solent actiones transire quæ pœnales sunt  
ex maleficio, veluti furti, damini, iniuria, ubi honorum raptor-  
um, iniuriarum.*

PLACUIT enim in actionibus quæ ex delictis  
oriuntur, siue ciuiles sint, siue honorariæ, vt noxa ca-  
put sequeretur, cap. 1. de priuat. delict. Et idcirco ciuili  
constitutione definitum est, pœnalibus actionibus  
hæredes non teneri, nec cæteros quidem successores,  
d. c. 1. & c. 16. §. 2. quod met. causa. nisi fortè ex damno  
locupletior hæres factus sit, c. 23. §. 6. ad leg. Aquil. nisi  
etiam lis antè defuncti obitum fuerit contestata. Est  
enim Paulus auctor, *post litem contestatam hæredem tene-  
ri ex omnibus causis*, c. 87. hoc tit. c. 13. in princ. de iniur.  
Eiusque diuersitatis ratio à nobis reddita est in expli-  
catione, d. cap. 87.

#### CXII. PAVLVS LIB. VIII.

##### AD EDICTVM.

*Nihil interest ipso iure quis actionem non habeat, an per  
exceptionem infirmetur.*

DE huius regulæ vera sententia scripsimus satis  
Varior. libr. 2. cap. 5. iisque adiungi poterunt quæ ad  
huius tituli cap. 66. annotauimus.

#### CXIII.



CXIII. GAIVS LIB. AD  
EDICTVM PROVINCIALE.*In toto & pars continetur.*

DE collegijs & corporibus disseruit Caius ad Edictum prouinciale lib. 3. c. 1. quod cuiusque vniuersi. nom. cap. 16. de verbor. signific Et solent quidem vniuersitates siue collegia ad exemplum reipublicæ res communes, aſſam communem & actorem siue Syndicum habere, d. cap. 1. Eoque sensu arcæ Pontificum quædam inscriptiones antiquæ meminerunt, his verbis; *SI QVIS AVTEM HOC VENDERE VOLLERIT, ARKÆ PONTIFICVM HS .X. MILLIA NUMMVM INFERAT.* Est enim in Sinerij libro elegans inscriptio arcæ collegij Centonariorum his verbis mentionem faciens; *HOC AMPLIVS ARKÆ RETRO POSITÆ COLLEGIIS. DONVM DEDIT DENARIORVM QVINQVE MILLIVM.* Actor quem ad agendum dat vniuersitas, non habetur quasi à pluribus datus Nam pro vniuersitate interuenit, non pro singulis, cap. 2. d. tit. Quia enim *vniuersitates portiones singulas adtrahere debet, non contra singulis portionibus applicari*, atque ita in toto pars, non in parte totum contineri, quemadmodum docet eleganter *Arnobius* aduersus gentes lib. 2. certè mirum non est pro toto corpore non pro partibus singulis Syndicum dici interuenire. Quo sensu scripsit hac regula Caius, in toto & partem contineri. Hoc enim idem est, ac si diceret, vniuersitatem singulas ad se trahere portiones, non autem portionibus singulis applicari. Quod etiam *Vlpianus* sensisse videtur, c. 7. in princ. de except. rei iudic.

CXIV.

## CXIV. PAVLVS LIB. IX.

## AD EDICTVM.

*In obscuris inspici solere quod verisimilius est, aut quod plerumque fieri solet.*

DVBITABATUR olim an seruus sine libertate hæres institutus rectè videretur institutus esse. Dubitandi ratio fuit quòd ea persona institueretur cum qua non erat testamenti factio. In contrarium allegabatur tacita voluntas testatoris & libertatis fauor. Tantæque inter veteres exorta est contentio, vt vix vlla spes esset eam decidi posse; cap. penult. in princ. C. de necessar. serm. hæred. Instit. Paulus eorum videtur traditionibus acquieuisse qui valere institutionem contendebant. Ait enim *in obscuris inspici solere quod verisimilius est*. Nam, vt auctor est Iustinianus, *non est verisimile eum qui seruum instituit hæredem, si pratermiserit libertatis dationem, seruum remanere voluisse*, §. idemque iuris. Instit. quibus ex caus. ma. non licet. Et quia fieri plerumque solet, vt seruus tutor testamento datus sine libertate, ipsa tutelæ datione præsumeretur libertatem acquisiuisse; d. cap. penult. hinc etiam fit vt putem multo magis seruilem sine libertate institutionem Paulum probasse. In obscuris enim inspici vult quod fieri plerumque solet. Nec etiam ignotum est multa contra iuris rigorem pro libertate esse constituta; 24. §. 9. de fideicomm. liber. Huc spectat illud Plinij Epistol. lib. 4. *Scribis mihi Sabinam quæ nos reliquit hæredes seruum suum nusquam liberum esse iussisse: eam tamen sic adscripsisse legatum. Modestum QVEM LIBERV M ESSE IVSSI. Quæris quid sentiam? con-*

*ruli cum prudentibus: conuenit inter omnes nec libertatem deberi, quia nō sit data, nec legatum, quia seruo suo dederit.*

*Sed*

*Sed mihi manifestus error videtur, ideòque puto nobis quasi scripserit Sabina faciendum, quod ipsa scripsisse se credidit. Hæc Plinius, satis cum Paulo & Iustiniano definiens in obscuris quod verisimilius est inspiciendum esse.*

## CXV. PAVLVS LIB. X.

## AD EDICTVM.

*Si quis obligatione liberatus sit, potest videri cepisse. Non potest videri accepisse qui stipulatus potest exceptione submoueri.*

POENA legis Cornelia teneri eos Macer ait qui ob accusandum vel non accusandum pecuniam acceperunt; cap. 2. de concuss. Eoque pertinet illud Tertulliani de fuga in persecut. Quid enim dicit ille concussor? Da mihi pecuniam. Certè ne eum tradat. Et paulò post; Miles me vel delator, vel inimicus concutit, nihil Cæsari exigens, immò contrà faciens cùm Christianum legibus humanis reum, mercede dimittit. Est etiam Vlpianus auctor; illicita ministeria sub pretextu adiuvantium militares viros, ad concutiendos homines procedentia, coercere debere, cap. 6. §. 3. de offic. præsid. Tertull. eodem libro: Neque enim statim & à populo eris tutus, si officia militaria redemeris. Solent etiam iudices frequenter corrumpi. Sic enim ad Macedonium epistola 54. scripsit Augustinus; Cùm autem iudicia & testimonia, qua nec iusta nec vera vendenda sunt, iniqua & falsa venduntur, multò sceleratius utique pecunia sumitur, quia sceleratè etiam; quavis à volentibus datur. Eaque de causa, legi repetundarum Antonini constitutione additum esse scripsit Vlpianus, ob pecuniam iudici vel aduersario datam, litem perire; cap. 1. de calumniat. De qua constitutione cùm tractaret libro 10. ad Edictum Paulus, iudicem vel aduersarium pecuniam cepisse videri scripsit, qui obligatione, qua reo erat ob-

X

strictus,

*strictus, liberatus est; cap. 2. dict. tit. quod fieri aut restitutione, aut etiam scissione chirographi solet. Air enim de Nabuthe, capite 13. beatus Ambrosius; Cauti-  
onem quoque si quam habui debitoris, scissam sine debiti  
recuperacone reddidi. Et libro primo Offic. cap. 32. Est  
etiam, inquit, illa benivolentia liberalitas, ut si quod habes  
debitoris chirographum, scindens restituas, nihil à debitore  
consecutus debiti. Augustinus Bonifacio; Extorta debi-  
toribus chirographa reddebantur. Aliud est si quid iudi-  
ci aut aduersario stipulanti promiserit reus. Quia enim  
exceptione tam legis Iuliæ repetundarum, quam con-  
stitutionis Antonini stipulatores huiusmodi possunt  
remoueri, certè nihil quicquam stipulatione viden-  
tur accepisse. Et hoc est, quod ait hac regula Paulus,  
non videri eum accepisse, qui stipulatus potest exceptione  
submoueri. Deque huiusmodi stipulatione sentit haud  
dubiè Tertullianus de fuga, differens in persecutione,  
cùm ait; Apud inferos emancipatio nostra est, & stipula-  
tio nostra in cœlis.*

## CXVI. VLP IANVS LIB. XI.

## AD EDICTVM.

*Nihil consensui tam contrarium est, qui bonæ fidei iudi-  
cia sustinet, quam vis atque metus; quem comprobare con-  
tra bonos mores est.*

CVM scriberet prætor, QVOD METVS CAU-  
SA GESTVM ERIT, RATVM NON HABEBO,  
hæc verba interpretans libro ad Edictum vndecimo  
Vlpianus, sic potest videri scripsisse; Nihil enim tam  
consensui contrarium est, quàm vis ac metus, quem  
comprobare contra bonos mores est. Olim ita edice-  
batur, &c. cap. 1. de eo quod met. causa. Eoque per-  
tinet quod Seneca Controuerf. lib. 5. ita scribit; *Neque  
enim*

*enim lex adhibenti vim irascitur, sed passo succurrit, & iniquum illi videtur id ratum esse, quod aliquis, non quia voluit, pactus est, sed quia coactus est. In hoc edicto vis est, inquit Paulus, maior rei impetus qui repelli non potest; siue, vt Vlpianus definit; vim accipimus atrocem, & eam qua aduersus bonos mores fit; cap. 2. & 3. d. tit. Cuiusmodi illa vis est, quam sic describit ibid. Seneca; Nul-la, inquit, vis est, arma lex, & vincula, & ultimum pe-riculum complectitur. Eoque sensu vim maiorem acce-pit etiam Seneca de benef. libro secundo capite 18. Ait enim; Cum eligendum dico cui debeas, vim maiorem ac metum excipio, quibus adhibitis electio perit. Idem Vl-pianus. ex Labconis sententia metum definit non quem-libet timorem, sed maioris malitatis, capite 5. d. titulo. Hoc est, qui salutis periculum, vel corporis crucia-tum continet, capite 13. C. de transact. cap. 3. ex quib. caus. ma. Ita enim metum & vim maiorem definiuit etiam Lactantius, de ira Dei, capite 15. Homo, in-quit, quia multis casibus periculisque subiectus est, me-tuit, ne qua vis maior existat, qua illum verberet, spoliet, laceret, affligat, interimat. Atque ita quidem à metu separari in hoc edicto vis solet, quam pratores non-nulli metus appellatione non dubitarunt comprehen-dere. Ait enim Vlpianus olim ita edici consueuisse, QVOD VI METVSVE CAUSA; postea vero sic; QVOD METVS CAUSA; & detractum fuisse vis mentionem, quia quodcumque vi atroci fit, id metu quoque fieri videtur, capite 1. Videlicet ea ratione quam tradidit breui quadam in Epicratem cum gladio reum Declamatio-ne Quintilianus, his verbis; Quid est vis? hac fit alias patientia, alias metu; quorum alterum ad corpus, alterum ad animum pertinet.*

## AD §. NON CAPITVR.

*Non capitur qui ius publicum sequitur.*

PAVLVS ait in emendo & vendendo naturaliter concessum esse quod plures sit minoris emere; quod minoris sit plures vendere, & ita inuicem se circumscribere, c. 22. §. 3. locati. Quod ipsum libro ad Edictum vndecimo tradidit etiam Vlp. c. 16. de minorib. adiiciens insuper minorem ita circumscriptum non esse restituendum; Non enim minorem capi qui ius publicum sequitur. Quo pertinet illud Senecæ, Controuers. lib. 5. Non possum domum habere nisi hic emero, nulla alia venalis est; hanc occasionem videt venditor, & premit; non tamen hanc emptionem rescindes, alioquin in infinitum calumnia excedet.

## AD §. NON VIDENTVR.

*Non videntur qui errant consentire.*

NIHIL enim consensui tam contrarium est quam error, qui imperitiam detegit, c. 15. de iurisd. c. 7. in fin. de rescindend. vendit. cap. 2. de iudic. Et idcirco qui in captionem per iustum errorem inciderant, restitui in integrum solent, cap. 2. de in integr. restitut. §. si quis agens Institut. de actionib. Id quod sibi hac regula voluit Vlpianus ex eius de restitutionibus in integrum commentario sumpta. Nec alia ratione dixit idem Vlpianus errore veritatem originis non amitti: & Papi- nianus errorem defensionem iuris non excludere, capite 6. & capite 17. §. 8. ad municipal.

## CXVII. PAVLVS LIB. XI.

## AD EDICTVM.

*Prator bonorum possessorem haredis loco in omni causa habet.*

DE

DE alienatione mutandi iudicij causa differens ad Edictum libro vndecimo Paulus, *dari ait ex eo edicto actionem haredi & in haredem, vel similem; pratorum enim bonorum possessorem haredis loco habere in omni causa, c. 5. de alienat. mut. iud. causa facta. Eoque sensu scripsit etiam Vlpianus in omnibus vice haredum bonorum possessores haberi, non autem haredibus aequales esse; cap. 3. §. 2. & §. 5. de bon. poss. haredis appellatione omnes significari successores etsi verbis non sint expressi; cap. 170. de verb. signif. Et sic quidem tam generis quam speciei loco accipi solet haredis nomen, speciei quidem, respectu ipsius successionis; cap. 14. de testib. cap. 62. hoc tit. generis verò, sola possessionis ratione; cap. 1. de poss. haredit. petit. Quemadmodum enim ciuili iure haredes, sic iure pratorio bonorum possessores, appellabantur possessores hareditatis; cap. 3. §. 1. de bon. poss. Hieronymus ad Oceanum; *Hic heres uxoris, & hareditatis alij possessores. Cicero act. 3. in Verrem; Itaque ei Verres possessionem hareditatis negat se daturum. Nec alio sensu scripsit Paulus hareditatis appellatione bonorum quoque possessionem contineri, quàm quod bonorum possessores genere quodam haredes sint; cap. 138. de verbor. signif. cap. 128. hoc tit. cap. 11. de petit. haredit.**

## CXVIII. VLPIANVS LIB. XII.

## AD EDICTVM.

*Qui in seruitute est, vsucapere non potest: nam cum possideatur, possidere non videtur.*

SINE possessione vsucapio non contingit, cap. 25. de vsurpat. Eaque de causa ad Edictum libro duodecimo scripsit ad hunc modum Vlpianus; *Is qui apud hostes est, nihil per usam sibi acquirere potest. Qui enim in seruitute est vsucapere non potest. Nec ceptam possessionem*

X 3 poterit

*poterit adimplere dum est apud hostes. Nam cum possideatur, possidere non videtur: cap. 23. §. 1. ex quibus causa. cap. 54. §. 2. de acquir. rer. dom. Ea videlicet ratione, qua tradidit idem Vlpianus in sua potestate non videri habere, qui non est sue potestatis; cap. 21. ad legem Iul. de adult. Nam ut ait libro quarto Controversiarum Seneca, quomodo civis iura habeat, qui liberi hominis non habet? Et quamvis re vera iure gentium serui sint, qui sunt in hostium potestate, rectius tamen eos esse in servitute dixit Vlpianus, quam si servos appellasset. Differens enim de addicto manumisso Declamatione quadam Quintilianus, sic ait; Plurimum autem refert, an servire merito dicamus, & eos qui in piratas inciderint, & eos qui ab hoste sint capti. Id quod ingenuis natura dedit, nulla fortuna iniuria eripi ipsis potest.*

CXIX. VLPIANVS LIB. XIII.  
AD EDICTVM.

*Non alienat qui duntaxat omittit possessionem.*

**Q**VI petitorio iudicio utitur, ne frustra experiretur, requirere solet solemnī interrogatione an is cum quo instituit actionem, possessor sit vel desit possidere; cap. 36. in princip. de rei vindicat. cap. 20. §. 1. de interrogat. Et tunc quidem si se responderet aduersarius desisse possidere, sedulo inquirebat actor an id ita non solum dolo malo, sed etiam iudicii mutandi causa factum esset. Nam potest aliquis dolo malo desinere possidere, nec tamen iudici mutandi causa quicquam alienasse videri. *Non enim alienat qui duntaxat omittit possessionem;* capitulo quarto §. 1. de alien. mut. iud. causa. cap. 28. de verb. signif.



CXX. PAVLVS LIB. XII.

AD EDICTVM.

*Nemo plus commodi hæredi suo relinquit, quàm ipse habuit.*

IN vniuersum ius quod defunctus habuit, succedit hæres; cap. 24. de verb. signif. Et idcirco in vsucapionibus possessio defuncti quasi iuncta descendit ad hæredem; cap. 30. ex quib. caus. maiores non tamen plus iuris aut commodi secum transfert. Nemo enim plus commodi hæredi suo relinquit, quàm ipse habuit, cap. 53. hoc tit. Cicero pro Cecinna; *Dubium est quin si Cæsennium possidebat, cum erat colonus in fundo, post eius mortem hæres eodem iure possederit.*

CXXI. PAVLVS LIB. XIII.

AD EDICTVM.

*Qui non facit quod facere debet, videtur facere ADVERSVS EA, quia non facit: & qui facit quod facere non debet, non videtur facere id quod facere iussus est.*

SOLET olim actionibus, cautionibus, & edictorum clausulis nonnullis, à primis formularum, quibus illæ concipiebantur, verbis nomen imponi. Sic enim appellari videtur actio QVOD METVS CAUSA; sic etiam actio SI CERTVM PETETVR; c. i. de condict. triticar. actio. QVOD IVSSV, actio QVANTI MINORIS, cap. 25. de except. rei iudic. interdictum QVORVM BONORVM, cap. i. quor. bon. interdictum QVOD LEGATORVM, cap. i. quod legat. Sic cautio REM RATAM HABERI. cautio IUDICATVM SOLVI, c. 46. de procurat. & illa vulgaris clausula AMPLIVS NON PETI; c. 15.

X 4 rem

328 IAC. RÆVARD. TOM. I. COMM.  
 rem ratam hab. Eoque videri potest in hac regula  
 Paulus respexisse his verbis, ADVERSVS EA. In-  
 ter alias enim edictorum vulgares & solemnes clau-  
 sulas, hæc quoque reperitur, QVI ADVERSVS  
 EA FECERIT; cap. 5. §. 6. de his qui deiec. vel effud.  
 cap. 1. de ædific. edicto. Cuius meminit etiam Festus  
 possessionem definiens, cum ait; ADVERSVS EA  
 VIM FIERI VETO. Hanc clausulam edicto quod  
 DE RECEPTIS proposuit, adiecisse videtur præ-  
 tor, certam iis qui arbitrum recipiunt, regulam præ-  
 scribens; cap. 3. §. ait prætor. & cap. 32. de receptis.  
 Et cum ad illud edictum scriberet libro ad Edictum  
 decimo tertio Iulius Paulus, eius clausulam hanc  
 QVI ADVERSVS EA FECERIT, ita interpre-  
 tatus est, ut contenderit videri arbitrum ADVER-  
 SVS EA facere; hoc est, in pœnam vulgaris illius  
 clausulæ QVI ADVERSVS EA FECERIT, inci-  
 dere, si non facit quod facere debet; & si aliquid ex-  
 tra compromissum attentauerit (quod facere non de-  
 bet, d. cap. 32. §. fin.) non videri eum facere id quod  
 facere prætoris edicto iussus est. Eamque veram esse  
 arbitror huius regulæ sententiam, præsertim cum sa-  
 tis constet libro ad Edictum teritiodecimo, disseruisse  
 Paulum de receptis; cap. 32. de receptis.

## CXXII. GAIUS LIB. V. AD EDICTVM PROVINCIALE.

*Libertas omnibus rebus favorabilior est.*

CERTVM enim est servos dominio alieno con-  
 tra naturam subiici, cap. 5. §. 1. de statu hom. Nam iu-  
 re naturali omnes homines liberi sunt & æquales; c. 4.  
 de iustit. & iure, cap. 32. hoc tit. Quintilianus lib. 3.  
 cap. 10. *Liberos natura omnes & iisdem constare elementis,*

✠

DE DIVERSIS REGVLIS IVRIS. 329  
*et fortassis antiquis etiam nobilibus ortos dici potest. Seneca declamabat lib.7. Neminem natura fecit liberum, neminem servum; imposuit fortuna nomina hac singulis. Eaque res in causa est quod libertas tam fauorabilis sit, ut in rebus obscuris secundum eam ferè semper pronuntietur; c.16.& 17. de manumiss. testam. c.4.§.6. de statuliber. cap.20. hoc tit.*

CXXIII. VLP IANVS LIB. XIV,  
AD E D I C T V M.

*Nemo alieno nomine lege agere potest.*

*QVI ius suum persequerentur, aut lege aut iure agere dicebantur; lege quidem, si legitima esset actio; iure verò, si honoraria, cap.2.§.2. de orig. iur. capit.3. de offic. prætor. Eoque sensu lib.17. cap.10. legis actiones centumviralium causarum & lib.20. cap.1 iuris actiones accepit Gellius. Sic etiam auctor est Suetonius, Vespasianum de eadem re pluribus legibus agi vetuisse; D. Augustum legibus aggredi, reosque cadis absentes deferre statuisse. Sic & Liuius eos qui adferunt in libertatem, lege agere dixit lib.4. Terentius Phor. Lege agito ergo. Plautus Aulul. Lege agito mecum, molestus ne sis. Dicitur etiam legis actio ex Decemviralibus, aliisque legibus descendens legitimus actus; ut sunt emancipatio, in iure cessio, adoptio, manumissio, cretio, usurpatio, & sic deinceps, de quibus latè disseruimus de auctoritate prudentum libro singulari. Atque ita legis actionem accepit Gellius lib.20 c.9. Ait enim ex iure manu confertum verba esse, quæ cum lege agitur, dici apud prætorem solent. Nec aliter de legis actionibus sentiunt Iurisconsulti cum apud magistratus legis actionem dicunt; cap.3. de offic. proconsul. cap.1. de offic. iurisdiction. cap.4. de adopt. Est & tertia legis actionis significatio;*

iis magistratibus propria qui in homines facinorosos lege animaduertunt. Sic enim Declamat. lib. 10. scribit Seneca ; *Etiā quibus animaduertere in damnatos necesse est , non dicunt OCCIDE , non MORERE , sed AGE LEGE , crudelitatem imperij verbo mitiore subducunt.* Valerius lib. 4. cap. 8. *Ac iussu lictore lege agere , tunc demum aperuit.* Hanc triplicem legis actionis interpretationem , illa verba requirunt quæ de Cn. Flauio sic protulit Liuius lib. 9. *Fastosque circa forum in albo proposuit , ut quando lege agi posset , sciretur.* Sensus enim est ex Fastorum albo cognosci quibus diebus vel liceat , vel non liceat cum aduersario legibus experiri , actus legitimos exercere , & in facinorosos animaduertere. Quæ omnia fieri nomine alieno non potuerunt ; licet mandato speciali absentis nomine auctor recte fieret procurator , videlicet solemnī quadam ratione apud acta suscipiens procurationem. quemadmodum ex eo licet suspicari , quod scripserit Paulus *decreto pratoris actorem constitui , si nondum fari pupillus potest , ut procuratorem facere possit ;* cap. 24. de administr. & peric. tut. Et quamuis procurator alterius negotia gerat ; nihilo magis tamen alieno nomine lege agere censetur. Non enim ille cuius nomine agitur , sed procurator ipse dominus litis constituitur , eamque suo nomine quodammodo exequitur ; cap. 11. de doli & met. except. cap. 4. §. ultim. de appellat. Actus quoque legitimos non potuisse alieno nomine exerceri , certius est quam ut ea res prolixiorē requirat disputationem , cap. 3. de acceptilat. cap. 90. de acquir. hæred. cap. penult. C. de vind. & apud consil. ma. cap. penult. C. qui ma. non poss.

A D

## AD §. TEMPORARIA.

*Temporaria permutatio ius pronincia non innotat.*

MORIS erat, eos qui in prouincijs domicilium habentes, Romæ vel in Italia studiorum aut alia iusta de causa morari volebant, habitationem impetrarent rescripto principis, nec ante discederent, quàm ad ipsum etiam impetrassent. Eúmque morem tradidit Cassiodorus Variarum lib. 1. & 4. Sic enim de liberis Valeriani cuiusdam scribit studiorum causa Romam deductis; *Quos illustris magnificentia tua in supradicta vrbe faciat commorari, nec illis liceat ante discedere, nisi hoc secunda discernamus iterum iussione.* Erat & illud moris, vt habitationem non concederet princeps, sine annua certaque pensione. Eoque sensu scripsit Suetonius, *Cesarem annuam habitationem Romæ usque ad bina millia nummum, in Italia non ultra quingenos sester-tios remisisse.* Neque est verisimile, sine iusta causa huiusmodi habitationem principes cuiquam indulxisse, & inter causas iustas, studiorum causam numerari ex eo perspicuum est, quod causam studiorum appella-uerit probabilem absentia causam Vlpianus cap. 28. ex quibus caus. maiores. Est etiam Modestinus auctor, *prouinciales studiorum aut rei suæ gerendæ gratia Romæ morari;* cap. 36. ad municipal. euidenter demonstrans, constare omnino debuisse, quam ob causam relicto domicilio Romam commigrasset prouincialis; & negotiatorem quidem rei suæ gerendæ gratia, hominem verò literatum studiorum causa iustè habitationem à principibus impetrasse; cap. 18. in final. de iudicijs Eaque sola ratione nō minus lege Cornelia tuti erant, qui habitationem impetrauerant, quàm si domici-lium Romæ haberent; cap. 5. §. 2. de iniurijs. Hæc habita

habitationis impetratio, alio modo commeatus dicitur, nec perpetua, sed temporaria erat, utpote temporariam sub se continens loci mutationem. *Est enim commeatus*, auctore in Terent. Donato, *ex aliqua commoratione temporalis abcessus*. Et quia mutatio loci temporaria ius prouinciæ non innouat, certè finito habitationis impetrato tempore, prouinciales qui commeatum impetrauerant, domum reuocati, muneribus, aliisque honorum municipalium functionibus tam erant obnoxij, quàm si nunquam egressi prouinciam fuissent. Idque illud est quod ait Vlpianus, *eum qui ultra commeatum abest, vel ultra formam commeatui datam, ad munera vocari posse*; cap. 2. in fin. ad municipal. Obseruari etiam solet, ut sic domo separarentur in prouincijs dignoscerenturque municipales, quemadmodum in vrbe constat ciues Romanos tribu distinctos fuisse. Id enim in Vitellio docuit non obscurè Suetonius, cum ait; *Ceterum P. Vitellius domo Nuceria*. Ex libro Smetij inscriptionem habeo qua hunc etiam morem liquido demonstrat, his verbis; D. M. C. IVLII FILETIONIS DOMO AFRICA MEDICI QVI VIXIT ANN. XXXV. C. IVLIVS FILETVS ET IVLIA EVTHENIA FILIO KARRISSIMO F. C. Sunt & aliæ inscriptiones quibus idem loquendi genus exprimitur, domibus ita distinctis; DOMO ARRETIO: DOMO ATESTÆ: DOMO ROMA: DOMO BOLDINIA: DOMO VIENNA: DOMO VERONA: DOMO CELEÆ: DOMO CARTHAGINE: DOMO ANTIOCHIA SYRIA. Nec alio sensu ius reuocandi domum videtur Vlpianus accepisse, de ijs differens qui domum reuocant, si non ibi contraxerunt ubi conueniuntur, c. 2. §. 3. & §. 4. de iudicijs. Huiusmodi priuilegio à municipibus singulis renuntiari

ad

ad tempus poterat; c. 7. qui satisd. cog. Nec per renun-  
tiationem ius prouinciæ intelligitur innouari. Muta-  
tio enim iuris temporaria, non innouat ius illud pro-  
uinciæ quod ei qui permutat cum reliquis municipi-  
bus commune est. Et ita quidem Vlpianus sensisse vi-  
detur libro ad Edictum 14. ex quo hæc regula sum-  
pta est; d. cap. 7. eo planè sensu permutationis vocabu-  
lo usus, quo *permutationem rerum* pro Sestio, & in Pa-  
radoxis tempestatum temporumque permutationes  
accepit Cicero. Et in Catilinam; *Si Catilina*, inquit, †  
*sententiam permutauerit.*

## CXXIV. PAVLVS LIB. XVI.

## AD EDICTVM.

*Vbi non voce sed præsentia opus est, mutus si intellectum  
habet, potest videri respondere; idem in surdo: hic quidem &  
respondere potest.*

IN negotijs quibusdam vox requiritur necessariò  
& præsentia; in quibusdam præsentia quidem neces-  
saria est, non vox. Stipulationes vocem requirunt,  
& præsentiam. Neque enim absens neque mutus pos-  
sunt stipulari; c. 1. §. 1. de verbor. obligat. *Hæreditates  
acquiri solent voce & præsentia; acquirebantur etiam, sine  
voce sola præsentia. Voce & præsentia acquirebantur, solemn-  
i cretionis formula; præsentia verò sola, pro hærede geritione,  
quemadmodum auctor est Vlpian. tit. 22. Mutus hæ-  
reditatem cernere non potest. Vocem enim non ha-  
bet. Potest tamen pro hærede gerere sola præsentia si-  
ne voce; c. 5. de acq. hæredit. Vbi enim non voce, sed  
præsentia opus est; mutus si intellectum habet, potest  
videri respondere. Solemniter videlicet an hæres sit  
interrogatus; c. 3. de interrog. Eoque pertinet quod ita  
Quintilianus lib. 11 c. 2. scribit; *Quippe non manus so-*  
*lūm,**

lūm, sed nutus etiam declarat nostram voluntatem, & in mutis pro sermone sunt. Surdus etiam, non tamen inutus (qualis est natura surdus) videri potest respondere, d.c. 5. quia intelligere potest & consentire; cap. 48. de obligat. & act.

## AD §. FURIOSVS.

*Furiosus absentis loco est; & ita Pomponius lib. 1. Epist. scribit.*

LICET enim præsens sit, nullum tamen habet intellectum. Nam (ut ait lib. 7. cap. 12. Lactantius) *in furiosis mens extinguitur anima, manet, & ideo non exanimis, sed dementes vocantur.* Eaque de causa, si nulla spes esset pristinae sanitatis recuperandae, furiosus absentis loco haberi solet.

CXXV. GAIVS LIB. V. AD  
EDICTVM PROVINCIALE.

*Fauorabiliores rei potius quàm actores habentur.*

PAVLVS auctor est, inter pares numero iudices si dissonae sententiae proferantur, in liberalibus causis pro libertate, in aliis etiam publicis pro reo statutum obtinere, cap. 38. de re iudic. Pro libertate quidem, quod ea rebus omnibus fauorabilior sit; cap. 122. hoc titul. pro reo verò, quia rei fauorabiliores habentur quàm actores. Id quod Epist. libr. 11. testatur etiam Seneca, *Reus*, inquit, *sententiis paribus absolvitur, & semper quicquid dubium est humanitas inclinatur in melius.* Aliud est si duo iudices dati diuersas dederint sententias. Non enim statim pro reo videbitur iudicatum, sed vtraque sententia tamdiu erit in pendent, donec iudex comperēs vnam confirmauerit, cap. 28. de re iudic. Eamque solet confirmare quae mirior est. Sic enim scripsit idem Seneca

Contro



DE DIVERSIS REGVLIS IVRIS. 335  
Controuerf. lib. 2. *Alter index damnat, alter abfoluit, inter difpares ſententias mitior vincat.*

CXXVI. VLP IANVS LIB. XV.

AD EDICTVM.

*Nemo prado eſt qui pretium numerauit. Locupletior non eſt factus qui libertum acquiſerit. Cum de lucro duorum queratur, melior eſt cauſa poſſidentis.*

DISSERENS ad Edictum lib. 5. Vlpianus de petitione hæreditatis, eum ait hæreditatis petitione teneri, qui pro hærede vel pro poſſeſſore poſſidet: pro poſſeſſore autem poſſidere prædonem, qui cum ſciſet ad ſe non pertinere hæreditatem, inuaſit bona, nullam habens poſſidendi cauſam; c. 11. c. 9. c. 25. § 2. de petit. hæredit. c. 34. § 9. de ſolut. Et cum de eo dubitaretur, qui ſciens alienam emerat hæreditatem, ac plerisque videretur quaſi pro poſſeſſore poſſidere, diſplicuit hæc ſententia Vlpiano. *Nemo enim prado eſt*, inquit, *qui pretium numerauit*; cap. 14. §. 6. de petit. hæred. In qua tamen ſententia Iulianus, Papinianus, Gaius & Paulus videntur fuiſſe. Volunt enim illi, omnes omnino mala fidei poſſeſſores prædones dici & pro poſſeſſore poſſidere, etiamſi pretium numerauerint, cap. 33. §. 1. vſurpat. cap. 55. de condict. indeb. cap. 28. de hæred. petit. cap. 5. de acq. poſſ. c. 13. de noxalib. actionib. Eſt & illud certum, eos qui bona fide hæreditatem poſſident, in id duntaxat Senatusconſulto teneri, in quo locupletiores facti ſunt, cap. 25. §. 8. de petit. hæred. Proinde ſi ſeruum iuſta ex cauſa manu-miſerint, non videntur eo nomine conueniri poſſe. Locupletior enim non eſt factus qui libertum acquiſiuit. *Meliorem etiam cauſam eſſe poſſidentis hæreditatem bona fide, cum de lucro duorum qui ſimul petunt hæreditatem, queritur, nemo eſt qui ex Neratio non indicet.* cap. 57. de petit. hæred.

CXXVII.

## CXXVII. PAVLVS LIB. XX.

## AD EDICTVM.

*Cum prator in heredem dat actionem quatenus ad eum peruenit, sufficit si vel momento ad eum peruenit ex dolo defuncti.*

QVI heredem restituere rogatus est, omnes transferre actiones solet, quæ iure civili heredi & in heredem comperunt; c. 40. ad S C. Trebel. Hereditatis enim restitutio non solutio est, sed successio; c. 38. d. tit. Et quia certum est post litem contestatam heredem teneri ex omnibus causis etiam pœnabilibus, quæsitum fuisse videtur an hæres restituere hereditatem iussus, ex dolo defuncti possit conueniri, & Paulus ad Edictum libro vigesimo respondisse post hereditatem restitutam eum non posse conueniri, quia exceptione hereditatis restitutæ adiuuatur: eumque rectè conueniri antequam restituatur hereditas; tunc enim exceptione aliqua adiuuandum non esse; c. 27. §. 6. ad S C. Trebel. Nec audiendum heredem, quod dicat exiguo tempore apud eum hereditatem fuisse, paratūque se restituere. Cum enim prætor in heredem dat actionem quatenus ad eum peruenit, sufficit si vel momento ad eum peruenit ex dolo defuncti. Per momentum spatium temporis perexiguum intelligit Paulus, eā certè ratione qua sic Liuius lib. 21. scripsit; *Non cunctandum tali occasione ratus Annibal totis viribus aggressus urbem, momento cepit.* Diuersa quoque diei cuiusque tempora momenta dici, testis est lib. 3. aduersus Marcionem Tertullianus, his verbis; *Constat ethnicis quoque testibus in Iudæa per dies quadraginta matutinis momentis ciuitatem de cælo pependisse.* Hæc ille, omnino demonstrans in momenta sic dies diuisos esse, vt certa

DE DIVERSIS REGVLIS IVRIS. 337  
certa vniuscuiusque diei matutina, meridiana, vespertina, momenta fuerint. Atque ita momentum videri possunt iurisconsulti accepisse; cap. 6. de vsurpat. cap. 3. §. 3. de minoribus, cap. 23. de acquir. rer. dom.

## CXXVIII. PAVLVS LIB. XIX.

### AD EDICTVM.

*In pari causa possessor potior haberi debet. Hi qui in vniuersum ius succedunt, heredis loco habentur.*

AIT Paulus ad Edictum libro nonodecimo in iudicium de seruo corrupto earum etiam rerum estimationem venire, quas seruus secum abstulit; nec interesse ad eum perlatum sint, qui corripit, an ad alium iustius enim esse eum teneri, qui princeps fuerit delicti, quam eum queri, ad quem res delatae sunt. Nam in pari causa possessorem huiusmodi potioorem haberi debere; cap. 10. de seruo cor. Certè propter bonam fidem qua res furtiua saepenumero possidentur; cap. 9. §. 2. de public. in rem act. Eodem libro scripsit Paulus, heredibus eius cuius seruus corruptus est, actionem competere serui corrupti; heredumque loco eos haberi, qui in vniuersum ius succedunt; cap. 8. de ser. cor. cap. 170. de verb. sig.

## CXXIX. PAVLVS LIB. XXI.

### AD EDICTVM.

*Nihil dolo creditor facit qui suum recipit. Cum principalis causa non consistit, nec ea quidem quae sequuntur locum habent.*

LEGE duodecim tabularum, inquit Vlpianus, prodigo interdicitur bonorum suorum administratio, & curator datur, exemplo furiosi; cap. 1. de curat. furiosi. Formula interdictionis hæc erat; QVANDO TV BONA  
Y PATER

PATERNA HABITAQVE NEQVITIA TVA  
DISPERDIS, LIBEROSQVE TVOS ADEGE-  
STATEM PERDVCS, OB EAM REM TIBI  
ÆRE COMMERCIOQVE INTERDICO; au-  
ctore Iulio Paulo Sentent. lib. 3. tit. 16. Hæc formula  
etiam Senecæ nota fuit, de benef. libro 4. cap. 16. Ait  
enim; *Puto nequam hominem existimas, cui pœna non cui  
curatore opus sit.* Idem Seneca sic etiam controuers. li-  
bro 4. scribit; *Serui quoque nomine tecum quari possum,  
quem, qui frugi fuerat, nequam fecisti.* Nec aliò spectat il-  
lud August. lib. 3. de doct. Christ. *Neque enim ullo mo-  
do quisquam sobrius crediderit domini pedes ita vnguento  
precioso à muliere perfusos, ut luxuriosorum & nequam ho-  
minum solent quorum talia conuiuia detestamur.* Et cùm  
antea apud Paulum nullo sensu legeretur HABITA  
QVÆ, id postea in HABITAQVE, id est, AVI-  
TAQVE, rectè mutatum fuit. Ita enim veteres locu-  
tos esse, testis etiam Hieronymus est sic ad Demetria-  
dē virginem scribens; *Et cùm incensis direptis omnibus  
in urbe captiuitas sit, nunc habitas venundare dicitur posses-  
siones.* Fuit autem huiusmodi interdictionis bonorum  
auctoritas tanta, vt si ab eo emas quem vetuit prator alie-  
nare, idque tu scias; *vsucapere non possis;* quemadmodum  
libro ad Edictum vigesimo primo scribit Paulus, cap.  
12. de vsurpat. Addiditque eodem loco diuersas ratio-  
nes duas, quarum vna est, *quòd alienationis verbo quo-  
dammodo vsucapio contineatur,* cap. 28. de verb. sig. alte-  
ra, *quòd alienatio principalis causa sit, & vsucapio inter  
ea numeretur, quæ sequuntur alienationem.* Si igitur non  
valeat alienatio rei, certè nec rei alienatæ valebit vsu-  
capio. *Cùm enim principalis causa non consistit, nec ea  
quæ sequuntur locum habent.* Et hæc quidem certissima  
sunt, si modò ab eo cui bonis interdictum est, credi-  
tæ pecuniæ restitutionem fieri non contigerit. Nam  
runc

tunc suum recipit creditor, etiam si non ignoret ei, qui nummos restituit mutuo datos, bonis interdictum esse, cap. 13. §. 1. cap. 14. & cap. 44. de condict. indeb. Nihil enim dolo creditor facit, qui suum recipit, cap. 9. §. 1. de condict. caus. dat. Atque ita quidem libro ad Edictum vigesimo primo scripsit Paulus; eo nihil obstante quod Vlpianus tradiderit *interdum personam locum facere repetitioni, ut puta si is cui bonis interdictum est, soluerit*, cap. 29. de condict. indeb. Id enim de eo intelligendum est, qui post interdictionem bonorum emit & soluit: quod certè facere non potuit, cum ei commercio interdictum sit.

## CXXX. VLPIANVS LIB. XVIII.

## AD EDICTVM.

*Nunquam actiones praesertim poenales de eadem re concurrentes alia aliam consumit.*

AD EDICTVM libro octauo decimo scripsit Vlpianus, *si seruus seruum alienum subripuerit & occiderit, furti & damni iniuria competere actionem*, capite vigesimo septimo ad leg. Aquil. Idem Vlpianus auctor est, *si quis ancillam alienam subripuerit & flagitauerit, serui corrupti agi posse, & furti*; cap. 2. §. 3. de priuat. delict. Qui enim flagitat ancillam, ipsa flagitatione eam corrumpit. Nam, ut Festus definit, *flagitare nihil aliud est, quam stuprare. Inter ceteros flagitatos, inquit Festus, dicebant antiqui, mares, qui stuprum passi aliquando essent.* Nonius etiam & Isidorus testes sunt, *flagitium veteres vitium quod virgini infertur appellasse.* Eoque sensu accipiendum est illud P. Africani apud Gellium libro septimo cap. 11. *Sed tu plus tertia parte pecuniae paterna perdidisti atque absumpsisti in flagitiis.* Quemadmodum igitur ancillae flagellatione serui corrupti, sic eiusdem

subreptione locus furti iudicio esse solet. Ait enim Tertullianus libro quarto aduersus Marcionem. *Nemo sua furatur aut suffodit, sed ille potius qui in aliena descendit, & hominem à domino eius alienat.* Nec aliò spectat Terentij illud in Eunuchò,

——— *Tun' me prohibeas*

*Meam ne tangam? C. prohibeo inquam. G. audin' tu? hic furti se alligat.*

Actio serui corrupti non consumit furti actionem, quemadmodum nec iniuriarum actio actionem legis Aquilia. Ait enim libro ad Edictum octauo-decimo Vlpianus, *actionibus legis Aquiliae & iniuriarum concurrentibus duas fieri estimationes, aliam damni, aliam contumeliae.* Nam generaliter post longas controuersias definitum esse, nunquam actiones praesertim poenales de eadem re concurrentes aliam consumere aliam, cap. 5. §. 1. ad leg. Aquil. cap. 60. de oblig. & act. cap. 34. d. tit. cap. de iniur. Eiusque definitionis hæc ab eodem Vlpiano prodita est ratio, *quod nunquam plura delicta concurrentia faciant, ut ullius impunitas detur: neque enim delictum, ob aliud delictum minuire poenam: eaque de causa eum qui hominem subripuit & occidit, quia subripuit furti, quia occidit, Aquilia teneri; neque alteram earum actionum alteram consumere;* capitulo secundo de priuat. delict. cap. 14. §. 1. de praescript. verbis, cap. 2. de tut. & rationib. distrah. cap. 1. vi bo. rapt. Quod ipsum à Quintiliano in ea Declamatione traditum est, qua de ignominio si pulsatore differit. *Dux enim sunt iniurie, inquit, in hoc tuo facto, & ideo dua poena.* Huiusmodi poenalibus iudiciis concurrentibus sic locus esse in foro solet, ut omnibus experiri necessum non foret, sed liceret actori quam voluerat actionem exercere, & quod amplius in aliis erat, hoc etiam officio iudicis exequi. Ita enim receptum fuisse, de actionibus concurrentibus libro singulari

singulari docuit Paul.d.cap.34. Et hoc nimirum illud est, quod sic etiam Modest. Regularum lib.3. scribit, *Plura delicta in una re plures admittunt actiones, sed non posse omnibus uti probatum est, c.53. de oblig. & act.* Nec aliò spectat quod ait Paulus, *si ex eodem facto due competant actiones iudicis partes esse, ut quo plus sit in reliqua actione, id actor ferat; si tantundem aut minus, id consequatur: c.41. de oblig. & act.* Sensus enim est, duabus ex vno facto concurrentibus pœnalibus actionibus, vnam eligere actorem debere, & si plus in reliqua actione est, quàm in electa, id eum officio iudicis ferre; sin minus aut tantundem, id eundem actorem actionis institutæ medio consequi. Et ita cum actione cõcurrit hac specie officium iudicis. Quod igitur Vlpianus hac regula scribit, pœnales actiones de eadem re concurrentes aliam per aliam non consumi, id omnino ad iudicis officium videtur referendum esse. Eò enim officio cessante, dubium non est, quin per exceptionem aut ipso iure altera consumat alteram; c.34. §.1. de oblig. & act. cap.13. in prin. de insti. act. cap.43. hoc tit. Sique famosa fuerit altera, & altera non famosa, præponendam esse famosam docuimus ad huius tit. cap. 104.

## CXXXI. PAVLVS LIB. XXII.

## AD E D I C T V M.

*Qui dolo desierit possidere, pro possidente damnatur, quia pro possessione dolus est.*

A D V E R S V S possessorem dari solet rei vindicatio; cap.7. de rei vind. Sed & is qui ante litem contestatam dolo desijt rem possidere, tenetur in rem actione; cap.27. §.2. d. tit. Dolus enim pro possessione est. In hæreditatis quidem petitione & rei vindicatione, senatusconsulti, in noxalibus verò iudiciis & interdictis

342 IAC. RÆVARD. TOM. I. COMM.  
iusta edicti prætoris interpretatione, cap. 13. §. 2. de  
hæred. petit. d. cap. 27. §. 2. cap. 12. & cap. 21. §. 2. de no-  
xalib. actionib. cap. 1. de tab. exhibend. Et idcirco *qui*  
*dolo desit possidere, pro possidente damnatur, non quidem*  
*directa, sed utili actione. Nam, ut ait Paulus, hæc actio*  
*in locum directæ actionis succedit, capite 26. §. 2. & 4. de*  
*noxalib. act.*

CXXXII. GAIUS LIB. VII. AD  
EDICTVM PROVINCIALE.

*Imperitia culpa adnumeratur.*

AUCTOR est ad Edictum prouinciale lib. 7. Caius,  
*medicum qui imperitiè secuit seruum, aut medicamento per-*  
*peram usus est culpa reum esse: imperitiam enim culpæ ad-*  
*numerari, cap. 8. ad leg. Aquil. cap. 9. §. locari.* Ex hoc  
loco ab hominibus eruditissimis probatum est, medi-  
cos olim chirurgos fuisse. Verius existimo dici posse  
omnes chirurgos medicos appellari, quàm medicos  
omnes chirurgos fuisse. Sic enim in fabulis scribit Hy-  
ginus Augusti libertus; *Chiron Centaurus Saturni filius*  
*artem medicinam chirurgicam ex herbis primus instituit;*  
*Apollo arte oculariam medicinam primus inuenit.* Est etiam  
inscriptio quædam vetus id liquidò demonstrans, his  
verbis; **CHRESTÆ CONSERVÆ ET CONIV-**  
**GI CELADVS ANTINOVS DRVSI MEDI-**  
**CVS CHIRVRG. BENEMERENTI FECIT.**  
Huic consentaneum est illud Hieronymi ad Onasum;  
*Medici quos vocant chirurgicos, crudeles putantur; & mi-*  
*seri sunt.* Atque ita medicum accepit etiam Ambro-  
sius, enarrans Psal. 37. his verbis; *Novit medicus qua sin-*  
*gulis vulneribus medicamenta conueniant, cuius ulceris pu-*  
*tredo ferro sit amputanda, ne in totius corporis serpat exitium.*  
Eodem loco addidit Caius *mulionem quoque qui per im-*  
*peritiam*



*peritiam impetu mularum retinere non potuit, culpa nomine teneri si illa hominem alienum obtrinerint; idemque iuris esse in persona eius, qui impetum equi, quo vehebatur propter imperitiam retinere non potuit; d. cap. 8. Est etiam Paulus auctor, eum culpa reum esse, cuius imperitia ignis in stipulam vel spinam comburenda eius causa immixtus, alienam segetem vel vineam laesit; cap. 30. §. 3. ad legem Aquil. Eoque pertinet quod ita Georg. lib. 1. Virgilius ait;*

*Sepe etiam steriles incendere profuit agros,*

*Atque leuem stipulam crepitantibus urere flammis.*

*Plinius libro decimo octauo cap. 30. Sunt qui accendunt in aruo & stipulas, magno Virgilij praconio.*

## CXXXIII. GAIVS LIB. VIII. AD

## EDICTVM PROVINCIALE.

*Melior conditio nostra per seruos fieri potest, deterior fieri non potest.*

Ex conuentionibus serui melior fieri potest conditio domini, non deterior; cap. 19. de fideiuss. cap. 62. de verborum obligat. cap. 32. de acquir. rer. domin. ex delictis deterior, non melior, cap. 21. in princ. & cap. 22. de noxal. act. cap. 1. §. 8. de vi & vi armata. Etiam si seruus mercenarius fuerit; cap. 5. §. 6. quod vi aut clam. Deteriorem dico conditionem non causam. Peiorem enim domini causam serui facere, nisi forte scierit dominus, omnino non possunt; auctore Paulo sent. lib. 5. tit. 12. in fine.

## CXXXIV. VLPIANVS LIB. I.

## AD EDICTVM.

*Non fraudantur creditores tum quid non acquirunt a debitore, sed cum quid de bonis deminuitur.*

EDICTVM de iis quae in fraudem creditorum facta sunt,

*sunt, ad deminuentes patrimonium suum perlinere ait Vlpianus, non autem ad eos qui id agunt ne locupletentur, c. 6. in princ. quæ in fraud. cred. Eoque Bulgarus, Placentinus, & Accursius hanc regulam rectè arbitrantur referendam esse. Ad edictum enim libro 21. cui hæc regula tribuitur, de eo disseruit Vlpianus, cui sub conditione legatum relictum est, cap. 42. de oblig. & act. Indèque intelligi facillè potest, si huiusmodi legatarium soluendo non esse contigerit, inuitum amplecti legatum non cogi; nec si repudiauerit, fraudari creditores. Suum enim patrimonium non deminuit, d. cap. 6. Nam, ut ait eodem libro Vlpianus, non fraudantur creditores cum quid non acquiritur à debitore, sed cum quid de bonis deminuitur.*

#### AD §. NEMO EX SVO.

*Nemo ex suo delicto meliorem suam conditionem facere potest.*

EXTAT Imperatoris Antonini constitutio, quæ prohibet iudici in publicis, priuatis, vel fiscalibus causis pecuniam dare, cap. 1. §. 2. de calumniat. Id autem fieri interdum solere, testis est libro 2. Epist. Cyprianus. Ait enim: *Quis inter hæc verò subueniat? patronus? sed præuaticatur, & decipit, index: sed sententiam vendit. Qui sedet crimina vindicaturus, admittit; & ut reus innocens pereat, fit nocens index.* Et paulò post; *Nullus de legibus metus est, de quasitore, de iudice paor nullus; quod potest redimi non timetur.* Est etiam Ambrosius sermone 7. auctor, usque adeò hoc inoleuisse malum, ut quasi ex consuetudine vendantur leges, corrumpantur iura, sententia ipsa venalis sit. Ideoque si constaret corruptum esse iudicem, litem perire voluit Antoninus, d. §. 2. Ita nimirum ut ea pars, quæ iudicem corrumpit, lite cadat; hoc

hoc est, interprete Festo, eius rei de qua agitur causam amittat, & iudex eam, quæ inter partes extincta est, litem suam faciat, in eam summam condemnandus, quæ religioni iudicantis æqua videbitur, c. 5 §. 4. de oblig. & act. c. ult. de extraord. cognit. Deque huiusmodi iudice differens ad Edictum. lib. 21. Vlpianus, *tunc iudicem litem suam facere ait, cum dolo malo in fraudem legis sententiam dixit, vel gratia, vel inimicitia, vel etiam sordibus. Nec interesse filiusne familias iudex sit, an verò paterfamilias. Neminem enim ex suo delicto meliorem suam conditionem facere posse*, cap. 5. de iudicijs.

## CXXXV. VLPIANVS LIB. XXIII.

## AD EDICTVM.

*Ea quæ dari impossibilia sunt, vel quæ in rerum natura non sunt, pro non adiectis habentur.*

**OBTINUIT** impossibiles conditiones testamento adscriptas pro nullis habendas esse, cap. 3. de condict. & demonst. Et idcirco sub impossibili conditione factam institutionem non vitari, cap. 1. de condict. Instit. Quia enim impossibiles in faciendo conditiones in non faciendo fieri possibiles possunt, cap. 7. de verb. obligat. certè institutionem sub impossibili conditione scriptam sic voluerunt prudentes valere, ut ei potius mendum subesse interpretarentur, quàm testatorem data opera, quod fieri non potest, fieri voluisse, d. c. 1. Veluti si sic concepta fuerit testamenti formula, **PVBLIVS SEMPRIVS, SI COELVM DIGITO TETIGERIT, HÆRES ESTO**; hanc conditionem ita interpretatur, quasi scriptum fuerit, **SI COELVM DIGITO NON TETIGERIT**. Cur autem huiusmodi interpretatio in contractibus recepta non fuerit, à Méciano elegans est ratio prodi-

Y 5

ta,

ta, c. 3. i. de oblig. & act. Eadem dicenda sunt, si quæ in rerum natura non sunt, dari voluerit testator; veluti Stichum qui mortuus est, aut Hypocentaurum qui esse non potest; §. 1. Instit. de inutilib. stipulat. cap. 30. §. de iureiurand. Eoque pertinet illud Senecæ Epistol. lib. 8. *In rerum natura quadam non sunt: & hæc autem quæ non sunt, rerum natura complectitur, quæ animo succurrunt, tanquam Centauri, Gigantes, & quicquid aliud falsa cogitatione formatum habere aliquam imaginem cœpit, quamvis non habeat substantiam.*

## CXXXVI. PAVLVS LIB. XVIII.

## AD EDICTVM.

*Bona fides tantundem possidenti præstat, quantum veritas, quoties lex impedimento non est.*

AQUA pluvia nocet vel opere facto vel natura; cap. 1. §. 2. de aqua & aqua pluuiarum. Nam, ut ait in † Topicis Cicero, genus est aqua pluvia nocens; eius generis forma duæ, loci vitio & manu nocens, quarum altera iubetur ab arbitrio coerceri, altera non. Quod ipsum ab Ulpiano quoque traditum est cap. 1. §. 12. d. tit. Est etiam Paulus auctor ad Edictum lib. 18. *cum cum quo aqua pluvie arcenda agitur, cogi iudicium accipere, ut opus tollat, quoniam suo nomine conuenitur; emptorem verò bonæ fidei, non quidem opus tollere, sed solam præstare patientiam cogendum esse aduersario diruere, cap. 7. & cap. 12. d. tit.* Et id quidem verum erat, si modò longo tempore opus factum emptor non possedisset bona fide. Quoties enim lex agro dicta impedimento non est, bona fides tantum longo tempore possidenti iuris in opere facto præstat, quantum ipsa veritas, hoc est, quantum verè, iustè, ac legitimè seruitus constituta, aut eius libertas acquisita pollet præstare, cap. 1. §. 17. & cap. ult. de

DE DIVERSIS REGVLIS IVRIS, 347  
de aqua & aqu. plu. arcend. cap. 10. si seruitus vindic. Et  
hoc nimirum illud est quod sibi hac regula Paulus  
voluit, ex eius libro ad Edictum 18. desumpta per le-  
gem, eam legem intelligens, quæ ab auctoribus diui-  
sionis agro dicta est, d. §. 17. Ait enim libro de condi-  
tionibus agrorum Sicut Flaccus, auctores diuisionis  
adsignationisque leges quasdam colonis describere solere, ut  
qui agri delubris sepulchrisve publicis, via, itineris, ætus,  
ambitus, ductusque aquarum priuatis & publicis utilitati-  
bus seruiert, in eadem conditione essent, qua antea fuerant.  
Deque huiusmodi legibus obseruauit rectissime Bris-  
sonius Vlpian. etiam sensisse, c. 8. ad legem Iul. pecul.

CXXXVII. VLPIANVS LIB. XXV.  
AD EDICTVM.

*Qui auctore iudice comparauit, bona fidei possessor est.*

IMPENSA funeris semper deducitur ex hæredi-  
tate, & omne creditum præcedit, cap. penult. de relig.  
& sumpt. fu. Funerisque haberi ratio tanta solet, ut mili-  
tem familiare funus excusaret, auctore Gellio; ut etiam  
in funus mortui serui necessaria impensa fierent, c. 13.  
§. 19. de act. empt. cap. 3. §. 1. de relig. Et idcirco disle-  
rens lib. ad Edictum 25. de sumptibus funerum Vl-  
pianus si nihil occurrat unde funeretur defunctus, ait ad  
res quoque legatas manum mitti oportere interueniente præ-  
tore, nec si postea hereditas fuerit adita, rem emptori ause-  
rendam esse; quia bona fidei possessor est & dominium ius-  
tum habet, qui auctore iudice comparauit, cap. 14. §. 1. de  
religios. Iuste enim possidet, qui auctore prætore possidet,  
cap. 11. de acquir. poss.

CXXXVIII.

*Omnis hæreditas quamvis postea adeatur, tamen cum tempore mortis continuatur.*

PRÆTEREA *pulla*, inquit Festus, *nulli alij licebat uti quam ei qui funus faciebat.* Funus autem eum facere oportebat cui funeris sui curam testator mandauerat, aut scriptos hæredes, aut si nullus scriptus esset legitimos vel cognatos, suo quosque ordine quo succedunt, cap. 12. §. 2. de relig. Qui funus facit, iusta non facit faciendo funus. Funus enim facere, iusta facere, & exequi funus diuersa sunt, cap. 2. in fin. & cap. 3. de in ius vocand. Nam qui funus indictum pompa funebri præcedente ducit, facit funus; qui sacrificio, quod *humanum* Festus appellat, ritè peracto, glebam obiiicit, iusta facit; & qui denique cadauer prosequuntur, eos exequi funus, exequiâsque frequentare, dixerunt veteres. Moris enim erat, ut mortui aut populari sandapila exportarentur, aut pompa funebri ducerentur. Nam tempore vespertino eos efferri sole-  
re ait Festus, qui funebri pompa duci propter inopiâ nequibant. Eoque pertinet quod ait Suetonius *Domitiani cadauer populari sandapila per vespilliones exportatum fuisse.* Nec aliò videtur Vlpianus respexisse, cum scriberet sumptus funeris à magistratu decernendos esse pro facultatibus, vel dignitate defuncti; sumptum funeris causa eum demum videri factum, sine quo funus duci non possit, cap. 12. §. 3. & cap. 14 §. 3. & 5. de religiosis. Qui funus faciebat, funus ducebat, d. cap. 14. §. 2. Qui autem funus sequebantur, exequi funus, exequiâsque frequentare dicebantur. Sic enim de Flamine Diali scripsit lib. 10. cap. 15. Gellius; *Mortuum nunquam*

nunquam attingit, funus tamen exequi non est religio. Sic etiam Suetonius de Tiberio; *Quorundam illustrium exequias usque ad rogam frequentant.* Et Donatus, *Funus, inquit, est pompa exequiarum.* Denique, qui in sepulchrum obicit glebam eum iusta facere Varro & Festus aiunt, porca presentanea familia purganda causa Cereri immolata. Hinc intelligimus quænam sit huius regulæ sententia vera. Differens enim ad Edictum libro vigesimo septimo Paulus de sumptibus funerum, *impensam funeris semper deduci scripsit ex hereditate, etiam legaris & pretiis manumissorum non deductis, cap. 25. & cap. penult.* Addiditque *necessum non esse ut hereditas adita sit.* Omnem enim hereditatem, licet postea adeatur, cum mortis tempore continuari; atque ita fieri, ut quæ mortis tempore ad executionem deductionemque funeris necessaria sunt, rectè ex hereditate etiam non adita deducantur. Nam, ut ait libro nono Epist. Ambrosius, ubi testamentum, ibi hereditas. Quod ipsum satis liquido demonstrat etiam Vlpianus, cap. 1. §. 4. de iniuriis. Sanè cum tempore mortis continuari hereditatem adeò verum est, ut scripserit expressè Caius, *eum qui postea heres extitit, ex mortis tempore successisse defuncto hac ratione videri, quod eius familia ex tempore mortis funesta facta intelligatur, licet post aliquod tempus heres extiterit, cap. 28. de stipul. seruior.* Nec ante desinebat esse funesta, quam iusta defuncto fecisset hæres. Tamdiu enim, auctore de lingua Latina li. quarto Varrone, familia funesta manebat & humilior dicebatur. Ait etiam Nonius Varro de vita pop. Rom. lib. 3. sic scripsisse; *Quod humatus non sit, heredi porca præcidanea suscipienda Telluri & Cereri, aliter familia pura non est.* Hanc porcam Gellius, Festus, & Varro præcidaneam vocant, dissentiente Victorino, qui eam appellari præcidariam vult, non præcidaneam, de orthographia differens. Fuisse quo-

*que porcam aliam qua in re & in praesente mortuo immolabatur, testis est idem Victorinus, eamque praesentaneam appellat. De qua porca dubium non est quin senserit Festus cum sic scriberet; Praes..... porca dicitur, &c. Ita enim ex eodem Victorini de orthographia libro, restituendus est hic Festi locus; Praesentanea porca dicitur, ut ait Veranius, qua familia purganda causa Cereri immolatur. Nec dubito quin ea restitutio verissima sit, & ad huius regulae veram sententiam accommodatissima.*

### AD §. NVNQVAM.

*Nunquam crescit ex postfacto praeteriti delicti aestimatio.*

NON de sumptibus funerum duntaxat, sed etiam de sepulchro violato scripsit libro ad Edictum vigesimo septimo Iulius Paulus, cap. 27. de iniurijs, cap. 4. de sepulch. violato. Et quia sepulchri violati actio alia pecuniaria est, alia capitalis, cap. 9. cap. 1 i. d. tit. dubitatum certe fuisse videtur, an is qui actione pecuniaria ob modicam sepulchri violationem conuentus est, postea corrumpente integro monumento, possit capitali iudicio conveniri, quasi ruinae causam dederit; & Paulus respondisse, id nullo modo fieri posse, *nunquam enim ex postfacto crescere praeteriti delicti aestimationem.* Videlicet ea ratione, qua scripsit idem Paulus, *si vulneratus fuerit servus non mortiferè, negligentia autem perierit, de vulnerato actionem esse, non de occiso.* cap. 30. in fi. ad leg. Aquil.

### CXXXIX. GAIUS LIB. AD EDICTVM PRÆTORIS VRBANI.

*Omnes actiones qua morte aut tempore perierint, semel inclusa iudicio salua permanent.*

LITIS



LITIS enim cōtestatione pœnales actiones transmittuntur, & temporales perpetuantur, c. vlt. in fin. de fideiuss. tut. Per actiones temporales honorariæ intelliguntur actiones. Illæ enim post annum aliter dari non solent, quàm si rei persecutionem haberent, cap. 22. in fin. de lib. causa. cap. 35. de oblig. & act. aut sine rei persecutione, inclusa semel iudicio forent, cap. 5. de publicanis. Est etiam Vlpianus auctor, *omnes pœnales actiones post litem inchoatam ad hæredes transire*, c. 26. de obl. & act. Eaque de re sapius iam dictum est.

## AD §. NON VIDETVR.

*Non videtur perfectè cuiusque id esse, quod ex casu auferri potest.*

HANC regulam arbitror desumptam esse ex Caij ad Edictum prætoris vrbanì commentario de libera-  
li causa. Docet enim in eo commentario Caius, interdum patrono licere pro libertate liberti litigare, interdum non licere. Licere quidem, si patrono ignorante libertus venire se passus est; non licere, si id ipsū sciēte patrono factum fuerit, cap. 4. de lib. caus. Auctor est Quintilianus libro septimo cap. 8. *in patroni manu libertum esse*: eaque ratione patronis munus, operas, & testamentum deberi alio loco demonstratum est. Quod ipsum sensisse videtur Vlpianus, cū scriberet *interesse nostra, libertos libertasque habere*, cap. 5. d. tit. Atque ita quidem patronorum esse liberti solent, quia in eorum manu sunt; non tamen perfectè, quia ex casu eis auferri & eripi possunt. *Non enim perfectè videtur cuiusque id esse, quod ex casu auferri potest.* Casus est, si non ignorante patrono libertus venditari se passus fuerit. Tunc enim in manu esse patroni desinit, & seruus efficitur.

## CXL. VLPIANVS LIB. LVI.

## AD EDICTVM.

*Absentia eius qui reipublica causa abest, neque ei neque alij damnosa esse debet.*

SENATORIBVS equitibusque Romanis Italiam excedere aliter non erat liberum, quam si facultatem excedendi impetrassent. Proinde qui proficisci volebant, olim quidem senatum, postea verò principem adibant, & exposita peregrinationis causa iusta, commeatum impetrabant, cap. 2. in fi. & capit. 22. §. penult. ad municipal. cap. 15. C. de dignit. Idque illud est quod ait Suetonius, *commeatus à senatu peti solitos, sui beneficij Claudium fecisse*. Plinius Traiano; *Deinde ut hoc facere quàm maturissimè possim, indulge commeatum*. Est etiam in eodem Claudio Suetonius auctor, *maiorum temporibus Rabirio Postumo equiti Romano sine commeatu Ptolemaum Alexandriam crediti seruandi causa* † *securo crimen maiestatis apud indices motum fuisse*. Et Cicero Epist. fam. lib. 9. *Cùm in his angustiis versarer, inquit, placitum est ut postularem legationem liberam mihi reliquisque nostris, ut aliqua causa proficiscendi honesta quaereretur*. Senecam quoque sapius à Nerone commeatum petuisse, bonisque cedere voluisse Suetonius testis est. Inter alias quibus decernebatur commeatus causas iustas, reipublice causa longè iustissima fuit. Cùm enim lib. 43. scriberet Liuius, *edicto senatores ex tota Italia Romam esse renocatos, eos dumtaxat exceptos fuisse addidit, qui reipublica causa abessent*. Certè quod soli illi reipublice causa intelligantur abesse, qui non sui commodi causa, sed coacti absunt; capit. 36. ex quib. caus. maio. Et idcirco mirum non est, absentiam eius qui reipublice causa abest, ei damnosam esse non debere, nec etiam alij,

aliij, cap. 6. de sepulch. si modò verè scripserit Africanus, *publicum officium non debere vel damno vel compendio cuiquam esse*, cap. 29. ex quibus caus. maior. Quod autem Modestinus ait, *abesse reipublica causa intelligi & eum qui ab vrbe profectus est, licet nondum prouinciam exceßerit, & eum qui exceßerit, donec in urbem reuertatur*, cap. 32. d. tit. id audio quibusdam vitiosum videri, pro exceßerit, legendum *acceßerit*, existimantibus. Sed frustra. Sensus enim est, nullam sine comœatu iniungi solere reipublicæ causa legationem, & tamdiu aliquem abesse reipublicæ causa, ac per consequens habere comœatum intelligi, donec ab vrbe profectus, rursus in urbem rediit. Nam, vt ait Festus, *dari comœatus dicitur cùm tempus datur, quo quis ire debeat, & redire*. Atque ita duo tempora sub se continet comœatus, vnum eundi, donec absens reipublicæ causa legatione functus exceßerit prouinciam, alterum redeundi, donec prouinciam excedens, in urbem fuerit reuersus; deque huiusmodi temporibus sentire videtur Modestinus, d. cap. 32. Vt enim non sine comœatu ab vrbe proficisci, sic nec ad urbem redeuntes poterant præsidēs prouinciam excedere sine comœatu; quemadmodum expresse docet Suetonius, cùm ait, *diuum Claudium ad quoddam spectaculum comœare in urbem non solum præsidibus prouinciarum permisisse, verum etiam exulibus quibusdam*.

## CXLI. PAVLVS LIB. LIV.

## AD EDICTVM.

*Quòd contra rationem iuris receptum est, non est producendum ad consequentia.*

DE hac regula scripsimus ad huius tituli caput primum,

Z.

A D

## AD §. VNI DVO.

*Vni duo pro solido heredes esse non possunt.*

NON enim dominium esse apud duos pro solido potest, cap. 19. §. 2. de castrensi pec. nec plures eandem rem possunt in solidum possidere, *Contra naturam* quippe est, *ut cum ego aliquid teneam, tu quoque id tenere videaris*, quemadmodum docet eleganter, & latissimè Paulus, libro ad Edictum quinquagesimo quarto, ex quo hæc regula sumpta est, cap. 2. §. 4. de acq. poss.

## CXLII. PAVLVS LIB. LVI.

## AD EDICTVM.

*Qui tacet, non vtiq̃ue fatetur, sed tamen verum est eum non negare.*

ARBITER dari solet aut æstimandæ liti aut iudicandæ, cap. 25. §. 2. & cap. 26. ad leg. Aquil. Eoque pertinent hæc veteres notæ, A. L. E. quas ita interpretatus est Valerius Probus, ARBITRIVM LITIS ESTIMANDÆ, vel, ARBITRIVM LITI ESTIMANDÆ. In actione quæ aduersus confitentem datur, iudex non rei iudicandæ, sed æstimandæ datur. Nam nullæ partes sunt iudicandi in confitentes, d. cap. 25, cap. 6. §. 1. de confess. Siquidem, ut Paulus ait libro ad Edictum quinquagesimo sexto, *confessus pro iudicato est*, cap. 1. d. tit. Eodem libro tractatum à Paulo fuit, an is qui tacet habeatur pro confesso. Et certum quidem est, tacentem haberi interdum pro confesso: quod tunc fieri maximè solet, cum in iure ab aduersario interrogatur, ne prætor videatur contemni, cap. 10. §. 3. de interrog. Eoque referri poterit illud Donati in Terentium; *Taciturnitas confessionis genus est, contra aduersarij*

DE DIVERSIS REGVLIS IVRIS. 355  
*uersarij interrogationem. Aliud erat si aduersarius non  
teneretur respondere. Tunc enim qui tacet neque fa-  
teri intelligitur, neque etiam negare, cap. 2. de except.  
Id quod Valerius satis indicat, de M. Claudij Marcelli  
filio sic lib. 6. scribens; Constat iuuenem productum in Ro-  
stra defixo in terram vultu perscueranter iacuisse, verecun-  
doque silentio plurimum in ultionem suam valuisse. Cate-  
rum de eius qui tacet consensu pro tractatus cuiusque  
diuersitate, variè à prudentibus responsum est, nec vl-  
lam habet ea res difficultatem.*

CXLIII. VLPIANVS LIB. LXII.

AD EDICTVM.

*Quod ipsis qui contraxerunt obstat, & successoribus eo-  
rum obstabit.*

NON enim debet quis melioris esse conditionis,  
quàm auctor eius, à quo ius in eum transijt. Et ideo  
æquissimum visum est ei, qui ex persona auctoris uti-  
tur accessione, pati dolum auctoris, capite 4. §. 24. de  
doli except. Qua de re differens libro ad Edictum  
sexagesimo secundo Vlpianus *dolum auctoris eum etiam  
esse ait, si debitor in fraudem alicuius creditoris, id persequi  
aut soluere noluerit, quod persequi & soluere potuit; eumque  
dolum successoribus quoque obstat. Quod enim ipsis qui con-  
traxerunt obstat, id eorum etiam successoribus obstat, capit.  
44. mandati. cap. 3. quæ in fraud. credit.*

CXLIV. PAVLVS LIB. LXII.

AD EDICTVM.

*Non omne quod licet, honestum est. In stipulationibus id  
tempus spectatur, quo contrahimus.*

AD Oceanum sic scribit Hieronymus; *Alie sunt  
leges Cæsaris, alie Christi; aliud Papinianus, aliud Paulus*

Z 2 *noster*

*noster precipit. Apud illos viri impudicitia fræna laxantur, & solo stupro atque adulterio damnato, passim per lupanaria & ancillulas, libido permittitur, quasi culpam dignitas faciat non voluntas. Hæc Hieronymus, demonstrans euidenter non omne quod licet honestum esse. Licere enim fornicari, cum nihil fornicatione sit inhonestius. Quade re differit etiam de prouidentia Dei libro quarto Saluianus. De tempore quod in stipulationibus spectari solet, scripsimus ad huius tituli caput decimum octauum.*

## CXLV. VLP IANVS LIB. LXVI.

## AD E D I C T V M.

*Nemo videtur fraudare eos qui sciunt & consentiunt.*

NON videtur celatus qui scit, neque certiorari debet, qui non ignorat, cap. 1. in fin. de act. empt. Et idcirco qui consentientibus creditoribus aliquid à fraudatore vel emit vel stipulatus est, non videtur in fraudem creditorum fecisse. Nemo enim videtur fraudare eos, qui sciunt & consentiunt, cap. 6. §. 5. quæ in fraud. credit. Quod ipsum etiam locum habet in ediliiciis actionibus, cap. 48. §. 2. & 3. de edilic. edict. cap. 4. §. 5. de except. dol. mali. Nec alia ratio est cur scripserit Pomponius, *simplariarum venditionum causa ne sit redhibita in usu esse*, d. cap. 48. §. fin. Res enim poculentæ & esculentæ nulla ferè continent latentia vitia; easque res *simplarias* appellari ex libello Fulgentij de prisco sermone suspicari licet. In eo enim sic scriptum est; *Simplones dicuntur conuiuia; nam & amicus sponsi; qui cum eo per conuiuia ambulat, simplator dicitur*. Hæc Fulgentius tam simplaria, quàm simplatores à simplonibus posse derivari, non obscure demonstrans.

CXLVI.

## CXLVI. PAVLVS LIB. LXII.

AD EDICTVM.

*Quod quis dum seruus est egit, proficere libero facto non potest.*

IN stipulationibus id tempus spectamus quo contrahimus, cap. 78. de verb. obligat. Et idcirco si tempore seruitutis sub conditione stipulatus fuerit seruus, & eum ante conditionis euentum contigerit manumitti, non seruo, sed domino commodum stipulationis acquisitum censebitur. Nam quod quis egit dum seruus est, ita protinus acquiritur domino, vt seruo libero facto proficere illud nullo modo possit. Et hæc quidem vera est regulæ huius sententiâ, ex Pauli ad Edictum lib. 62. desumptæ. Nam in eo libro hac de re tractatum à Paulo fuisse ex inscriptione d. c. 78. omnino constat. Eaque res latius ad huius tituli, cap. 18. à nobis exposita est.

## CXLVII. GAIVS LIB. XXIV. AD

EDICTVM PROVINCIALE.

*Semper specialia generalibus insunt.*

CAIVS ad Edictum prouinciale lib. 24. de bonis differens auctoritate iudicis possidendis, ideo, ait ΑΝΑΓΡΑΦΗΝ singulorum instrumentorum fieri posse, quod liceat creditoribus vniuersorum bonorum descriptionem facere. Semper enim specialia generalibus inesse, cap. 15. de bon. auct. iudic. possid. cap. 6. de aliment. legat.

## CXLVIII. PAVLVS LIB. XVI.

BREVIS EDICTI.

*Cuius effectus omnibus prodest, eius & partes ad omnes pertinent.*

Z ;

SOLET

SOLET debitor qui soluendo non erat, aut bonis cedere, aut foro. Bonis autem cedebatur, non in iure tantum, sed etiam extra ius per nuntium & per epistolam; cap. ult. de cess. bon. Erat enim moris ut rei qui soluendo non essent, legis Iuliæ de bonis cedendis beneficium implorarent, eoque impetrato omnibus suis bonis, æs alienum in iure professi, creditoribus cederent, bonorum, siue (ut est apud Varronem) *bonam copiam* eiurantes, cap. 4. C. qui bon. cedere poss. Eoq; pertinet illud Senecæ de benefic. lib. 6. Si quis patriæ meæ pecuniam credat, non dicam me illius debitorem, nec ex hoc æs alienum profitebor aut candidatus, aut reus. Et tunc quidem observari etiam solet, ut creditores solo venditionis bonorum remedio, indemnitati suæ consularent. Siquidem bona diuidere non poterant propria auctoritate, nec etiam iure dominiæ detinere, d. cap. 4. Extra ius bonis ad eum modum cedebatur quem sic Apolog. 2. descripsit Apuleius; *Pater eius pluribus creditoribus desceneratus maluit retinere pecuniam quam pudorem. Nam cum undiq; versum tabulis flagitaretur, & quasi insanus ab hominibus obuiis teneretur, Flax, inquit, negat se posse dissolvere annulos aureos, & omnia dignitatis insignia abijcit, cum creditoribus depaciscitur.* Hæc Apuleius, satis indicans in omni bonorum cessione *verbum*, hoc est, nudam voluntatis professionem sufficere. Quod ipsum Philippus etiam & Theodosius Imperatores, iurisconsultum Marcianum secuti, tradiderunt, cap. 1. & cap. ult. C. d. tit. cap. ult. D. de cess. bon. Frustra igitur hanc clausulam, *scrupulositate priorum legum explosa*, responsio Theodosij adiecit Tribonianus aliquid novi iuris introduxisse cum Theodosio Philippum falso persuasus. Nec dubium est quin clausula illa Triboniani sit. Eam enim abesse à Theodosiano codice norunt omnes. Ceterum foro cedere debitores



debitores dicuntur qui solum vertunt, qui iudicio prouocari latitant, qui ne per procuratorem quidem ad ius fori respondent. Et huiusmodi quidem debitorum *bona*, si tertio edicto, aut vno pro tribus dato, ad sui defensionem non excitarentur, non possidebantur solum, sed etiam vendi à creditoribus poterant, cap. 1. §. si nemo. quod cuiuscunque vniuersi. no. cap. 7. quib. ex caus. in poss. eat. *Possidebantur quidem dies triginta, vendebantur verò post trigesimum diem*, quemadmodum pro P. Quintio docet Cicero. Si modò cum creditoribus intra dies illos triginta debitores cuiusve successores de certa portione non essent pacti. Solet enim maiore creditorum parte consentiente à pratore decretum nonnunquam interponi, vt certam creditores singuli portionem farent. cap. 5. §. 1. mand. cap. 7. §. fin. & cap. 8. de pactis. Seneca de benefic. lib. 4. cap. 39. Appellare debitorem ad diem possum, & si foro cesserit portionem feram. In bonorum venditionibus illud esse in vsu solet, vt aut sector admitteretur, aut magister constitueretur, Sector admittebatur, si creditores parari essent partem ex bonis, licet ab extraneo consequi, c. 60. de pactis. cap. 6. de bon. auct. iud. possid. Tunc enim ita diuidendi bona solent, vt de certis portionibus cum creditoribus singulis decideret emptor, datis auctore Theophilo fideiussoribus idoneis. *Sectores* autem huiusmodi emptores appellari, testis euidentissimus est Asconius Pedianus. Deque huiusmodi emptionibus arbitror accipiendum esse Iustiniani titulum, DE SVCCESIONIBVS SVBLATIS QVÆ FIYNT PER BONORVM VENDITIONES. Nam si Theophilo credimus, *bona debitoris addicebantur emptori decreto pratoris eaque additione, sic debitori succedebat emptor iure pratorio, vt actiones omnes debitori, & aduersus debitorem competentes, ad emptorem*

*transferrentur.* Aliud erat si ex bonis rei non dubitarent singuli creditores solidum consequi. Tunc enim ex creditoribus uni, quem maior pars elegerat, ne corrumpenter rationes negotium dari solet, addita rerum omnium venditarum diligenti cura capite fin. de curat. bon. dand. cap. 15. de bon. auct. iud. possid. cap. 9. de curat. fur. Eumque magistrum appellari testatur  
 † Cicero ad Atticum lib. 1. Ait enim; *Vna agebant ceteri creditores, in quibus erat Lucullus, & P. Scipio, & is quem putabant magistrum fore, si bona venirent, L. Ponnus.* Hæc cum ita se habeant, nunc intelligimus quid hac regula voluerit Paulus. Certum enim est, eius qui bonis vel foro cessit, creditores non esse omnes unius eiusdemque conditionis. Nam alij re & effectu creditores sunt, alij effectu solo, non re. Re & effectu creditores sunt qui aliqua exceptione perpetua nequeunt submoueri; effectu autem solo, quibus nondum competit actio, cuiusmodi sunt conditionales creditores, capite 54. & capite 55. de verborum significatione. Atque ita effectum accipi in prudentum responsis nouum non est, capite 5. §. 1. quod cum eo. cap. 1. §. 12. vt legat. no. capite 14. in fine commun. diuid. Deque huiusmodi effectu sensit hac regula Paulus ex eius Breuis edicti libro 16. desumpta. In eo enim libro de rebus auctoritate iudicis possidendis, & magistris faciendis Paulum disseruisse, constat ex epigraphe cap. 26. de rebus auctorit. iudic. poss. & cap. 55. de verb. signific. Et idcirco ea videri potest huius regulæ esse sententia, quasi contenderit Paulus creditores conditionales cum aliis creditoribus concurrentis effectum omnibus alijs prodesse posse. Nam si euauerit conditio, partes, huius creditoris aliorum augentur portiones. Et ita cuius effectus omnibus prodest creditoribus, eius quoque partes siue portiones, ad omnes creditores pertinent,

tinent, eorúmque portionibus aut accrescunt, aut etiam detrahuntur: accrescunt quidem, euanescente conditione; detrahuntur verò, si euentum sortita conditio fuerit.

## CXLIX. PAVLVS LIB. LXVII.

## AD EDICTVM.

*Ex qua persona quis lucrum capit, eius factum præstare debet.*

QVOD filius peculiari nomine apprehenderit, id statim pater eius possidet, cap. 4. de acquirend. poss. Quod seruus acquirit, id etiam acquiri domino nemo dubitat. Et cum natura æquum sit eum qui commodum sentit, incommodi etiam participem fieri, quid mirum & filij patrem, & dominum serui factum præstare? cap. 1. quod cum eo cap. 27. in princip. de pecul. cap. 1. §. 8. de vi & vi armata. Nec refert proprius ne seruus an mercenarius sit de cuius facto præstando agitur. Ait enim Vlpianus, *si tuum seruum mercenarium habuero, quicquid ab eo factum fuerit meo nomine, ob id non tecum, sed tecum interdicto quod vi aut clam agendum esse*, cap. 5. §. 6. quod vi aut clam, cap. 1. §. 10. de vi & vi armata. Nam, ut ait pro Cecinna Cicero, *si tuus seruus nullus fuerit, & omnes alieni ac mercenarij; tamen & ipsi tua familia & genere & nomine continebuntur*. Seneca de benefic. libro 7. *Nec conductum meum quanquam sis dominus intrabis, nec seruum tuum mercenarium meum abduces*. Idque ad eum morem omnino pertinet cuius ita meminit lib. 6. de prouidentia Dei Saluianus; *Illorum more dominorum nobiscum agitur, qui mancipia obsequiis suis non necessaria, mercedibus promerendis locant*. Eiusque moris meminerunt sapissimè Iurisconsulti, cap. 18. §. 3. cap. 19. §. fin. & cap. 20. de instrum.

362 IAC. RÆVARD. TOM. I. COMM.  
 & instruct. legat. cap. 73. §. 1. de legat. 3. cap. 11. §. 1. de  
 pænis. Solent etiam operarum seruilium huiusmo-  
 di locationes, aliarum locationum exemplo, in quin-  
 quennium plerumque fieri cap. 49. de act. emption.  
 cap. 18. §. 3. de stipulat. seruor. Annisquæ singulis an-  
 nuæ exoluebantur dominis mercedes, cap. 19. in fin.  
 de instrum. & instruct. legat. cap. 25. §. 2. & cap. 26. de  
 usufruct.

## CL. VLPPIANVS LIB. LXVIII.

### AD EDICTVM.

*Parem esse conditionem oportet eius, qui quid possideat  
 vel habeat, atque eius cuius dolo factum sit quominus possi-  
 deret, ut haberet.*

HÆC regula desumpta est ex c. 2. §. 26. ne quid in  
 loco publ. cuiusque ratio redditur huius tit. c. 131. Nec  
 aliò spectat quod Caius ait, eum videri facere quominus  
 facere possit, qui erogat bona sua in fraudem future actionis,  
 idque ex interdictis colligi, in quibus ita est; QVOD  
 DOLO FECISTI VT DESINERES POSSI-  
 DERE; c. 68. pro socio. Quid autem hac regula sit  
 possidere vel habere, explicat Vlpianus, d. c. 2. §. 23. A  
 quo videtur dissentire Cornelius Fronto.

## CLI. PAVLVS LIB. LXIV.

### AD EDICTVM.

*Nemo damnum facit, nisi qui id fecit, quod facere ius  
 non habet.*

IN interdicto NE QVID IN LOCO PV-  
 BLICO, his quoque verbis solet uti prætor; QVA  
 EX RE QVID ILLI DAMNI DETVR, c. 2. in  
 princ. ne. quid in loco publ. Eaque verba interpre-  
 tans

DE DIVERSIS REGVLIS IVRIS. 363  
tans Paulus ad Edictum lib. 64. *neminem damnum facere scripsit, nisi eum qui id fecit quod facere ius non habet. Et ideo damnum eum pari, auctor est Vlpianus, qui commodum amittit quod ex publico consequebatur, eoque nomine eum qui damnum fecit interdicto teneri, nisi tacendi ius principali auctoritate consecutus esset, cap. 2. §. 7. & 10. ne quid in loco publico.*

## CLII. VLPIANVS LIB. LXIX.

### AD EDICTVM.

*Hoc iure vitimur, ut quicquid omnino per vim fiat, aut in vis publica, aut in vis priuata crimen incidat. Deicit & qui mandat. In maleficio ratihabito mandato comparatur. In contractibus quibus doli praestatio vel bona fides inest, haeres in solidum tenetur.*

LEX Iulia publicorum coniuncta fuit cum lege Iulia maiestatis, & in publicas duntaxat personas ferebatur, auctore Paulo sentent. lib. 5. tit. 26. indeque publicorum dicebatur, cap. 32. de poenis, cap. 1. in princ. de vi & vi armata, & sine aliqua prouocatione delinquentes aquae & ignis interdictione coëicebat, quemadmodum refert Philipp. 1. his verbis Cicerō? *Quid? quod obrogatur legibus Caesaris, qua iubenti ei qui de vi. itemque ei qui maiestatis damnatus sit aqua & igni interdici? quibus cum prouocatio datur, nonne acta Caesaris rescinduntur?* Priuatorum autem hominum armatorum furorem, inermiumque seditiones, coetus & concursus, alia lege repressit Caesar, quae lex Iulia priuatorum dicebatur, d. tit. 26. & d. cap. 32. Et quia legis Ploriae de vi apud Ciceronem mentio fit epistol. familiar. lib. 8. facile suspicor his duabus Iulijs rogationibus, eam legem sublatam fuisse. Eoque etiam spectat illa publicae vis & priuatae definitio, quam tradidit Etym. lib. 5. tit. 26.  
Isidorus.

Isidorus. Et hæc quidem sic in usu fuerunt antè legem regiam. Cum enim lege regia desisset esse ad populum prouocatio, desissent etiam à populo magistratus creari & coërceri, lex illa Iulia publicorum cum lege Iulia ambitus in vrbe tandem cessabat; cap. vnic. de lege Iul. ambit. Solent veteres legem aliquam cessantem aut ad desuetudinem inclinantem sic interdum retractare, ut quæ post eam latam nouis legibus alijs aut constitutionibus fuerant definita, ei in retractando per saturas adijcerentur, eiusdem legis nomine retento. Est enim Festus auctor *legem vniuersis alijs legibus confertam, saturam dici, & in sanctione legum adscribi.* NEVE PER SATVRAM ABROGATO AUT DEROGATO. Ait etiam Suetonius, *leges quasdam Augustum retractasse, quasdam ex integro sanxisse, capiti legis Papia Popæ à Tiberio Casare quasi sexagenarij generare non possent, addito, D. Claudium obrogasse.* Et idcirco mirum non est vim armatam ad legem Iuliam de vi publica prudentes retulisse, quam sub priuatorum lege Cæsar expressè voluit comprehendere, cap. 3. 4. 5. & 10. ad leg. Iul. de vi publ. Non enim dubium est, quin publicorum & priuatorum leges Iuliæ, sic fuerint aliquando retractatæ, ut vix nomen integrum retinuerint. Nam quæ leges Iuliæ publicorum priuatorumque genere quodam ab initio dicebantur, postea specie quadam circumscribi, & appellari leges de vi publica & priuata cœperunt. Hisque legibus tenebantur qui vim fecerant. Nam, ut ait hac regula Paulus, *hoc iure utimur, ut quicquid omnino per vim fiat, aut in vis publica aut in vis priuata crimen incidat. Diciturque vis publica, quod exemplo publicorum iudiciorum, huiusmodi violentiæ executio cuius ex populo concederetur; priuata verò, quod executio eius laeso cuique propria esset & peculiaris, §. 1. Institut. de public. iudic. Per executionem*

curionem persecutionem intelliges. Sic *publicam actionem* interpretatur *eam actionem* Vlpianus, *qua omnibus patet*, cap. 1. §. 4. de susp. tut. Sic *libertas* dicitur *publica res*, c. 3. in princ. de fideicom. libert. *Publicam enim tutelam meretur libertas*, cap. 2. ne de statu defunct. Et idcirco tam hi plurimum errant qui vim omnem publicam, esse armatam contendunt; quam illi, qui vim armatam idcirco publicam dicunt appellari, quod arma essent publica, & publicè in armamentarijs custodirentur. Quasi verò stuprum inferre vis publica non sit, c. 29. in fin. ad leg. Iul. de adulter. c. 3. ad leg. Iul. de vi public. Quasi fustes & lapides & armorum appellatione Iurisconsulti de vi publica differentes, non comprehenderint; cap. 3. §. 2. de vi & vi armat. cap. pen. ad l. Iul. de vi publ. Qui vi deiectus est, interdicto solet vnde deiectus est restitui. Atque ita non criminaliter solum, sed etiam ciuilitè conueniebatur qui vim fecerat; criminaliter quidem, legibus Iulij; ciuilitè verò, interdicto, c. 1. in princ. de vi & vi armat. c. 3. 2. de pœnis. Moris enim erat, vt si quis vi deiectus esset, ita interdiceret prætor, **V N D E T V I L L V M V I D E I E C I S T I, R E S T I T V A S;** d. cap. 1. in princ. Et quia dupliciter homines deijciuntur, aut sine coactis armatisve hominibus, aut per huiusmodi rationem & viam, idcirco contendis pro Cecinna Cicero, ad duas res dissimiles duo deuincta esse interdicta; unum de vi quotidiana, alterum de vi armata. De quibus dubium non est quin senserit etiam Paulus cum scriberet possessionis recipiende causa sub rubrica **V N D E V I,** interdicta proponi, c. 2. in fine, de interdict. Deque huiusmodi interdictis libro ad Edictum sexagesimo nono disseruit latissimè Vlpian. cap. 1. & cap. 3. de vi & vi armat. Addiditque, Cum procurator armatus venit, ipsum dominum armis deiecisse videri, siue mandauit, siue ratum habuit. Deicere enim enim

366 IAC. RAVARD. TOM. I. COMM.  
*cum qui mandat; rectiusque secundum Sabinum & Cassium  
 dici in maleficio ratihabitionem mandato comparari, d. c. 1.  
 §. 7. & d. c. 3. §. 6. Nec non in heredes in factum actionem  
 competere in id quod ad eos pervenit; aliter atque in bonæ  
 fidei contractibus fieri solet. Nam ex ijs tenentur hæ-  
 redes in solidum d. cap. 1. in fin.*

### CLIII. PAVLVS LIB. LXV.

#### AD EDICTVM.

*Fere quibuscunque modis obligamur, hisdem in contra-  
 rium actis liberamur, cum quibus modis acquirimus, his-  
 dem in contrarium actis amittimus. Vt igitur nulla possessio  
 acquiri nisi animo & corpore potest: ita nulla amittitur, nisi  
 in qua utrumque in contrarium actum.*

POSSESSIONIBVS rerum immobilium trans-  
 ferendis actus duo solemnes adhibebantur, vnus erat  
 acquisitionis, alter amissionis. Ciuilis fundo possessio  
 acquirebatur solemnī quadam in fundum inductione,  
 c. 3. de iur. iust. c. 3. §. 4. de administrat. tutor. c. 41. de  
 acquir. poss. Et quia inductioni eductio contraria est,  
 certè quemadmodum ciuilis possessio acquiri dicitur  
 inductione, sic ea consuevit amitti eductione. Educe-  
 batur enim ex fundo venditor, & sic fundi eius pos-  
 sessionem corporalem amittebat, simul exuta omni  
 retinendæ possessionis affectione; eoque momento in  
 fundum emptor ducebatur, & eandem, quam ven-  
 ditor exuerat, animi induens affectionem, non corpo-  
 re solùm, sed etiam animo apprehendere possessio-  
 nem intelligebatur; adhibitis, nisi vehementer fallor,  
 vsurpationis solemnibus antiquis, de quibus disserui-  
 mus latè suo loco. Atque ita quibus modis acquiritur, is-  
 dem in contrarium actis amitti possessionem auctor est hac  
 regula Paulus, cap. 8. & cap. 46. de acquir. poss. Eò  
 nihil



DE DIVERSIS REGVLIS IVRIS. 367  
nihil obstande, quod ab eodem Paulo traditum sit, *possessionem animo solo amitti posse, quamvis acquiri nequeat solo animo*, cap. 3. §. 5. d. tit. Id enim perpetuò verum est actibus illis duobus simul non concurrentibus, quibus amitti & acquiri eodem momento corpore & animo possessionem moris fuisse demonstratum est. Omissione amitti possessionem nemo dubitat. Nam qui fundum vsucapit; eum sine possessione non acquirit, cap. 25. de vsurp. Et quia duo vnam rem in solidum nequeunt possidere, cap. 3. §. 4. de acq. posses. consequens videtur emptore bonæ fidei possidente, non censi dominum verum possidere, sed potius omissione possessionem amisisse; eoque sensu amitti solo animo possessionem ad Edictum lib. 54. Paulum scripsisse, d. §. 5. Tum quod eo libro de vsucapionibus tractauerit Paulus, tum etiam *quòd certum sit possessionem recedere, ut quisque constituit nolle se possidere*, cap. 17. de acquirend. poss.

#### CLIV. VLP IANVS LIB. LXX.

##### AD EDICTVM.

*Cum par delictum est duorum, semper oneratur petitor, & melior habetur possessoris causa, sicut fit cum de dolo excipitur petitoris. Non enim datur talis replicatio petitori,*  
AVT SI REI QVOQVE IN EA RE DOLO  
ACTVM SIT. *Illi debet permitti pœnam petere, qui in ipsam non incidit.*

INTERDICTO Saluiano vitur dominus fundi de rebus coloni, quas pro mercedibus fundi pignori futuras pepigerat, §. interdictum quoque. Instir. de interd. Addiditque Theophilus aduersus quemvis res coloni possidentem huic interdicto locum esse. Quod ipsum etiam videtur Iulianus voluisse. Nam  
aduersus

aduersus extraneum eidem interdicto locum facit, c. 1. de Sal. interd. Et rectè quidem. Est enim apiscendæ possessionis, quemadmodum & interdictum *QVORVM BONORVM*, quod certum est aduersus quemlibet possessorem etiam directo competere, c. 2. §. 3. de interdict. capit. 1. & 2. quor. bonor. Nec obest rescriptum Gordiani, c. 1. C. de precario. Illud enim de ijs accipiendum est qui res coloni emptionis titulo possident. Cùm enim res illæ desierint esse coloni, certè nec vtili quidem interdicto Saluiano auferri earum possessio emptoribus potuit. Siquidem huiusmodi interdicto ad possessionem rerum quæ coloni propriæ sunt apiscendam duntaxat locus erat. Eaque ratio est cur scripserit Iulianus, eius quod apud emptorem ex ancilla pignori obligata & à colono venditatum est, apprehendendi gratia, vtile interdictum reddi oportere, cap. 1. de Saluia. interdict. Ex eo enim perspicuum est ad apiscendam ancillæ venditæ possessionem, ne vtili quidem interdicto locum fuisse. Et hæc quidem adeò vera sunt, vt etiamsi colonus res in fundum duorum pignoris nomine intulisset, & singulis in solidum obligasset, singuli aduersus extraneum res coloni detinentem, Saluiano interdicto, & aduersus earundem rerum emptorem, non quidem interdicto, sed actione Seruiana experirentur; sique inter ipsos fundi communis dominos quæstio moueretur, possidentis conditio melior esset, cap. 1. de Saluia. interd. cap. 10. de pignoribus, cap. 36. de noxalib. act. Hoc est eius qui Saluiano interdicto rerum coloni ab extraneo detentatarum, adeptus erat in solidum possessionem, etiam si alter accusaret ex pari delicto alterius fidem, cap. 36. de dolo. *Cùm enim par delictum est duorum, semper oneratur petitor, & melior habetur possessoris causa*; quemadmodum hac regula Paulus auctor

ctor est, ex eius libro ad Edictum septuagesimo reperta. In eo enim libro non de interdictis solum, sed specialiter etiam de Saluiano interdicto, & simul de possessoris in eodem interdicto causa meliore Paulum differuisse, ex cap. 2. de Saluia. interd. eiusque epigraphæ omnino constat. Ex quo capite etiam probari videtur, id quod de causa possessoris meliore diximus, non solum in interdicto locum habuisse, sed etiam in Seruiana. Ait enim Vlpianus *quamuis possessor vicisset interdicto, nihilominus ad Seruianum iudicium descendi consueuisse*; hoc est, vtilem fuisse hanc inter duos eiusdem fundi dominos exceptionem, **SI NON CONVENIT VT EADEM RES MIHI QVOQVE PIGNORI ESSET**, d. cap. 2. & cap. 10 de pignorib. Eaque exceptio nullo modo proderat petitori si res coloni pignori datæ erant singulis insolidum. Causa enim possessoris haberi in huiusmodi specie melior solet. Aliud est si pro partibus res fuerint pignori obligatæ, tunc enim possessoris conditio melior non est, c. 1. de Saluia. interd. & d. cap. 10. Quod autem de pari delicto dictum est, id tunc etiam locum obtinet cum de paris delicti pœna tractatur. Siquidem ait eodem loco Vlpianus, *ei permitti pœnam petere, qui in ipsam non incidit*. Proinde si ambo in pœnam inciderint ex pari delicto, quin cesser petitio pœnæ, nulla dubitatio est, c. 36. 16. & 18. de dolo. Videlicet eo modo quo scripsit hac regula Vlpianus, *aduersus doli exceptionem non dari replicationem doli*. Nam, ut ait Labeo, *iniquum esset communem malitiam petitori quidem præmio, ei verò cum quo agitur pœna esse*, c. 4. §. 12. & 13. de doli except. Per pœnam, id omne damnum intelligi potest, quod extra rei persecutionem est, cap. 12. §. 1. si quis omis. caus. testa. cap. 2. in fin. de tut. & rat. distrah. Atque ita pœnam accepit etiam Labeo, d. §. 13.

## CLV. PAVLVS LIB. LXV.

## AD EDICTVM.

*Factum cuique suum, non aduersario nocere debet. Non videtur vim facere qui suo iure utitur, & ordinaria actione experitur. In pœnalibus causis benignius interpretandum est.*

LIBRO ad Edictum sexagesimo quinto, cui hæ tres regulæ adscribuntur, certum est de interdictis VNDE VI, & VTI POSSIDETIS Paulum scripsisse. Et de eo quidem differens qui deiectus est vi ab usufructu, eum ait Paulus in eandem causam restituendum esse, siq; finiretur tempore usufructus, postquam deiectus à domino est usufructuarius, restitutionem nihilominus fieri oportere, & usumfructum iterum constituere dominum cogendum. *Factum enim cuique suum non aduersario nocere debet*, c. 9. de vi & vi armata. Eodem libro ait Paulus, *qualem cunque possessorem, hoc ipso quod possessor est, plus iuris habere, quam ille habeat, qui non possidet*, c. 2. vti possidet. Eoque iure si voluerit vti possessor, & ordinaria experiri actione, etiam aduersus verum dominum, audiendum esse, nec eum vim facere videri. Non enim videtur vim facere qui suo iure utitur, & ordinaria actione experitur. Actionis verbo continentur interdicta, c. 37. de obl. & act. Et idcirco per actionem ordinariam arbitror Paulum hac regula interdictum VTI POSSIDETIS intellexisse. Præsertim cum ita scripserit de limitibus agror. Aggenus Urbicus; *De possessione fit controuersia, quoties de totius fundi statu per interdictum, hoc est, iure ordinario litigatur.* Non est etiam dubium quin duo fuerint interdicta. VNDE VI, vnum de vi quotidiana, alterum de vi armata. Id enim pro Cecinna testatur expressè Cicero. Et non ciuilitè solum sed criminaliter etiam, eum qui

qui vim fecerat, potuisse conveniri, demonstratum à nobis est ad huius tituli caput 152. Eoque non dubium est quin respexerit eodem ad Edictum libro 65. Paulus de vtraque vi differens, cum ita scriberet; *In pœnalibus causis benignius interpretandum est.* Eamque regulam huius veram sententiam vehementer confirmat Vlpianus, capite 32. de pœnis.

## CLVI. VLPPIANVS LIB. LXX.

## AD EDICTVM.

*Inuitus nemo rem cogitur defendere. Cui damus actionem, eidem & exceptionem competere multo magis quis dixerit. Cum quis in alij locum successerit, non est æquum ei nocere hoc, quod aduersus eum nocuit in cuius locum successit. Plerumque emptoris eadem causa esse debet circa petendum ac defendendum, quæ fuit auctoris. Quod cuique pro eo præstatur, inuito non tribuitur.*

AD Edictum lib. 70. scripsit Vlpianus, *si debitori meo velim actionem edere, & fateatur se debere, paratumque dicat solvere, audiendum esse. Neminem enim inuitum defendere cogi*, cap. 21. de iudic. c. 31. de re iudic. Dari etiam cum competenti cautela dies solet ei qui debitum fatetur, non tamen inuito d. cap. 21. Quod enim cuique pro eo præstatur, inuito non tribuitur, cap. 19 §. 2. de donat. Eodem libro interdictum de superficiebus interpretans Vlpianus ait, *si is in cuius solo superficies est, aduersus superficiarium velut vindicare, exceptione utendum in factum data.* Nam cui damus actionem, eidem & exceptionem ex eadem causa multo magis competere, capite 1. §. 3. de superfic. capite 28. §. fin. quib. ex caus. maiores. Videtur etiam eodem libro Vlpianus de hærede qui deliberat, quædam tractasse. Ait enim, *si res sunt in hereditate, quæ ex tractu temporis deteriores sunt,*

*eum qui deliberat, adito pratore sine praiudicio iustis pretiis vendere posse; & simul curare ut as alienum, quod sub pœna vel sub pretiosis pignoribus debetur, exoluatur; de iure delib. non enim æquum esse, ut quod respectu pœnæ vel pignorum pretiosorum nocuit aduersus defunctum, etiam heredi eius iniurio noceat. Scio hanc regulam ab Vlpiano relattam aliò fuisse eod. lib. non tamen ut hîc legitur affirmatiuè, sed negatiuè, c. 3. §. 2. de itinere actûque pri. Et cum eod. loco sic scriptum esset; *A me videtur vi aut clam aut precario possidere, qui ab auctore meo vitiosè possidet.* hæc quoq; verba subiecit Vlpianus; *Plerumq; enim emptoris eadem causa debet esse circa petendum ac defendendum quæ fuit auctoris,* d. cap. 3. §. 2.*

## CLVII. VLPIANVS LIB. LXXI,

## AD EDICTVM.

*Ad ea quæ non habent atrocitatem facinoris vel sceleris, ignoscitur seruis, si vel dominis, vel his qui vice dominorum sunt, veluti tutoribus & curatoribus obtemperauerint.*

**P**ERTINERE hanc regulam ad interdictum **QVOD VI AVT CLAM**, satis constat ex cap. 11. §. 6. quod vi aut clam. Illius enim capitis & huius regulæ eadem inscriptio est. In eo capite de eo tractatur quod a pupilli vel furiosi seruis vi aut clam factum est, tutoris curatorisve iussu, his verbis; *An ignoscitur seruo qui obtemperauit tutori vel curatori?* Nam ad quædam quæ non habent atrocitatem facinoris vel sceleris, ignoscitur seruis si vel dominis vel his qui vice dominorum sunt, veluti tutoribus & curatoribus obtemperauerint, quod & in hoc casu admittendum est, d. §. 6. Auctor est Cornelius Fronto *rixam sine armis esse & habere defensionem.* Proinde quod hac regula traditum est, id omnino de rixa intelligi videtur, ex litibus & contentione nata, aut certè de vi iuris retinendi



di causa sine facinore facta. In his enim ignoscitur  
 seruis, non autem si domini iussu hominem occide-  
 rent; aut furtum vel piraticam facerent, c. 10. de obli-  
 gat. & act. Nam ut apud Paulum Pedius ait, *seruus in*  
*facinoribus domini dicto non debet audiendus esse*, cap. 21.  
 §. 1. rer. amor. Eoque pertinet quod Declamatione  
 quadam de nuptiis inter inimicorum filios differens  
 Quintilianus, ita scribit; *Serui me hercule quedam libe-*  
*rius ex bona mente faciunt, & aliquando indicium fidei pu-*  
*tant empti mancipia non paruisse.* Soletque mitius puniri  
 seruus, si domini iussu, quam si ignorante domino fa-  
 cinus commisisset, c. 2. C. de sepulchro violat. Eo nihil  
 obstante, quod audiam dici pœnam relegationis in  
 seruum non cadere, cuius pœnæ meminit Constantius  
 d. c. 2. Id enim usquequaque verum non est. Nam Vl-  
 pianus seruo competere libertatem non posse ait, si relegatus  
 moratus sit in urbe, cap. 2. qui & à quib. ma. Et sanè alia  
 seruorum, alia item liberorum hominum relegatio  
 fuit. Serui enim in agros, homines verò liberi in pro-  
 uincias solent relegari. Idque Apologia David cap. 14.  
 testatur euidenter Ambrosius. Ait enim; *Plerique autem*  
*diuitum amandare consueverunt mancipia sua, & per agellu-*  
*los relegare, & hac pena grauior aestimatur.* Quod autem  
 Vlpianus scribit, *dominorum vice tutores esse & curatores*,  
 ei prorsus consentaneum est illud eiusdem Ambrosij  
 ad Clementianum Epist. libro 9. *Sunt etiam heredes*  
*paruuli, qui nihil differunt à seruulo, quoniam sub curatori-*  
*bus sunt & actoribus.*

#### AD §. SEMPER. ET §. IN CONTRACTIBVS.

*Semper qui dolo facit quo minus haberet pro eo habendus*  
*est ac si haberet. In contractibus successores ex dolo eorum*  
*quibus successerunt non tantum in id quod peruenit, verum*  
*etiam in solidum tenentur, hoc est unusquisque pro ea parte*  
*qua heres est.*

Ex epigraphe cap. 20. de noui oper. nuntiat. satis apparet lib. ad Edictum 71. de noui operis nuntiatione Vlpianum scripsisse, eoque hanc priorem regulam non incommodè referri posse. Ait enim illo capite Vlpianus, *interdictum huiusmodi aduersus heredem eius qui fecit opus nouum, in hoc competere duntaxat, quod ad eum peruenit, vel si quid dolo malo ipsius factum esset quominus perueniret; semper enim qui dolo fecit quominus haberet, pro eo habendum esse ac si haberet, d. c. 20.* Eodem libro interdictum etiam de precario interpretatus est Vlpianus. Eaque interdicto heredem eius qui rogauit teneri, scripsit, *siue haberet, siue dolo fecisset, quominus haberet. Semper enim qui dolo facit quominus haberet. Ex dolo autem defuncti heredem huiusmodi haecenus teneri, quatenus ad eum peruenit, aliter atque in bonæ fidei contractibus fieri solet, cap. 8. in fin. de precario.* In iis enim non tantum in id quod peruenit, sed etiam in solidum tenetur haeres, cap. 12. & cap. 49. de obligat. & act. Certe quia tamdiu precarium est quamdiu is qui concessit patitur, cap. 1. de precario: quod de contractibus bonæ fidei dici non potest, in quibus libera permittitur potestas iudici ex bono & æquo æstimandi quantum actori restitui debeat, §. in bonæ fidei. Instit. de act. id quod in precario fieri non solet. Eaque ratione à precario dignosci commodatum potest.

## CLVIII. GAIUS LIB. XXVI. AD

## EDICTVM PROVINCIALE.

*Creditor qui permittit rem venire, pignus demittit.*

PLACET, inquit Paulus, *in urbanis habitationibus locandis inuecta & illata pignori esse locatori, etiamsi nihil nominatum conuenerit, cap. 4. de pactis.* Sed cur in prædiis rusticis obseruatur contrarium? cap. 4. & cap 7. in



in quib. caus. pig. §. interdum. Instit. de interd. Nullam Paulus, nullam item Neratius aliam profert rationem, quàm quod ita placuerit, quodque eo iure vterentur Romani. Sed profectò, alia vrbànòrum, alia item rusticorum prædiorum locatio fuit. Eius enim mobilia qui conduxerat habitationem, annua pensioni tacita conuentione sic erat obligata, vt ne ignorare quidem eam consuetudinem conductori liceret, ac proinde nulla necessario scriptura opus erat, nullisque tabulis, cap. 13. in fin. locati. Contrario iure in prædiis rusticis vtebantur Romani. In iis enim locandis signaculo opus fuit & tabularum conscriptione, cap. 9. §. 3. c. 2 §. 3. & cap. 29. locati. Et inter alias quidem conuentionis leges expresse solet comprehendì vt inuecta & illata in rusticum prædium pignori essent locatori, cap. 4. in quib. caus. pign. Eùmque morem in rusticòrum fructuum venditionibus, veluti oleæ pendentis, pabuli hyberni, & sic deinceps, veteres etiam obseruabant. Inter alias enim leges oleæ pendentis venditæ, illam quoque solere comprehendì ait de re rustica Marcus Cato; **DONICVM SOLVTVM ERIT AVT SATIS DATVM, QVÆ IN FVNDVM ILLATA ERVNT PIGNERI SVNTÒ.** Et illam de pabulo hyberno; **DONICVM PECVNIA SATISFECE- RIT, AVT DELEGARIT, PECVS ET FAMI- LIA, QVÆ ILLIC ERIT, PIGNERI SVNTÒ.** Item de venditis ouium fructibus; **CONDVCTOR DVOS MENSES PASTOREM PRÆBEAT DO- NEC DOMINO SATISFECERIT AVT SOL- VERIT, PIGNORI ESTO** Nec aliò videri potest Imp. Alexander respexisse, cùm scriberet *certi iuris esse ea quæ voluntate dominorum, coloni in fundum condu- ctum induxerint, pignoris iure dominis prædiorum teneri,* capite 5. C. de locato & conduct. Sensus enim est,

res quæ in fundum voluntate dominorum locationis instrumento comprehensa illatæ sunt, pignoris iure teneri. Diciturque instrumenti scriptura voluntas dominorum ea ratione, qua scriptura testamenti voluntas appellatur defunctorum, cap. 4. §. 10. de doli mali & met. except. Eoque referenda omnino est hæc iuris regula. Exstat enim prætoris interdictum *DE MIGRANDO*, de quo videtur Caius libro ad Edictum prouinciale 26. scripsisse, cap. 2. de migrando. Ex eodem libro sumpta est hæc iuris regula. Quid igitur obstat quo minus eam ad interdictum de migrando referamus? Quemadmodum enim homo qui non est ex rebus pignori obligatis, quo minus abduci possit, vis fieri vetatur interdicto *DE MIGRANDO*, cap. 1. de migrand. ita quoque res, quæ pignoris obligationi est exempta, quo minus rectè auferatur, nihil quicquam esse in causa videtur. Quod tunc accidere solet, cum creditor rem pignori obligatam permittit venire. Intelligitur enim pignus dimittere, cap. 4. §. 1. quib. mod. pign. sol.

## CLIX. PAVLVS LIB. LXX.

## AD EDICTVM.

*Non ut ex pluribus causis deberi nobis idem potest, ita ex pluribus causis idem possit nostrum esse.*

Hoc est, non amplius quàm semel res nostra esse potest, sæpius autem deberi potest, quemadmodum eodem libro interpretatus est hanc regulam Paulus, cap. 14. §. 2. de except. rei iudic. Eoque pertinet quod idem Paulus ait, *sicut dominium non potest nisi ex una causa contingere, ita & possidere nos ex una duntaxat causa posse*, cap. 3. §. 3. de acquirend. possess.

CLX.

## CLX. VLP IANVS LIB. LXXVI.

AD EDICTVM.

*Aliud est vendere, aliud vendenti consentire.*

C E L S V S ait, si quis rem meam vendidit minoris quàm ei mandavi, non videri alienatam; & si petam eam non nocituram mihi vendita rei exceptionem, quemadmodum libro ad Edictum septuagesimo sexto scripsit Vlpianus, c. 1. §. 2. de except. rei venditæ. Eaque exceptio obstarèt si ipse vendidissem. *Aliud enim vendere esse, aliud vendenti consentire*, auctor est eodem loco Vlpianus, adijciens insuper *alienatum non propriè dici, quod adhuc in dominio venditoris manet, venditum tamen rectè dici*, c. 67. de verbor. signific. Per venditorem eum intelligit Vlpianus, qui cum rei vendendæ dominus sit, eam mandavit distrahi certo pretio. Proinde si is qui iussu alterius vendidit, minoris vendidit, res dicetur vendita non autem alienata. Vendita quidem, respectu ipsius contractus; non alienata verò, propter inutilem venditæ rei exceptionem. Et hoc est, quod ait hac regula Vlpianus, *aliud esse vendere, aliud vendenti consentire.*

## AD §. REFERTVR.

*Refertur ad vniuersos quod publicè fit per maiorem partem.*

V L P I A N V S municipali lege caueri ait, ut ordo non aliter habeatur quàm duabus partibus adhibitis, cap. 3. de decret. ab ord. fac. Easque partes duas arbitror esse, bu-  
len & Ecclesiam; quarum auctoritatem in decretis municipalibus publicis necessariam fuisse docet Pli-  
nius, de quodam medico Epist. lib. 10. sic Traiano scri-

A a 5 bens;

bens; *Petebat apud me à Iulio Pisone denariorum circiter quadraginta millia donata illi publicè antè viginti annos, & bule & Ecclesia consentiente.* Nec aliud est quod sibi hac regula voluit Vlpianus. Referri enim ad vniuersos muncipes ait, quod publicè fit per maiorem bules & Ecclesie partem. Refertur sanè eo modo, quo Seneca de benefic. lib. 6. c. 19. ita scripsit; *Si quis patriæ meæ pecuniam credat, non dicam me illius debitorem, nec ex hoc as alienum profitebor aut candidatus aut reus, ad explendum tamen hoc portionem meam dabo.* Nec alia ratione tradidit Scauola, quod maior pars curia priuatim non publicè decernendo effecit, pro eo haberi ac si omnes egerint decuriones, c. 19. ad municipal. Meminit etiam legitimi decurionum numeri Marcianus, quo non coacto negat decreta valere, cap. 2. de decret. ab ordine fac. Illud autem quod publica fit auctoritate, dici publicè fieri ex supradicto Plinij loco neminem arbitror non intelligere. Cicero act. 4. in C. Verrem; *Postremò homines ex tota prouincia nobilissimi primique publicè priuatimque venerunt.* In quem locum Asconius, publicè, inquit, legati venerunt; priuatim, qui iniurias suas persequabantur.

## AD §. ABSVRDVM EST.

*Absurdum est plus iuris habere eum, cui legatus, sit fundus, quàm heredem, aut ipsum testatorem si viueret.*

Si quis ex causa legati vindicet, de dolo exceptionem pati debet, ex causa eius in cuius locum successit, cap. 4. §. 26. de doli except. Absurdum enim est plus iuris legatarium habere, quàm heredem aut testatorem si viueret. Et idcirco vt hæres, qui in vniuersum ius succedit, submouetur exceptione, ita & legatarius debet submoueri, quasi vnius rei successor, cap. 6. de except.

## CLXI. VLPIANVS LIB. LXXVII.

## AD EDICTVM.

*In iure civili receptum est, quoties per eum cuius interest conditionem non impleri, fiat quominus impleatur, perinde haberi ac si impleta conditio fuisset, quod ad libertatem & legata & ad heredum institutiones perducitur, quibus exemplis stipulationes quoque committuntur, cum per promissorem factum esset, quominus stipulator conditioni pareret.*

LIBRO ad Edictum septuagesimo septimo ait Vlpianus, inter omnes convenire, heredem sub conditione institutum pendente conditione possidentem hereditatem substitutio cauere debere de hereditate, cap. 12. qui satisd. cog. Sique per substitutum steterit quominus impleatur conditio, perinde eam haberi ac si impleta fuisset. Ita enim receptum esse iure civili testatur eodem loco Vlpianus, tam circa libertas & legata, quam circa heredum institutiones. Quod ipsum tradidit etiam Iulianus, cap. 24. de cond. & demonst. Sic de libertate condicionali sentit idem Vlpianus, cap. 3. de statulib. Sic de legato Papi- nianus, c. 78. de condict. & demonst.

## CLXII. PAVLVS LIB. LXX.

## AD EDICTVM.

*Quae propter necessitatem recepta sunt, non debent in argumentum trahi.*

PROPTER necessitatem est receptum, ut is qui in vinculis, vel in custodia militari, vel etiam in seruitute hostium est, ac per hoc in iudicium non stetit, exceptione debeat adiunari, c. 4. §. 1. si quis caur. Idque adeo verum esse arbitratus est Attilicinus, ut contenderit conventionem, ne ulla exceptio in promissione deserta



380 IAC. RÆVARD. TOM. I. COMM.  
*deserta iudicio sistendi causa facta obijciatur, non valere,*  
 d. cap. 4. certè ne conventio talis trahatur aliquo mo-  
 do in argumentum. Nam *qua propter necessitatem rece-*  
*pta sunt, non debent in argumentum trahi.* Per desertam  
 promissionem, desertum accipitur vadimonium; quod  
 ab Alciato mirum est intellectum non fuisse, qui ex  
 desertam disertam promissionem studuit facere. Sed  
 frustra. Id ipsum enim quod hîc de promissione deser-  
 ta traditur, ad desertum vadimonium refert expressè  
 Seneca de benef. lib. 4. cap. penult. Ait enim; *Vadimo-*  
*nium promittimus, tamen deseritur: non in omnes datur*  
*actio; deserentem vis maior excusat.*

### CLXIII. VLP IANVS LIB. LV.

AD EDICTVM.

*Cui ius est donandi, eidem & vendendi & concedendi*  
*ius est.*

DONARI non potest, nisi quod eius fit cui do-  
 natur, c. 9. de donat. Sic etiam quod venditur, empro-  
 ris fieri necessum est, c. 53. de contrah. empt. Ait enim  
 de benefic. lib. 5. Seneca, *quemadmodum vendere, sic dare*  
*à se dimittere esse, & id quod tenueris habendum alteri tra-*  
*dere.* Sed qui donat, suum deminuit patrimonium,  
 quod is non facit qui vendit. Ideoque ius donandi  
 vendendi iure maius est. Quod autè conceditur, id pro-  
 tinus ei non acquiritur, cui conceditur, c. 35. d. tit. c. 1.  
 de prec. Plus igitur donare est quàm vendere, plus item  
 vendere quàm concedere. Et quia *quod minus est ei li-*  
*cere debet, cui quod plus est licet.* cap. 21. hoc tit. certè mi-  
 rum non est cui ius est donandi, eidem & vendendi  
 & concedendi ius esse: non autem, cui ius est venden-  
 di & concedendi, eidem esse ius donandi. Qui enim  
 liberam habet peculij administrationem, emere &  
 vendere

DE DIVERSIS REGVLIS IVRIS. 381  
vendere potest, non donare, c. 28. in fin. de pactis, c. 3.  
§. 5. de don. inter vir. & vxor. Sic tutor rem pupilli  
potest alienare, non autem donare, c. 56. §. 3. de furt.  
c. 7. §. 1. & cap. 22. de administr. tut.

CLXIV. PAVLVS LIB. LI.

AD EDICTVM.

*Pœnalia iudicia semel accepta, in heredes transmitti  
possunt.*

PAVLVS ait libro ad Edictum quinquagesimo  
primo, ordinata liberali causa liberi loco haberi eum qui de  
statu suo litigat, ita ut ei aduersus eum qui se dominum esse  
contendit, actiones nulla denegentur: easque si tales sint ut  
tempore aut morte pereant, litem contestando in tuum re-  
digi posse; non solum ut ei qui de sua libertate litigat, sed  
etiam ut eius heredibus consulatur. Pœnalia enim iudicia  
semel accepta ad heredes transmitti, cap. 24. in princ. de  
lib. causa cap. 26. de obligat. & act. Déque ea re disse-  
ruimus ad huius tit. cap. 87.

CLXV. VLPIANVS LIB. LIII.

AD EDICTVM.

*Cum quis possit alienare; poterit & consentire aliena-  
tioni. Cui autem donare non conceditur, probandum erit, nec  
si donationis causa consenserit, ratam eius voluntatem  
habendam.*

PERTINET hæc regula ad Edictum de aquæ  
pluuiæ arcendæ actione. Certum enim est de huius-  
modi actione lib. ad Edictum quinquagesimo tertio  
Vlpianum latissimè differentem inter alia scripsisse, in  
concedendo aquæ ducenda iure, non eorum dumtaxat in quo-  
rum loco aqua oritur, sed eorum etiam ad quos eius aquæ  
vires

*usus pertinet, voluntatem exquirendam esse, capite octavo, de aqua & aqua pluvia arcend. action. Si modò tales essent personæ, vt possent ius illud aquæ quod habent alienare. Per hoc enim multo magis posse alienationi consentire intelliguntur. Quod utique non facerent, si nullam haberent donandi potestatem. Neque enim si donationis causa consentirent, rata eorum haberetur voluntas, c. 28. in fin. de pactis. Quod etiam à Petro Fabro vt nouissimo, ita regularum iuris interprete diligentissimo obseruatum est.*

## CLXVI. PAVLVS LIB. XLVIII.

## AD EDICTVM.

*Qui rem alienam defendit, nunquam locuples habetur.*

IS ENIM qui suscipit alienæ rei defensionem, etsi locupletissimus est, etsi consularis sit, non videtur viri boni arbitratu defendere, nisi satisfacere fuerit paratus, c. 51. c. 52. & c. 53. de procur. Defendere enim viri boni arbitratu aliud nihil est quàm satisfacere, cap. 5. §. 3. iudicat. solui. Rectè meminit Paulus consularis, d. c. 52. Non enim dubium est quin consularis locuples sit, tum quod certæ fuerint equestres, senatoriæ, & consulares facultates: tum etiam quod candidati magistratuum iniriuri soleant eas alienum profiteri, vt est apud Senecam de benefic. lib. 7. cap. 19.

## CLXVII. PAVLVS LIB. XLIX.

## AD EDICTVM.

*Non videntur data, quæ eo tempore quo dantur accipientis non fiunt.*

TALIS constitui seruitus potest, vt aquam quarere & vinentiam ducere liceat. Idque Labconem scripsisse testis est Paulus



Paulus libro ad Ediētum 49. cap. 10. de seruit. præd. rustic. Addiditque idem Labeo eo modo huiusmodi seruutem cedi posse, quo seruus adificio nondum factō imponitur, d. cap. 10. Siq̃ue aquam inueniri non contigerit, certē nec poterit duci, & per hoc inutilis erit aquæ cessio, siquidem tempore cessionis nihil factum est accipientis: *Non enim videntur data, quæ eo tempore quod dantur, accipientis non fiunt.* Nam id dari auctore Seneca dicitur, quod habendum alteri traditur, etiamsi (vt Paulus ait) seruantes sint prædiorum, cap. 19. de seruit. præd. rustic. Quomodo autem aqua soleat quæri docet eleganter Vitruuius de architect. lib. 8. cap. 1.

## AD §. QVI IUSSV IVDICIS.

*Qui iussu iudicis aliquid facit, non videtur dolo malo facere, quia parere necesse habet.*

QVI dolo malo sepulchrum violat, sepulchri violati actione tenetur, cap. 3. in princ. de sep. viol. Proinde si quis sepulchrum edificauerit ex quo aqua noceat, aquæ pluuiæ arcendæ tenebitur; & si iussu iudicis opus restituerit, non tenebitur sepulchri violati, quia dolo caret, cap. 4. in princip. de aqua & aq. plu. arc. act. Nam, (vt ait Paulus de aqua pluuiæ differens libro ad Ediētum quadragésimo nono) *qui iussu iudicis aliquid facit, non videtur dolo malo facere, quia parere necesse habet. Magistratibus enim concessum fuit iurisdictionem suam defendere pœnali iudicio. c. 1. si quis ius dict. ad eod̃ quidem vt scripserit etiam Alconius, eum qui potestate suam in administratione non defendit, inuincit magistratus, velut maiestatis læsæ reum esse.*

## CLXVIII. PAVLVS LIB. I.

## AD PLAVTIVM.

*Rapienda occasio est quæ præbet benignius responsum.*

C V M

CUM esset de procuratore damnato controuersia, alijs eum indistinctè debere conueniri contendentibus, alijs distinctionem requirentibus, inter alia responsum fuit aliter eum non debere conueniri quàm si aut in rem suam datus esset, aut obtulisset se, cum sciret cautum non esse. *Illudque responsum responsis alijs multo benignius esse, omnibusque eo nomine placuisse.* Plautius ait. c. 61. de procurat. c. 7. de rei vend. Satis per hoc indicans ex eo tempore protinus in iuris regulam responsum illud transiisse, & ex eo etiam eleganter concludi *rapiendam esse occasionem, qua prabet benignius responsum; quemadmodum ad Plautium libr. 1. Paulus testatur.*

#### AD §. QVOD FACTVM EST.

*Quod factum est cum in obscuro sit, ex affectione cuiusque capit interpretationem.*

REGVLA est iuris ciuilis tutorem in rem suam auctorem fieri non posse. cap. 1. de auctorit. tut. De qua regula differens ad Plautium libro primo Paulus, cum tutor debet pupillo, eum ait delegari ipso tutore auctore non posse; tum quia futurum sit, ut auctoritate sua tutor liberetur; tum etiam ne in propria causa indulgeat tutor affectioni, capitulo 18. d. tit. *Quod enim factum est, cum in obscuro sit,* inquit eodem loco Paulus, *ex affectione cuiusque capit interpretationem;* hoc est, quoties de eo quod factum est obscura quadà exoritur controuersia, an is qui fecit aliqua in faciendo vsus fuerit affectione, sedulo inquiri solet. Huiusmodi controuersia & affectionis interpretationi inter pupillum & tutorem pupilli debitorem locus esse nullo modo potuit: & ideò in rem suam non potuit tutor auctor fieri. Certè ne eius affectio, ad quam naturâ procliuus sumus in discrimen adducatur, c. 33. ad leg. Aquil.

CLXIX.

## CLXIX. PAVLVS LIB. II.

AD PLAVTIVM.

*Is damnum dat qui iubet dare, eius verò nulla culpa est, cui parere neceſſe eſt.*

IABOLENVS ait, ſi liber homo iuſſu alterius damnum iniuria dedit, actionem legis Aquilia cum eo eſſe qui iuſſit ſi modo ius imperandi habuit, cap. 37. in prin. ad leg. Aquil. Eum enim damnum dare qui iubet dare, & eius nullam culpam eſſe cui parere neceſſum ſit, auctor eſt Paulus ad Plautium libro ſecundo, de damno iniuria dato differens. Nam certum eſt quædam de lege Aquilia eo libro Paulum tractaſſe, cap. 33. d. tit. Ait etiam Vlpianus, ſervum nihil delinquere domino iubenti obtemperantem, capite ſecundo, §. 1. de noxalib. act. Sed hoc in damno locum habet iniuria dato, non autem in facinore, cap. 20. de obligat. & act.

## AD §. QVOD PENDET.

*Quod pendet non eſt pro eo quaſi ſit.*

EODEM ad Plautium libro ſecundo ſcripſit de eo Paulus qui pro ſervo fideiuſſit, & eum ait in ſolidum teneri etiamſi nihil in peculio eſt; ſique eam fideiuſſionem in rem domini fieri contigerit, dominum ſervi nomine duntaxat de peculio teneri, quod tunc erit, cum res iudicatur, cap. 35. de fideiuſſorib. Atque ita pendere obligatio peculij intelligitur, uſque ad rei iudicatæ tempus, etiamſi tempore ſponſionis nihil eſſet in peculio. Nam, ut ait eodem loco Paulus, quod pendet, non eſt pro eo quaſi ſit, ſed pro eo potius quaſi aliquando eſſe poſſit, cap. 213. de verbor. ſignific. cap. 16. §. 2. de fideiuſſ.

Bb CLXX.

## CLXX. PAVLVS LIB. III.

## AD PLAVTIVM.

*Factum à iudice quod ad officium eius non pertinet , ratum non est.*

EST receptum, vt si quis subiiciat se iurisdictioni alterius possit ei & aduersus eum ius dici, cap. 14. de iurisd. cap. 28. ad municipal. Est & illud certum, suprâ iurisdictionem suam, aut extra suum territorium ius dicere neminem posse, cap. fin. de iurisd. cap. 1. §. 1. de offic. præfect. urb. Et ita qui non cogitur inuitus in aliquo loco iudicium pari, potest pari submissione. Et si quidem submiserit se, non agere solum, sed etiam excipere cogetur actiones & ad eundem iudicem mittetur, quemadmodum auctor est Paulus ad Plautium libro tertio cap. 22. de iudic. Si verò agere inuitum apud se coëgerit alterius loci iudex, ei impunè non parebitur, d. cap. fin. Nam vt ait eodem libro Paulus, *factum à iudice quod ad officium eius non pertinet, ratum non est.* Ad officium autem iudicis pertinet si priuatus est limites formulæ præscriptæ non excedere; si magistratus suprâ iurisdictionem suam & extra suum territorium ius non dicere, d. cap. fin. cap. 1. & 2. C. si à non compet. iudic. cap. 1. C. qui pro sua iurisd.

## CLXXI. PAVLVS LIB. IV.

## AD PLAVTIVM.

*Nemo ideo obligatur, quia recepturus est ab alio quod præstiterit.*

AD Plautium libro 4. ait Paulus, si dominus vel pater pecuniam mutuam accepturus insserit seruo filiove numerari nullam questionem esse quin ipsi condici possit; im-

*in hoc casu de iussu actionem competere. Neminem enim ideo obligari, quia recepturus est ab alio quod prestitit, quam ab eo cui prestitum est, cap. 5. quod iussu. Id quod hac specie contingit. Seruo enim vel filio patris dominive iussu pecunia numeratur, quam creditor à patre vel domino recepturus est, non à seruo, non à filio. Si quidem ipsa numeratione inter huiusmodi personas & creditorem nulla constituitur obligatio, quamvis iis rectè solvatur, cap. 141. §. 3. de verb. oblig. cap. 11. & 13. de stipulat. seruor. quamvis etiam ab iis chirographum vel pignus accipiarur, atque ita ipsis obligari creditor quodammodo videatur, cap. 1. §. 1. vers. creditor. de oblig. & act. §. fin. Instit. quib. mod. re contrah. oblig. cap. 5. quod iussu.*

## CLXXII. PAVLVS LIB. V.

## AD PLAVTIVM.

*In contrahenda venditione ambiguum factum contra venditorem interpretandum est: ambigua autem intentio ita accipienda est, ut res salva aëtori sit.*

HAC regula Paulus ait contrahi venditionem. Emptionem etiam contrahi argumento est titulus Pandectarum, *De contrahenda emptione*. Ut igitur venditio, sic etiam emptio contrahi dicitur; venditio quidem à venditore; emptio verò ab empt. leg. propositis. Venditionis leges huiusmodi sunt; *Si QUID SACRI VEL RELIGIOSI, VEL PVBLICI EST EIVS VENIT NIHIL, c. 22. & 72. de cōtrah. empt. QVO IVRE QVAQVE CONDITIONE EA PRÆDIA LVCII TITII HODIE SVNT, ITA VENEVNT, ITAQVE HABERVNTVR; c. fin. d. tit. Si AD DIEM PECVNIA SOLVTA NON SIT, VT FVNDVS INEMPTVS SIT, c. 2.*

B b 2 de

388 IAC. RÆVARD. TOM. I. COMM.  
 de leg. commiss. FLUMINA STILLICIDIA UT  
 NUNC SUNT UT ITA SINT, cap. 33. de con-  
 trah. empt. c. 17. §. 1. de seruit. præd. urbanor. Est etiam  
 Varro auctor, de ling. Lat. lib. 4. *lege prædiorum urbano-  
 rum ita scribi solere*; STILLICIDIA FLUMINA-  
 QUE UT ITA FLVANT CADANTQUE. Quæ  
 locum si vitiosum esse suspiceris (ut re vera est) sic  
 tibi persuadeas restitui posse; STILLICIDIA FLV-  
 MINAQUE UTI NUNC FLVUNT CADUNT,  
 ITA FLVANT CADANTQUE. Emptionis le-  
 ges tales sunt; QUANTI TV EVM EMISTI,  
 QUANTVM PRETII IN ARCA HABEO. EST  
 MIHI EMPTVS CENTVM, ET QUANTO PLV-  
 RIS EVM VENDIDERO. cap. 7. de contrah. empt.  
 QUÆ EX MEIS ÆDIBVS IN TVAS ÆDES  
 PROIECTA SUNT, UT MIHI ITA HABE-  
 RE LICEAT, cap. 80. d. tit. Illud etiam certum est  
 huiusmodi leges si ambiguerent, iis nocuisse in quo-  
 rum potestate fuit eas apertius conscribere, cap. 39. de  
 pactis Ex quo cõsequi omnino videtur in contrahen-  
 da venditione contra venditorem, & emptione con-  
 trahenda contra emptorem ambiguum pactum inter-  
 pretandum esse Et id quidem de venditore tam diser-  
 tẽ non hac regula solum, sed aliis etiam prudentum  
 responsis est definitum, ut nullam eas res admittat am-  
 plius dubitationem, d. c. 39. c. 21. & cap. 33. de contrah.  
 empt. De emptore verò omnino dubitaretur, si Paulus  
 non scripsisset *in emptione contrahenda legem emptionis  
 contra emptorem secundum venditorem interpretandam esse*,  
 cap. 34. d. tit. Et rectẽ quidem, nec ullam admittit re-  
 sponsum illud emendationem, si modò verum est, ut  
 venditionem, ita quoque emptionem contrahi, &  
 (quod toties inculcant iurisperiti) *obscuritatem pacti  
 iis nocere qui potuerunt re integra apertius loqui*, d. c. 39.  
 d. cap.

DE DIVERSIS REGVLIS IVRIS. 389  
d. cap. 21. & 99. de verb. oblig. Quod etiam Accursius  
ignorasse non videtur. Ambigua autem intentio ita  
accipienda est, vt res salua actori sit. Semper enim in  
dubiis id agendum est, vt quàm tutissimo loco res sit  
bona fide contracta; nisi cùm apertè contra leges, scri-  
ptum est, cap. 21. de reb. dubiis.

CLXXIII. PAVLVS LIB. VI.  
AD PLAVTIVM.

*In condemnatione personarum qua in id quod facere  
possunt damnantur, non totum quod habent extorquendum  
est, sed & ipsarum ratio habenda est, ne egeant.*

DE iis qui in id quod facere possunt damnantur,  
latissimè disseruimus ad huius tituli cap. 28.

AD §. CVM VERBVM.

*Cum verbum RESTITVAS lege inuenitur, etsi non  
specialiter de fructibus additum est, tamen etiam fructus  
sunt restituendi.*

AD Plautium lib. 6. scripsit Paulus, in Fabiana actio-  
ne & Pauliana fructus restitui, Nam verbum RESTI-  
TVAS quod in hac re prator dixit, plenam habere significa-  
tionem, vt fructus quoque restituantur. Cùm enim ver-  
bum RESTITVAS in lege inuenitur, etsi non spe-  
cialiter de fructibus additum est, tamen etiam fructus  
sunt restituendi, cap. 38. §. 3. de vsuris, cap. 35. de  
verbor. significat. Per legem lex intelligi potest Fabia-  
na, quam prator obseruans, ea qua in fraudem patroni  
alienata sunt, restitui iubet, auctore eodem Paulo, sen-  
tent. lib. 3. tit. 3. cap. 1. §. penultimo si quid in fraud.  
patron. Et ita quæ iubente prætore fit restitutio, eadem  
fieri lege hac regula dicitur; quemadmodum bonis in-

390 IAC. RAYARD. TOM. I. COMM.  
*terdici lege aut moribus solet, ipso pretore verba solennia pronuntiant; ut est apud Paulum sentent. libro 3. tit. 4. & Vlpianum, cap. 5. de acquir. hered.*

AD §. VNICUIQUE.

*Vnicuique sua mora nocet, quod in duobus reis promittendi observatur.*

EODEM libro de mora scripsit Paulus. Ait enim *moram rei nocere quoque fideiussori: sed si fideiussor servum obtulit & reus moram fecit, mortuo Stichio fideiussori succurrendum; unicusque enim nocere suam moram, cap. 88. de verborum oblig. Quod & in duobus reis promittendi observatur. Testatur enim Marcianus si duo rei promittendi sint, alterius moram alteri non nocere, cap. 32, §. fin. de usuris. Et ita Paulus quoque ad Plautium scripsit; cui omnino contrarium est quod ex eodem Plautio sic refert Pomponius; Ex duobus reis eiusdem Stichi promittendi factis, alterius factum alteri quoque nocet capite penultimo de duobus reis. Non est quod cum Accursio suspiceris de duobus reis sociis sentire Pomponium. Verisimilius enim est scripsisse Pomponium, eo sensu factum vnius rei alteri nocere quò ab eodem traditum est altero ex duobus reis capite diminuto alterum non liberari, cap. fin. d. tit. Et ita factum vnius rei alteri nocet, sicut diximus suum cuique factum nocere, cap. 155. hoc tit. Delictum haud dubiè per factum intelligentes.*

AD §. DOLO FACIT.

*Dolo facit qui petit quod redditurus.*

Id ipsum à Paulo quoque traditur, cap. 8. de except. doli mal. Et quia verus regula huius sensus est,  
cum



DE DIVERSIS REGVLIS IVRIS. 391  
tum dolo facere qui id petere audet, quod eidem à  
quo petit se redditurum esse non ignorat, certè de iis  
curiosius inquirendum non est, quæ Accursius obiicit,  
Ad res enim litigiosas hæc regula trahi nullo modo  
potest, cap. fin. de rei vindicat. cap. 3. §. 11. ad exhibend.  
cap. 25. C. locati.

## CLXXIV. PAVLVS LIB. VIII.

### AD PLAVTIVM.

*Qui possit facere ut possit conditioni parere, iam posse  
videtur.*

AD Plautium libro 8. ait Paulus *dubitatum fuisse, si  
seruus sub conditione fuerit heres institutus, an bonorum  
accipere possessionem possit: & ait posse, idque Scauolam  
probasse, cap. 10. de bon. possell. secund. tabu. si modò  
conditioni parere possit huiusmodi seruus. Qui enim facere  
potest, ut possit conditioni sub qua institutus est, parere, idem  
quoque iam posse videtur bonorum accipere possessionem,  
quemadmodum eodem loco à Paulo traditum est. Et  
hoc etiam verum est si prætor de serui conditione cer-  
tus sit, tunc enim bonorum possessionem rectè admit-  
tere seruus potest, cap. 7. de bon. possell.*

### AD §. QVOD QVIS.

*Quod quis si velit habere non potest, repudiare non potest.*

EODEM ad Plautium libro 8. scripsit Paulus, *tuto-  
rem bonorum possessionem pupillo competentem repudiare  
non posse, quia tutori petere quidem permissum est,  
non autem repudiare, cap. 8. de bon. poss. cap. 49. de ac-  
quir. hæred. Cur autem repudiare permissum non sit,  
quænam obsecro in medium adferri alia ratio posset,  
quàm hæc iuris regula, præsertim cum de eodem*

Pauli ad Plautium lib.8. desumptam constat? Tutor igitur quia si velit bonorum habere possessionem non potest, certè nec eam poterit repudiare. Is enim potest repudiare qui & acquirere potest, cap.4. & cap.18. de acquir.hæred.cap.45. §.1. de legat.2.

## CLXXV. PAVLVS LIB. XI.

## AD PLAVTIVM.

*In his qua officium per liberar fieri personas leges desiderant seruus interuenire non potest. Non debeo melioris conditionis esse quàm auctor meus, à quo ius in me transit.*

INTER huiusmodi officia magistratus, equestres & senatoriæ dignitates, iudicia, arbitria, militiæ, postulatio, & testimonij dictio, numerantur; à quibus seruos esse repellendos passim traditur, cap.6. de testibus, cap.12. de iudiciis, c.3. de offic. prætor. cap.7. de receptis. Atque ita officium accipi ex eo constat, quod præsides & procôsules eorumque comites officij causa in prouinciis agere vel militare dicantur, cap.46. & 72. de contrahend. empt. cap.46. de iure fisci. Eoque sensu senatoria & equestria officia refert Suetonius biennij spatio determinare Sergium Galbam voluisse; diuum Titium recepta ad se propè omnium officiorum cura, patris nomine epistolas dictasse & edicta conscripsisse, orationesque in senatu recitasse quæstoris vice: Vespasianum Augustum perlectis epistolis officiorumque omnium breuiariis, amicos admisisse. Hæc ita Suetonius, euidenter demonstrans quàm lata ciuiliū officiorum sit appellatio, quibus receptum est vt serui non fungantur, d. §. penult. Ciuili quoque officio funguntur qui absunt reipublicæ causa, etiam si milites sint, cap.62. de contrahend. empt. cap.1. de re milit. cap.7. ex quibus caus. maior. Et idcirco nec reipublicæ causa abesse, nec milites esse serui possunt,

possunt, cap. 7. si quis cautionibus cap. ult. hoc tit. c. 11. de re milit. cap. 6. C. qui milit. poss. cap. 2. C. de tyronibus. Proinde si reipublicæ ad bellum necessarius videretur vsus seruorum, aliter illi in numeros non refererentur, quàm si manumissi essent. Id enim indicat Suetonius, cùm ait *D. Augustum seruos viris mulieribusque pecuniosioribus indictos, ac sine mora manumissos sub priore vexillo habuisse, neque aut commistos cùm ingenuis, aut eodem modo armatos.* Nec mirum seruos ab omni militia fuisse prohibitos, cùm scripserit Valerius lib. 2. *populum Romanum operam dedisse, ne Imperatoribus capite censos sacramento rogare esset necesse, quorum nimia inopia suspecta erat, idcircoque publica arma iis non committerentur.* Quod autem Paulus ait, *non debere me conditionis esse melioris, quàm fuerit auctor meus,* id nullam continet obscuritatem, & est iam sapius ea de re à nobis tractatum.

## CLXXVI. PAVLVS LIB. XIII.

## AD PLAVTIVM.

*Non est singulis concedendum quod per magistratum publice possit fieri, ne occasio sit maioris tumultus.*

**LIBRO** ad Plautium tertio decimo scripsit Paulus si maris proprium ius ad aliquem pertineat, **VT I POSSIDETIS** interdictum ei competere, si prohibeatur ius suum exercere, cap. 14. de iniur. Nec aduersarium iuuabit, quod dicat mare & litora maris communia esse naturali iure, capit. 2. & 3. de rer. diuis. ac proinde naturaliter ei, qui quod commune est efficere proprium studet, resisti posse, cap. 13. §. si. de iniur. Quia enim vsurpatum est tametsi nullo iure, vt quis prohiberi possit antè ædes meas vel prætorium piscari, d. §. fin. certè ad officium magistratus, ne occasio sit

B b 5

maioris

maioris tumultus faciendi, hanc omnem controuersiam referri voluerunt prudentes, & interdicto locum esse; quoniam ad priuatam causam iam pertinet hæc res; non ut olim ad publicam, d.c. 14. Quamobrem si quis antè prætorium suum proprio priuatoque iure piscari sine magistratus auctoritate impediatur, iniuriarum agere potest, d.c. 13. in fine. Non enim id facere singulis concedendum est, quod per magistratus fieri publicè potest. Eoque pertinet quod lib. 5. Hexameron c. 10. sic Ambrosius scribit, *Spatia maris sibi vindicant iure mancipij, pisciumque iura sicut vernaculorum conditione sibi seruitij subiecta, commemorant. Iste, inquit, sinus maris meus est, ille alterius. Diuidunt elementa sibi potentes.* Et de Nabuthe, c. 3. *Inducis mare intra prædial tua, ne desint belua; producis fines terra, ne possis habere finitimum.* Meminit etiam maritimarum huiusmodi piscinarum Varro de re rustica l. 3. c. 17. & Columella, l. 8. c. 16.

## AD §. INFINITA.

*Infinita æstimatio est libertatis & necessitudinis.*

PER necessitudinem ius intelligitur cognationis & affinitatis, cap. ult. de iustit. & iure. Est etiam, ut ait Fronto, *necessitudo vel sanguinis, vel meritorum, cum præceptoribus, cum amicis.* Nec mirum infinitam esse necessitudinis æstimationem, cum scripserit Festus, *in necessarios, qui aut cognati aut affines sunt, necessaria officia conferri præter ceteros.* Eoque pertinere cap. 21. solut. matrim. admonuimus suo loco.

## CLXXVII. PAVLVS LIB. XIV.

## AD PLAVTIVM.

*Qui in ius dominiũve alterius succedit, iure eius vitæ debet. Nemo videtur dolo exequi qui ignorat causam cur non debeat petere.*

AD

AD Plautium lib. 14. refert Paulus, *cum hereditatem aliquis vedit, esse debere hereditatem ut sit emptio, c. 7. de hered. vel act. vendita. Hæredemque res hereditarias eodem iure tradere debere emptori, quo à defuncto eas accepit. Qui enim in ius dominiūve alterius succedit, iure eius in alienando vii debet, c. 14. d. tit. Nam defuncti personam ita repræsentat, ut, non bonorum duntaxat, sed sacrorum quoque dicatur hæres, auctore Festo; indèque etiam est quod successionē dicamus hæredis, non accessionem, quemadmodum docet Ambrosius enarrans Psalm. 37. Et quamvis omnes hereditarias actiones præstare soleat hæres emptori, illud tamen observabatur, ut hæres emptori non præstaret quòd non debitum exegerat, cap. 2. §. 6. d. tit. Id enim sine dolo malo potuit ab hærede factum videri. Nam, ut eodem ad Plautium l. 14. scripsit Paulus, *nemo videatur dolo exequi, hoc est, iudicio persequi rem aliquam, qui causam ignorat cur eam non debeat petere. Quod ipsum ab Ulpiano quoque traditum est, c. 2. §. 5. de doli ma. & met. except.**

## CLXXVIII. PAVLVS LIB. XV.

## AD PLAVTIYM.

*Cum principalis causa non consistat, plerūque nec ea quidem qua sequuntur locum habent.*

SI fons exaruerit ex quo ductum aqua habeo, isque post constitutum tempus, quo amitti non utendo servitus solet, ad suas venas redierit, dubitatum fuit an aqueductus amissus sit. Et ait quidem ad Plautium lib. 15. Paulus, aqua ducenda ius amissum esse, quia principalis causa, nimirum ipsius fontes scaturigo esse desijt. Cum enim principalis causa non consistit, plerūque nec ea quidem qua sequuntur locum habere. Nihilominus tamen Casarem rescripsisse ius non negligentia aut culpa amissum, restituendum esse, fonte

*fonte ad venas suas redeunte, c. 35. de seruit. rustic. præd. Eoque pertinet illud Cypriani aduersus Demetrianum; Et fons qui exundantibus prius venis largiter profuebat, senectute deficiens, vix modico sudore distillat. Nec alia ratio est cur scripserit eodem libro Paulus, loco sacro, sancto, vel religioso interueniente, seruitutem constitui non posse. Huiusmodi enim locis uti fas non est, c. 17. §. 3. de aqua & aq. plu. arc. act. Quo fit, ut nec ijs seruitus possit imponi. Cum enim principalis causa non consistit, plerumque nec ea quæ sequuntur locum habent. Causa principalis est usus siue possessio loci; accessorium loci eiusdem habitus, siue qualitas, cap. 86. de verb. sign. Cur autem plerumque dixerit Paulus, ab alijs obseruatum est.*

## CLXXIX. PAVLVS LIB. XVI.

AD PLAVTIUM.

*In obscura voluntate manumittentis fauendum est libertati.*

Id enim humanitas est; & in ambiguis rebus humaniorem sententiam sequi oportet, c. 10. in fi. de rebus dub. c. 10. in fi. de manumiss. testam.

## CLXXX. PAVLVS LIB. XVII.

AD PLAVTIUM.

*Quod iussu alterius soluitur, pro eo est quasi ipsi solutum esset.*

Si donaturus mulieri iussu eius sponso numeravi, & nuptiæ securæ non sunt, mulier condicet. Ipsi enim mulieri solutum à me videtur, ac deinde à muliere sponso traditum. Nam *quod iussu alterius soluitur, pro eo est quasi ipsi solutum esset*, quemadmodum ad Plautium scripsit Paulus libro 17. cap. 9. in princ. de condict. causa

DE DIVERSIS REGVLIS IVRIS. 397  
causa dat. cap. 64. de solut. Non est enim corpore &  
actu necesse apprehendere possessionem, sed oculis  
quoque & affectu, cap. 1. §. 13. de acq. poss. Atque ita  
qui mandat solui, ipse etiam videtur soluere, capitulo  
quinquagesimo sexto de solut.

CLXXXI. PAVLVS. LIB. I.

AD VITELLIVM.

*Si nemo subiit hereditatem, omnis vis testamenti soluitur.*

SI nemo, inquit Pomponius, hereditatem adierit, ni-  
hil valet ex his quæ testamento scripta sunt. cap. 9. de test.  
tut. Non enim potest vllum testamentum valere, quod  
hæredem non habet, capite tertio de his quæ in te-  
stam. delent. Proinde si nemo ex pluribus hæredibus subiit  
hereditatem, vis omnis testamenti soluitur, cap. 17. si quis  
omissa caus. testam. c. 14. C. de fideic. Siquidem vis te-  
stamenti cum hæreditatis aditione adeo est coniu-  
cta, vt qui hæreditatem adit, adire quoque testamen-  
tum dicatur. Explicans enim Psalm. 18. sic scripsit ser-  
mone decimo quarto beatus Ambrosius; *Nonnullum ta-*  
*men testamentum singuli adeunt, & omnes possident.* Idem  
Ambrosius Epist. libro nono. *Vbi, inquit, testamentum,*  
*ibi hereditas.* Et hæc quidem locum habent in hæredi-  
tatibus directis. In fideicommissarijs enim hæredita-  
tibus prouisum est, vt si scriptus hæres noller adire  
hæreditatem, iussu prætoris adeat eam & restituat,  
d. c. 17. & c. 38. §. 1. de vulg. & pup. substit. Sed quia in-  
uitus adit, destitui videtur iure ciuili testamentum, &  
ideò secundas tabulas non oportere resuscitari aditio-  
ne huiusmodi coacta; respondebat Quintus Cerui-  
dus Scæuola. Aliud tamen ius in vsu fuisse Paulus  
auctor est, quia pupillares tabulæ pars sunt prioris te-  
stamenti, eoque fit vt prioris testamenti viribus non  
solutis,

398 IAC. RÆVARD. TOM. I. COMM.  
solutis, nec posterioris quoque soluantur vires, d. §. 1.  
Et hoc inde, ni fallor, quod in ijs testamenti tabulis  
quibus instituuntur & substituuntur hæredes, duæ  
intelligantur hæreditates diuersæ contineri, cap. 2, §. 2.  
de hæred. vel. act. ven. vna quidem in prima, altera ve-  
rò in ima cera. Eoque videri potest Suetonius respec-  
xisse, de C. Cæsare ita scribens; *Novissimo testamento tres  
instituit hæredes sororum nepotes, Caium Octavianum ex do-  
drantie, & L. Pinarium & Q. Pedium ex quadrante; reli-  
quos in ima cera.* Sensus enim est tres solos sororum ne-  
potes sibi C. Cæsarem hæredes instituisse, & reliquos  
his tribus substituissse. Nam hæc potissimum ratione  
in ima cera secunda hæreditas scribebatur, quod  
quamdiu priori testamento locus esset, ad posterius  
non soleat veniri. Et idcirco sic tabulæ testamenti in-  
terdum aperiebantur, vt ex septem signis ea tantum  
rumperentur quæ priori hæreditati imposita erant,  
salvis supra imam ceram reliquis signis; id quod de  
pupillari substitutione tradidit expressè Caius Instit.  
lib. 2. tit. 4. Vt igitur suas secundæ tabulæ vires reti-  
neant, nihil interest an ultro adeat, an verò per præto-  
rem fideicommissarium coactus restituat hæres insti-  
tutus hæreditatem. Prioris enim testamenti pars sunt  
tabulæ secundæ, d. §. 1.

## CLXXXII. PAVLVS LIB. III.

### AD VITELLIVM.

*Quod nullius esse potest, id vt alicuius fieret, nulla obli-  
gatio valet efficere.*

LIBER homo in stipularum deduci non potest;  
quia nec dari oportere intendi, nec æstimatio eius  
præstari potest, c. 103. de verb. obligat. Ideò dari oportere  
hominem liberum non intenditur, quia nullius  
esse potest, cap. 70. de contrah. empt. ideò nec eius  
præstari



præstari potest æstimatio, quia libertas res est inæstimabilis, cap. 106. hoc tit. Nec obest quòd homo liber possit effici seruus, capit. 5. §. 1. de statu ho. *Qua enim ab initio inuilis fuit stipulatio, non conualescet ex post facto, §. nec in pendentì.* Instit. de inutilib stipulat. Idem iuris est si rem sacram vel publicam dari quis stipulatur. Quamvis enim res sacra prophana fieri, & vñibus publicis relicta, in priuatos vñus reuerti possit, nihilominus propter eandem rationem inutilis est stipulatio, capit. 83. §. 3. de verb. oblig. *In stipulationibus enim id tempus spectatur, quo contrahimus,* cap. 78. d. tit. *Et idcirco quod nullius esse tempore contractus potest, id ut aliquo tempore fiat alicuius, nulla efficere valet obligatio.* Nam quæ dominio nostro exempta sunt, in obligationem deduci nullo modo possunt, cap. 34. §. 1. de contrah. empt. Quomodo autem res sacra fiat profana, suo loco demonstrabitur.

CLXXXIII. MARCELLVS LIB. III.  
DIGESTORVM.

*Esti nihil facile mutandum est ex solemnibus, tamen ubi aequitas euident poscit, subueniendum est.*

CITATIONES fieri in iure solent voce præconis, cap. 7. de in integ. restitut. Qui in ius vocabantur, siue denuntiatione, siue per edictum, etiam citari dicebantur, cap. 15. §. 2. de iure fisci. Suetonius in Tibério; *Citati ad causam dicendam partim se domi vulnerauerunt.* Et in Caligula; *Alios cum clam interemisset, citare nihilominus ut viuos perseuerauit.* Liuius lib. 3. *Citari iubent in curiam patres.* In iure tam actores quam reos citari voce præconis consueuisse, ex Asconio & Apuleio ostendimus suo loco Irenæus lib. 1. aduersus hæreses, cap. 9. *Ecce, iudex in proximo, & præco me iubet meæ defensionem*

400 IAC. REYARD. TOM. I. COMM.  
defensioni adesse. Auctor est lib. 3. Digestor. Marcellus, *si citatus non respondet, morem esse ut pronuncietur*, d. cap. 7. Quibus verbis ad eum morem respexit Marcellus, quo reum, cuius nomen citabatur, non respondentem præco declarabat abesse. Tunc enim summum cognoscens prætor, aut iusta, aut iniusta de causa citatum abesse, auditis eorum qui ad excusationem admitti desiderabant, allegationibus, pronuntiabat, quemadmodum demonstratum à nobis est Protribunalium libro singulari. Atque ita, *si prætor reum citatum non iusta ex causa pronuntiaret abesse, eaque ratione etiam absentem posse condemnari, & confestim sedentem adhuc protribunali prætorem adiret reus*, scripsit Marcellus *eum restitui posse; quia non sua culpa, sed parum exaudita voce præconis defuisse existimari potest*, d. cap. 7. Nec eius haberi rationem voluit D. Antoninus, quod mos receptus diceretur immutari. Etsi enim nihil facile ex solemnibus est immutandum, tamen ubi evidens aequitas poscit, solemnibus receptisque moribus salvis subueniendum est, d. cap. 7.

#### CLXXXIV. CELSVS LIB. VII. DIGESTORVM.

*Vani timoris iusta excusatio non est.*

**VOLVERUNT.** *Decemviri tempus indicati faciendi esse mensis unius*, auctore Gellio lib. 20. cap. 1. Deque eo tempore videtur Vlpianus sensisse, cum scriberet *repleri ex lege quod sententia deest, si minorem diem statuerit index tempore indicati legitimo*, cap. 4. §. 3. de re iudic. Sic etiam Papinianus tempus quod condemnatis præstatur, legitimum appellat, cap. 3. in princ. de de vsuris. Nec aliter tempus illud liberum erat debitoribus, quàm si satisfdatum foret, præsertim in grauioribus causis, cap. 16. §. 1. de acceptilat. Ait enim Valerius

Valerius libro quarto. *Scipionem Asiaticum à consule in vincula publica duci iussum fuisse, quod iudicata pecunia satisfacere non posset.* Porro legitimum tempus quod iudicatis dabatur, à maioribus qui pro tribunali cognoscebant, iudicibus, non tam præcisè debebat observari, quin illud pro causæ qualitate & quantitate vel personarum obsequio vel contumacia nonnunquam arctare, nonnunquam ampliare potuerint, capite 2. de re iudicata. Si quæ iis qui fatentur se debere, vel qui ex re iudicata necesse habent reddere, tempus ad soluendum fuerit prorogatum, eorum qui intra prorogatum diem non soluebant, pignora capiebantur, & post duos menses vendebantur, cap. 31. de re iudic. Et ea quidem *distraçtio pignorum fieri per officium solet*, cap. 74. de euiccionibus, hoc est, per apparitores prætoris extra ordinem sententias exequentes, cap. 50. de euiccionibus. Apparitores autem viatores dicuntur non liçtores, *quamvis tam liçtores prætor haberet, quàm viatores*, ut est apud Gellium libro decimo tertio, cap. 12. Aliçtoribus enim apparitores separat Suetonius in Domitiano, his verbis; *Cùm hastis militaribus præcederent eum inter liçtores apparitoresque.* Sanè viatores consueuisse sententias exequi, non liçtores, ex eo patet evidentissimè *quod viatores interpretetur litium executores* Iustinianus §. tripli Institutione de actionibus. Videlicet ea ratione qua tradidit Vlpianus *missum in possessionem, si non admittatur, per viatorem introducendum esse*; cap. 5. §. 21. ut in poss. legat. prætoris haud dubiè viatorem intelligens, cap. 5. §. 9. de rebus eor. Et hæc quidem cùm ita se habeant, nunc intelligimus quidnam hæc regula Celsus voluerit. *Si creditor cui reus indicatus est, tam fuerit meticulous, ut vulgati sententiarum executione non contentus, condemnati debitoris nomine decem à Tizio stipulatus dein-*

*ceps à Seio indicata pecunia satisfdari stipuletur, de estimatione eius quod stipulatoris interest satisfdari, cum satisfdatum non esset, dubitatum fuit. Et ait quidem libro 6. ff. Celsus; interdum nihil estimandum esse. Nimirum si debitor & is qui decem promisit, tam fuerint locupletes, ut censu essent in ordinem equitum vel decurionem lecti. Nam per hoc vanus omnino videtur creditoris metus, de tam exquisita securitate solliciti, eaque vanitas excusanda non est, nec illius timoris ulla in estimatione eius quod interfuit satisfdari, ratio est habenda. Vani enim timoris ut nullam iustam excusationem, ita nullam quoque, ait Celsus, estimationem esse, cap. 13. de re iudicata. Aliud erat si tam de Titij pœnam promittentis, quam de ipsius rei condemnati facultatibus diffiderent homines. Tunc enim eius quod creditoris interfuit à Seio satisfdari cum non esset satisfdatum forte non soluta ratio haberi solet, d. cap. 13. nam desiit esse vanus timor.*

## CLXXXV. CELSVS LIB. VIII.

## DIGESTORVM.

*Impossibile nulla obligatio est.*

IMPOSSIBILE est quod meum est amplius meum fieri cap. 14. §. 2. de except. Et ideo rei suæ emptio consistere non potest, cap. 19. de viurpat. cap. 45. hoc tit. Quamvis vnus ex venditoribus meliorem adferre possit conditionem, Nam, ut ait libro 8. ff. Celsus, *emere cum tota re etiam nostram partem possumus*, cap. 13. de in diem addict.

## CLXXXVI. CELSVS LIB. XII.

## DIGESTORVM.

*Nihil peti potest ante id tempus quo per rerum naturam persolui possit: & cum soluendi tempus obligationi additur, nisi eo praterito peti non potest.*

PAVLVS

P A V L V S auctor est *interdum puram stipulationem ex re ipsa dilatione capere*, veluti si quis id quod in vtero est, aut fructus futuros, aut domum futuram stipulatus sit; tunc enim incipit actio. cum ea per rerum naturam præstari possunt, cap. 73. de verborum obligat. Nam vt ait Celsus, *nihil peti potest ante id tempus quo per rerum naturam persolui possit*. Atque ita Celsum hanc regulam accipi voluisse, euidenter demonstrat Pomponius, cap. 14. d. tit. Hac enim Pomponij verba, *Celso placet*, sic videntur supplenda esse; *Celso placet libro duodecimo Digestorum*, ex quo hæc regula sumpta est. Simili modo quod debetur in diem ante peti non potest quàm dies venerit, cap. 7. de re iudic. capite 118. de verborum oblig.

## CLXXXVII. CELSVS LIB. XVI.

## DIGESTORVM.

*Si quis pregnantem uxorem reliquit, non videtur sine liberis decessisse.*

INFANS aut in rerum natura est, aut in rebus humanis. In rerum natura quidem, conceptus; in rebus verò humanis, si non editus, saltem viuens in vtero matris, cap. 1. §. 6. in fin. cap. 6. in fin. & cap. 7. de suis & legit. Quod in rebus humanis est, in rerum quoque natura est; non autem quod in rerum natura est, id omne in rebus humanis est, c. 1. de hæred. vel act. vend. Mortui in rebus humanis non sunt. Ita enim scripsit Ep. lib. 10. Seneca, *Quāvis fructus operis peracti nullus ad defunctum exemptumque rebus humanis pertineat, ipsa tamen contemplatio futuri operis iuuat*. Delinunt etiam mortui esse in rerum natura, c. 59. §. 6. de hæred. instit. Quid igitur mirum eos qui mortui nascuntur, appellari nunquam liberos potuisse? c. 129. de verb. sig. Quod igitur

Celsus ait *eum qui pregnantem reliquit uxorem non videri sine liberis decessisse*, id ad eos liberos referendum est, qui si non in rebus humanis, saltem in rerum natura sunt, cap. 18. quand. dies leg. d. cap. 7.

## CLXXXVIII. CELSVS LIB. XVII.

## DIGESTORVM.

*Vbi pugnancia inter se in testamento iuberentur, neutrum ratum est. Quæ rerum natura prohibentur, nulla lege confirmata sunt.*

IULIANVS ait *duas orationes pugnancia continentes simul falsas esse, & idcirco inutilem esse institutionem orationes pugnantes continentem*, cap. 13. §. 3. de reb. dub. Quod ipsum tradidit hac regula Celsus, huiusmodi subiiciens rationem; *Quæ enim rerum natura prohibentur, nulla lege confirmata sunt.* Nam ut ea quæ inter se pugnant, simul subsistant, non patitur rerum natura, cap. 7. hoc titulo quo fit. ut nec confirmari possint vlla lege quemadmodum docet eleganter in Enchiridio beatus Augustinus.

## CLXXXIX. CELSVS LIB. XIII.

## DIGESTORVM.

*Pupillus nec velle nec nolle in ea ætate, nisi apposita tutoris auctoritate creditur: nam quod animi iudicio fit, in ea tutoris auctoritas necessaria est.*

PUPILLVS iure civili sine tutoris auctoritate non obligatur, quia nullum dominium transferre potest, ut potè qui nec velle nec nolle creditur in ea ætate nisi apposita fuerit tutoris auctoritas, cap. 5. §. 1. & cap. 9 §. 1. de auct. tut. cap. 8. de acquir. hæred. Hæreditatem etiam adire non potest sine tutoris auctoritate, d. cap.

DE DIVERSIS REGVLIS IVRIS. 405  
 d. cap. 9. §. 2. tum quod hæreditatem adeuntes obligen-  
 tur ætæ alieno; tam etiam quòd in adeunda hæredita-  
 te opus sit *animi iudicio* hoc est scientia & certo decre-  
 to, quibus destituitur ætas pupillaris, cap. 8. & cap. 9.  
 de acquir. hæred. Et idcirco *in eo quod animi iudicio sit*  
*necessaria est tutoris auctoritas.* Eoque pertinet illud Am-  
 brosij ad Clementianum, Epistolæ. lib. 9. *Parvuli hære-*  
*des nomen nudum hereditatis non auctoritatem usurpant,*  
*iubendi ius & utendi non habent, qui plenitudinem sua æta-*  
*tis expectant, ut à curatoribus liberentur.*

## CXC. CELSVS LIB. XXIV.

DIGESTORVM.

*Quod euincitur in bonis non est.*

DE curatore bonis dando libro 24. ff. scripsit Cel-  
 sus, cap. 3. de curat. bon. dandor. *id bonorum quibus cu-*  
*rator datus est, appellatione non contineri asserens, quod*  
*euincitur: siquidem curator nec ad retinendum, exceptio-*  
*nem; nec etiam ad recipiendum id quod euincitur, actio-*  
*nem habet,* cap. 53. de acquir. rer. dom.

## CXCI. CELSVS LIB. XXXIII.

DIGESTORVM.

*Neratius consultus an quod beneficium dare se quasi vi-*  
*uenti Cæsar rescripserat, iam defuncto dedisse existimaretur*  
*respondit non videri sibi principem, quod ei quem viuere exi-*  
*stimabat, concessisset, defuncto concessisse, quem tamen mo-*  
*dum esse beneficij sui vellet, ipsius estimationem esse.*

PRINCIPIS beneficia varia sunt. Suetonius au-  
 ctor est *commeatus à senatu peti solitos, sui beneficij Clau-*  
*dium fecisse.* Solet etiam principis beneficio aut rebus  
 concedi immunitas aut personis, & quæ personis  
 Ce 3 concessa

406 IAC. RÆVARD. TOM. I. COMM.  
 concessa erat, semper extinguebatur cum personis;  
 quæ rebus, non utique, cap. 3. §. 1. de censibus. Magi-  
 stratus quoque & dignitates omnes etiam militares  
 ante quidem à senatu & populo, postea verò à prin-  
 cipe conferebantur, & beneficia dicebantur, cap. 57.  
 in fin. de re iudic. cap. vnic. de lege Iulia ambit. cap. 5.  
 de iurisd. Ait enim Suetonius *Tiberium Casarem in sus-  
 picionem venisse per quosdam beneficij sui centuriones à*  
 † *commeatu castra repetentes.* Et Cicero Epist. fam. libro  
 quinto. *De centurionibus tamen, inquit, & de tribunorum*  
*militum contubernalibus, res est in integro;* genus enim  
 horum beneficiorum definitum lege non erat. Et rur-  
 sus libro septimo. *Huic ego neque tribunatum, neque ullius*  
*beneficij certum nomen peto.* Nec aliò referendum est  
 quod Modestinus ait *abesse reipublica causa intelligi*  
*tribunos militum & comites legatorum qui ad ararium aut*  
*in commentarium principis delati sunt,* cap. 32. ex qui-  
 bus caus. maior cap. 41. §. 1. de excusat. *Erat enim*  
*moris, ut eorum qui huiusmodi beneficia fuerant à senatu*  
*populoque Romano vel à principe consecuti, ad ararium*  
*aut in principis commentarium hac potissimum inten-*  
*tione deferretur nomen, ut iis ex arario populi, aut princi-*  
*pis fisco annua darentur;* auctore Frontino de aquæ du-  
 † ctibus libro 2. Eoque spectasse videtur Cicero sic  
 pro Archia Poëta scribens; *Testamentum sæpe fecit nostris*  
*legibus, & adiit hereditates civium Romanorum, & in be-*  
*neficiis ad ararium delatus est à L. Lucullo pratore & con-*  
*sule.* Qui principis beneficio adepti erant civitatem, aut  
 ius Quiritium (illud enim à principe solere peti testis  
 est Epistolar. lib. 10. Plinius) in principis etiam com-  
 mentarium referebantur, id quod à nobis suo loco de-  
 monstratum est. Sunt & alia principis beneficia, quæ  
 ex aliorum commentariis qualia sint, faciliè cognosci  
 possunt; quibus addo ea omnia quæ iuris esse cogni-  
 tionum



tionum aliquando diximus. *Huiusmodi principis beneficia, de quibus nunc latè tractatum est, quasi viuenti à Cesare concessa, defuncto concessa non videri*: Neratius auctor est hac regula, ita tamen ut ipsius principis aestimatio sit, quem velit sui beneficii modum esse; hoc est, an etiam illud velit ad filios liberosve defuncti, optimè de re publica meriti, transmitti.

CXCII. MARCELLVS LIB. XXIX.  
DIGESTORVM.

*Ea quæ in partes diuidi non possunt, solida à singulis heredibus debentur.*

DE seruitute legata differens libro 29. Digestorum Marcellus, ait, *si quis fundum Manio & ad eum viam per alium fundum, & eundem fundum sine via Titio legasset, sine via legatum fundo cessurum; quia neque acquiri per partem seruitus potest. Ea enim quæ in partes diuidi non possunt, solida à singulis heredibus debentur legatariis singulis, quibus vnus idemque fundus relictus est in solidum singulis, cap. 3. de seruit. leg.* Nam si seruitus debetur fundo, certè ea vti poterunt singuli domini; siquidem ea sic diuidi nequit, ut pro parte debeat, pro parte non debeat, cap. 17. de seruitut. Videlicet ea ratione qua Dionysio scripsit Architas philosophus, *individa esse quæ diuisionem non admittunt, & simplicia sunt: monadem, punctum & sonum individa dici*, ut est apud Diogenem Laërtium De vitis philosophorum libro tertio. Vno eodemque sono, vno eodemque puncto vtuntur plures in solidum singuli non pro parte; agri salubritate & amœnitate fruuntur plures nõ pro parte, sed in solidum singuli. Quidni ergo sic etiam vteretur vna eademq; seruitute loci vnus plures domini? Præsertim cum liquido constet seruitures huiusmodi

nihil aliud esse quàm habitus & qualitates prædiorum, cap. 12. quemad. seruit. amit. qui habitus & qualitates diuidi nō magis possunt, quàm sonus aut punctum, quàm salubritas, quàm amœnitas. *Nam*, vt ait eleganter Celsus, *quid aliud sunt iura prædiorum, quàm prædia qualiter se habentia, vt bonitas, salubritas, amplitudo?* cap. 86. de verb. signif. d. cap. 12. Cùm igitur seruitutes indiuiduæ sint, consequens vtrique videtur, eas à singulis hæredibus solidas deberi; quæ certè pro parte, aliarum rerum diuiduarum exemplo deberentur, si in partes diuidi possent, cap. 25. §. 9. fa. ercisc. Et solet quidem rerum hæreditariarum diuisio fieri partim officio iudicis, partim ipso iure: officio iudicis, per adiudicationem. Auctor est enim tit. 19. Vlpianus, *adiudicatione dominium acquiri per formulam familia erciscunda, per formulam communi diuidundo, & per formulam finium regundorum*. Atque ita rem adiudicatam à re ex causa iudicati tradita distinxit & separauit Vlpianus, cap. 3. in fine, & c. 7. in princ. de public. in rem act. Cæterum æs alienum defuncti, in portiones hæreditarias sine aliquo iudicis factō ex lege duodecim tabularum ipso iure diuidi solet. Eoque sensu scripsit Imperator Gordianus *ea quæ in nominibus sunt non recipere diuisionem*. Per diuisionem enim intelligit iudicis officium, rationem hanc subiiciens; *Cum ipso iure in portiones hæreditarias ex lege duodecim tabularum diuisa sint*, capite 6. C. fa. ercisc. Quod ipsum eleganter etiam à Quintiliano quadam Declamatione traditum est sub hoc titulo, *Ager communis & noua tabula*, his verbis; *Finge esse aliquem ex creditoribus petitem, nunquid petere à te totam summam potest? minimè, vt opinor. Duos enim pater noster filios reliquit, & necesse est, sicut bona, ita onera esse communia. Partem ergo tu debuisti, partem ego. Et paulò post; Num dubium est quin dicturus fuerit creditor:*

*Tu*

*Tu debes mihi, patri tuo credidi, cuius ex parte dimidia hæres es, assem non possum à te petere, sed semissem petere possum. Et hoc etiam illud est quod ait Vlpianus in iudicium familia erciscunde nomina non venire, c. 2. §. fin. fam. ercisc.*

## AD §. IN RE DVBIA.

*In re dubia benigniorem interpretationem sequi non minus iustius est, quàm tutius.*

REGVLA hæc desumpta est ex c. 3. de his quæ in testam. delent. nec opus habet interprete.

## CXCIII. CELSVS LIB. XXXVIII.

## DIGESTORVM.

*Omnia fere iura hæredum perinde habentur ac si continuo sub tempus mortis hæredes extitissent.*

HÆREDITAS in multis partibus iuris pro domino habetur, ideóque hæreditati vt domino per hæreditarium seruum acquiritur, c. 61. de acqu. rer. do. Et quia hæreditas cum testatoris morte continuatur, etiam si eam adiri postea contingat, certè quod acquisitum est hæreditati, id hæredi eam post elapsos creationis dies adeunti, & cernenti, acquisitum censebitur. Nam, vt Celsus hac regula definit, *omnia ferè iura hæredum perinde habentur, ac si continuo sub tempus mortis hæredes extitissent.* Quod ipsum Cassius etiam defendit aduersus Proculi sententiam, c. 28. §. fin. de stipulat. ser. Et quamuis pro domino habeatur hæreditas, personam tamen domini veram non repræsentat; siquidem id tribui potius iuris fictioni debet, quàm rei veritati. Quo fit vt vsusfructus, qui sine persona constitui non potest, hæreditati per seruum non acquiratur,

410 IAC. REYARD. TOM. I. C C M M.  
tur, nec per consequens hæredi postea eam adveni-  
d.c.61.& c.26.de stipulat.fer. Idque Celsum non igno-  
rasse, & articulum fere, huic regulæ eadem de causa ab  
eodem Celso adiectum esse vulgò traditur.

#### CXCIV. MODESTINVS LIB. VI.

##### DIFFERENTIARVM.

*Qui per successionem quamvis longissimam defuncto hæ-  
redes constiterunt, non minus heredes intelliguntur, quam  
qui principaliter heredes existunt.*

SI hæres Titij falsum dixerit & vsque ad finem  
litis oppugnauerit testamentum, ac succubuerit, qua-  
si indignus repelli solet, cap. 13. §. 5. de iure fisci, eiús-  
que portio applicatur fisco, cap. 14. de lege Cor. de  
falsis: salua interim cohæredi sua portione. Eúmque co-  
hæredem si mori contigerit, & citrursus hæres extiterit illé  
qui vt indignus ab hereditate Titij fuerat expulsus, an  
non prohibendus esset hæres existere, dubitabatur. Et scri-  
psit quidem Differentiarum libro sexto Modestinus,  
non esse prohibendam, quia non principaliter in Titij heredi-  
tatem succedit, cap. 7. de his quæ vt indignis. Eò nihil  
obstante quod hæredis Titij existens hæres, Titio  
etiam succedere quodammodo videatur, quemadmo-  
dum hac regula traditum est ex eodem Modestini  
Differentiarum lib. 6. desumpta. Aliud enim est hære-  
dem principaliter esse, aliud non principaliter. Nam  
hæres qui falsum dicens testamentum succubuit, qua-  
tenus quidem hæres est principaliter, vt indignus re-  
pelli solet; quatenus verò principaliter hæres non est,  
vtrique non solet repelli, d. §. 5. & d. cap. 7.

#### CXCV. MODESTINVS LIB. VII.

##### DIFFERENTIARVM.

*Expressa nocent, non expressa non nocent.*

SENTEN

SENTENTIAM huius regulæ & originem veram tradidit Modestinus c. 2. de condic. & demonst. Eamque optimè Bulgarus videtur affecutus esse, quem etiam alij secuti sunt.

## CXCVI. MODESTINVS LIB. VIII.

## REGVLARVM.

*Privilegia quadam causasunt, quadam persone, & ideo quadam ad heredem transmittuntur quæ causæ sunt; quæ persone sunt ad heredem non transeunt.*

DE hac regula scripsimus ad huius tituli c. 48. quibus addi poterit cap. 29. De re iudic.

## CXCVII. MODESTINVS LIBRO

## SINGVLARI DE RITU NVPTIARVM.

*Semper in coniunctionibus non solum quid liceat considerandum est, sed & quid honestum sit.*

CONIUNCTIONES aliæ iustæ sunt & licitæ, aliæ licitæ non iustæ. Iustæ & licitæ sunt quæ legitimæ sunt, & iuri ciuili congruæ, vt sunt nuptiæ; licitæ non iustæ, quæ permittuntur tacito ciuili iure, vt est concubinatus, c. 23. & c. 31. de ritu nupt. c. 1. de concubi. Rursus ex coniunctionibus licitis, aliæ licitæ sunt & honestæ simul; aliæ licitæ quidem, non tamen honestæ. Quæ enim in concubinato est, ab inuito patre ei discedere licet, & alteri se in concubinatum dare, c. 1. de concub. Sed quia id honestum non est, hoc faciens liberta matrisfamilias perdit honestum, c. 41. de ritu nuptia. Et ita in coniunctionibus non solum quid liceat spectari solet, sed etiam quid honestum sit; cap. 41. & 42. d. tit. Non enim omne quod licet honestum est.

## CXCVIII.

CXCVIII. IAVOLENVS LIB. XIII.  
EX CASSIO.

*Neque in interdicto, neque in ceteris causis pupillo nocere oportet dolum tutoris, sine soluendo est, sine non est.*

DE tabulis exhibendis scripsisse Iauolenum libro terdecimo ex Cassio testis est epigraphe c. ult. de tabul. exhib. Et quia Paul. ait, *si tabula apud pupillum dolo tutoris esse desierint, in ipsum tutorem interdictum competere*, c. penult. d. tit. certè non possum non adsentiri Petro Fabro existimanti id ipsum etiam tractatum fuisse à Iaboleno, ex Cassio libro 13. Hac videlicet ratione quod *neque in interdicto de tabulis exhibendis, neque etiam in ceteris causis pupillo nocere oporteat dolum tutoris, sine soluendo est, sine non est.* Ait enim Paulus, *aquum esse ipsum tutorē ex delicto suo teneri, non pupillum*, d. cap. penult. Nec transfertur in pupillum post pubertatem hoc quod dolo tutorum factum est, c. 13. §. de act. empti. Ea enim duntaxat habentur rata ex rescriptis Traiani & Hadriani, quæ bona fide à tutore gesta sunt, nec interest tutor soluendo fuerit nec ne, c. 12. §. 1. de administ. & peric. tutor.

## CXCIX. IAVOLENVS LIB. VI.

## EPISTOLARVM.

*Non potest dolo carere, qui imperio magistratus non potest.*

E O QVE nomine coërcendus est, cap. fin. de iurisd. cap. 1. si quis ius dic. c. 26. §. 4. in fin. ex quib. caus. maio. Ait enim de legibus Cicero, *ut magistratibus leges, ita populo praeesse magistratus.*

CC.

## CC. IAVOLENVS LIB. VII.

## EPISTOLARVM.

*Quoties nihil sine captione inuestigari potest, eligendum est quod minimum habeat iniquitatis.*

SI testator ita scripserit, QVISQVIS MIHI ALIVS FILII FILIVSVE HÆRES SIT, ait Labeo non videri filiam contineri, Proculus contra. Labeo videtur verborum figuram sequi; Proculus mentem testantis. Et idcirco respondit Epistolarum libro septimo Iabolenus, se non dubitare, quin Labeonis sententia vera non sit, c. 116. de verb sign Est enim Labeonis sententia captionibus exposita, eò quòd ad solà relata sit verborū figuram. Nam, vt ait pro Cecinna Cicerō, quæ lex, quod Senatusconsultum, quod magistratus edictum, quod fœdus aut pãctio, quod vt ad priuatas res redeam, testamentum, quæ iudicia, aut stipulationes, aut pãcti conuenti formula non infirmari & conuelli potest, si ad verba rem deflectere velimus, consilium autem eorum qui scripserunt, & rationem & auctoritatem relinquamus. Verborum igitur figura sine captione nequit inuestigari, iusta autem & benigna mentis voluntatisque interpretatio minimum habet iniquitatis. Proinde mirum non est non Labeonis, sed Proculi definitionem secutum esse Iabolenum. Ait enim eodem libro 7. *quotiens nihil sine captione inuestigari potest, eligendum esse quod minimum habet iniquitatis.* nihil aliud volens in effectu, quàm non esse in verborum errore versandum, sed potiùs supremam testatoris voluntatem iustè ac benignè interpretandam esse: hoc enim minimum habere iniquitatis, cùm alterum illud sine captione nequeat fieri, cap. 24. de reb. dub. Et hæc quidem adeò vera sunt vt dubium non videatur, quin Labeonis

nis explosa , & Proculi sententia recepta fuerit , tum quod Pomponius & Vlpianus tradiderint *filiorum appellatione in formula testamenti etiam filias contineri*, c. 1. §. 1. de testam. tur. c. 45. de leg. 2. tum etiam quod de benef. lib. 5. c. 19. sic scripserit Seneca; *Sed ut dialogorum alteratione seposita, tanquam Iurisconsultus respondeam, mens spectanda est dantis.*

## CCI. IAVOLENVS LIB. X.

## EPISTOLARVM.

*Omnia quæ ex testamento proficiantur , ita statim euentus capiunt, si initium quoque sine vitio ceperint.*

Ex testamento proficiuntur legata & fideicommissa, proficiuntur etiam seruorum manumissiones. Et ob id si testamentum inualidum est , nihil valebit quod ex eo proficitur, c. 1. §. 1. de leg. 3. Nihil enim relinquere legato vel fideicommissio potest is qui testamenti faciendi ius non habet, d. cap. 1. §. 2. Nam, ut ait hac regula Iabolenus , *quæ ex testamento proficiuntur, ita statim euentus capiunt, si initium ceperint sine vitio*; hoc est, si ipsum testamentum, ex quo initium sumunt legata, vitiosum non sit ; cap. 29. qui testament. fac. poss.

## CCII. IAVOLENVS LIB. XI.

## EPISTOLARVM.

*Omnis definitio in iure ciuili periculosa est , parum est enim ut non subueri possit.*

PER *definitionem* intelligit Iabolenus regulam iuris ciuilis, cap. 10. de auro arg. leg. cap. 4. §. 1. de hered. Instit. Dicitur enim regula Catoniana *definire*, c. 1. de reg. Cat. Et huiusmodi quidem definitiones nonnunquam



DE DIVERSIS REGVLIS IVRIS. 415  
nunquam subuerti posse, à nobis est demonstratum  
ad huius tituli cap. 1. Quod ipsum Prosper Aquitani-  
cus non videtur ignorasse. Sic enim Epistola quadam  
de libero arbitrio scribit; *Ad defensionem alicuius defi-  
nitionis, ea promenda sunt, quæ alteri intellectui, à quo vide-  
tur definitio dissonare, non cedant, & eam regulam cui sunt  
aptata, non deserant.*

CCIII. POMPONIVS LIB. VIII.  
AD QVINTVM MVCIVM.

*Quod quis ex culpa sua damnum sentit, non intelligitur  
damnum sentire.*

TESTAMENTO hæres institutus ab eo cuius etiam  
intestati legitima hæreditas ad me pertineret, eodem mo-  
mento ex testamento & legitimam repudiare possum hære-  
ditatem. Si autem legitimam velim ad me pertinere, videbor  
ante repudiare testamentum, & sic legitimam acquisisse. Ita  
enim ad Q. Mucium scripsit Pompon. c. 77. de acq.  
vel omit. hæred. Et quia ad huiusmodi hæreditatem  
duplex patet via, certè nihil deesse videtur quo hæres  
sibi prospiciat, ne in damnum incidat. Proinde si ex  
testamento hæreditas adita fuerit, eamque contigerit  
damnosam esse, non intelligitur is qui adiit; damnum  
sentire. Nam, ut ait eodem libro Pomponius, *quod quis  
ex sua culpa damnum sentit, non intelligitur damnum senti-  
re.* Potuit enim & vtrunque & alterutram, repudiare,  
& quantitas. Inst. ad leg. Falc. potuit etiam tempus de-  
liberandi impetrare, atque i. a instruere se, expediret.  
nec ne agnoscere hæreditatem c. 5. de iure deliber.

CCIV. POMPONIVS LIB. XXVIII.  
AD QVINTVM MVCIVM.

*Minus est actionem habere quam rem.*

PETIMVS

PETIMVS vel esse aliquid nostrum, vel dari nobis aliquid oportere, cùm in rem agimus, cap. 6. de rei vindic. Atque ita fit vt minus sit actionem habere quàm ipsam rem. Nam qui in rem agit, fieri potest vt licet actionem impetrauerit, rem tamen nunquam consequatur. Ait enim Caius, *eum nullam videri actionem habere, cui propter inopiam aduersarij inanis actio est*, cap. 6. de dolo. Testis est etiam Scæuola *sumptus in petendo & euentus executionis posse incertos esse*, cap. 51. de peculio.

## CCV. POMPONIVS LIB. XXXIX.

AD QVINTVM MVCIVM.

*Plerumque fit vt etiam ea quæ nobis abire possint; proinde in eo statu sint atque si non essent eius conditionis vt abire possent; & ideo quod fisco obligamus, & vindicare interdum, & alienare, & seruitutem prædio imponere possumus.*

CVM enim fit alienatio cùm sua causa dominium ad alium transferimus, quæ esset futura, si ea res apud nos mansisset, idque toto civili iure ita se habere, testatur eodem ad Quintum Mucium lib. 39. Sextus Pomponius, c. 67. de contrah. empt. Et ideo fit vt rem fisco obligatam possimus à non domino vindicare, possimus alienare, & etiam prædio non prohibeamur imponere seruitutem. Huiusmodi enim vindicatio, alienatio, & imposio seruitutis fieri cum sua causa intelliguntur, c. 20. de solut. c. 12. C. de distract. pignor. c. 20. de acq. rer. do.

## CCVI. POMPONIVS LIB. IX.

EX VARIIS LECTIONIBVS.

*Iure natura æquum est neminem cum alterius detrimento & iniuria fieri locupletiores.*

QVOD

QVOD pupillus sine tutoris auctoritate mutuum accepit, & locupletior factus est, si pubes factus soluerit, non repetet. Nam, ut ait Pomponius, *naturâ æquum est, neminem cum alterius detrimento fieri locupletiores*, cap. 13. & 14. de cond. indeb. cap. 6. de negot. gest.

CCVII. VLP IANVS LIB. I. AD  
LEGEM IVLIAM ET PAPIAM.

*Res indicata pro veritate accipitur.*

AD legem Iuliam & Papiam libro primo. ait Vlpianus, *ingenuum accipi etiam eum de quo sententia lata est, quamvis fuerit libertinus, quia res indicata pro veritate accipitur*, cap. 25. de statu hom. Idque eo pertinet quod senatores lege Iulia prohiberentur libertinas uxores ducere, cap. 44. de ritu nupt. Eaque de re differens ad legem Iuliam & Papiam lib. primo Vlpianus, scripsisse videtur mulierem de qua sententia lata est pro ingenua haberi, & ob id nubere senatori posse, etiam si fuerit libertina, rem enim iudicatam pro veritate haberi. Si modò in ea re per collusionem nihil factum fuerit, cap. 4. de collus. deteg. Nam, ut ait eleganter Donatus, *quod in iure semel indicatum est, rescindi, & iterum agi non potest, indeque prouerbiū, Actum agere*, cuius apud Terentium frequens est mentio, natum putat, pro eo quod est nihil agere. Eaque etiam ratio est cur *de re indicata pacisci nemo possit*. Ita enim Alexandrum Imperatorem rescripsisse, ex iis incertis titulis constat, qui Gregoriano codici à Cuiacio tribuuntur.

CCVIII. PAVLVS LIB. III. AD  
LEGEM IVLIAM ET PAPIAM.

*Non potest videri desisse habere, qui nunquam habuit.*

Dd SVETO

SVETONIVS auctor est *legem Iuliam & Papiam aliquanto seuerius quàm ceteras Augustum emendasse*. Ea lege inter alia præcipuè cauebatur ne cœlibes & orbi ex testamentis ciuium Romanorum quicquam caperent; quemadmodum docet euidenter Tacitus Annalium libro tertio his verbis; *Et lege Papia Poppæa præmiis inducti; si à priuilegiis parentum cessaretur, velut parens omnium populus vacantia teneret*. Sensus enim est, diuum Augustum multis præmiis ad legitimam liberorum procreationem inuitasse ciues Romanos, ac pertinaciùs parentum priuilegia reiicientes, ita puniuisse, vt ex aliorum testamentis nihil quicquam caperent, sed eorum loco succederet populus. Vt autem suspicer nullam Iuliæ legis rogatione inter cœlibes & orbos factam fuisse differentiam, facit hîc Taciti locus *quo ararium traditur vacantia bona occupasse, si à priuilegiis parentum cessaretur*. Hoc enim nihil est aliud, quàm si cœlibes & orbi contemnerent iura parentum; hi quidem sterilitatis causa nuntium vxori non remittentes, illi verò in cœlibatu viuere gestientes. Idque eo mihi persuadeo constantiùs, quod sciam Hermogenianum scripsisse *propter sterilitatem commodè retineri matrimonium non posse*, cap. 60. de donat. int. vir. & vxor. Auctor est eodem libro Tacitus *impetrante Tiberio relatum fuisse de moderanda Papia Poppæa, quam senior Augustus post Iulias rogationes. incitandis cœlibum pœnis, & augendo arario sanxerat; relationique causam dedisse gliscientem periclitantium multitudinem, cum omnis domus delatorum interpretationibus subuerteretur, multorumque excissi fuissent status, ni Tiberius statuendo remedio quinque consularium, quinque è pratoris, totidem è senatu sorte duxisset, apud quos exoluti plerique legis nexus, modicum in præsens lenamenum erant*. Ac tunc quidem primùm arbitror Papiam legem ita fuisse retractatam, vt cum

antea

antea nulla esset, certa deinceps obseruaretur cœlibis, orbi, & patris solitarij differentia, sic quidem vt cœlibes ab omni testamentariæ successionis commodo secluderentur; orbi verò semissem obtinerent relictorum, & pater solitarius certam portionem. Id quod ex Vlpiani titulo decimo tertio planè cognosceretur, si integer esset, quamuis interim ea quæ de cœlibe & orbo diximus, auctore suo non destituantur. Is enim consentanea ex Sozomeno libro primo historiæ tripartitæ annotata quædam reperiuntur. Nec quidem vel diuortio, vel morte matrimonio soluto, protinus nouum contrahi voluit Augustus matrimonium. Testatur enim titulo decimo quarto Vlpianus, *fœminis legem Iuliam à morte viri vacationem anni tribuisse* (credo propter luctus legitimum tempus) *à diuortio sex mensium; legem autem Papiam à morte viri biennij; à repudio anni & sex mensium.* Non est quod hîc hæreas, & pro Biennij, suspiceris Triennij ex Suetonio reponendum esse. Ait enim Dio, *palam dixisse Augustum, se nunquam festinare cœlibes coëgisse, ac iis primum quidem triennium, postea verò biennium se dedisse.* Hæc cum ita sint, nunc satis apparet quid sibi voluerint Iurisconsulti de iis differentes qui solidum ex aliorum testamentis consequi lege Papia prohibentur, c. 72. & c. 88. §. fin. de hæred. instituend. c. 6. de vulgar. & pupil. cap. 16. §. 13. ad S. C. Trebel. c. 67. in fin. d. tit. De orbis enim sentiunt & patribus solitariis quos certum est solidum consequi non potuisse, iisque auferri solere quod capere non poterant, & in ærariū redigi, d. c. 67. in fin. & c. 12. §. fi. de iure fisci. Cœlibes autem nihil potuisse capere, adeò verum est vt scripserit Vlp. tit. 17. *quod cœlibi testamento relictum est, caducum fieri, si legi intra dies centum cœlebs non paruerit.* De quæ eo arbitror sensisse Clementem cap. octagesimo secundo

420 IAC. RÆVARD. TOM. I. COMM.  
 de acq.hæred. Vnde & illud perspicuum est quod hæc  
 regula traditur. Cùm enim ea ex Pauli ad legem Iu-  
 liam & Papiam libro tertio desumpta sit, certè ad cœ-  
 libes, orbos, & patres solitarios non incommodè vi-  
 detur referri posse: præsertim cùm scripserit Vlpianus  
*eos qui solidum capere non possunt ex asse hæredes institutos,  
 & rogatos restituere solidum, adire hæreditatem & restituere  
 cogendos esse*, cap. 16. §. 13. ad S C. Trebel. Quænam  
 enim alia huius responsi esse ratio potest, quàm quod  
 orbus aut solitarius pater nihil contra legem Papiam  
 faciat, integram huiusmodi hæreditatem adeundo.  
 Ipsa enim aditione nihil acquirit sibi, quo fit vt nec  
 restitutione quicquam desinat habere. Siquidem *vi-*  
*deri non potest* restituendo desuisse habere hæredita-  
 tem, qui eam non habuit adeundo. Et hoc est, quod  
 ait hac regula Paulus, *non videri eum desuisse, habere, qui  
 nunquam habuit.*

CCIX. VLPIANVS LIB. IV. AD  
 LEGEM IULIAM ET PAPIAM.

*Servitutem mortalitati ferè comparamus.*

CERTVM est ex lege Papia legatum intercidere,  
 si ante aditam hæreditatem mortuus sit legatarius.  
 Quid autem si servus factus sit? Idem erit iuris, c. 59. de  
 condic. & demonst. Nam *servitutem mortalitati ferè com-*  
*paramus*, d. c. 59. cap. 23. quand. dies legat. cap. 32. §. 4. de  
 don. inter vir. & vxor. Et ita regulam hanc interpreta-  
 tus est Gifanius noster, meo quidè iudicio rectissimè.

CCX. LICINIUS RVFINVS LIB. II.  
 REGVLARVM.

*Quæ ab initio inutilis fuit institutio, ex postfacto conua-*  
*lescere non potest.*

SCRIPTIT

SCRIPSIT Licinius Rufinus libro secundo Regularum de formula testamenti. Eamque formulam honorario & civili iure inter alia necessario requirere ait testes idoneos hæredisque institutionem non vitiosam: testes autem idoneos non esse, quibus imperari à testatore potest, ut testes fiant, cap. 6. de testib. §. in testib. Inst. de testam. Certi etiam iuris est non posse vllum testamentum valere, quod hæredem non habet, cap. 3. de his quæ in testamen. del. Hæredemque nullum intelligitur habere, si cum eo scriptus est hæres, testamenti factio temporibus tribus diuersis non fuerit, videlicet testamenti facti tempore, ut possit valere institutio; & tempore mortis testatoris, ut habeat effectum; & denique cum aditur hæreditas, cap. 49. §. 1. de hæredib. instir. Et hoc ita, si testator miles non fuerit, cap. 13. §. 1. de testam. milit. Eoque non dubium est quin hac regula respexerit Rufinus. Per initium enim tempus intelligit nuntiationis testamenti. Nam quæ eo tempore inutilis est institutio, ex postfacto nec morte testatoris, nec etiam aditione hæreditatis potest conualescere: quemadmodum nec ea valet institutio, quæ ab initio utilis existens tempore mortis testatoris, aut intra diem creationis efficitur inutilis. Nec est quod obiciat; *Latium & cœlibem*, cum quibus testamenti factio non est, si mortis testatoris tempore, aut intra diem creationis, hic quidem paruerit legi Papiæ, ille verò ciuis Romanus fiat, hæres esse posse, ideoque ab Vlpiano traditum esse tit. 22. Non enim vitiosa est huiusmodi institutio, tum quod ei insit tacita conditio, quemadmodum demonstrat Vlpianus, tit. 17. de caducis differens; tum etiam quod regula Catoniana, nec ad institutiones conditionales; nec ad leges novas pertineat, cap. 4. & cap. 5. de reg. Caton. Nam per nouas leges non dubium est quin leges Iunia Norbana de Latinis, & de orbo ac cœlibe Iulia & Papiæ in-

422 IAC. RÆVARD. TOM. I. COMM. &c.  
 telligantur. Ad huiusmodi enim leges Catonianam  
 definitionem non pertinere, adeò verum est, vt seruus  
 cœlibis aut orbi hæres institutus ad hæreditatem ad-  
 mitteretur, si dominus legi Papiæ non pareret, &  
 seruum manumitti vel alienari contingeret, antequam  
 adiretur domini iussu hæreditas, cap. 82. de acquir. hæ-  
 red. Illud autem non faciliè dixeris, quia fieri possit, vt  
 verum sit quod Papinianus ait, *Catonianam regulam  
 ad hereditates non pertinere*, cap. 3. de reg. Caton. Est  
 enim certissimum, eas ad puras institutiones omnino  
 referri, cap. 8. de lib. & posthum. Qui putat locum cor-  
 ruptum esse, probabili sanè vtitur coniectura. Liber-  
 tatis enim & hæreditatis nomina sic interdum con-  
 fusa librariorum negligentia inueniri, vt alterum fre-  
 quenter alterius occupauerit locum, ex Quintiliani  
 Declamatione, cui tit. est. *Rusticus parasitus*, animad-  
 uerti. Sic enim habent quidam codices; *Pudet dicere  
 quo pretio hereditatem manciperis*: quidam sic; *Pudet  
 dicere quo pretio libertatem manciperis*. Et idcirco in-  
 terpretis doctissimi Iac. Cuiacij coniecturam, pro *hære-  
 ditates*, existimantis apud Papinianum, *libertates* esse  
 reponendum, omnino probarem, si ad legitimas hæ-  
 reditates non videretur Papinianus respexisse, d. cap. 3.  
 Arnobius in Psalm. 5. *Hæreditas de morte parentis na-  
 scitur filiis*.

## CCXI. PAVLVS LIB. LXIX.

### AD EDICTVM.

*Seruus reipublica causa abesse non potest.*

SVMPTA est hæc regula ex cap. 7. si quis caut.  
 quod ab aliis etiam animaduersum est. Hic verò sit  
 finis, quem Deus optimus maximusque dedit, cui  
 soli laus, honor, & gloria in omni æuo.

CAPIT



CAPITVM QVÆ HIS  
QVINQVE VARIORVM  
libris continentur Elenchus.

## CAPITA LIBRI I.

**Q**UÆNAM à inrisconsultis tradita sit iuris par-  
titio. Caput I.  
Quo sensu scripserit Vlpianus, iuris nomen à iusti-  
tia descendere. II.

*Explicatur cap.8.de appellat.& cap.42.de iniuriis. III.*

*Quenam dicantur in aures, & de muliebribus ornamentis  
quedam non passim obuia. IV.*

*Quo sensu scripserit Ulpianus, vectigalia prædia longo tempore capi posse, cum eadem prædia non posse usufructuari scripserit expresse Paulus.* V.

*Emendatur & explicatur Ulpiani locus, de his qui propter loci religionem inde se mouere non possunt. VI.*

*Verus intellectus cap. 20. D. Com. diuid.* *V I I*

*Quo sensu scripserit Ulpianus, calceatum debere praefectum  
vigilum coerrare. VIII.*

*De atrocibus iniuriis quadam non vulgaria.* . . . . . I X.

*De tutela foeminarum, deque lege Claudia tutelari noua  
disputatio.* X.

*Demonstratur Triboniani de compensationibus manifestus error.* XI.

Quò sensu accipiendum sit quod scripsit Ulpianus, sta-  
tores suos habere in provinciis proconsules non posse.  
XII.

*Explicatur L. qui Roma, §. Flavius, de verborum obli-*  
*gar.* *XIII.*

*Emendatur L. si arbiter, D. de probat. XII.*

D d 4 Q 101

- Quot fuerint pecuniarum fide publica deponendarum apud Romanos rationes.* XV.  
*Emendatur cap. 3. in princ. D. de minorib.* XVI.  
*Notatur Triboniani de minorum curatoribus manifestus error.* XVII.  
*De liberali caussa, & de partu agnoscendo, quedam à nemine animaduersa ad §. præiudiciales, Institut. de actionibus.* XVIII.  
*Rectè Ulpianum scripsisse, electrum auri appellatione non contineri.* XIX.  
*De legitimo luctus tempore, & luctus quomodo diminui soleat, obiter explicatum.* XX.

## CAPITA LIBRI II.

- De pactis, & explicatur L. pacta conuenta, D. de cont. empt.* I.  
*Explicatur L. qui viam, D. de noui operis nuntiat.* II.  
*De pœna periurij.* III.  
*Quid per arculam intellexerint Iurisconsulti.* IV.  
*Quomodo qui spondet, ipso iure ex sponsu sit obligatus.* V.  
*Verus intellectus §. pactus ne peteret, L. si unus, D. de pactis.* VI.  
*Auersio quid à sectione differat.* VII.  
*Quid sit testes de domo producere.* VIII.  
*Marcelli locus apud Ulpianum de curatoribus pupilli, prodigi, vel furiosi, explicatur nouo sensu.* IX.  
*Indicatur de tutoribus fœminarum Triboniani error.* X.  
*Conciliatio vera, cap. 39. de statulib. cum cap. 14. de quaestionibus.* XI.  
*Quid sit xpnosis.* XII.  
*Exceptiones pro pactionibus interdum à veteribus usurpari.* XIII.  
*Explicatur cap. 31. D. de pœnis.* XIV.  
*Emendatur*

*Emendatur & explicatur Vlpiani locus, de eo qui equo publico in caussa publica transuehiur.* XV.

*Quae dicantur diuisiones, & quid sit apud Paulum ad diuisionem singulorum ciuium legare.* XVI.

*Quo sensu Vestales virgines capi scripserit Vlpianus: & locus A. Gellij restitutus ex manuscripto codice.* XVII.

*De triumuiris capitalibus.* XVIII.

*Conciliatio cap. 81. de furtis, cum cap. 4. §. 4. ad L. Iul. peculatus.* XIX.

*De his qui officij caussa in prouinciis agunt vel militant.* XX.

## CAPITA LIBRI III.

*Quae nominibus obligatio fieri dicatur, & de signatoribus quadam non vulgaria.* I.

*Explicatur cap. 8. D. de public. & vectig.* II.

*De gemmatis praepositionibus quadam à nemine animaduersa.* III.

*Verus intellectus cap. 1. de legat. 1.* IV.

*Emendatur & explicatur Callistrati locus de magna capitis diminutione.* V.

*Explicatur cap. 39. D. de iniuriis.* VI.

*Elegans pandectarum Florentinarum lectio defenditur in cap. 9. D. de dolo malo.* VII.

*Potueritne haeres quod furtum antea factum esset, rectè furti agere.* VIII.

*Emendatur cap. 7. C. de solut.* IX.

*De nominibus Antoninorum, & veris eorum differentiis.* X.

*De iis qui quaestus caussa in certamen descendunt, & propter premium in scenam prodeunt.* XI.

*De custodia reorum.* XII.

*Defenditur lectio Florentina de fusionibus fisco praestandis.*

dis.	XIII.
De plus petentibus.	XIV.
Ad Ellipses substantivorum animadversio singularis.	XV.
De vigesima rerum venditarum locus pandectarum explicatur.	XVI.
Qua dicatur arctior annona.	XVII.
Qua fuerit de Pyrrhi captivis Appij Claudij sententia.	XVIII.
Emendatur Callistrati locus cap. 27. de pœnis.	XIX.
An soli praetores Roma, & in provinciis praesides soli de libertate iudicaverint.	XX.

## CAPITA LIBRI IV.

Emendatur & explicatur conventionum ab Ulpiano tradita divisio cap. 5. de pactis.	I.
Cur à praetoribus decreta Latine debuerint interponi, emendatumque Arcadij & Honorij rescriptum.	II.
Sub pellibus quid sit apud Celsum & Labeonem.	III.
Quid ab aerario fiscus differat.	IV.
Emendatur Ulpiani locus.	V.
Verus intellectus L. Transigere, C. de transact.	VI.
Quid sit apud Ulpianum, circa stationes se occultare.	VII.
De tribunatu numerorum: emendaturque c. ult. C. de testamento milit.	VIII.
Qua fuerit vindicta manumittendi ratio.	IX.
Qui puberes, & quid habitus corporis sit: insignisque Triboniani error demonstratur.	X.
De vera sententia c. 1. C. de custod. reor.	XI.
Qua dicatur materfamilias.	XII.
Quale fuerit iudicium de moribus quod esse sublatum Iustinianus voluit.	XIII.
Notatur Iustiniani constitutio de tempore dirimendis civilibus	

<i>libus controuersis prafinio.</i>	XIV.
<i>Ad L. 15. D. de iureiurando.</i>	XV.
<i>De iustis vxoribus, &amp; iniustis.</i>	XVI.
<i>De comitibus matrumfamilias &amp; matronarum.</i>	XVII.
<i>Verus intellectus L. ob as alienum, C. de obligat. &amp; actionibus.</i>	XVIII.
<i>Indicatur Triboniani facinus quoddam, &amp; explicatur Vlpiani locus perdifficilis.</i>	XIX.
<i>Verus intellectus. L. cum vir. C. ad L. Iuliam de adulteris.</i>	XX.

## CAPITA LIBRI V.

<i>De veris agnationum cognationumque differentiis.</i>	I.
<i>Quid sit gratiam iurisiurandi facere in L. Labeo etiam, D. de iureiur.</i>	II.
<i>Quae dicatur feralis pestis in rescripto quodam Imperatoris Constantini.</i>	III.
<i>Ad Linum, D. de testib.</i>	IV.
<i>Quid sit per salutem suam, quid item per Iouem iurare atque inibi de vero sensu cap. 33. de iureiur.</i>	V.
<i>Quae dicantur ambitiosa decreta, &amp; expenditur explicaturque Vlpiani locus perdifficilis.</i>	VI.
<i>De superindictionibus.</i>	VII.
<i>Indices olim in leges iurare solitos: &amp; quid sit apud Horatium Puteal Libonis.</i>	VIII.
<i>Iteratarum dictionum observatio singularis.</i>	IX.
<i>De poenis iniuste promoucantium, &amp; quae dicatur praedictialis multa.</i>	X.
<i>Quae sint vela regia.</i>	XI.
<i>De iure publico.</i>	XII.
<i>Responsum quoddam Martiani integrum non videri, &amp; illud quomodo restitui possit obiter demonstratum.</i>	XIII.

De

*De ludis Circensibus explicantur leges quadam obscuriores.*

*XIV.*

*Quæ sint inimicitie capitales.*

*XV.*

*Explicatur Tit. 17. lib. 2. Codicis Iustiniani Caesaris.*

*XVI.*

*Quo sensu scripserit Celsus, pecuniam sine peculio fragilem esse.*

*XVII.*

*Emendatur & explicatur cap. ult. D. de restit. in integrum.*

*XVIII.*

*Quid sit apud Ulpianum, extra ordinem ferias indicere.*

*XIX.*

*De ordinariis, vicariis, & mediastinis servis.*

*XX.*



IA CO

# IACOBI RÆVARDI IVRISCONSULTI

## VARIORVM, SIVE DE Iuris ambiguitatibus

### LIBER PRIMVS.

#### CAPVT I.

*Quanam à Iurisconsultis tradita sit iuris partitio.*



VVM de aquo & iniquo differitur, æquitatis loci bipartitio cernuntur, inquit Cicero, † natura & instituto. Naturam Iurisconsulti sic acceperunt, vt eius interpretationem esse duplicem contenderint: vnā quidem humano generi cum belluis ipsis communem, alteram verò solis hominibus propriam. *duplici enim homines natura indutos esse*, scribit eleganter Connanus: *vna, qua Deo assimilatur: altera, secundum quam dicitur masculus & fœmina*. Humanitas enim inter extrema duo quasi media sita est, scilicet inter diuinam incorporeamque, & inter sensitiuam brutorumque naturam, ac vtriusque hominem esse participem, in Genesin scribit Procopius. Et quia vtrāque iuris quadam functione est prædita, hinc etiam factum est vt duplex sit iuris naturalis interpretatio: sic nimirum vt ius aliquod natura hominibus cum belluis communis obseruari præcipiat, & ratio quoque quadam iuris functione humani generis societatem foueat.

foueat. Vlpianus sanè naturale ius illud, cuius peritia omnia animalia censentur, ius esse ait quod natura omnia animantia docuit, c. 1. de Iust. & iur. Ius autem quod à iubendo nomen accepisse dubium non est, in iis solùm versabatur, in quibus esset de æquitare disceptatio. Aliud igitur iussus & imperium, aliud item ius erat. Quicquid iubebat natura, iussus, imperium, imperus, & instinctus, non ius dicebatur, nomen enim iuris ad ea quæ ex æquo & bono constabant, duntaxat referebatur. Nam quæ præter instinctum naturæ simplicem, vim quandam æqui bonique amplectebantur, iuris nomine velut æquo bonoque proprio, complexi sunt veteres. Ius igitur naturale est illud, quod ius natura docuit omnia animantia: cuius generis sunt, liberos educare, vim vi repellere, & id genus alia. Quæ quod iustitiæ æquitatisque effigiem, seu quandam ideam præ se ferant, iuris idcirco nomine comprehenduntur. Quin & altera iuris naturalis interpretatione, ius quod solos homines naturalis ratio docuerat, iuris etiam naturalis nomen obtinebat: verùm hac discriminis ratione, quod istud indirectè seu per consequens, alterum verò directè naturale vocaretur. Ius ergo naturale duplex erat: vnum quod natura docuerat, alterum, quod ratio. Quod natura docuerat, ideò naturale dicebatur, quia illud natura docuerat quæ cunctis hominibus cum belluis communis erat, & sic directè: quod ratio, ideò naturale vocabatur, quia ratio quæ solis tributa est hominibus, esset naturalis, & sic indirectè. Non enim ideò naturale dicebatur, quod ratio illud docuerat, sed quia ratio naturalis erat, & sic per consequens, & indirectè. Si enim ratio non fuisset naturalis, utique nec ius illud quod ratio docebat, iuris naturalis nomine censi potuisset. Hæc si considerasset Laurentius Valla, tam iniquè Vlpiano conuitium



conuitium non fecisset, existimans cum in brutis nulla sit ratio, nullum in iisdem ius inesse. Quo quid potest absurdius dici? Si enim vim vi repulero, nonne iure facio: si id bellua fecerit, an quæso quod in brutis nulla sit ratio, idè minus iure factum causabere? Vim vi repello, quod illud mihi suggerat, quæ prædictus sum, ratio: bellua vim vi repellit, quod illam id natura, quam cum hominibus habet communem, sic facere docuerit. Vt enim esset ius, non ex vrentium qualitate, sed ex facto æstimabatur. Proinde quæ ab hominibus vel à brutis fierent, si quam iusti & æqui effigiem referrent, iuris appellatione olim contineri, neminem posse inficiari arbitror. Diuiditur autem ius naturale, in ius quod natura docuit, & in ius quod ratio docuit. Rursus, ius illud quod ratio docuit, partim erat constitutum, partim non constitutum. Quod enim naturalis ratio constituit, siquidem inter omnes homines, apud omnes peræque custoditur, vocaturque ius gentium, quasi quo iure omnes gentes vrantur: sin verò inter alicuius ciuitatis populum, ius ciuile dicitur. A iure autem naturæ solis hominibus proprio, ius gentium recedere facile est intelligere, quia ius gentium ius est naturale constitutum & vfu receptum: ius verò naturæ, hominum mentibus inhærens iusta ratio. Quæ si constituatur, & in vsum aliquem recipiatur, mutat nomen suum: & siquidem à gentibus, iuris gentium; sin verò à ciuibus, iuris ciuilis nomen adsumit. Hinc seruitus constitutio dicitur iuris gentium: libertas, non naturalis constitutio, sed facultas, cap. 3. de statu. homi. Hinc etiam factum deinde suspicor, vt vim vi repellere, à Florentino iuri gentium adscribatur, cap. 3. de iust. & iur. quodd, si originem spectes, re vera iuris vtriusque naturæ est, cap. 1. §. 16. de vi & vi armata. Est  
ergo

ergo iuris gentium, & iuris vtriûsque naturæ simul. Iuris gentium quidem, quod gentes ex naturali & innato iure obseruent, vt qui vim vi repulit, non puniatur: quo spectant hæc Florentini verba: *Nam hoc iure enenit, vt quod quisque ob tutelam corporis sui fecerit, iure fecisse existimetur.* cap. 3. de iust. & iur. Naturæ verè, quod id facere, vt omnibus animantibus natura sic hominibus ratio præcipiat naturalis. Vt ita quidem eorum opinioni minimè subscribendum sit, qui Tribonianum (excusantes Florentinum) erroris hîc insimulant. Est etiam eorum sedulo fugiendus error, qui à naturali isto iure, gentium ius non distinguunt: quod veteres fecisse non est obscurum, si præter definitionem iuris ciuilis ab Vlpiano traditam cap. 6. de iustit. & iure, consideremus illud ius gentium duntaxat appellandum esse, quod naturalis ratio inter omnes homines constituit, cap. 9. dict. tit. quod naturali ratione inter omnes homines peræque custoditur, cap. 1. de acquir. rer. domin. Qua in sententia etiam Ciceronem fuisse, hinc coniicio, quod ille ius hominibus proprium ita partitus sit, vt aliud hominum, aliud gentium, aliud denique ciuium commune esse contenderit, in lib. 1. de Orat. Nimirum per ius hominum commune, iustam rationem hominum mentibus natura inditam: per gentium verò ius constitutam inter omnes homines æquitatem intelligens. Et ita quidem ius aliud constitutum est, aliud non constitutum. Constitutum in ius gentium & ciuile diuiditur. De gentium iure, quod ciuili antiquius est, satis multa: de iure ciuili alio loco tractabimus. Exposui paucis, non quid Philosophi, sed quid Iurisconsulti de iure eiûsque partibus senserint.

## CAPVT II.

*Quo sensu scripserit Vlpianus, iuris nomen  
à iustitia descendere.*

**A**IT Vlpianus: *Iuri operam daturum prius nosse oportet unde nomen iuris descendat, est autem à iustitia appellatum, c. i. de iustit. & iur.* Quum ius iustitia prius sit & antiquius, quomodo illud à iustitia possit descendere, nonnullis visa est quaestio perdifficilis. Existimarem per hoc quod à iustitia ius descendere conderit Vlpianus, cum non negasse, ius esse prius iustitia: sed nomen illius iuris, quod iustitia prius est & antiquius, à iustitia existimasse descendere. Ius enim in imaginatione positum est, nec certo nomine alio quam iuris aut aequitatis designari potest: iustitia est quaedam virtus, qua in reddendo iure constituendoque fungimur. Hæc iustitia dat nomen iuri non ut ius duntaxat appelletur, quod per eam exercetur: verum ita, ut ius per iustitiam speciei insuper adsciscat expressam designationem. Nam quum ius ad actionem & exercitium trahimus, tunc iustitia siue virtus illa qua id fit, imponit nomen iuri: & siquidem inter ciues illud fiat, non ius solum, sed ius ciuile: sin inter gentes, ius gentium vocabitur. Quum enim ius nihil aliud sit quam iussus, iustitia verò virtus, qua qui sic iubet, præditus est; sequitur ut qui iustitia fungitur, nomen imponat iuri. Hinc eam Aristoteles Ethicorum lib. 5. *videri ait affectionem animi iustitiam, qua apti sumus ad res iustas gerendas, quaque res iustas facimus & cupimus facere.*

## CAPVT III.

*Explicatur cap. 8. De appellat. & cap. 42. De iniur.*

**Q**UOD Vlpianus scribit, *cum in unum complures voces conferuntur, conuiuium appellari, quasi conuocium,*

*Ec. cium,*

*cium* c. 15. §. 2. de iniur. id perpetuò verum non est. Nam is qui aliquem reprehendit, etiam si in vnum voces complures non conferantur, rectè nihilominus conuitium facere dicitur. Quo sensu *conuitium facere* C. Iunio iudici *questionis*, pro Cluentio Auito; & pro Quinctio, *sustinere quotidianum alicuius conuitium*, scripisse visus est Cicero. Nec est etiam omne conuicium iniustum, aut inhonestum. Nam posse alicui conuicium iustè honestoque fieri, ostendit Plinius, cum sic lib. 6. Epist. scribit. *Proinde etiam atque etiam rogo, ut mihi semper eadem simplicitate, quoties cessare videor (nunquam enim cessabo) conuicium facias.* Ostendit id ipsum Cicero sic Cornificio scribens Epist. Famil. libro 12. *Meo iustissimo honestissimoque conuicio, te tuam dignitatem summa tua virtute tenuisse, provinciaeque honoribus amplissimis affectum, vehementer gaudeo.* Hinc quod Ulpianus & Paulus scribunt iudici ab appellatoribus conuicium fieri non oportere, alioquin eos qui conuiciantur, infamia notari plectique diuos fratres voluisse, (cap. 42. de iniur. & cap. 8. de appellat.) illud de iis esse accipiendum rectè videtur qui sententias iudicum reprehendunt, eorumque pronuntiationi contradicunt. Huiusmodi enim homines plecti solere docet euidenter Apuleius in prima Apol. ubi de Sicinio Æmiliano loquitur; quem cum dixisset, auunculi sui testamentum quod verum sciebat, pro falso infamasse, subiecit: *Tanta quidem pertinacia, ut quum Lollius Urbicus v. c. verum videri, & ratum esse debere, de consilio consularium virorum pronuntiasset, contra clarissimam vocem iurauerit vecordissimus iste tamen, illud testamentum fictum esse, adeò ut egrè Lollius Urbicus ab eius pernicie temperarit.* Et id quidem adeò verum erat, ut contenderit expressè Plinius, ne interrogare quidem fas esse, de quo pronuntiatum est. Scribit enim Voconio libro primo Epist. *interrogatum se à Regulo, ecquidnam*

ecquidnam de Metti Modesti, qui Domitiano relegatus erat, pietate sentiret, his verbis respondisse: *Quaris, inquam, quid sentiam? At ego ne interrogare quidem fas puto, de quo pronuntiatum est. Conticuit, inquit Plinius, me laus & gratulatio secuta est, quod nec famam meam aliquo responso, virili fortassis inhonesto tamen laferam, nec me laqueis tam infidiosa interrogationis inuolueram.* Et paulò post: *Ecce tibi Regulus. Quæro, inquit, Secunde quid de Modesto sentias: Vides quod periculum si respondissem bene? quod flagitium, si malè?* Huc accedit quod Sidonius Apollinaris sic epist. libro primo scribit: *Namque hîc quoq; cumulus accedit laudibus imperatoris, quod amare palam licet & capite damnatos.* Et hæc quidem quum ita sint, non esse tunc admodum obscurum puto, quid sibi voluerit Paulus Sentent. libro quinto, tit. 35 quum ita scribit: *Eum qui appellat, cum conuicio ipsius iudicis appellare non oportet: ideòque quod ita factum est, arbitrio principis vindicatur.* Illud enim de eo esse accipiendum dubium non est, qui sic formulam appellationis concipit, vt in ea iudicis sententiam eludat, hunc in modum: *Quia malè iudicatum est, appello.* Id enim fieri boni mores non patiuntur.

C A P V T I V.

*Quanam dicantur inaures, & de muliebribus ornamentis quadam non passim obuia.*

**O**RNAMENTA, inquit Vlpianus, muliebria sunt, quibus mulier ornatur, veluti inaures, armilla, viriole, annuli præter signatorios, & omnia quæ ad aliam rem nullam parantur, nisi corporis ornandi causa: quo ex numero etiam hæc sunt, aurum, gemma, lapilli, quæ aliam nullam in se utilitatem habent, cap. 26. De aur. arg. leg. Testatur Isidorus, ab aurium foraminibus, ex quibus

E c 2 pretiosi

pretiosi lapilli dependebant, in aures nuncupatas esse. Idque verissimum docet apertè diùs Hieronymus, sic enim in epistola quadam Demetriadi scribit: *Ne taceam de inaurium pretiis, candore margaritarum, rubri maris profunda testantium, smaragdorū virore, cerauniorum flammis, hyacinthorum pelago, ad quæ ardent & insaniunt studia matronarum.* Accedit & illud eiusdem ad Latam: *Cave ne aures eius perfores, ne cerussa & purpurisso consecrata Christo ora depingas, nec collum auro & margaritis premas, nec caput gemmis oneres.* Idem Hieronymus eleganter de Romanis matronis, in vita B. Marcellæ viduæ Romanæ differens, sic ad virginem Principium scribit: *Illæ solent purpurisso & cerussa ora depingere, sericis nitere vestibus, splendere gemmis, aurum portare cervicibus, & auribus perforatis rubri maris pretiosissima grana suspendere, fragrare musco mure, maritos ita plangere, ut tandem dominatu eorum se caruisse latentur.* Eoque etiam spectat, quod in libro de habitu virginum Cyprianus scribit: *Non inferantur auribus vulnera, nec brachia includat aut colla de armillis & monilibus pretiosa catena, sint à compedibus aureis pedes liberi, crines nullo colore fucati, oculi conspiciendo Deo digni.* Quam autem ætate consueverint aures virginum perforari, optimè in eodem de habitu virginum libr. tradidit his verbis Cyprianus: *An vulnera inferri auribus Deus voluit, quibus innocens adhuc infantia & mali secularis ignara crucietur, ut postea de aurium cicatricibus & cauernis pretiosa grana dependeant, & etsi non suo pondere, mercium quantitate?* Et hæc quidem de inauribus sufficerent, nisi de iis meminissem hæreticum quendam nomine Iulianum, eleganter etiam ad Demetriadem virginem scripsisse, in libro de institutione morum virginis: *Sæculi, inquit Iulianus, virgines, quæ se nuptiis preparant, & indulgentiam Apostoli magis quam consilium sequi malunt.*

tant, magis amplectuntur incontinentia remedium; quam premium continentia; ut sponsis placeant, eosque in amorem sui magis incitent, mira sollicitudine se formare student, & naturalem corporis pulchritudinem, ornandi arte commendant. Hac est illis per dies singulos cura præcipua, decedentibus fucis colorare faciem, implicare auro crinem, & ardentes concharum lapides capitis honorem facere, suspendere ex auribus patrimonia, brachia ornare monilibus, & latera, inclusas auro gemmas à collo in pectus demittere. Hac Iul. cuius libro de institutione morum virginis, operum diui Hieronymi tom. 4. præponitur. De inauribus visus est etiam sentire Seneca in libro de beata vita, dum ita scribit: *Quare vxor tua locupletis domus censum auribus gerit?* Et libro secundo ad Serenu. *Quid refert, inquit, quantum habeat, quot lecticarios, quam oneratas aures, quam laxam sellam?*

## CAPVT V.

*Quo sensu scripserit Vlpianus, vectigalia prædia longo tempore capi posse, cum eadem prædia non posse vsucapi scripserit expresse Paulus.*

**C**IUES Romanos prouincialesque, in prouinciis prædia possedisse & emancipasse, ex Plinio Modestino, & Cicerone in libro singulari ad leges 12. tab. est à nobis demonstratum. Id ipsum confirmat Hygenus Augusti libertus libro 2. de limit. constit. *Hi agri, inquit, qui redditi sunt, non obligantur vectigalibus, quoniam scilicet prioribus dominis redditi sunt.* Accedit huc etiam elegans eiusdem Hygeni, fundorum exceptorum & concessorum differentia. *Excepti, inquit, sunt fundi bene meritorum, ut in totum priuati iuris essent, ne Colonia ullam munificentiam deberent, essent in solo populi Romani: concessi sunt fundi, è quibus est indultum, cum*

E c 3

possidere

*possidere unicuique plus quàm edictum continebat non lice-  
ret.* Nec aliò referendum videtur , quod de prædiis  
prouincialibus hunc in modum Sidonius Apollinaris  
scribit epist. libro 5. *Hi sunt qui inuident tunicatis otia,  
stipendia paludatis,viatica veredariis , mercatoribus nun-  
dinas,munuscula legatis,portoria quadruplatoribus, prædia  
prouincialibus.* Et quia in solo prouinciali prædia quæ-  
dam mancipi, quædam nec mancipi fuisse constat:vi-  
dendum est , hæc ab inuicem qua ratione discernan-  
tur prædia illa, quorum legitimum dominium ad ci-  
uem Romanum , aut ad prouincialem aliquem perti-  
nebat , prædia dicebantur *mancipi à mancipio* , hoc est  
dominio legitimo.Ea verò prædia quorum proprietas  
ad populum Romanum , aut ad principem spectabat,  
prouincialibus nuda duntaxat eorum possessione reli-  
cta , *nec mancipi* esse dicebantur , qualia sunt prædia  
vectigalia, stipendiaria, & tributaria.Vectigalia enim  
reipublicæ populi Romani , tributaria verò & stipen-  
diaria principis erant proprietate , vsu verò & fructu  
possessorum. Et idcirco sic alienari non poterant , vt  
Romano populo aut principi eorum adimeretur pro-  
prietas *Cessione tamen*, auctore in fragmentis Vlpiano,  
*rectè alienabatur*:verùm ita,vt illo eodem vtendi fruen-  
di iure,siue, vt Accursianorum verbo utar,vtili (quod  
tamen rectius bonitarium appellatur ) dominio , quo  
in huiusmodi prædiis utebantur,alteri rectè apud pro-  
uinciæ præsidem possessores cederent, proprietate in-  
terim populo & principi semper salua,cap. 71. in fine  
de legat. 1.Eaque ratione videntur , etiam huiusmodi  
prædia olim longa possessione acquiri consueuisse.quæ  
tamen vsucapi posse negauit expressè Paulus cap. 12.  
de pub. in rem act Igitur prædia vectigalia vsu non  
capiuntur,capiuntur tamen longa possessione,cap.15.  
§. 13. de damno infect.Vsu quidem non capiuntur ea  
ratione,



ratione, quares sacrae & sanctae non possunt vsucapi, cap. 9. de vsucap. habita scilicet solius iuris, nulla facti consideratione. *Verant*, inquit Seneca, *iurisconsulti quicquam publicum vsucapi*. Et idcirco populo Romano praediorum istiusmodi nullo vsu, nullo tempore, adimi proprietates potuit. Sed quia vsu & fructu possessorum erant, idcirco non proprietates quidem, verum vsus eorum & fructus, recte longa possessione capi poterant. Nec sane absurdum est, cum legimus praedia nec mancipi longa possessione capi, ut eo modo acquiri longa possessione huiusmodi praedia intelligamus, quo per vsu, proprietate salva, possunt acquiri. Proinde sic vsucapi, siue longa possessione (quae in legitima vsucapionis locum diu ante tempora Iustiniani successit) acquiri praedia vectigalia interpretabimur, ut vsus eorum & fructus (solent enim in annos centenos plerumque aut in perpetuum locari) ab improbo possessore alteri in iure cessus, longo tempore sic bona fide possidenti acquiratur, ut verus eorum possessor, iusta bonae fidei possessoris praescriptione, prorsus ab aliis excludatur. Eoque sensu ad possessorem bonae fidei, praediis vectigalis dominium transire dicebatur, quo libera eodem praedio utendi fruendi potestas acquisita eidem bonae fidei possessori longo tempore existimabatur, d. §. 13. Et ita quae vsucapi non poterant, recte per longam possessionem acquirebantur praedia vectigalia, quod à nemine animaduersum est.

## CAPUT VI.

*Emendatur, & explicatur Vlpiani locus, de his qui propter loci religionem inde semouere non possunt.*

**E**X P O N E N D U M est, quid sibi voluerit Vlpianus, quum eos scriberet in ius vocari non posse, qui propter

Ee. 4

loci

*loci religionem inde se mouere non possunt*, cap. 2. de in ius voc. Existimo locum hunc corruptum esse, & sic restituendum, vt pro *semouere*, legamus *semoueri*, atque ita intelligendum, quasi dixerit Vlpianus, eos qui ad aras deorum, aut alium locum aliquem, cuius religio impedit, quominus quis inde inuitus semoueat, confugiunt, vocari in ius trahi, aut rapi inde non posse. Nec quidem dubium est, quin hi qui ad fana, ad aras Deorum confugiebant, in iis sic essent tuti, vt inde vocari aut trahi ad prætorem inuiti non possent. Idque à Cicerone, Plauto, & aliis præclaris auctoribus passim † traditum est. Cicero in orat. pro domo sua: *Hic aræ sunt, hîc foci, hîc dij penates, hîc sacræ religionis ceremoniæ continentur, hoc perfugium est ita sanctum omnibus, ut inde abripi neminem fas sit.* Plautus in Rudente:

*Ferte suppetias, qui Veneri Veneriæque antistita*

*More antiquo in custodiam suam commiserunt caput.*

Et paulò post,

— *Mulieres*

*Dua innocentes intus hic sunt tui indigentes auxilij,*

*Quibus a tuorsum ius legesque insignita iniuria hic*

*Facta est, si que in Veneris fano.*

Ælius Lampridius in vita Elagabali, sic de Elagabalo scribit: *Hic fertur occiso Macrini factione patre, vt dicebatur, Antonino, in templum Dei Elagabali confugisse, velut in asylum, ne interficeretur à Macrino, qui seuiissime cum filio luxurioso & crudeli exercuit imperium.* Sidonius Apollinaris epist. lib. 1. *Implet quotidie sylvas fugientibus, villas hostibus, altaria clericis, carceres reis.* Et hæc quidem moris antiqui religionisque prærogatiua tam seruis quàm liberis hominibus competeat. Idque in eadem comœdia testatur etiam Plautus his verbis:

*Mihi non liceat meas ancillas Veneris de ara abducere?*

DÆ. *Est lex apud nos.*

Eoque

Eoque spectat quod idem Plaut. sic in Mostel. scribit.

*Immo primum volo.*

*Quæstioni accipere servos. T R. faciundum ad eol. cenſeo.*

*Ego interim hanc aram occupabo. T H. Quid uia?*

*T R. Nullam rem ſapis.*

*Ne enim illi huc confugere poſſint, quæſtioni quos dabit.*

Igitur qui ad huiusmodi locum confugit, cuius impedit religio quominus quis inde ſemoueat inuirus, is inde vocari, trahi, aut rapi in ius non poteſt.

## C A P V T VII.

*Vernus intellectus cap. 20. D. Comm. diuid.*

**D**I V O R V M Seueri & Antonini reſcriptum eſt, ne quis abſens puniatur: neque enim in audita cauſſa quendam damnari æquitatis ratio patitur. c. 1. de req. reis. De hoc reſcripto Tertullian. qui ſub iſtis imperatoribus vixit, ſentire omnino viſus eſt in Apologetico, dum ita ſcribit *Reſpondendi, altercandi facultas patet, quando nec liceat indefenſos & inauditos omnino damnari.* Ad quod reſcriptum etiam referendum videtur quod ſic Apuleius ſcribit, de aſino l. 10. *Nec ad inſtar barbarica feritatis, vel tyrannica impotentie, damnetur aliquis inauditus, & in pace placida tam dirum ſaculo proderetur exemplum.* Ideoque ſi reus abſens grauius videretur puniendus, hoc caſu abſens requirendus adnotari ſolet, vt copiam ſui præſtet. d. c. 1. Si que ad edictum magiſtratus non reſponderet, nec ab aliquo defenderetur, eius bona poſt annum in ſiſcum cogeantur. c. fin. d. tit. Sed quorſum hæc? Nimirum vt intelligamus quid ſibi voluerit Pomponius, quum ita ſcriberet: *Si is cum quoq; fundum communem habes ad edictum non reſpondit, & ob id motu iudicis villa diruta eſt, aut arbuſta ſuccifa ſunt, præſtabitur tibi detrimentum*

E c 5

iudicio

*iudicio communi diuidundo*, c.20. *comm. diuid. Florentiæ pro Ad edictum, rectius Ad delictum* quam, ut Duarenus emendauit, *Ad delectum* legitur. Ad delictum, & ad edictum non respondere, in effectu eadem sunt. Nam si reus latitans ad edictum magistratus non respondet, certè nec ad delictum respondet quod illi impingitur. Eorum autem qui ad delectum non respondebant, villas dirutas, aut arbuta succissa fuisse, nusquam traditum est. Sanè nefarii sceleris criminis-que horrendi reis maximam tunc pœnam constitui, expresse testatur apud Pontifices pro domo sua Cicero, quum domus eorum publicari, euerti & complanari iubetur. *Sp. Melij*, inquit Cicero, *regnum appetentis domus est complanata. Ecquid aliud æquum accidisse Melio populus Romanus iudicauit? Spurij Cassij domus ob eandem causam euersa, atque in eodem loco adis posita Telluris. In Vaccii prætis domus fuit M. Vaccii, qua publicata est & euersa, ut illius facinus memoria & nomine loci notaretur. Et paulò post: M. Flaccus quia cum Caio Graccho contra salutem reipublicæ fecerat, & senatus sententia est interfectus, & eius domus euersa & publicata est, in qua porticum post aliquanto Q. Catulus de manubiis Cimbricis fecit. Et hæc quidem omnia etiam Valerij confirmantur auctoritate, qui de Spurio Cassio ad hunc modum scribit lib.6. cap.3. Senatus enim, populusque Romanus, non contentus capitali eum supplicio afficere, interemptio domum superiecit, ut penatium quoque strage puniretur. In eodem loco sic de Spurio Melio scribit idem Valerius: Quantum ergo odij aduersus hostes libertatis institum animis antiqui haberent, parietum ac tectorum in quibus versati fuerant, ruinis testabantur. Ideoque & M. Fiacci, & L. Saturnini seditiosissimorum ciuium corporibus trucidatis, penates ab imis fundamentis eruti sunt. Quod igitur Pomponius de villa diruta & succisis*

succisis arbuſtis ait , illud ad ſcleris atrocioris , præſertim perduellionis , reos latitantes , nec ad edictum magiſtratus reſpondentes , pertinere omnino videtur. Quod autem de motu iudicis idem Pomponius ſcribit , proſectò id mihi valdè ſuſpectum eſt , & pro *motu iudicis* , legendum *magiſtratus imperio* , omni auſim aſſeueratione contendere ; erroremque ex his notis M. I. exortum videri , quibus tam magiſtratus imperium quàm motus iudicis deſignari potuit. *Ædes enim damnatorum non motu iudicis , ſed magiſtratus imperio dirui ſolitas teſtatur non obſcurè Plinius* , quum ſic in libello de viris illuſtribus de Lucio Quinctio Cincinnato ſcribit : *Iterum poſt viginti annos Dictator dictus , Spurium Melium regnum affectantem , à Servilio Hala magiſtro equitum occidi iuſſit domum eius ſolo aquauit : unde locus ille Æquimelum dictus*. Porro ſi cui hæc non probabitur interpretatio noſtra , videat ille an verius ad finium regundorum controuerſiam reſpexerit in hoc reſponſo Pomponius , quàm ad criminis horrendi reos : præſertim cùm ſic Paulus etiam ſcripſerit. Sed etſi quis iudici non pareat in ſuccidenda arbore , vel ædificio in fine poſito deponendo , partève eius , condemnabitur , cap. 4. §. 3. fin. regund. Ut ſic contendiſſe videri Pomponius poſſit , eum qui in finibus vicini fundi tanquam in proprijs ædificium aut arborem poſuerat , edictis tribus euocatum , nec reſpondentem , quaſi contumacem condemnari , & iudicis qui de finibus cognoscit , motu ; ædificium in fine poſitum , eiùſve partem , dirui aut arborem ſuccidi cõſueuiſſe. Et proinde , ſi fundus reo latitanti communis eſſet cum alio , ſolebat actione comuni diuidendo omne detrimentum illud , quod is cum quo cõmunis eſt fundus , paſſus erat , præſtari. Et quãvis hæc ita ſe habeant , hac tamen interpretatione poſte

posteriore idcirco mihi prior illa visa est multo probabilior, quod in Florentinis pandectis pro *Ad edictum*. expressè *Ad delictum* legi videam. Sed cum utraque & ratione & legum constet auctoritate, profectò lectori quam velit amplectendi liberam potestatem facio.

## CAPUT VIII.

*Quo sensu scripserit Ulpianus, calceatum debere præfectum vigilum coërrare.*

**C**IUES Romanos calceis usos esse, ex Tertulliano liquet, qui togæ tormentum proprium calceos fuisse contendit in libro de pallio his verbis: *Calceos nihil dico, proprium togæ tormentum, immundissimam pedum tutelam.* Idem auctor est, calceos quosdam mulleolos, quosdam pueros fuisse. *Impuro*, inquit, *cruri purum aut mulleolum inducit calceum.* Et quia lunulas illos qui nobilitate apud Romanos præstare videbantur, in calceis tulisse refert in problematibus Plutarchus, idcirco dubium non videtur quin per mulleolos, lunulatos calceos; & per pueros, eos qui ex puro corio sine lunulis facti erant, qui perones appellantur, intellexerit Tertullianus: vel hinc potissimum, quod mulleis reges Albanorum primos, deinde patricios usos esse scripserit Pompeius Festus. Eoque sensu calceos patritios esse accipiendos puto in hac inscriptione: **ÆDEM HONORI ET VIRTUTI FECIT, VESTE TRIVMPHALI, CALCEIS PATRICIIS.** Nec sanè iisdem usi sunt Romani magistratus calceis. Ex ijs enim quidam mulleis, quidam peronibus induebantur: curules magistratus mulleos lunulatos, cæteri perones gestabant. Idque Marcum Caronem testis est idem Festus, originum libro 7. sic scripssisse: *Qui magistratum*

*stratum curulem cepisset, calceos mulleos allucinatos, ceteri perones.* Quo quidem in loco pro *allucinatos*, aut *alutatos*, aut *lunulatos* esse legendum, rectè vir quidam eruditus admonuit. Per *perones* autem non rusticos cum Seruio, sed potiùs cum Tertulliano pueros calceos intelligemus: quibus per niues, imbres, & glaciem veteres etiam vsos esse Iuuenalis his versibus auctor est Satyr. 14.

*Nil vetitum fecisse volet, quem non pudet alto*

*Per glaciem perone regi.*

Eodem sensu *perones* accepisse videtur Sidonius Apollinaris epistolar. lib. 4. *Quorum pedes, inquit, primi perone setoso talos ad usque vinciebantur, genua, crura, suraque sine tegmine.* Et hæc quidem verissima sunt. Proinde quod ait Vlpianus, *calceatum debere præfectum vigilum coërrare*, cap. 3. §. 3. de offic. præfect. vigil. illud ad *perones*, non autem ad mulleolos trahendum videtur, tum quod magistratus iste curulis non sit, (qui curulis magistratus solus inter magistratus reliquos, ut mulleis solet, ut ex Catone probatum est:) tum etiam quod intempesta nocte per niues, per glaciem & imbres præfectus vigilum coërraret, siquidem mulleoli ex *alutis*, hoc est mollioribus pellibus facti, lunulati-que præfecto vigilum coërranti nulla ratione conueniebant. Quamvis interim dubium non sit, quin inter magistratum & ciuium priuatorum *perones* fuerit nonnihil discriminis. Fortassis lapillis quibusdam, gemmisque preciosis magistratum *perones* exornabantur. Idque eo mihi faciliùs persuaderi potest, quod sic in libro de habitu virginis scripserit Tertullianus: *Latent in singulis smaragdi; & cylindros vagina sua solus gladius sub sinu nouit, & in peronibus uniones emergere de luto cupiunt.*

CAPVT

## CAPVT IX.

*De atrocibus iniuriis quadam non vulgaria.*

**A**TROCEM iniuriam aut persona, aut tempore, aut re ipsa fieri apud Vlpianum ait Labeo. Persona iniuriam atrociorē fieri, quum magistratui, quum parenti patronove, & ut Iulius Paulus scribit, quoties senatori, vel equiti Romano, decurioni, vel alias spectatæ auctoritatis viro, iniuria fit: tempore, si in ludis, & in conspectu Prætoris: re atrocem iniuriam haberi idem Labeo ait, ut puta si vulnus illatum, aut os alicui percussum sit, cap. 7. in fin. de iniur. De atroci iniuria quæ persona fit, sic scribit eleganter Saluianus lib. 6. de prouidentia Dei: *Si illustrem aut præpotentem nequaquam exhonoriari à quoquam licet, & si quisquam exhonoraueit, decretis legalibus reus existit, & iniuriarum actor iure damnatur: quanto itaque maius crimen est, iniuriosum quempiam Deo esse? Semper enim per dignitatem iniuriarum perferentis, crescit culpa facientis: quia necesse est, quanto maior est persona qua contumeliā patitur, tanto maior sit noxia eius qui facit. Et id quidem adeò verum fuisse sequenti libro testatur idem Saluianus, ut iniuriæ etiam leuiores, illustriori tamen personæ aut sublimiori factæ, pro atrocioribus haberentur. Deum ergo, inquit, ô homo, incuriosum & negligentem vocas, si quemlibet ingenuorum hominum hac contumelia laderes, iniuriarum insolentium reus esses: certè si illustriorem quempiam aut sublimiorem, etiam censuram iuris publici sustineres. Pupillis enim vel maximè prodigiis hac obiciuntur opprobria, perditorum hoc adolescentium speciale conuicium est, ut abusers scilicet & incuriosi ac negligentes rerum suarum esse dicantur. Cæterum tempore atrox efficitur iniuria, si in ludis & in conspectu prætoris*



prætoris eam fieri contingat. Ad ludos spectat illud Arnobij lib. 4. aduersus gentes. *Magistratum in ordinem redigere, aut senatorem conuicio prosequi, suis esse decrestis periculosissimum pœnis. Carmen matum conscribere, quo fama alterius coinquinetur & vita, Decemviralibus scitis euadere nolulistis impune: ac ne vestras aures conuicio aliquis perulantiore pulsaret, de atrocibus formulas constituistis iniuriis.* Huc etiam referri debet, quod apud Cassiodorum Variarum libro 1. sic populo Romano rex Theodoricus dicitur scripsisse: *Atque idèd edictali programme definimus, ut si atroces iniurias in quempiam senatorum vox iniusta præsumpserit, nouerit se à præfecto urbis legibus audiendum, ut pro facti qualitate discussa excipiat promulgatam iure sententiam.* Quod autem ad iniuriam attinet, quæ in conspectu prætoris fit, id nuper cuidam eruditissimo interpreti visum est apud Vlpianum mendosum esse, existimanti, IN CONSPECTU POPULI ROMANI legendum. Assentirer optimo viro, si sic scripsisset Vlpianus: *Tempore, si ludis in conspectu prætoris.* Sed quia sic scripsit: *si ludis & in conspectu prætoris*, non dubito quin hæc verba, licet coniuncta videantur, pro separatis tamen accipienda sint: sicut illa in duodecim tabulis, *agnatorum, gentiliūque*: Item, *nexum mancipiumque*. Et idcirco dubium mihi non videtur, quin tam de ijs iniurijs, quæ in iure, in conspectu prætoris pro tribunali sedentis, quàm de ijs quæ in ludis fiunt, Vlpianus hîc sentiat. Siquidem tanti esse conspectus prætoris potest, præsertim pro tribunali sedentis, ut ei rectè solitudo esse aduersa possit. Festus enim auctor est, *tertio modo conuentum intelligi, quum à magistratibus iudicij causa populus congregatur.* Idque etiam ex Apuleio constat, qui sic scribit in apologia 2. *Tæstor te Claudi Maxime, vosque qui in consilio estis,*  
vosque

vosque etiam qui tribunal mecum assistitis. Eoque omnino spectare videntur hæc Vlpiani verba: *Nam in prætoris conspectu, an in solitudine iniuria facta sit, multum interesse ait: quia atrocior est, quæ in conspectu fiat.* Quo in loco haud dubiè illa fieri in prætoris conspectu iniuria dicitur, quam dicunt practici in facie iudicis fieri. Et hæc quidem interpretatio nostra eò videri probabilius potest, quod eam quoque iniuriam definierit Vlpianus *atrocem, quæ in theatro quis vel in foro caditur:* capit. nono in princip. de iniurijs. Haud dubiè per theatrum, ludos; & per forum, prætoris conspectum ex Labeonis sententia intelligens, cap. 9. §. 1. de pœnis.

## C A P V T X.

*De tutela fœminarum, deque lege Claudia tutelari noua disputatio.*

**D**E tutela fœminarum non tanta est obscuritas, quantam esse plerique existimant. Mulieres contendit Cicero teneri perpetua tutela, quas tamen Iurisconsulti anno duodecimo tutela liberari tradiderunt. Et vtrumque verissimum est. Erat enim tutela pupillaris, quæ anno duodecimo finiri solet: erat etiam muliebris tutela, qua fœminæ per in manus conuentionem & Vestæ sacerdotium duntaxat liberabantur. † Proinde quum dixisset pro Murena Cicero, *mulieres omnes propter infirmitatem consilij, in tutorum potestate esse, ad Iurisconsultos conuersus: Hi, inquit, innuerunt genera tutorum, quæ potestate mulierum continerentur.* Itaque moris olim fuit, ut virgines ad annum vsque duodecimum sub tutoribus vel testamento datis vel legitimis agerent, & finitis annis pupillaribus, quia infirmitate consilij rebus proprijs superesse non poterant, &

& more maiorum nihil agere sine auctoritate, (quemadmodum refert Portius Cato legem Oppiam suadens, apud Liuium libr. 21.) si tutores onere tutelæ defungi vellent, poterant in iure alteri tutela cedere: & is cui tutela cedebatur, cessicus tutor; tutelaque cessia, cessitia tutela dicebatur. Quò spectat quod in frag. Vlpiani tit. de tutelis sic legimus: *Permissum erat in iure, cedere tutela, feminarum tantum, non etiam masculorum.* Certè quia masculi, ætate pupillari finita, omni modo liberabantur tutela, feminae verò non item. Nec quidem ante legem Claudiam vlla tutelarum in huiusmodi cessionibus haberi solet ratio: sed ita tutela passim cedebatur, vt is qui pupillæ tutor, licèt legitimus, tanquam proximus agnatus, fuerat, onere tutelæ, finita ætate pupillaris statim si vellet liberareretur, aliique ex agnatis post eum proximis in iure tutela cederet. Quod quum satis iniquum esse diuus Claudius animaduertisset, legem edidit, qua legitimas feminarum tutelas sustineri voluit. De qua lege sic scripsit in d. titu. de tutelis idem Vlpianus. *Feminarum autem legitimas tutelas lex Claudia sustinet.* Sunt qui non recte pro *sustinet* legendum esse *sustulit* contendunt: Sensus enim illius loci est, quia lex Claudia legitimas feminarum tutelas sustinet, ideo quantum ad agnatos pertinet, hodie cessitia tutela (quæ in solis feminarum tutelis olim habebat locum) non procedit: sic nimirum, vt legimus pupillæ tutor, finita ætate pupillari, alteri ex agnatis tutela cedere amplius possit. Igitur diuus Claudius legitimas feminarum tutelas non sustulit, sed *sustinuit*; hoc est distulit, vltra pubertatis tempus prorogauit, seu potius continuauit. Eam enim esse verbi *sustinere* significationem, nemo est qui non iudicet ex cap. 42. de noxalib. act. Eodémque sensu accepisse verbum *sustinere* visus est etiam Cicero ad Atticum

ticum lib. 12. *Sustinenda tamen*, inquit, *si tibi videtur, solutio est nominis Cereiani, dum & de Metone, & de Faberio sciamus*. Nec quidem ignoro, quid de lege Claudia per legem Constantini sublata rescripserit imperator Leo capitulo tertio. C. de leg. tut. Sed quia legis Claudiae diuersa fuisse capita videntur, Constantini & Leonis constitutiones ad aliam Claudiae legis clausulam quam ad hanc esse referendas, coniectura probabili demonstrabo. Nusquam legitimas feminarum tutelas omnino sustulisse diuum Claudium, vel Leo vel Constantinus auctores sunt. Sanè lege 12. tabularum agnati pupillorum pupillarumque tutores erant legitimi: sed ita quidem, ut eadem lege certus esse agnatorum ordo descriptus videretur. Sic nimirum, ut agnatus proximus, vel proximi, reliquis in administratione tutelae praeferrentur. capit. 3. §. 1. de leg. tut. Ad quem ordinem visus est Iustinianus respexisse, quos ad hereditatem lex vocat, eosdem tutores esse contendens: quia plerumque ubi successionis est emolumentum, ibi & tutelae onus esse debet. §. vnico Institutionum de legitim. patrim. tutor. Igitur si agnatus proximus familiam solet habere, consequi rectè videretur, ad eundem etiam tutelae onus pertinuisse, non autem ad omnes agnatos. Ideoque ex vera legis interpretatione hic ordo seruari solet, ut consanguineus patruo praeferretur, non contra patruus consanguineo, id est fratri. Cæterum diuus Claudius hunc lege constitutum ordinem noua lege sustulit, & consulibus eam dedit auctoritatem, ut pupillis *extra ordinem*, hoc est, non seruato ordine agnatorum legitimo, ex agnatis eligere tutores possent, ad functionem huiusmodi maximè idoneos. Sic tamen ut proximiores, siquidem satis essent idonei, seruato antiqui iuris ordine tutores essent; sin verò inter agnatos magis inuenirentur proximioribus

ximioribus idonei, illi tutelam administrarent. Et idcirco ex inquisitione tutores dare consules dicebantur, §. Sed ex his, Inst. de Attil. tuto. cap. 1. de confir. tutore. Eaque consulum inquisitio tam ad eos tutores qui extra ordinem, quam ad eos qui testamento dabantur, omnino pertinet, non autem ad cautionem rem pupilli saluam fore, ut quidam nugantur. Est enim ea cautio prætoria, cap. 1. de prætor. stipulationibus. Nimirum à prætore tutelari primum excogita. Hæc quum ita sint, iam facile intelligimus, quid sibi velit hæc Claudie legis ad Suetonium brevis clausula, qua sanxisse D. Claudius dicitur, ut pupillis tutores dari extra ordinem possent. Verba Suetonij hæc sunt in vita Claudij: *Sanxit ut pupillis extra ordinem tutores à consulibus darentur*: hoc est, sanxit ut pupillis non observato agnatorum ordine legitimo tutores darentur. Ut sic ea ratione dare tutores extra ordinem, scripsisse Suetonium non sit dubium, qua Ulpianus dixit, *extra ordinem ferias indicere*, cap. 26. §. 5. Ex quibus causis maior. hoc est, non observato aliquo statarum solemniumque feriarum ordine. Nec quidem nos moueat, quod scripserit Ulpianus, *legitimos tutores neminem dare, sed eos legem duodecim tabularum tutores facere*, cap. 5. de legit. tut. Illud enim tunc locum obtinebat, cum extra ordinem nullus necessario eligendus esset tutor. Tunc autem legitimus tutor non dabatur, sed ipso decemviri iure tutor efficiebatur. Quem si propinqui probarent ad tutelæ functionem esse omnino idoneum, consulibus eam tribuebat D. Claudius potestatem, ut extra ordinem in locum illius alium ex agnatis idoneum surrogarent. Et sic quidem ex inquisitione tutores dare consules dicebantur. Quod autem quidam dicunt, *extra ordinem* idem esse omnino quod *de plano*, id sanè plus est quam nugatorium. Nam

quum dico, extra ordinem ferias indicere, quid sub-  
 intello? nonne, feriarum? Quid item quum dico;  
 extra ordinem tutores dare? nonne idem est ac si di-  
 cerem, extra ordinem tutorum, tutores dare? Quis  
 est, quæso, tutorum ordo, qui legitimus non est? Agna-  
 ti siquidem vt ad successionem, sic ad tutelam lege  
 duodecim tabularum ordine vocantur: quo ordine  
 non seruato, si tutor detur, dari tutor extra ordinem  
 rectè dicitur, cap. 12. §. 2. in fine, de relig. & sumpt. fu-  
 ner. Idque adeò verum est, vt eadem propemodum  
 ratione, in quodam imperatorum Valentiniani, Theo-  
 dosij, & Arcadij rescripto *de alio ordine dari* in mo-  
 ribus defensores iubeantur, l. 3. in fin. C. TH. de tut. &  
 curat. creand. hoc est, de ordine cognatorum, eò quòd  
 nulli superessent legitimi. Cæterum non tam Con-  
 stantinus, pro antiqui iuris auctoritate, quàm prætor  
 tutelar, diu ante Constantinum Claudiam hanc le-  
 gem visus est primus sustulisse. Is siquidem agnato-  
 rum ordinem legitimum semper esse in tutelis obser-  
 uandum sic statuit, vt proximus agnatus etiam ad tu-  
 telam inidoneus, legitimus tutor esset penes idoneum  
 administratione relicta, cap. 13. de curat. fur. Et tunc  
 quidem primum in vsu fuisse prætor, rem pupilli  
 saluam fore, cautio videtur. Constantinus autem ius  
 antiquum, quo certus agnatorum ordo seruari solet,  
 contra legem Claudiam in fœminarum tutelis recipi,  
 expresso quodam rescripto voluisse visus est, cap. 2.  
 c. TH. dict. tit. Igitur ante orationem diui Claudij,  
 consanguineus, patruus, & reliqui agnati, quoad suc-  
 cessionem, eodè ordine ad tutelam vocabantur Diuus  
 deinde Claudius, ordinem in successionib. duntaxat;  
 non autem in tutelis semper obseruari voluit. Prætor  
 denique tutelar contra Claudiam legem secundum  
 ius antiquum edixit. Quod quidem prætoris edictum  
 Constan

Constantinus, & Leo Impp expressis rescriptis confirmasse, ad tutelas fœminarum legitimas traxisse visi sunt, d. cap. 2. & cap. 3. C. de legit. tut. Duo itaque fuisse videntur legis Claudiae capita: vnum quidem, quo ordinem legitimorum tutorum non semper esse obseruandum, visus est diuus Claudius constituisse: alterum verò, quo legitimas fœminarum tutelas sustinuit, & ultra pubertatis tempus prorogauit.

## CAPUT XI.

*Demonstratur Triboniani de compensationibus manifestus error.*

**A**IT Vlpianus: *Quoties ex maleficio oritur actio, ut puta ex causa furtiua, ceterorumque maleficiorum si de ea pecuniariè agitur, compensatio locum habet, cap. 10. §. 2. de compenlat. Quomodo autem huiusmodi soleat compensatio fieri, optimè docet his verbis Seneca de benefic. lib. 6. Sic debitori suo creditor saepe damnatur, ubi plus ex alia causa abstulit, quàm credito petit. Non tantum inter creditorem & debitorem index sedet, qui dicat, pecuniam credidisti. Quid ergo? pecus abegisti, seruum eius occidisti, argentum quod non emeris possides: aestimatione facta, debitor discede, qui creditor veneras. Loquitur Seneca de pecunia credita, hoc est non deposita, sed mutua, c. 11. de reb. cred. Et sic quidè satis tam ex Seneca, quàm ex Vlpiano perspicuum est, in iis etiam quæ ex maleficiis oriuntur actionibus, locum fuisse compensationi. Proinde si rem apud me deposueris, & mihi postea furtum feceris: quæri solet an compensatio locum habeat. Et quidem ante Iustiniani tempora locum videri in hac specie compensationi aliquem fuisse, ex eo probari potest, quod scripserit expressè Tribonianus, ne in actione depositi compensatio locum ha-  
beat,  
F f 3*

*beat, Iustiniani primum sanctione dispositum esse, §. in bonæ fidei. Inst. de act. cap. si. C. de compensat. Id si verum est, consequi ergo rectè videtur, ante tempora Iustiniani reprobata omnino non fuisse in causa depositi compensationem. Quod tamen falsum esse, intelligi ex Paulo euidenter potest. Sic enim scribit Paulus Sentent. lib. 2. tit. 12. In causa depositi compensationi locus non est, sed res ipsa reddenda est. Si dixeris, id iis qui in libris Sent. Pauli plurima transformarunt, acceptum ferendum esse: audi quid Seneca scripserit in eodem libro 6. Separantur actiones, ( inquit Seneca ) & de eo quod agimus, de eodem nobiscum agitur. Confunditur formula, si qui apud me pecuniam deposuerit, idem mihi postea furtum fecerit, & ego cum illo furti agam, & ille mecum depositi. Quæ proposuisti, mi Liberalis, exempla, certis legibus continentur, quas necesse est sequi. Lex legi non miscetur, utraque sua via habet actionem propriam, tam mehercule quàm depositum, quàm furtum. Hæc Seneca. Ex quo loco satis esse manifestum puto, in depositi causa, etiam Senecæ ( qui sub Nerone floruit ) temporibus locum non fuisse compensationi. Ut enim lex legi non miscetur, sic nec furtum misceri deposito testatur expressè Seneca. Si deposito furtum non miscetur, ergo nec admitti huiusmodi formularum confusio debet, nec per consequens furto pensari depositum potest: sed sua via actionem habet propriam, sine aliqua formularum confusione, tam depositum quàm furtum. Et hoc nimirum illud est, quod sibi volunt hæc Pauli verba: Sed res ipsa reddenda est. Idque mihi sic videtur.*

CAPVT



## CAPVT XII.

*Quo sensu accipiendum sit quod scripsit Vlpianus,  
 statores suos habere in prouinciis  
 proconsulem non posse.*

**L**AMPRIDIUS auctor est, Alexandrum imperatorem, ne ante tribunos aut duces, apparitores irent prohibuisse. Apparitores, inquit, *nullos esse passus est tribunis aut ducibus, milites anteire voluit: iussuque ut ante tribunum quatuor milites ambularent, ante ducem sex, ante legatum decem, hique ad domos suas reciperentur.* Et quia statores apparitores sunt, profectò dubium non videtur, quin ad hanc Alexandri constitutionem respexerit Vlpianus, quum ita scriberet: *Nemo proconsulum statores suos habere potest, sed vice eorum milites ministerio in prouinciis funguntur.* cap. 4. in princ. de offic. proconsul. Ut sic quidem non solum ducibus, legatis, & tribunis statores suos esse, hoc est domesticos apparitores, prohibuerit Imperator Alexander, sed etiam prouinciarum præsidibus & præconsulibus eosdem denegauerit. Quasi dixerit Vlpianus, si quo procòsuli exeundū sit, nullos habebit domesticos apparitores, sed milites ante eum ambulabunt. Et quia hi milites proconsulum domestici non erant, ideo in prætorium proconsule reducto, sese ad domos suas recipiebant. Et hæc quidem omnium primus sic visus est constituisse Alexander Imp. Olim enim sub C. Cæsare Augusto, & qui ad Alexandrum vsque Augustum subsequuntur, imperatoribus statores suos, hoc est domesticos apparitores, videntur in prouinciis proconsules habuisse. Eoque pertinet quod Cicero, quum proconsul esset & Imperator, sic C. Cælio quæstori scripsit, epist. Famil. libro 2. *Quæ quum essent incerta existimanti*

tamen esse faciundum, ut ad testatores meos & lictores cum litteris mitterem.

## C A P V T XIII.

*Explicatur L. Qui Roma §. Flavius, De verb. obligat.*

**F**LAVIUS Claudio Stichum ea lege donauit, ut manumitteretur; adiecta pœnali stipulatione, si non manumitteretur, & vindicta liberaretur: quasitum est, an de libertate Stichi Claudius conueniri à Flauio possit. Et posse quidem Scauola contendit, cap. 122. §. Flavius, de verb. obligat. Qui huic responso diuorum Marci & Commodi obiiiciunt rescriptum, hi non animaduenterunt fuisse Hadriani quandam constitutionem rescripto diui Marci abrogatam: quæ Hadriani constitutio Scæuolæ temporibus in usu erat. De seruis enim ea conditione venditis aut donatis (nihil enim interest, cap. 7. §. 7. de donat. inter vir. & vxor. cap. 20. de manumiss. cap. 16. §. 1. de manumiss. vind.) ut manumittantur rescripta duo in pandectis inueniuntur: vnum quidem diui Hadriani, alterum verò diui Marci Hadrianus voluit huiusmodi seruos aliter liberos non fieri, quàm si manumitterentur: & idcirco donatarios emptoresque ut manumittant cogendos esse. Contra, diuus Marcus non necessariâ esse manumissionem, sed ipso iure seruos huiusmodi conditione alienatos, fieri liberos, in semestribus constituit, quemadmodum Scæuola & Claudius scribunt, c. fin. de seru. export. Qui quidem Scæuola eo tempore vixit, quo simul imperabant M. Antoninus Philosophus, & L. Ælius Verus. Antoninum enim Philosophum usum esse Scæuola iurisperito testatur Capitolinus: quo tempore in usu erat Hadriani constitutio. Nam ea quæ diuo Marco adscribitur, tunc demum lata est, cum Antoninus & Commodus simul

simul imperabant, cap. 3. qui sine manumiss. ad liber. per. Quo tempore floruisse Scauolam nunquam inuenies. Proinde temporibus Scauolæ, quia ex D. Hadriani constitutione serui huiusmodi conditione alienati, sine manumissione ad libertatem non perueniebant: idcirco rectissimè visus est scripsisse idem Scauola, serui nomine hac conditione donati vt manumittatur, donatarium conueniri posse. d. §. Flavius. Nam quod in eodem illo Scauola responso, in quo de rescripto Hadrianis disseritur, enim constitutionis D. Marci facta sit mentio, (d. cap. fin.) illud ad Scauolam referri non debere satis indicat verbum C L A V D I V S. Quo verbo significari videtur, ea quæ de Marci constitutione responso Scauolæ adiecta sunt, non ipsi Scauolæ, sed Claudio Tryphonino adscribenda esse; & sic intelligenda, quasi ius illud quo primum post tempora Scauolæ populus Romanus ex Antonini & Commodi rescripto vti cæpit, responso Scauolæ Claudius adiecerit. Claudium enim quendam ad Scauolam notas scripsisse, indicat hæc epigrapha c. 3 l. ff. de legat. lib. 3. *Apud Scauolam lib. 18. ff. Claudius notat.* Esse autem Claudium hunc Claudium Tryphonium, ex c. 5 §. de administr. tut. constat.

C A P V T X I V.

*Emendatur L. Si arbiter, ff. De probat.*

**R** E S P O N S V M istud Labeonis, quod deprauatissimum est, in pristinam integritatem restituere visum est operæ precium. Et constat quidem sic in Florent. pandectis non rectè legi: *Et hoc ita quod Græci dicere solent.* ΕΝ ΠΛΑΤΕΙ *enim potest hoc memoria non teneri, intra annum puta factum.* Ego locum huic sic esse puto restituendum: *Et hoc ita quod Græci dicere*  
F f      5      solent

solent EN ΠΛΑΤΕΙ. *Non enim potest hoc memoria non teneri, intra annum, puta, factum: cum interim nemo sit eorum qui meminerit, quibus consulibus id fieri videret. Vt sit sensus: Quum quæritur an operis facti memoria extat, non hoc quæritur, an aliquis meminerit quo die aut quo consule illud factum sit: sed satis est vt meminerit intra annum vnum aut alterum, tres decem aut viginti annos, & ita deinceps, opus factum esse. c. 2. §. 8. de aqua & aq. plu. arcend. Et hoc EN ΠΛΑΤΕΙ fieri idcirco dicitur, quia operis facti memoria ad liquidum oratione non perducitur, quemadmodum fit quum dies & consul exprimuntur, d. §. 8. Si enim ἐν πλάτει accipiendum esse, eleganter docet noster Iacob. Curtius, ad Curtium fratrem *εἰς τὴν* lib. 1. c. 18. Est & alius in eodem responso mendosus locus: cui medebimur, postquam admonuerimus in Florentinis pandectis postremam huius responsi partem præcedentibus eiusdem responsi clausulis non rectè sine interpunctione adhærere, hunc in modum: *Cum interim nemo sit eorum qui meminerit quibus consulibus id fieri viderit, sed cum omnium hac est opinio, &c.* Sic enim locus hîc emendandus est, vt ab his verbis, *sed cum omnium*, noua initium sumat huius responsi clausula, hoc modo: *Sed quum omnium hac est opinio, nec audisse, nec vidisse, quum id opus fieret, neque ex iis audisse, qui vidissent aut audissent, & hoc infinite: similiter sursum versum accidet, quasi memoria operis facti non extaret.* Ecce quàm sit elegans & perspicua posterioris huius responsi partis sententia, leui correctione huiusmodi adhibita, vt *Quasi*, pro *Quum*, legamus. Sanè in notarum interpretatione frequenter esse allucinatum Tribonianum, sæpiùs demonstratum est: idque eodem hîc factum esse omnino videtur, siquidem hæ particula, *Quasi*, *quum*, & *quod*, solent ferè notis ijsdem designari.*

CAPVT XV.

*Quot fuerint pecuniarum fide publica deponendarum  
apud Romanos rationes.*

**A**PVD nummularios, mensarios, siue argenta-  
rios (quos Comici interdum appellant *trapezi-  
tas*, interdum *danistas*) duobus modis deponi pecuniæ  
solent: nimirum aut custodiæ aut fœnoris gratia. c. 7.  
§. 2. depositi. cap. 50. de administ. & per tut. De prior  
modo sic scribit Plautus in Capt.

*Ibo intro, atque intus subducam ratiunculam,*

*Quantillum argenti mixi apud trapezitam fiet.*

De posteriore apud eundem Plautum in Mostel. legi-  
mus, vbi danistam sic loquentem introducit.

*Scelestiorem ergo annum locando argento fœnori*

*Nunquam ullum vidi, quàm hic mihi annus obigit.*

*A mane ad noctem totum usque in foro ago diem,*

*Locare argenti nemini nummum queo.*

Qui autem custodiæ causâ pecunias apud mensam  
deponebant, hi fidem publicam sequebantur; & ijs qui  
idipsum fœnoris gratia faciebant, alijsque creditori-  
bus cunctis præferebantur. cap. 24. §. 2. de reb. auctorit.  
iud. possid. Eosque qui non fœnoris sed custodiæ causâ  
apud trapezitas pecuniam deponebant, publicè il-  
lam deposuisse ex Papiniano colligi potest, cap. 56.  
§. 1. Mand. cap. 24. §. 2. de reb. auct. iud. poss. Quo sen-  
su, in loco publico pecuniam deponere consignatam, visus  
est etiam Hermogenianus dixisse cap. 64. de fideiuf-  
sor. Tabernas etiam argentarias publicas fuisse, expres-  
sè testatus est Vlpianus c. 32. de contrah. empt. d. §. 2.  
Et certè duplex olim fuisse, custodiæ causâ, re-  
rum fide publica deponendarum ratio videtur. Aut  
enim in loco publico apud mēsam nummulariorum,  
aut

aut in loco sacro apud sacerdotem ædis alicuius, vel fani pecuniæ deponebantur. De pecunijs quæ in æde custodiebantur, scribit eleganter hunc in modum Plautus in Bacchidibus:

*Nos ibi apud Theotimum omne aurum deposuimus*

*Qui illic sacerdos est in Diana Ephesia.*

Et paulò pòst;

*Quin ipsa in æde Diana conditum est, ibi*

*Demum publicitus seruant.*

Eoque sensu, rem pecuniâque signatam in æde deponere, visus est etiam Vlpianus scripsisse, cap. 1. §. 24. cum §. seq. de pos. Per ædem enim, ædem sacram apud Vlpianum intelligi, docet his verbis Iulius Paulus: *Sed constat, ut antè litem contestatam præses iubeat in æde sacra pecuniam deponi.* cap. 73 de procurat. cap. 5. ad leg. Iul. peculat. Porro hæc omnia, in æde, in fano, apud ædituum, & apud pontificem deponere, eadem sunt. De pecunijs quæ in fano ponebantur, sic scribit lib. 5. epistol. famil.

† Cicero: *Nam de Luceio est ita actum, ut auctore Cn. Pompeio ista pecunia in fano poneretur.* Et paulò pòst: *Illud me non aduertisse molestè ferrem, ut adscriberem te in fano*

† *pecuniam iussu meo deposuisse.* Idem Cicero lib. 1. §. ad Atticum sic scribit: *Quum ex reliquis, quæ Nonis April. fecit, abundarem, cogor mutuari: quodque ex istis fructuosis rebus receptum est, id ego ad illud fanum sepositum putabam.* Eos quoque qui apud pontificem pecuniam deponebant, eam in æde siue in fano deposuisse, non est obscurum, si consideremus sacerdotes etiam pontifices veteribus appellatos fuisse, quo sensu collegium sacerdotum, collegium pontificum appellatum est à Pomponio: Eoque sensu accipiendum est quod ita Varro scribit lib. 5. de ling. Latina: *Ea pecunia quæ in iudicium venit in litibus à sacro sacramentum. Qui perebat & qui inficiabatur, de aliis rebus utrèque quingentos asses apud pontificem*

*pontificem deponebant.* Sic locus hîc legendus est, non autem *Quingentos aris*, non *apud pontem*, vt malè passim legitur, eiusque hæc est sententia: Litigatores de alijs rebus quingentos asses, de alijs certum item ac legitimum numerum assium, apud ædis alicuius sacræ siue fani sacerdotem deponebant. Sic enim hoc in loco pontificem esse accipiendum, satis etiam demonstrant hæc eiusdem Varronis verba subsequētia: *Qui iudicio vicerat, suum sacramentum à sacro auferebat, victus ad ararium redibat.* Aedituus Theophilo sacerdos dicitur, qui sacras ædes tuetur. Festus autem non sacerdotem, sed eum esse aedituum ait, qui sacræ ædis tutor est, hoc est illius curam gerit. Et est vtrūque verissimum, sed diuerso respectu. Aedituus enim sacerdos, ædis custodiæ præerat, ne fortè fur aliquis aut nocturnus in eam irreperet latro. Ille verò aedituus qui curam gerebat ædis sacræ, nec sacerdos erat nec habitabat in æde: sed vt omnia facta essent in ea, & tecta, sedulam operam periculo suo dabat, de quo nullus est hîc differendi locus. De ijs autem qui sacrarum ædium custodiæ præerant, scribit eleganter Arnobius aduersus gentes lib. 6. *Et tamen, ô isti, inquit, si apertum vobis & liquidum est; in signorum visceribus deos viuere, atque habitare cœlites: cur eos sub validissimis clauibus, ingentibusque claustris sub repagulis, pessulis, aliisque huiusmodi rebus custoditis, conseruatis, atque habetis inclusos: ac ne fortè fur aliquis aut nocturnus irrepat latro, aedituis mille protegitis, atque excubitoribus mille?* De his sentire visus est etiam in Octauio M. Minucius Felix, quum ita scriberet: *Frequentius denique in aedituorum cellulis quàm in ipsis lupanaribus flagrans libido defungitur.* Addatur illud Tertulliani, de cultu fœminarum: *Eius templi aedituus & antistes pudicitia est.* Et de anima; *Quid si ab aedituo redempta clam inspectione cognori?*

gnouit ? Hinc intelligere mihi nunc videor , quid sibi voluerit Vlpianus , quum ita scriberet : *Proinde & si custodiam tabularum adituus vel tabularius suscepit , dicendum est teneri eum interdicto*, cap.3.§.3. de tab. exhiben. Non enim dubito , quin de ijs tabulis Vlpianus hîc sentiat,quæ vel priuatim apud tabularium,vel publicè in æde,in fano,apud eius antistitem, siue pontificem , custodiæ causâ deponebantur. Eoque sensu ædituum visus est etiam accepisse Paulus in cap.9.§.1. Ad l.Iul.pecul.& Papinianus in cap.77.§.26. de leg.2. Et sic quidem in æde , in fano , apud Pontificem & apud ædituum deponere , eadem esse omnino videntur. His ita expositis,videamus nunc de mensæ rationibus, & quidnam sit, pecuniam de domo numerare. Gellius lib.14.c.2.auctor est,*expensi latione,mensa rationibus, chirographi exhibitione, tabularum obsignatione, testium intercessione probari olim solere pecuniâ deberi*: haud dubiè per *mensa rationes*,nummulariorum rationes intelligens , quas *mensa scripturam & negotium mensa* appellat Vlpianus cap.27.de furt. cap.77. §.16. de leg.2. c.28.§.8. de lib.leg. Quia enim apud mensam veteres magnam pecuniæ partem deponebant custodiæ causâ: idcirco eueniebat sæpenumero, vt à debitoribus interdum quidem de domo , interdum de mensa creditoribus satisfaceret. Sique in foro ab argentarijs pecuniæ fieret numeratio , in tabul. addebatur , *ex mensa scriptura* : sin verò domi, syngraphæ adscribebatur , *ex cista*, vel, *ex arca*: auctore in Terentium Donato. Eoque referendum est , quod sic apud Scæuolam legimus, *Decem quæ Lucius Titius ex arca tua acceperat* : & apud Marcellum , *Si domi pecuniam fideiussor non habebit*. cap.26. de constit. pec. cap.38. in fin. Mandati. Hinc etiam intelligimus , quo sensu *de mensa emere* hunc in modum scripserit Apuleius in apologia 1. *Marcus*



*autem Cato, nihil oppertius ut alij de se predicarent, ipse in oratione scriptum reliquit, quum in Hispaniam consul proficisceretur, tres seruos solos ex vrbe duxisse, quoniam ad villam publicam venerat, parum visum qui videretur, iussisse duos pueros in foro de mensa emi, eos quinque in Hispaniam duxisse. Eoque spectat illud Ciceronis pro Flacco: Si prator dedit, à quaestore numerauit: quaestor, à mensa publica: mensa publica, aut ex vectigali, aut ex tributo. Nec aliò referendum est quod sic Tacitum Annalium lib. 5. scribit: Euersio rei familiaris dignitatem ac famam princeps dabat, donec tulit opem Caesar, disposito per mensas millies sestertio, factaque mutuandi copia sine usuris per triennium, si debitor populo in duplum pradiis cauisset. Ad numerationem quæ fieri de domo dicebatur, visus est Plautus respexisse dum ita scriberet in Curculione:*

*Pessime metui, ne mihi hodie apud prætorem solueret.*

*Verum amici compulerunt, reddit argentum domo.*

*Nec alio sensu, quindecim mutua numerata de domo, in illa cautione accipienda sunt, quam Paulus ait in auditorio Æmilij Papiniani lectam fuisse, cap. 40. in princ. Si cert. petat. Seneca sic etiam scribit Epist. lib. 3. Scis, inquit, cuius arca utar: expecta me pusillum; & de domo fiet numeratio.*

## CAPVT XVI.

*Emendatur Cap. III. in princip. De minoribus.*

**L**EX Attilia iubebat mulieribus, pupillisve non habentibus tutores, dari tutores à prætore, & maiore parte tribunorum plebis, quos tutores Attilianos appellamus. Sed quia lex Attilia Romæ tantum locum habebat, lege Iulia & Titia prospectum est, ut in prouincijs quoque

quoque similiter à præsidibus eorum, darentur tuto-  
 res, ut auctor in fragmentis Vlpianus tit. 11. Huc spe-  
 ctat illud Apuleij de asino aureo lib. 1. *At verò domi-  
 tue iam defletus & conclamatus es, liberis tuis tutores in-  
 ridici prouincialis decreto dati.* Cæterùm D. Claudius,  
 teste Suetonio; sic à prætore & maiore parte tribunorum  
 ad consules ius dandorum tutorum transtulit, ut à consuli-  
 bus extra ordinem dari tutores pateretur. Tutoris à con-  
 sulibus dati meminit Plin. epist. lib. 9. sic Quadrato  
 suo scribens: *Dicunt contra Auidius Quietus, Cornutus  
 Terrullus: Cornutus datum se à consulibus tutorem Helui-  
 di filia, petentibus matre eius & vitrico, nunc quoque non  
 sustinere deferere officij sui partes.* Tandem denique im-  
 perante M. Antonino Philosopho, à consulibus non  
 ad vrbanum prætorem, sed ad prætorem quendam tu-  
 telarem, omnis creandorum tutorum potestas transla-  
 ta fuit. *Is siquidem, si Iulio Capitolino credimus, præ-  
 torem tutelarem primus fecit, ut nimirum diligentius de  
 tutoribus tractaretur.* Hæc quum ita sint, non satis  
 intelligo qua ratione *ad tempora Seueri imperatoris tu-  
 telaria consulum decreta* traxerit Vlpianus, cap. 3. in pr.  
 D. de minoribus. Nulla enim consulibus imperante  
 Seuero, sed omnis prætori tutelari pupillorum mino-  
 rumque cura incumberebat: eoque iure annos propè  
 triginta vsus tū erat populus Romanus. Quamobrem  
 si locus mendo non careat, sic videlicet, ut pro *Consu-  
 lum* legi *proconsulum* debeat, ingenuè fateor nihil esse  
 mihi quo tam manifestum Vlpiani excusare errorem  
 possim. Et hæc quidem emendatio eò videri probabi-  
 lior potest, quòd similis error in quadam D. Hiero-  
 nymi ad Nepotianum epistola etiam deprehendatur.  
*Turpe est, inquit Hieronymus, ante fores sacerdotis  
 Christi crucifixi, pauperis, & qui cibo quoque vefcebatur  
 alieno, lictores consulum & milites excubare, iudicemque  
 prouincia*

*provincia melius est apud te prandere, quàm in palatio.* Quo in loco quum expressè de proconsulibus tractet diuus Hieronymus, quis dubitabit quin pro *Consulum* legi *Proconsulum* omnino debeat? Atque ita quidem mihi videtur.

## CAPUT XVII.

*Notatur Triboniani de minorum curatoribus manifestus error.*

VETERI iure sic tutela liberabantur pubertate masculi, ut iis inuitis nulli curatores, nisi redditis causis, darentur. Proinde qui curatorem minori 25. annis, à præside vel à consulibus postulabat, causam cur eum dari desideraret, exprimere debebat: eaque cognita, si iusta videretur, dabat magistratus curatorem: sin iniusta, denegabat. Causas autem iustas Lætoria lege fuisse expressas verisimile est. Siquidem ea lege cautum fuisse, & abundè prouisum adolescentulorum circumscriptioni, docet M. Cicero lib. 3. offic. Inter eas causas continebantur, necessaria rerum alienatio, lites, & iurgia necessaria, lasciuia etiam, hoc est prodigalitas, & dementia, hoc est manifestus furor. Hoc ius antiquum sic aboleri voluit diuus Marcus, ut non amplius redditis causis darentur curatores, sed tutor non prius tutelam deponeret, quàm curator esset à magistratu constitutus. Et id quidem expressè testatus est Callistratus: *Officium, inquit, tutorum curatoribus constitutis finem accipit: ideoque omnia negotia, quæ inita sunt, ad fidem curatorum pertinent: idque diuus Marcus cum filio suo Commodò rescripsit capite 33. §. 1. de administrat. & peric. tut.* Auctor est etiam Vlpianus, *sacris* (hoc est diui Marci & Commodi) *constitutionibus, eum qui tutelam administravit, iuberi pupillum*  
G g. *suum*

*suum puberem factum admonere ut sibi curatores petat, cap. 5. §. 3. dicto titulo : Et hoc nimirum illud est, quod de M. Antonino Philosopho ad hunc modum scribit Iulius Capitolinus : De curatoribus verò quum ante non nisi ex lege Latoria, vel propter lasciviam, vel propter demetiam darentur, ita statuit ut omnes adulti curatores acciperent, non redditis causis. De hac constitutione sentire omnino visus est idem Ulpianus, cum ita de minoribus viginti quinque annis scriberet: Et ideo hodie in hanc usque aetatem adolescentes curatorum auxilio reguntur, nec ante rei suae administratio eis committi debet, quamvis bene rem suam gerentibus. capite primo de minoribus. In hoc enim loco hodie additum est ab Ulpiano, respectu veteris iuris diui Marci & Commodi rescriptis abrogati. Non sic igitur hodie, hoc est post diui Marci rescriptum, ut olim, lege nimirum Latoria, curatores accipiunt adolescentes. Olim quidem, redditis probatisque causis : hodie verò, causis non redditis : olim, actus magis legitimi quàm ætatis, hodie ætatis magis quàm alicuius actus ratione, cap. 3. §. 1. de tutel. Eoque spectat quod ita Caius Instit. libro primo scribit: Sub curatore sunt minores ætate, maiores eueriores, insani. Et hæc quidem quum ita sint, nunc opinor, intelligimus, quod Tribonianus ait, inuitos adolescentes curatorem non accepisse, præterquam in litem, (§. Item inuiti, Instit. de curat.) id ex veteri iure, hoc est ex lege Latoria, omnino reperitum videri, & ad ius nouum nequaquam pertinere. Notanda igitur est Triboniani negligentia, qui ius vetus & abrogatum, pro nouo mira fraude, ne dicam inscitia, nobis obtrusit. Si dixeris hoc iure Iustiniani fortassis tempore vsos fuisse Romanos, respondebo id satis non esse liquidum, præsertim quum Iustinianus, quicquid pandectis conclusum est, id omne sibi velit tribui, & ad sui temporis vsum ac-*  
*commodari;*

commodari: in quibus pandectis hæc quoque diui  
Marci constitutio passim occurrit. •

C A P V T X V I I I.

*De liberali caussa, & de partu agnoscendo quadam à nemine  
animaduersa, ad §. Preiudiciales, Instit. de actionib.*

**S**Ic legitimam causam liberalis habebat actio, ut  
sea non tam Romanæ ciuitatis, quàm communi  
gentium iure possit introducta videri. Cuilibet enim  
suum licuit liberali caussa manu asserere popularem,  
ut ciui Romano Romanum ciuem etiam Athenis, &  
ciui Atheniensi ciuem Atheniensem etiam Romæ.  
Quò spectant hi Plauti versus in Pœnulo:

*Meis consanguineis nolo te iniuste loqui:*

*Carthagini ego sum gnatus olim, ut scis sciens.*

P. Æ. O mi popularis salue. A. G. Et tu adepol quisquis es.

*Et si quid opus est, quæso dic atque impera*

*Popularitatis caussa.*

Non enim libertatis iudiciûm prætor inuenit, sed lex,  
quæ partim communem, partim propriam status con-  
ditionisve distinctionem in Romanam rempub. in-  
uexit. Nam qui hominem liberum liberali caussa ma-  
nu assererat, quod ex lege Quiritium vel iure Roma-  
no ageret, legitimam actionem impetrabat: siqui-  
dem ut liberos homines alienare prohibitum erat,  
sic alienatos ciuili iudicio manu asserere permissum.  
Paut. in Curculione:

*Qui scias mercari furtinas atque ingenuas virgines*

*Ambula in ius.*

Terentius in Adelphis.

—— *Quid si ego illam tibi nolo vendere,*

*Coges me? Æ s c. minimè. S. namquè id metui. Æ s c.*

*neque vendundam censeo*

G g 2

*Que*

*Quæ libera est, nam ego illam liberali affero caussa manu.* Ex quibus versibus satis intelligi potest, actionem liberalem civilem esse. Quum enim dixisset Æschinus liberam mulierem vendi non posse, subiicit. *nam ego illam liberali affero caussa manu.* Quasi diceret, quia liberam mulierem quæ vendi non potest, alienare vis, ego illam *liberali caussa*, hoc est directæ legis, qua liberos homines alienare prohibitum est, actione affero manu. Ceterum si quærebatur, an quis libertus esset an servus, ideo ex prætoris iurisdictione substantiam capiebat hæc quæstio, quòd ea ex nudo facto constaret. Quum enim quærimus an quis libertus sit, an servus, in effectu quærimus an quis sit manumissus: & ita de facto. Simili modo quoties de hoc contenditur, an quis sit filius, non de iure, verum de facto omnis est contentio. Et idcirco hæc quæstiones duæ *ex prætoris iurisdictione substantiam capiebant*, hoc est viua iudicis quem prætor decernebat, voce, sine aliquo iuris auxilio expediebantur. Nam quæ ex nudo constabant facto, nuda solent prætoris iurisdictione definiri. Errant igitur, qui existimant actionem de partu agnoscendo ex S.C. nasci. Id enim nullis rationibus probari potest, tum quòd huius actionis caussa ex nudo meròque facto non ex certa aliqua iuris aut S.C. definitione constaret: tum etiam quod nec S.C. Plancianum, nec illud senatusconsultum quod temporibus diui Hadriani factum est, quicquam aut adderet actionis substantiæ aut detraheret, sed dies constituebat denuntiationi certos. Ergo quum ante huiusmodi senatus constitutionem, nullo certo ordine aut tempore denuntiationi constituto, passim etiam sine denuntiatione maritos pro arbitrato agnoscendi alendique partus gratia feminae suos prouocarent. voluit senatus intra dies triginta post diuortium connumerandos feminas suis maritis

maritis denuntiare, si se pragnantes existiment, ut possent mariti custodes mittere. Nam quod Plancianum senatusconsultum de liberis agnoscendis nihil ad actionis substantiam pertineat, ex Vlpiano nemo est qui non iudicet. *Ordinem enim senatusconsultis de liberis agnoscendis exponi* Vlpianus auctor est c. 1. §. ex hoc rescripto. de vent. inspic. Ut sic ante senatusconsulta, quibus ordo erat constitutus sine ordine de agnoscendo partu veteres contendisse videri possint. *Si leges ad leges trahi solebant, cap. 26. de legib. si pratoris edicta ad iuris constitutiones trahenda nonnunquam sunt, cap. 1.* Ex quib. causis maior. si denique *de his quis primo constituta sunt, certius quid statui poterat, cap. 11. de legib.* cur non circa prætoria de partu agnoscendo actione, certius quid senatus potuisset ordinare? Est igitur de partu agnoscendo iudicium honorarium, non ciuile.

## C A P V T X I X.

*Rectè Vlpianum scripsisse: electrum auri appellatione contineri.*

**V**LPIANVS auctor est, *electrum auri appellatione non contineri, cap. 4 de legat. 1.* Id quo sensu accipiendum sit, optimè aduersus Hermogenem docet Tertullianus. *Nam & testam, inquit. licet ex argilla confectam, iam non argillam vocabo, sed testam: & electrum licet ex auro & argento fœderatum, nec argentum tamen nec aurum appellabo, sed electrum, à cuius habitu quid diuerit, pariter & à vocatu eius recedit appellatione, sicut & conditionis proprietate.* Huic addendum est illud eiusdem Tertulliani aduersus Praxeam. *Si enim sermo ex transfiguratione & demutatione substantia caro factus est, una iam erat substantia Iesus ex duobus, ex carne & spiritu mixtura quadam, ut electrum ex auro & argento, & incipit neq au-*

G g 3 rum

*rum esse, id est spiritus, nec argentum, id est caro, dum alterum altero mutatur, & tertium quid efficitur. Electrum igitur quia ab auri & argenti recessit habitu, ideo nec auri potest nec argenti nomine comprehendi. Et hoc nimirum illud est, quod dixit Vlpianus, rerum vocabula immutabilia esse, d. cap. 4. Quod enim ex auro & argento fœderatum est, proprium habet vocabulum, & electrum appellatur, non aurum, non argentum. Eoque sensu electreos nummos appellasse videri potest Lamprius in Alexandro: *Alexandri habitu*, inquit, *nummos plurimos figuravit: & quidem electreos aliquantos, sed plurimos tamen aureos.* Est & aliud genus electri, de quo scribit ad hunc modum D. Ambrosius Hexameron lib. 2. cap. 15. *Quid autem tibi referam, quod electrum lacryma virgulti sit, & in tanta materia soliditatem lacryma duret? Nec leuibus id asseritur testimoniis, quando folia & minutissima surculorum portiones, aut exigua quedam animalium genera in electro sæpe reperiuntur, quæ videtur, cum adhuc gutta esset mollior, recepisse, solidata tenuisse.* Hæc Ambrosius. Et de hoc quidem electri genere accuratissime disputaturus est doctissimus medicus Gulielmus Pantinus in iis commentariis quos in C. Plinij naturalem historiam meditatur.*

## C A P V T XX.

*De legitimo luctus tempore: & luctus quomodo diminui soleat, obiter explicatum.*

**R**ECTE est à Cuiacio animaduersum, ad Theodosij usque tempora fœminis apud Romanos decem menses luctui peragendo fuisse præfinitos. Quamuis enim certissimum sit, luctus legitimum tempus anni spatio circumscriptum fuisse, idque variis auctorum locis confirmetur: nihilominus tamen annum luctus



luctus de mensibus duntaxat decem accipiendum esse, potest eleganter defendi. Romulus in anno constituit menses quinque bis esse suo. Et idcirco indicare volens luctus legitimum tempus anni spatio comprehendit, sic scripsit Fast. libro primo Ovidius:

*Per totidem menses à funere coniugis uxor*

*Sustinet in vidua tristitia signa domo.*

Cæterum Numa Pompilius decem mensibus non contentus, anno duos adiiciens, luctus legitimum tempus non prorogavit: Testis est enim Plutarchus *longissimum tempus luctus esse decem mensium, etiam Numam voluisse*. Idcirco quum apud Livium legimus lib. 2. & apud Plinium, aut (si mauis) Cornelium Nepotem in libro de viris illustribus, matronas Brutum ut parentem annum luxisse, sic annum interpretabimur, ut illo annus Romuli, hoc est decem duntaxat menses comprehendantur. Et hanc quidem interpretationem verissimam esse ex Seneca potest euidenter intelligi. Is enim quum libro octauo epist. scripsisset, *Annum feminis ad lugendum constituere maiores*: hanc eandem sententiam repetens in libro de consolatione sic scripsit: *Maiores decem mensium spatium lugentibus viros dederunt*. Haud dubie per annum in epistolis decem menses; & in libro de consolatione, per decem menses, annum intelligens, alioquin sibi ipsi contrarius est. Et ita quidem satis esse perspicuum arbitror, luctus olim legitimum tempus decem mensium fuisse, eoque annos quingentos, & quod excurrit, videlicet ad Cannensem vsque cladem, vsus esse Romanus populus constantissime videtur. Qua de re sic scribit Festus de verb. signif. libro 7. *Græcia sacra festa Cereris ex Græcia translata, quæ ob inuentionem Proserpina matronæ colebant: quæ sacra quum non essent matronæ quæ facerent, propter Cannensem cladem, & frequentiam lugentium, institutum*

*institutum est ne amplius 30. dieb. lugeretur. Idipsum confirmat lib. 1. Valer. Max. Quanto, inquit, nostra civitatis senatus venerabilior in deos, qui post Cannensem cladem decrevit, ne matrona ultra 30. diem luctus suos extenderent, uti ab his sacra Cereris peragi possent? Et ita, quamvis decem mēsis lugeri moris esset, nihilominus tamen ob Cannensem cladem lugentiumque multitudinem, ne amplius, triginta diebus lugeretur, est institutum. Quod quidem institutum perpetuum non fuisse, & sic esse accipiendum, ut diutius triginta diebus habitu tristiore lugubribusque non vterentur matronæ, annu. n interim à secundis nuptiis, propter sanguinisurbationem, perpetuò abstinentes, indicat his verbis idem Valerius: *taque matres ac filia, coniugesque, & sorores nuper interfectorum absterfis lacrymis, depositisque doloris insignibus, candidam induere vestem, & aris thura dare coacte sunt.* Ait etiam Liuius lib. 22. *post Cannensem cladem SC. diebus 30. luctum finium: non autem tempus legitimum luctus, in 30. dies mutatum fuisse.* Nec quidem dubito quin aliud sit in prudentum responsis rescriptisque principum *lugere* aliud *elugere*. *Lugetur* enim maritus lugubribus, ut vtar Labeonis verbo: *elugetur* anni spacio, hoc est decem mēsis etiam sine lugubribus, propter sanguinisurbationem. cap. 8. & 11. de his qui not. infam. cap. 2. C. de secund. nupt. Elugendi ratio ad nuptias solas pertinet, ob sanguinis, inquam,urbationem. Ideoque si intra legitimum tempus mulier partum ediderit, quamvis maritum luxerit, elugere tamen non compellitur, hoc est, habitu quidem lugubri tamdiu uti cogitur, quamdiu partus editus non est, non autem decem mēsis à nuptiis abstinere. siquidem edito partu nubere potest. d. cap. 11. Lugentur parentes, sed non elugentur: non enim liberorum & parentum luctus, impedimento nuptiis sunt, d. cap.*

cap. 11. Mariti verò lugentur, & elugentur: lugentur interdum, & non elugentur: elugentur etiam nonnunquam, & non lugentur. Lugentur quidem, & elugentur, quum luctus non minuitur; lugentur & non elugentur, quum partus intra luctus legitimum tempus editus est: tunc enim minui luctus solet: elugentur denique & non lugentur, mariti perduellionis, damnati, hostes, suspensiosi, quique manus sibi intulerunt mala conscientia. d. c. 11. Elugendi verbo non autem lugendi utitur prætor in edicto perpetuo, de his qui notantur infamia, in Florentiniis pandectis, de muliere tractans, quæ intra id tempus, quo virum elugere moris est, antequam virum elugeret, in matrimonium collocatur, capit. 1. de his qui notant. infam. Lugendi verbo non elugendi utitur Iulius Paulus Sentent. lib. 2 tit. 21. *Qui luget, inquit, abstinere debet à conuiuijs, ornamentis, & alba veste.* Immo aliud esse elugere, aliud lugere, docet euidentissimè imperator Gordianus, quum ait, *luctus diminutionem ad habitum duntaxat tristiores, ceteraque id genus insignia, non autem ad tempus illud quo maritos elugeri moris est, pertinere.* cap. 15. C. Ex quibus causis. infam. irrog. Igitur quum luctus diminuitur, *lugendi*, hoc est à conuiuijs, ornamentis, & alba veste abstinendi, *non autem elugendi*, hoc est viduitatis legitimo tempori derogatur. Differentiam horum verborum, præter Iurisperitos & imperatores, obseruant nulli. Et idcirco rectius interpretibus alijs, non qui iuri operam damus, intelligimus quid sibi voluerit Apuleius, de asino lib. 8. quum ita scriberet: *Boni ergo & opimi consules, si luctu legitimo miserrima fœmina necessarium concesseris tempus, quoad residuis mensibus spacium reliquum compleatur anni.* Sensus enim est, quia per anni spacium elugeri maritum leges iubent, ideo à nuptiarum mearum

sollicitatione quiesces donec mensibus residuis reliquum anni spacium compleatur. Ante tempora Theodosij Apuleium vixisse negat doctissimus Iuriconsultus. Cedo, quamobrem? Opinor quia de luctus anno loquitur Apuleius. Meminit idem Apuleius Lolliani Auiti in Apologia 1. *Quum*, inquit, *Lolliano Auito prasente publicè dissererem*. Et in apologia 2. *Petit postea suppliciter, ut se Lolliano Auito clarissimo viro purgem*. Auctor est etiam Vlpianus, Lolliano Auito diuos fratres rescripsisse: *Spurios*, inquit, *posse in ordinem allegi, nulla dubitatio est: sed si habeant competitorem legitime quasitum, praferri eum oportere, diui Fratres Lolliano Auito Bithynia prasidi rescripserunt*. cap. 3. §. 1. de decurionibus. Hunc Lollianum etiam sub Heluio Pertinace floruisse, testis est Capitolinus. Quum enim dixisset, *Pertinacem post Sulpitium Apollinarem Grammaticem professum esse*, subiecit: *Sed quum in ea minus quæstus proficeret, per Lollianum Auitum consularem virum patris patronum, ducendi ordinis dignitatem petijt*. Igitur Lollianum Auitum sub diuis fratribus præsidem fuisse Bithyniæ, & Pertinacis etiam temporibus vixisse manifestum est. Et idcirco rectè consequi omnino videtur, iisdem ferè temporibus etiam Apuleium vixisse. Si tunc vixerit Apuleius, quid igitur obstat, quo minus luctus illud legitimum tempus cuius Apuleius meminit, ad annum etiam Romuli, hoc est, ad decem menses, referamus: Eoque respexisse Theodosium omnino est verisimile, quum ita scriberet: *Si qua ex fœminis perduto marito, intra anni spacium alieri festinauerit nubere, (paruum enim tempus post decem menses seruandum adijcimus, tamen si idipsum exiguum putemus) probos inuista notis, honestioris nobiliorisque persona decore & iure priuetur*. cap. 2. C. de secund. nupt. Et sic quidem tempus legitimum

rimum luctus, à Romulo decem mensibus comprehensum, & Numæ legibus confirmatum, vsque ad Imperatoris Theodosij tempora obseruatum fuisse videri potest. Et quum antea perpetuo prætoris edicto fœminæ antè annum nubentes, infamia duntaxat notarentur: antiquo iuri videtur etiam Theodosius adiecisse, vt omnia quæ de priorum maritorum bonis, vel iure sponsalium, vel iudicijs defunctorum, huiusmodi mulieres consecutæ fuerant, amitterent. dict. cap. 2. Et hæc de luctus legitimo tempore. Nunc videndum est, luctus quomodo diminui soleat. *Minuebatur populo luctus*, inquit Festus, *ædis dedicatione, quum à censoribus lustrum condebatur, quum votum publicè susceptum soluebatur.* Ædis dedicatione idèò minui populo luctum arbitror consueuisse, quod Romani diem dedicationis epulo celebrarent. Et quia eos qui lugebant, à conuiujs abstinuissent, testari Iulium Paulum liquidò demonstratum est, idcirco mirum videri non debet, ædis dedicatione luctum populo minutum fuisse. Quod autem de voto Festus scribit, id ipsum Ælius Spartianus confirmat, qui sic de Ælio Vero in Hadriani vita scribit: *Quare ab Hadriano votorum causa lugeri est vetitus.* Et paulò post, in vita Ælij Veri: *Iussusque ab Hadriano, quia vota interueniebant, non lugeri.* Cæterum priuatis, auctore eodem Festo, *minuitur luctus, quum liberi nati sunt, quum honos in familiam venit, quum parens, aut liberi, aut vir, aut frater ab hoste captus domum redit, quum desponsatio est, quum propiore quis cognatione quam is qui lugetur natus est, quum in casto Cereris est, omnique gratulatione.* De casto Cereris mihi non liquet, nisi fortè per castum Cereris, nimiam castitatem illam intellexerimus, qua viduas Africanæ Cereri olim adstitisse scribit ad vxorem lib. 1. hunc in modum Tert.

*Cæterum*

*Caterum viduas Africana Cereri adfistere scimus, durissima quidem obliuione matrimonij adlectas. Nam manentibus in aeternum viris, non modò thoro decedunt sed & alias eis vique ridentibus, loco suo insinuant, adempto omni contactu, usque ad oscula filiorum. Et sic quidem castum Cereris ea forma veteres dixisse videri possunt, qua castum pro re casta, sacrum pro re sacra, diuinum pro re diuina, & sic deinceps sumitur. Idquè mirum in modum eiusdem Festi, Liuij, & Valerij confirmatur testimonijs, qui Cereris festa lugentes matronas colere non potuisse expresse testari sunt. Igitur si matrona in Casto Cereris est, & ei lugendum esse contingat, ne omnino per luctum stet, quo minus statò solemnique die Cereri sacra fiant, luctus ordinis amplissimi decreto minuitur. Hæc quum ita sint, satis opinor nunc intelligimus, quonam referendum sit, quod de luctu minuendo sic scripsit imperator Gordianus: Decreto amplissimi ordinis, luctu fœminarum diminuto, tristior habitus, cateraque id genus insignia remittuntur. capite 15. C. ex quibus caus. infam. irrogat. Porro, quo in libro singulari ad leges 12. tab. fore promissum, ut in hoc 1. Varior. lib explicarentur dies sessionum, id nunc consilio propter amplitudinem argumenti mutato non præstabitur. Scripsimus enim Protribunalium librum singularem, in quo huiuscemodi argumentum multo commodiùs, & expeditiùs tractatum est.*

*Finis libri primi Varior.*

IACOBI



IACOBI RÆVARDI  
IVRISCONSULTI

VARIORVM, SIVE DE  
Iuris ambiguitatibus

LIBER SECVNDVS.

CAPVT I.

*De pactis, & explicatur L. pacta conuenta.  
ff. De contrah. empt.*



ONVENTIO Iurisconsultis generis nomen est, non speciei: pactum Legumlatoribus, Grammaticis, & Oratoribus generis nomen est, non speciei, prætoribus verò & Iurisconsultis, speciei non generis. Contractus Grammaticis & Oratoribus pactum: pactum, iisdem contractus est: prætori verò & Iurisconsultis, in facto pactum, in iure versari contractus dicitur. Auctor ad Herennium lib. 2. pactum pro omni conventionione accepisse visus est: *Ex pacto*, inquit, *ius venit, si quid inter se pepigerunt, si quid inter aliquos convenit.* Rursus, pactum illud quod inter aliquos convenit, sic eodem loco diuidit, ut aliud legitimum esse, aliud sine lege obseruari contendat: per pactum haud dubiè conventionem intelligens. Quo modo ipsi quoque decemviri per pactum legitimam conventionem visi sunt intellexisse, dum ita scriberent: SI MEMBRUM RVPIT, NI CVM EO PACIT TALIO ESTO. Quasi dicant, ni aliquo modo, is qui alterius membrum

brum rupit , cum eo cuius membrum rupit , pactus fuerit, conuenerit, aut fuerit stipulatus. Non enim tam præcisè pactum requirunt decemuires , vt aliam conventionem legitimam nullam admittant, quemadmodum prætores & Iurisconsulti faciunt, quum de pactis disserunt. Et hoc modo legitima conuentio etiam à Paulo pactum appellatur, c. 6. de pact. Non quod in ea persuasione sit Paulus , vt existimet , pactum illud decemuirale , aliquid cum pacto prætorio habere commune: non magis hercle quàm contractus , quàm stipulatio. Verùm quia in suis legibus pacti vocabulo sic vtuntur nomothetæ , vt illud pro conuentione omni legitima videantur accipere , idcirco contendit idem Paulus, ex pacto interdum actionem dari, veluti quum illud lege vel Senatusconsulto cõfirmatur. Tunc enim amplius *nudum pactum* , hoc est nudus consensus, nudum placitum dici non potest , non magis profectò quàm stipulatio, quàm contractus. Quid enim aliud est stipulatio , quàm conuentio legitima ? quid item aliud contractus ? quid denique pactum lege confirmatũ; Sed an nudum maneat? Et magis est, vt nudum esse definat. Quòd ego non probo. Verius siquidem esse didici, omnino pactum nõ esse, sed aliam conventionem legitimam. Iurisconsulti prætoresque pactum ad nudum factum referunt : conuentiones, nõ autem pactum. in legitimas, & in eas quæ sine lege obseruantur; diuidunt. c. 5. & 6. de pact. Cicero pactum legitimum dixit ; Iurisconsulti conuentionem legitimam, non pactum. Igitur qui de pactis disputat, non Cicero- nem, Cornificium, nomothetas, Oratores, aut Grammaticos, sed prætores solos & Iurisconsultos de vocis notatione consulat. Sũt enim quædam vocabula, quibus quum generalia verè sint , pro specialibus tamen Iurisconsulti & prætores vtũtur. Legare siquidem decemuiris



cemuiris idem est, quod Iurisconsultis testari. Legandi enim verbo generis loco vsi sunt perpetuò decemuiri, quod contra pro certa quadam supremæ voluntatis specie, prudentes iuris prætorésque semper vsurparunt. Emptionem quoque alio sensu decemuiros, alio item prætores & Iurisconsultos accepisse dubium non est. Illi quidem, per emptionem genere quodā omnem omnino alienationem intellexerunt, c. 29. de statuli. Hi verò, pro certa quadam nominati contractus specie, emptionis vocabulo vsi sunt. Itaque conuentiones omnes quæ lege aliqua confirmantur, pacta non sunt: sed sunt vel contractus, vel aliæ conuentiones legitimæ. Rursus, conuentiones omnes quæ ex nudo factō constant, contractus eadem consideratione non sunt, sed sunt pacta. Et hoc illud est, quod dixit Vlpianus, *in pactis factū, & in stipulationibus ius versari*, c. 27. §. pactus, de pact. Cæterum, quamuis ex nudo pacto nulla detur actio, si tamen ei subsit causa satis ad agendum valida. vtique non ex pacto, sed ex causa quæ pacto subest, dabitur actio. Nudum autem pactum cui causa subest, illud rectè appellabitur, quod alicui obligationi principali ex cōtinenti adijcitur. Nam si pactum ex cōtinenti additum est venditioni, pacto subest venditio. non contra venditioni pactum: hoc est, licet vires & substantia ex venditionis contractu assumat pactum, sic tamen pacto subiecta est venditio, vt ea sui iuris non sit, sed ex nudo pacto interpretationem & moderamen necessarium accipiat. Si venditio subsit pacto, ergo & causa venditionis, quæ causa civilis est: si venditionis causa, ergo pactum quod venditioni statim in ipso contractus ingressu adijcitur, rectissime *pactum cui causa subest* appellabitur, vt sic per causam, illius cui pactum ex cōtinenti adijcitur, obligationis substantiam intelligamus. *Qui fundum vendidit.*

dit, inquit Hermogenianus, *ut eum certa merce de conductum ipse habeat, vel si vendat, non alij sed sibi distrahat, vel simile aliquid paciscatur: ad complendum id quod pepigerunt, ex vendito agere poterit.* cap. 75. de contrah. empt. Ecce causa quæ huic pacto subest, venditionis causa est. Quia igitur hac specie pacto nudo causa subest, id quod pacto convenit, actione ex vendito continetur. Et hoc illud est quod dixit Ulpianus, *quum nulla subest causa, propter conventionem non posse constitui obligationem.* Causam intellige, ad actionem impetrandam efficacem. Non enim dabat actionem prætor, nisi causa cognita. Proinde si pacto nulla subesset causa cuius ergo actionem merito prætor concederet, quia pacta ex natura sui ad actionem inualida sunt, non mirum est aut absurdum, prætorem nullam ex pacto actionem tribuisse. Igitur nuda pactio actionem non parit. Illud autem otiosum non est, quod *pactum aliud, adijci ex continenti, aliud ex intervallo,* Ulpianus adnotatum reliquerit, c. 7. circa princ. de pact. Illudque *quod ex continenti adijciuntur,* hoc est in ipso ingressu, aut (ut clariùs dicam) quod simul cum ipso contractu expressum, una conventionem, una scriptura, (quæ emptionis dicitur instrumentum, cap. septuagesimo secundo de euiet.) concluditur, *format actionem,* hoc est, ipsius principalis obligationis formula comprehenditur: non quidem ut duabus actionibus aut formulis opus sit; verum una actio, unaque formula, & pacti & contractus placitum continebit. Veluti, si pacto fundi venditioni ex continenti additum sit, ut fructus eius anni quo fundus venit, una cum fundo cedantur: nec fructus sine fundo, nec fundus sine fructibus peti rectè poterunt: sed pactum cum contractu venditionis sic confunditur, ut una actione, unaque formula, non ex pacto, sed ex empto, & fundum emptor

pror & fructus consequatur, d. cap. 75. Et ita quidem, pacta, quæ contractibus ex continenti adiiciuntur, inesse contractibus, & actiones formare dicuntur. Quæ autem ex intervallo adiiciuntur, vtrique inesse negantur & ad actionem proficere, verum exceptiones pariunt. Aliud autem est, si pactum ex intervallo additum detrahat aliquid conventioni legitima, tunc enim id quod detractum est, contractu continetur, cap. 7. de pact. cap. 72. de contrah. emptio. Eiusque diuersitatis hanc reddi posse rationem existimaui, quod pacta omnino facti, contractus verò non facti solum, sed etiam iuris esse intelligantur, dicto §. pactus. Et idcirco, contractibus detrahi ex intervallo bene potest pacto, si modò id, quod detrahitur, non iuris, sed facti sit, cuiusmodi ea sunt, quæ *adminicula contractus* dicuntur, dict. cap. 72. Verum quia contractus, vt gentium iuris, sic etiam iuris ciuilis sunt: nihil adiici iis ex intervallo *per pactum*, id est per nudum factum, potest. Certè quòd in iis quæ ex iure constant, nihil operetur nudum factum, sine ciuilis aut prætorij iuris subsidio, cap. 3. §. 1. c. 30. de constituta pecunia. *Sed hoc locum habet*, inquit Papinianus, *in his quæ adminicula sunt contractus: veluti, ne cautio duplæ præstetur*, d. cap. 72. Fortè conuenerat vt fundi venditor cautionem duplæ cum satisfactione præstaret: postea perfecta omnino venditione pactus est venditor, ne eam quæ lege venditionis continetur, duplæ cautionem præstaret, pactum hoc, quia detrahit venditioni, quamuis ex intervallo additum sit tamen inesse venditioni rectè censetur. Verum sic cum ea conditione tibi venditus esset fundus, ne cautio duplæ præstaretur, post emptio- nem perfectam pactus cum venditore fueris, vt cum fideiussore cautio duplæ præstetur, creditur hoc non inesse. *Sed quo casu*, inquit Papinianus, *agente emptore*

H h

non

*non valet pactum, idem vires habebit, iure exceptionis agente venditore*, d. cap. 72. Quod sic esse intelligendum puto, si emptor ex interuallo pactus, vt cum fideiussore cautio duplæ præstetur, ex empto egerit ad fundi traditionem, vtique vt cautionem cum satisfactione venditor fundum tradens præstet, non rectè desiderabit, quia pactum ex interuallo additum empti iudicio non potest contineri. Verùm si venditor ex vendito ad pretium egerit, pactum illud quod agente emptore non valebat, vires habebit, inquit Papinianus, *iure exceptionis agente venditore*: hoc est, utilis erit exceptio, si non venditor pactus sit cautionem dupla cum satisfactione præstare. Siquidem ex continenti huiusmodi pactum venditioni fuisset additum, iure actionis non autem exceptionis eam rectè fuisset emptor persequutus. Tunc enim emptam rem petens, vnà & cautionem præstari rectè postulasset. Et ita quidem, ex Papiniani sententia, venditori ad pretium rei venditæ agenti, non ante satisfacere emptor, qui ex interuallo de cautione præstanda pactus est, iure tenetur, quam duplæ cautionem venditori idoneè præstitisset. Et hæc hæctenus de adminiculus contractus. Cæterum de contractus substantia, non tanta est obscuritas, vt ea prolixam disputationem requirat. Quamuis itaque pactum, quod ex nudo facto consistit, eam non habeat potestatem, vt ex interuallo aliquid contractui possit adiicere: ipsa tamen contractus substantia, quatenus ex nudo facto constat, rebus integris pacto mutari potest. Hac ni fallor, coniectura, quod contractus qui pacto renouatur, non tollatur pacto, vel penitus extinguatur (ea enim paciscentium non est intentio, qui pretium augent, vel minuunt) sed contractus maneat contractus, causa interim facti mutata. Contractus enim per pactum tolli non potest, nisi quatenus in naturam conuentionis

nis legitimæ pactum transierit, d. §. pactus. Potest tamen pacto renouari, quia eiusmodi renouatio non cōcernit ipsum ciuile ius, cum quo pactum nihil habet commune, sed nudum factum. Fundum Tusculanum à te quinquaginta aureis emi, postea rebus integris conuenit inter nos de sexaginta præstandis, ecce, emptio omnino non rescinditur, ius contractus siue auctoritas fundi non imminuitur, sed pretium, quod facti est, mutatur. Ius quidem emptiones contractusq; reliquos confirmauit: sed quo modo? An sic, ut domino certam rei suæ præscripserit æstimationem? Nequaquam: verum satis esse putauit, sic eos confirmare, ut qui aliquid emisset, modò pretium verè non dicis gratia interueniret, iure ciuili obligatum sibi venditorem haberet. Et quia ius non distinguit pretium, sed satis est interuenire pretium: pretij idcirco distinctionem ex nudo facto constare, & per consequens, eam contractus substantiam, quæ ex pretio constat, quis est quæso tam imperitus ut id non intelligat? Proinde siue augeatur, siue minuatur pretium, nihil ad ius, modò pretium interueniat: sed ad factum pertinet. Ideoque per nudum pactum, hoc est per factum nudum, augeri vel minui rectè rebus integris obligationis pretium potest. Siquidem factum facto, & ius mutari iure, non est absurdum.

## C A P V T I I.

*Explicatur L. Qui viam, D. De noui oper. nuntiat.*

**O** B S E R V I T V T E M nouū opus nuntiari posse, traditum est, c. 1. §. ius, de remiss. capitulo quinto in pr. de noui oper. nuntiat. Contra, eum qui viam habet, si opus nouum fundi domino in viæ ædificanti nuntiauerit, nihil agere, sed seruitutem vindicare non prohiberi, auctor est Iulianus cap. 13. de noui ope.

H h 2

nuntiat.

nuntiat. Et hæc quidem diuersa magis, quàm pugnantia sunt. Diuersitatis autem hanc puto reddi rationem posse, vt dicamus, in iis seruitutibus in quibus ædificatio ipso seruitutis iure prohibetur, esse locum nuntiationi: in iis verò, quæ ad ædificationem prohibendam opus habent iudicis officio, locum nuntiationem non habere. Si mihi seruitutem debeas alius non tollendi, prospectui luminibusque meis non officiendi, in hoc mihi obligatus es, vt non ædifices, vt alius parietem tuum non extollas. Proinde si ædificaueris, liberum erit mihi meo iure opus nouum tibi nuntiare, etiam sine pratoris aditione: quia ad illud mihi seruitutis iure es obligatus, vt non ædifices. Aliud autem est, si per fundum tuum habeam viæ itineris, aut actus seruitutem. Tunc enim idcirco tibi in viâ ædificanti non possum opus nuntiare nouum, quia illo ipso quod mihi debetur, seruitutis iure, tibi ius ædificandi non adimitur: & propterea sine auxilio iudicis nequeo, quominus ædifices, impedire. Vindicanda igitur erit viâ, itineris, aut actus seruitus: qua vindicatione non prohibebitur statim opus nouum, sed iter per fundum præstari desiderabitur. Tum si illud fortè deberi negauerit aduersarius, suam probabit actor intentionem: eaque posita & probata, ædificatio ad iter præstandum, pronuntiatione iudicis inhibebitur, capite 9. Si seruit. vind. Et hanc verissimam esse sententiam puto, d.l. Qui viam.

## C A P. V T. III.

*De pœna periurij.*

**Q**VI præstitum iusiurandum contemnit, peccare dicitur, cap. 2. C. de reb. cred. Qui falsum iurat, etiam peierat, capite vltim. de crim. stellionat. cap. 13.

cap. 13. in fi. de iureiu. Qui autem peierabat, is Deum, principem, censores, pontifices ultores habere, & extra ordinem puniri interdum solet. Religio contempta iurisiurandi, si in consulto & calore quodam peieratum esset, siue per Deum siue per principem, solum deum ultorem habebat, non principem dict. cap. 2. Cæterum qui cōsulto per Deos arave Deorum peierabant, pontificibus: qui per genium principis, principi: qui alia ratione, censoribus pœnas dabant. *Pontifices* scribit lib. 2. Dionysius *de omnibus causis ad sacra pertinentibus tam inter priuatos homines, quam inter magistratus sacrificos iudicasse.* Et idcirco etiam de periurio, quatenus illud ad sacra pertinebat, quale est quod per Iouem, per Deum fidium, aut per aras Deorum solemniter modo præstabatur, cognouisse olim & iudicasse omnino videntur: quemadmodum expressè Plautus de quodam iuramento conceptis verbis per aram Veneris præstito, in hunc modum scribit in *Rudente*:

*Gripe, quod tu istum talentum possis? R. Iuratu' st mihi*

*Dare. L. A. Libet iurare: tum meo pontifex periurio es?*

Qui autem consulto per genium principis peierabat, is ex constitutionibus principum fustibus interdum castigari solet, d. cap. 13. grauiusque multo iis qui per Iouem peierauerant puniebatur, quemadmodum auctor est in Octauio M. Minucius Felix. *Sic eorum, inquit, numen inuocant, ad imagines supplicant, genium hoc est demonem eius implorant, & est eis tutius per Iouis genium peierare, quàm regis.* Auctor est etiam Appalium libro primo Tacitus, *olim crimini datum fuisse, violatum periurio nomen principis.* Rubrio, inquit, *crimini datur violatum periurio nomen Augusti.* Et hæc de iis, qui per principis genium peierabant. In reliquos autem homines periuros censoria nota animaduertebatur. Siquidem, vt scribit in Officiis Cicero, *censores nul-*



*la de re diligentius quàm de iureiurando indicabant. Hunc etiam vilus est respexisse idem Cicero, quum in suis legibus periurij pœnam diuinam exitium, humanam dedecus statueret. Per dedecus enim quin notam censoriam intellexerit, nequaquam dubium est. Eiusque rei extat apud A. Gellium elegans exemplum, libro sexto cap. 18. Cùm enim decem captiuos Annibalem Romanum iureiurando ab eis accepto mississe, permutationemque Romanis non placuisse, scriberet Gellius: ex his captiuis octo ad Annibalem reuersos, & reliquos reuerti recusantes à censoribus notatos quasi periuros fuisse, his verbis adiecit. Hæc eorum fraudulenta calliditas, tam esse turpis aestimata est, ut contempti vulgo discerpique sint; censesque eos postea omnium notarum & damnis, & ignominiiis affecerunt, quoniam quod se facturos dictauerant non fecissent. Porro extra ordinem puniebatur, si in stellionatus crimen periurium incideret. Tunc enim non tanquam periurus, sed velut stellionatui obnoxius qui peierauerat, sic puniebatur, ut ad tempus exularet, cap. vltim. Stellionat.*

## CAPVT IV.

*Quid per arculam intellexerint Iurisconsulti.*

**D**I V O S fratres edicto admonuisse Martianus ait, ne sepultura traditum, hoc est, terra conditum corpus inquietetur: viderique terra conditum, etsi in arcula conditum hoc animo sit, ut non alibi transferatur, cap. 39. de relig. & sumpt. fun. Quo in loco per Arculam intellexit Accursius casam in qua ultra montes magni homines imponuntur sub terra. Ridiculum. Addidit enim Martianus, arculam in commodiorem locum transferri posse. Vnde etiam in Epiraphio An. Crestinæ sic legimus: NE QVIS NOS INQUIETET EX AR-

CA



CA NOSTRA, NEQUE AB ANTE ALIAM  
 PONAT, AVT COMMVTET. Certè Martiani  
 temporibus eam sepeliendi rationem in vsu fuisse su-  
 spicor, cuius Cassiodorus Variar. libro tertio memi-  
 nit. Tunc enim non terra solum condi solebat, sed  
 etiam in arca lapidea supra terram posita corpus per-  
 petuæ sepulturæ tradendum, plerunque recondebatur.  
 De quibus arcis sic apud Cassiodorum Danieli  
 cuidam scribit rex Thedoricus: *Et ideo artis tue peritia  
 delectati, quam in excavandis & ornandis marmoribus  
 exercens, præsentii auctoritate concedimus, ut te rationabi-  
 liter ordinante, dispensentur arca, qua in Rauennati vrbe  
 ad recondenda funera distrahuntur: quarum beneficio ca-  
 dauera in supernis humata sunt lugentium non parua con-  
 solatio: quoniam anime tantum de mundi conuersatione di-  
 scedunt, corpora verò dulces quondam superstites non re-  
 linquunt.* Hæc Cassiodorus. Eoque sensu accepisse ar-  
 cam lapideam visus est etiam Caius, cum ita scribe-  
 ret: *Aduersus eos qui in alterius arcam lapideam, in qua  
 adhuc mortuus non erat conditus, mortuum intulit vtilem  
 actionem in factum proconsul dat, cap. 7. de relig. & sumpt.  
 fun.* Et Seneca Epistol. libro decimo tertio. *In ipsa,  
 inquit, Scipionis Africani villa iacens hæc tibi scribo, ado-  
 ratæ manibus eius, & arca quam sepulchrum esse tanti viri  
 suspicor.* Dæque huiusmodi arcis illud Frontini etiam  
 accipiendum videtur, de diuersis mensuris agrorum  
 li. 1. *In campis verò statuerunt terminos quadratos cursorios,  
 & interiectis locis arcas & monumenta, vel alia testimonia.*  
 Et hæc de arcis. Plinius etiam scribit Nat. hist. libro  
 septimo, cap. 54. *sepultum intelligi, quoquo modo condi-  
 tum; humatum verò, humo contextum.*

## CAPVT V.

*Quomodo qui spondet, ipso iure ex sponso sit obligatus.*

**Q**VÆDAM deberi iure ciuili, quæ prætorio iure non debentur, certissimum est, cap. 4. cap. 30. de constitut. pec. Si tibi centum mutua dederim, & pactus sim ea non petere: iure ciuili obligatus es, iure prætorio non es obligatus. Es quidem iure ciuili obligatus, quia pactum eam non habet auctoritatem, ut quæ ciuilia sunt tollere possit, d. c. 4. & c. 5. i. de pactis. Proinde si mutua centum à te peterem, quamuis tecum pactus essem ea non petere, nihilominus tamen mihi à prætore dabatur actio: non quidem purè, verum exceptione addita huiusmodi: *Si non pactus sit ne peteret.* Quo sensu nihil interesse dixit Paulus ipso iure quis actionem non habeat, an per exceptionem infirmetur, cap. 113. de regul. iur. Ius ciuile stipulationes introduxit; ius ciuile ex stipula u actiones etiam dedit. Ideoque stipulationes omnes (paucis exceptis quæ ciuili etiam iure esse dicuntur inualidæ) ipso iure sic ex interrogatione & responsione subsistere intelligebantur, ut ad obligationem, etiam iocandi animo essent interpositæ, ipso iure prodesse. Eoque pertinet quod ita Plautus in Pseudolo scribit:

*Auferetur id premium à me quod promisi per iocum?*

Ius inquam ciuile stipulationes instituit. Quo modo? Nimirum ut altero interrogante *Dabis?* & altero respondente, *Dabo*, firma esset, & ipso iure valida conuentio. Idque illud esse omnino videtur, quod sic pro† Cecinna Cicero scribit: *Si quis quod spondit, qua in re verbo se uno obligauit, id non facit, maturo iudicio sine ulla religione iudicis condemnatur.* Sed cum varix inciderent stipulationum species, quæ quod dubiè essent & incerta

certa

certainæ, certam à prudentibus requirebant interpretationem : & quia sine certa interpretatione incerta lex & infinita seruari commodè non poterat: sic iuri prætorio actiones ex sponso legitimæ accommodari deinde cœperunt, ut quæ utiles essent, & ipso iure validæ, sapientius à prætore redderentur inutiles, ipsoque iure ex sponso obligatus iure prætorio interdum omni obligatione solutus esset. Idque ex Varrone de ling. Lat. lib. 5. satis probari potest. *Qui sponponderat*, inquit Varro, *despondisse dicebatur, quod de sponte eius, id est, voluntate exierat. Non enim si nolebat dabat quod sponso erat obligatus. Nam in comædiis vides dici, Sponden' tuam gnatam filio uxorem meam quod tuum & prætorium ius ad legem, & censorium iudicium ad æquum æstimabatur. Quasi dicat Varro: qui dixit Spondeo, etiamsi noluerit, hoc est, obligandi animum nullum habuerit, tamen ex sponso per legem obligatur, hoc est ipso iure: sed prætorio iure ad legem æstimato, hoc est velut viua voce legi mutæ accommodato, qui per legem obligatus est, is prætorio iure semper obligatus non est. Proinde non spondet ille statim*, inquit Varro, *qui dixit, Spondeo, si iocandi causa dixit, nec agi cum eo sponso potest. Itaque quisquis dicit in Tragœdia, Meministi te despondere gnatam tuam? quod nolens, hoc est sine sponte sua dixit, cum eo agi ex sponso non potest*, inquit Varro. Quia, ut mihi quidem fit verisimile, in huiusmodi actionibus non legem solum, qua qui spondet, etiamsi animum spondendi nullum haberet, est obligatus: sed prætorium ius ad legem æstimatum, quo nullæ sine iusta & probabili causa solent actiones dari, inspicimus. Et sic quidem accipienda sunt hæc Varronis verba, *Si nolebat*, quæ verba pessimè ad ipsam quæ desponderetur filiam visus est interpretes quidam retulisse. Lex ad formulam tantum & nudam verborum pronuntiationem

nem respicit : prætor non verba, non aliquam formulam duntaxat, sed mentem etiam & intentionem inspicit contrahentium. Et idcirco vel dare solet prætor ex sponſu actiones, vel denegare Denegabat, si iniusta, si improba, si ipso iure prætori stipulatio videretur inualida. c. 26. & 27. de verbor. obligat. Hoc est (vt. vtat Papiniani verbis) *si ab initio non valuit.* c. 123. de verbor. obligat. Dabat vel purè, si non ciuili solum, sed etiam iure prætorio stipulatio esset cõfirmata: vel addita exceptione, cum ea quæ ipso tantum iure utilis erat, & sic ab initio valuit, *prætorio iure*, hoc est per acceptiõnem postea inutilis reddebatur: c. 25. d. tit. c. 1. §. 3. de dol. mal. & met. except. cap. 17. §. 1. Solut. marrim. Quo sensu accipiendum est quod Paulus scripsit, *ex stipulatione per iocum vel demonstrandi causa interposita, nullam nasci obligationem*, cap. 3. in fin. de oblig. & act. Paulum enim ita interpretari conuenit, vt nulla efficax & satis ad agendum valida ex huiusmodi stipulatione obligatio nascatur : non quidem ipso iure, sed exceptionis auxilio : non legis, sed prætoris solius beneficio. Hæc qui non considerauerunt, in eo Caium, Pomponium & Iustinianum notare non verentur, quod illi verbis obligationem ex interrogatione & responsione contrahi expressè tradiderint. c. 1. §. 2. de oblig. & act. c. 1. de verb. obligat. §. 1. Instit. eod. tit.

## CAPVT VI.

*Verus intellectus §. pactus ne peteret, L. Si unus, ff. De pactis.*

**P**ACTVM de non petendo ciuilem obligationem non elidit, id est, sic non extinguit, vt possit impedire quo minus id quod ciuili debetur obligatione, actione ciuili rectè petatur. *Verum si quum pactus esset credi-*

*tor ne peteret, postea conuenisset ut peteret, pactum de non petendo tollitur sine eliditur* (perinde enim est) *per pactum de petendo, non quidem ipso iure, inquit Paulus, sed per replicationem, cap. 27. §. pactus, de pactis.* Certum est non esse in ea perſuaſione Paulum, ut contendat pactum per pactum replicatione ſemper ſic tolli, ut ipſo iure nunquam poſſit elidi, id enim falſiſſimum eſt. Nam pactum per pactum tam poteſt ipſo iure tolli, quàm per ſtipulationem ipſo iure ſtipulatio tollitur. Nec id obſcurum adeò eſt, ſi còſideremus id demum ipſo iure tolli, quod per ſe ſine aliquo aduentitio auxilio tollitur: quemadmodum oſtendimus in libro ſingulari Ad legem Scriboniam. Vel, ut planius dicam, quod eodem illo ipſo iure tollitur, quo ligatum eſt, id ipſo iure tolli dicitur. Itaque cùm ſtipulatio per ſtipulationem ipſo iure tolli dicitur: per ipſum ius, ciuile ius accipitur, quia ex eo iure ſtipulatio conſtat. Cùm autem naturalis obligatio ipſo iure per pactum tollitur, tunc per ipſum ius non ciuile ius, ſed ius naturæ intelligimus. Et idcirco pactum tolli per pactum poteſt ipſo iure, per ſe, ſine prætoris auxilio, ſi hoc actum eſt. Rurſus pactum pacto tolli non poteſt ipſo iure, ſi etiam hoc actum eſt. Tollitur quidem pactum pacto ipſo iure, ſi priùs pactum tale ſit, ut nec ad ciuilem aliquam obligationem pertineat, nec ei ſubſit cauſſa ad actionem impetrandam ſatis efficax, ſed naturalem nudam ſub ſe contineat obligationem. Tunc enim per pactum tollitur pactum, non quidem alicuius aut exceptionis aut replicationis medio; (id enim fieri non poteſt: nec ut poſſit fieri, obligationis natura patitur) *ſed ipſo iure.* hoc eſt eodem illo ipſo iure, ex quo ſuam fortitur ſubſtantiam. cap. 55. §. naturalis, de ſolut. Verùm ſi pactum alicui legitime conuectioni adiectum alio pacto tollendum ſit,  
tollit.

tolli quidem prius pactum per posterius non potest ipso iure, quia hoc actum non est: sed illud potius videtur actum, ut per replicationem elisa pacti prioris exceptione, ipsum quoque prius pactum non ipso iure, sed replicationis auxilio nullum sit. Veluti, si quum mutua centum tibi dedisset Sulpitius, tecum pactus de ijs non petendis, iterum de iisdem petendis paciscatur, quamuis pactum pacto tolli ipso iure possit, hoc tamen casu tolli ipso iure, hoc est per se, siue, ut clarius dicam, tolli iure pacti pacto pactum non potest, certè quod prius pactum, quia facti est tollere contractum mutui non potuerit. Ergo si centum quæ mutua dedit, petierit. Sulpitius creditor, & debitor contendat pactum esse creditorem ne peteret, quia pacto mutui obligatio elisa non est, civilis creditori ex causa mutui dabitur actio; reo verò defensionis loco, quia pacta iusta prætor servat, pacti congruenti exceptio non denegabitur: qua posita & probata, civilis extinguetur obligatio. Quòd si ponentem reum pacti de non petendo exceptionem, pacti de petendo excluderit actor replicatione, quia firma manet, & ipso iure semper valida, mutui civilis obligatio: de eo quæri solet, cur pactum istud de non petendo, tollatur per pactum de petendo, non tam ipso iure quam per replicationem. Respondeo, quia sic actum videtur. Sic nimirum videtur actum, ut salva quæ pacto tolli non potest principali obligatione, ni pacti de non petendo exceptione agentem repellat actorem reus, statim reus condemnetur: & nisi pacti de non petendo quam reus obtinuit exceptio replicatione pacti de petendo, per actorem rursus excludatur, absolvens omnino reus videatur. Igitur contractus mutui in causa est, quominus ipso iure hoc casu pactum tollatur per pactum. Et hoc quidem significare videntur hæc verba.



*Si hoc actum est.* Non enim negat Paulus, pactum per pactum ipso iure tolli posse, sed contendit tolli non posse si hoc actum est. Nam si pacto pactum ipso iure apud Paulum elideretur, consequens esset, ex posteriore pacto civilem nasci obligationem, & priore pacto mutui civilem obligationem elidi. Sed neutrum fieri potuit. Non est igitur mirum hoc actum esse non videri, ut pactum ipso iure per pactum elidi apud Paulum potuerit. Sanè Iurisconsulti quid actum sit sedulo inspiciunt in omni conuentione, cap. 2. §. 1. de hæred. vel act. vend. l. 4. de fide instrum. Aliud autem est in stipulatione. Quia enim stipulatio civilis est, non refert an ad contractum siue ad civilem aliquam obligationem ea adiiciatur, an verò per se stet. Semper enim ex stipulatu actio comperit. Ideoque ipso iure semper potest per stipulationem stipulatio tolli. Exposui paragraphum longè difficillimum nouo & singulari quodam intellectu.

## CAPVT VII.

*Auersio quid à sectione differat.*

**O**BTINUIT auersione in pandectis id dici venire, quod pretio infemel infimulque nuncupato non in res singulas constituto venit, Antonio Augustino, Brissonio, & alijs eruditjs viris auctoribus, cap. 35. §. in his, cum §. seq. de cont. empr. cap. 4. §. 1. de peric. & com. rei vend. cap. 62. in fine, de contrah. empridn. Goueano non assentior, existimanti id quod negligenter fit, neque consideratè factis, dici auersione fieri. Quis enim credat auersione opus locare, vinum auersione vendere, locare infulam auersione, idem esse quod negligenter locare, vendere? Auersioni contraria est sectio. Solet enim cum

cum auctio fit, res omnis auersione aut sectione vendi. Auersione quidem vna pertica, sectione verò distinctè gradatimque. Nam eò respexisse omnino visus est Plinius lib. 8. Epist. hunc in modum Caluissio suo scribens : *Ex ipsis etiam, quos non vna, ut dicitur, pertica, sed distinctè gradatimque tractant, quantò quis melior & probior; tantò mihi obligatior abit.* Loquitur Plinius de suis vindemijs, quas ait certatim negotiatoribus ementibus se vendidisse; & ex ijs nonnullos vna pertica, nonnullos distinctè gradatimque tractasse : Hoc est, ut mihi videtur, vindemias partim quidem auersione, partim verò sectione se vendidisse. Sectores damnati atque proscripti bona emebant auersione, quæ rursus sectione distrahebant. Auctor est enim Alconius, *sectores dictos esse qui spem lucri sui secuti bona condemnatorum semel auctionabantur, ac postea singulas quasque res pecunia populo venditabant.* Nec quidem hi duntaxat, sed omnes etiam qui sectione res aliquas vendebant, sectores dicebantur. Nam in quodam Latini Pacati Drepani panegyrico, qui olim Imperatori Theodosio fuit dictus, *vendi eo sensu sub sectore infantes dicuntur*, quo scripsit Eutropius *instrumenta regij cultus sectione distrahi*. Verba Pacati sunt hæc : *Vidimus redactas in numerum dignitates, & exutos trabeis consulares, & senes fortunarum superstites, & infantium sub ipso sectore ludentium flendam securitatem.* Et paulò post : *Ut possemus effugere carnificem, optabamus subire sectorem.* Eoque pertinet quod sic libro octauo Eutropius de M. Antonino Philosopho scribit : *Cum largitiones nullas haberet, facta in foro D. Traiani sectione, instrumenta regij cultus distraxit.* Bona quæ ad ærarium deferebantur, edictis publicari solent, hoc est publicè venalia proscribi aut proclamari : & tandem publicata interdum auersione, interdum sectione

ne



ne hasta posita distrahebantur. Eoque arbitror Ciceronem respexisse in Philippica secunda. Cum enim hasta posita pro æde Iouis Statoris bona Cn. Pompeij Magni subiecta esse præconis voci demonstrasset acerbissimè Cicero, hæc verba subiecit: *Expectantibus omnibus quisnam esset tam impius, tam demens, tam diis hominibusque hostis, qui ad illud scelus sectionis auderet accedere; inuentus est nemo, præter Antonium: præsertim cum toti essent circum hastam illam, qui alia omnia auderent.* Huic etiam consentaneum est quod sic Tacitus Annalium lib. 13. scribit: *Eius accusationis auctor extitit Patrus quidam, exercendis apud erarium sectionibus famosus, & tum vanitatis manifestus.* Hinc etiam intelligimus quid illud sit quod idem Tacit. sic l. 17. scribit: *Pridie Id. Mart. commendata patribus republica, reliquias Neronianarum sectionum, nondum in fiscum conuersas, reuocatis ab exilio concessit.* Et erat quidem tanta apud Romanos huiusmodi sectionis auctoritas, ut per eam legitimum dominium statim acquireretur. Testatur enim M. Varro de re rustica lib. 2. *dominium sex ferè res perficere, nimirum hereditaris aditionem, mancipationem, in iure cessionem, usucapionem, è prada sub corona distractionem, & demique sectionem.*

## CAP V T. VIII.

*Quid sit Testes de domo producere.*

**P**AULVS ait: *Testes eos quos accusator de domo produxerit, interrogari non placuit, cap. 24. de testibus.* Quem locum interpretans Duarenus, *Domesticus*, inquit, *testis non is tantum dicitur, qui in eadem domo habitat, sed & qui eiusdem familia, gentis, agnationis est.* Non rectè. Eorum enim qui de familia produceban-  
tur

tur testimonia non vsquequaque olim fuisse neglecta, docet actio tertia in C. Verrem Cicero, ubi Verrem Malleoli tutorem sic alloquitur : *Cur sodalis ( erat hinc Malleoli pater ) uxorem, sodalis socrum , domum denique totam sodalis mortui contra te testimonium dicere ; cur prudentissimas lectissimasque feminas in tantum virorum conventum insolitas inuitasque prodire cogis ?* Huic etiam adiungi potest quod sic de Iulio Cæsare Suetonius scribit : *In P. Clodium Pompeia uxoris sua adulterum, atque eadem de causa pollutarum ceremoniarum reum , testis citatus negavit se quicquam comperisse , quamvis & mater Aurelia & soror Isilia apud eosdem iudices omne ex fide retulissent.* Ideoque verisimilius est eos duntaxat testes de domo productos Paulo dici , qui in accusatoris sunt potestate. Sic testimonium domesticum Græci interpretantur. Et idcirco non possum non probare interpretis eximij Theodori Balsamonis sententiam, qui Canonem Synodi Carthaginensis 132. interpretans , quo testes quos de domo producit accusator, non esse audiendos etiam traditum est , *domesticos testes accusatoris ait appellari omnes qui cum eo habitant, & quibus ipse potest imperare.* Ea nimirum ratione , qua furta quæ serui faciunt dominis , liberti patronis , & mercenarii ijs apud quos degunt , domestica dicuntur. cap. 11. §. 1. de pœnis. Ad domesticum testimonium spectare videtur quod sic Apuleius scribit in Apologia prima : *Cipio enim produci eos pueros , quos spe libertatis audio confirmatos ad mentiendum.* Huiusmodi enim pueros de domo productos rectè dici ex VIPIANO probari euidenter potest. cap. 1. §. 1. & cap. 10. §. 2. de quaest.

## CAPVT

CAPVT IX.

*Marcelli locus apud Vlpianum de curatoribus pupilli, prodigi, vel furiosi, explicatur nouo sensu.*

**P**ROMITTENDO obligari posse furiosum, & fideiussorem pro eo interuenire negauit Vlpianus, cap. 6. de verb oblig. *Quia*, inquit Caius, *non solum ipsa stipulatio nulla intercessit, verum ne negotium quidem vllum gestum intelligitur.* cap. 70. §. 1. de fideiuss. Sed videamus ne non sibi ipsi contrarius sit Vlpianus, qui cum Marcello huiusmodi fideiussores obligari expressè visus est annotasse. *Marcellus scribit*, inquit Vlpianus, *si quis pro pupillo sine tutoris auctoritate obligato, prodigore vel furioso fideiusserit, magis esse ut ei non subueniatur: quoniam his mandati actio non competit*, cap. 25. de fideiussoribus. Corruptum esse hoc Marcelli responsum videtur, & pro *Non subueniatur*, legendum *Ideo subueniatur*, erroremque ex notis creatum suspicio est. Sic enim scribebant veteres *Ion*, pro *Ideo*, quod facillè in particulam *Non* transmutari potuit. Sensus igitur est: pupilli, prodigi, & furiosi fideiussoribus ideo subueniri, quoniam mandati actio pupillo, prodigo, vel furioso non comperat aduersus fideiussores; hoc est, quia principalis obligatio non subsistit, ac ne negotium quidem vllum gestum intelligitur d. §. 1. Quasi in effectu dixerit Marcellus, accessorium naturam sequi sui conuenit principalis. Principalis obligatio directa mandati actio est. *Quia igitur mandati actio illis non competit*: hoc est, quia obligatio principalis ipso iure inualida est; *ideo subuenitur fideiussoribus*, hoc est, ideo nec accessoria conualescit. Subuenitur inquam fideiussoribus, aduersus pupilli, prodigi, vel furiosi creditores. Sanè non particulam pro *ideo*, interdum librariis obrepisse obserua-

I i

tum

tum est ex capit. quadragesimo quarto §. si quis sponte, de furtis. In eo enim §. vulgares quidem libri, *Et ideo*, Florentini verò *Et non*, scriptum expressè continent. Et hæc quidem emendatio, quæ viris aliquot eruditis mihiq̃ amicissimis mirum in modum placet, mihi sic non probatur quin putem curiosâ quadam inspectione eleganter lectionem antiquam defendi posse. Quandoquidem enim Caius nullam esse stipulationem, ac ne negotium quidem vllum tunc gestum intelligi contendat quum pro furioso intervenit fideiussor, d. §. 1. utique hoc videtur intendere, ipso iure totum negotium nullius prorsus momenti esse: Si nullius momenti sit, ergo nec vlla ex eo nasci potest obligatio. Si nulla nascatur obligatio, ergo & actio & exceptio nulla. Et quia tunc demum subventioni locus est, quum id quod ipso iure vtile & validum est, iure prætorio inutile & invalidum aut exceptionis, aut in integrum restitutionis beneficio redditur: profectò mirum non est fideiussoribus huiusmodi non subueniri. Ipso enim iure obligati non sunt. Eaque res efficit ut nulla prorsus subventionis opus habeant: siquidem is, qui obligatus ipso iure non est, nullo prorsus exceptionis, nullo in integrum restitutionis opus habet beneficio, cap. 113. de reg. iuris. Et hoc nimirum illud est quod dixit Marcellus, *huiusmodi fideiussoribus non subueniri, quoniam mandati actio pupillo, prodigo, vel furioso non competat*. Sensus enim est, ideo fideiussoribus exceptionis medio non subueniri, quoniam ipso iure nulla prorsus ex huiusmodi negotio nata sit obligatio. Igitur fideiussoribus non subuenitur, quia nulla opus habent subventionis, ut pote ipso iure non obligati.

## CAPVT X.

*Indicatur de tutoribus fœminarum Triboniani error.*

**V**IDETVR Tribonianus in ea fuisse perfuafione, vt existimauerit finita pupillari ætate, tam puellas quàm mafculos liberari omnimodo tutela cõfueuiffe, & ad annum vfque vigefimum quintum curatores accepiffe. §. 1. Inft de curat. Quæ perfuafio falſa eſt. *Erant enim mulieres in perpetua tutela*, quemadmodũ pro Mur. teſtatur eſt Cic. Et in eius top. Boëtius, *Mulieres*, inquit, *antiquo iure tutela perpetua cominebat: recedebant verò à tutoris poteſtate, qua in manum viri conuenerant.* Igitur ætate pupillari finita, liberari tutela ſolent mafculi, & curatores accipere: Fœminæ verò tandiu ſi non legitimæ, ſaltem ceſſitiæ tutelæ ſuberant, donec aut ſeſe capite diminuiffent, aut virgines eſſent Veſtales captæ. Hoc iure etiam Pauli & Vlpiani temporibus uſum fuiſſe populum Romanum, ſatis ex Vlpiani fragmentis conſtat. In iis enim titulo decimo, fœminis tam puberibus quàm impuberibus, propter ſexus fragilitatem forenſium rerum ignorantiam, tutores ſolere dari expreſſè traditum eſt, additurque talis inter pupillarem & muliebreſ tutelam differentia: Pupillorum pupillarumque tutores & negotia gerunt, & auctoritatem interponunt: mulierum autem tutores auctoritatem duntaxat interponunt. Idque mirum in modum Apulei (quem ſub diuis fratribus vixiſſe probauimus ſuperiore libro) auctoritate confirmatur. Sic enim in Apologia ſecunda ſcribit: *Adeſt etiam tutor auctor mulieris, vir grauiffimus & ſanctiſſimus, omni cum honore mihi nominandus Caſſius Longinus. Quare Maxime cuius emptionis auctor fuerit, quantum pretio mulier locuples agellum ſuum præſtinarit. Teſti-*

*monium Casti Longini tutoris & Coruini Celeris estne ita  
ut dixi? uspiam in hac emptione nomen meum scriptum est?*  
Et hæc quidem cum ita sint, nunc opinor intelligimus  
quidnam sentiendum sit de hoc Pauli responso, quod  
in Pandectis quibusdam manuscriptis rectius quam in  
Florentinis ad hunc modum expressum est: *Tutor pu-  
pillam vel curator adultam, uxorem ducere non potest,*  
cap. 36. de ritu nuptiarum. Nimirum verbum hoc *Cu-  
rator*, non esse Pauli verbum, sed Triboniani suppositi-  
tium, falso haud dubiè persuasi, non fuisse in perpe-  
tua tutela puellas viripotentes, sed curatores accepisse.  
Est igitur sic legendum: *Tutor pupillam vel adultam,  
uxorem ducere non potest*, Hoc est, pupillam aut virgi-  
nem viro maturam quam habet in potestate legiti-  
mus, cessicus, aut prætorius tutor, non potest ux-  
orem ducere. Id enim senatusconsulto non de adulta  
solum, sed nominatim quoque de pupilla fuisse cau-  
tum, cum ex eodem Paulo, cap. 59. de rit. nupt. tum  
etiam ex testamento quodam Sempronij Tucidani  
perueterusto euidenter constat, in quo sic legitur;  
CAIVS TVCIDANVS QVOD PVPILLAM  
CVIVS IVSSV MEO CVRAM GESSIT, CON-  
TRA DECRETVM AMPLISSIMI ORDINIS  
VXOREM DVXIT, EXHÆRES ESTO. Et hæc  
quidem emendatio nostra duorum locorum collatio-  
ne euidentissimè confirmatur. Sic enim scripsisse Te-  
rentium Clementem accepimus: *Sive generalis curator,  
sive dotis danda constitutus sit, & amplius doti promissum  
est quam facultates mulieris valent, ipso iure promissio non  
valet*, cap. 61. de iure dot. In fragmentis ad hunc mo-  
dum scribit titulo 10. Vlpianus: *Ex lege Iulia de mari-  
tandis ordinibus tutor datur à prætore urbis mulieri virgi-  
nive, quam ex hac ipsa lege nubere oportet, ad dotem dan-  
dam, dicendam, promittendamve, si legitimum tutorem pu-  
pilla*

*pilla non habeat.* Ecce Terentius Clemens curatorē, Vlpianus non curatorem, sed tutorem ait mulieri dotis dandæ causâ constitui. Quis hîc non dixerit Terentium hunc omnino contrarium esse Vlpiano, si Triboniani culpam non agnouerimus? Dubium enim mihi non videtur, quin sic Clemens scripserit: *Sive generalis tutor, sive dotis danda, dicenda, promittendæue causa constitutus sit.* Quid Cicero: An non ita etiam pro L. Flacco disserit? *Doti Valeria pecuniam omnem suam dixerat, Nihil istorum explicari potest, nisi ostenderis illam in tutela Flacci non fuisse. Si fuit, quæcunque sine hoc auctore est dicta dos, nulla est.* Et idcirco generaliter posse defini-ri puto ubicunque in pandectis tribui mulieribus curatores videmus, iis in locis omnibus pro *Curatores, esse Tutores*, ex prudentium intentione & vera sententia reponendum. cap. 37. De ritu nupt. cap. 60. & 61. de iure dot. cap. 7. de tut. & curat. dat. ab his cap. 7. Ad l. Iul. de adult. Fortassis antiquum ius ad sui temporis rationem accommodans Tribonianus, hæc responsa sic deformauit. Id si verum est, cur igitur tres illas feminarum tutelâs voluntaria quadam obliuione non deleuit, de quibus in eo senatusconsulto tractari docet Paulus, quo tutores pupillâs vel adultas vxores ducere prohibentur: cap. 60. de ritu nupt. Nam si tres huiusmodi tutelâs admiserit Tribonianus, non pupillâs solum, sed adultas etiam sub tutela fuisse vt fateatur necessum est. Est enim feminarum tutela tripartita. Alia siquidem pupillaris est, alia cessitia, alia denique prætorîa: quemadmodum ex frag. Vlp. quiuis potest intelligere. Nec est quod quis obiiciat, tutoris officiû post pupillæ pubertatem finiri, idque etiam Paulum scripsisse in d. cap. 60 §. 3. Id enim sic non accipere conuenit, vt pubertate finita desinant mulieres in tutela esse. Finitur enim pupillaris tutela pubertate: incipitque

tutela muliebris, aut cessione, aut certè legitimi tutoris continuatione ex lege Claudia. Illud etiam admonendi sumus, senatusconsultum de prohibitis inter tutores & pupillas adultasque nuptiis, orationem diui Antonini & Commodi subsecutum esse. Idque ex eo libro singulari manifestum est, quem Paulus ad orationem Antonini & Commodi scripsit. In eo enim libro plenissimè senatusconsultum istud anonymum interpretatus est idem Paulus, id quod ex epigraphe dicto cap. 60. omninò colligitur. Deniquè si quæsieris tutor ille qualis fuerit, quem Paulus *honorarium* appellat, *honorisque causa datum* scribit, in cap. 61. de ritu nupt. illud habeto, sic interdum datos fuisse plures tutores, ut eorum vnus administraret & reliqui potius honoris, hoc est hor estatis gratia dati viderentur, quàm administrationis, cap. 3. §. in fine iud. solui. Ita enim honorarium tutorem expresse interpretatus est Vlpianus. in cap. 3. §. 1. de administ. & peric. tut. cap. 14. §. 1. de solut. Et hæc de tutoribus fœminarum.

## C A P V T XI.

*Conciliatio vera cap. 39. De statulib. cum  
cap. 14. De quæst.*

**Q**VÆSITVM est, an easdem pœnas patiantur in publicis iudiciis statuliberi, quas ceteri serui. Et pari quidem pœnas easdem statuliberos, asserit Pomponius, c. 29. in princ. de statulib. negat Modestinus cap. 14. de quæst. Quid dicemus? Aliud nihil, quàm pugnam hanc sic componi posse, ut definiamus Pomponium ius illud tractare, quod eo tempore in vû fuit quo Quintus Mutius floruit: Idque ex hac eiusdem, cap. 29. epigraphe satis intelligi, *Pomponius libro*



libro octauo decimo ad *Quintum Mutium*. Eoque iure  
 uti tamdiu visus est populus Romanus, donec tandem  
 diuus Pius Saluio Martiano rescripisset statuliberum  
 quasi liberum puniendum esse, cap. 9. in fin. de pœ-  
 nis. Quid enim aliud præ se ferunt hæc Vlpiani ver-  
 ba, *Statuliberum quasi liberum cum iam puniendum*:  
 quàm statuliberum ante hanc diui Pij constitutio-  
 nem quasi seruum punitum fuisse? Quid autem, si sic  
 legamus; *Statuliberum quasi liberum esse iam puniendum*:  
 ut pro *Eum* reponamus, *esse*? Et hæc quidem videri po-  
 test probabilis emendatio, quod *Eum* & *Esse*, iisdem  
 notis veteres expresserint. Auctor est enim Valerius  
 Probus sic veteres has notas i. c. e. v. interpretatos  
 esse, *Iusta causa esse*, vel *iusta causa eius videbitur*. Sic  
 igitur legendum est in dict. cap. 9. *Statuliberum quasi*  
*liberum esse iam puniendum, diuus Pius Saluio Martiano*  
*rescripsit*. Et ita quidem ante rescriptum istud diui Pij  
 statuliberi, non quasi liberi, sed ut serui videntur pu-  
 niri consueuisse. Eoque ad *Quinctum Mutium* libro  
 octauo decimo arbitror Pomponium rescripisse. Post  
 verò editam hanc diui Pij constitutionem, statulibe-  
 ri, non ut serui, sed ut homines liberi plecti cœpe-  
 runt: ad quam constitutionem trahendum est supe-  
 rius Modestini responsum. Idem Vlpianus statulibe-  
 ros non ut homines liberos, sed ut seruos esse coër-  
 cendos alio loco tradidit. *Quid tamen, inquit, si sub*  
*conditione accepit libertatem? Ecce nondum liber erit;*  
*sed ut seruus potest coërceri*, cap. 1. §. in fine. Si is qui  
 test. lib. esse iuss. erit, hoc est, puniri, cap. 6. in fine  
 cum capite sequenti & cap. 28. circa principium de  
 pœnis. Et idcirco in hac quam primus excogitauit  
 conciliandi ratio hoc in loco recepta fuerit, profe-  
 ctò quid dici absurdius potest, quàm vnum eundem-  
 que Vlpianum contraria scripsisse? Eaque res efficit;

vt mihi prorsus persuasum habeam, Vlpianum ante ad edictum scripsisse, quàm edita esset supradicta diui Pij constitutio, & ex libro ad edictum trigesimo octauo posteriorem hanc Vlpiani sententiam repetitam esse, vt indicat inscriptio d. cap. 1. ad hæc per diuum Pium, non Antoninum Pium, sed Antoninum Caracallam, sub quo floruit Vlpianus, esse intelligendum, idque ex particula *Iam*, omnino probari: præsertim cum liquidò constet; Antonino Pio imperante nondum in aliquo Iuris prudentum numero Vlpianum floruisse. Antoninum autem Caracallam, Antoninum Augustum pium nostrum interdum appellasse Vlpianum alio loco demonstratum est. Proinde quis est qui non animaduertat hæc Vlpiani verba *Diuus Pius iam constituit*, nihil aliud esse quàm illa eiusdem, *Diuus Pius noster constituit*? Et ita mihi videtur.

## CAP V T .XII.

*Quid sit ὁ ΧΡΗΣΙΣ.*

**A**IT Vlpianus: *sed si ὁ ΧΡΗΣΙΣ sit relictus, an usus sit videndum est. Et Papinianus libro septimo responsorum ait, usum esse, non etiam fructum relictum.* cap. 10. §. 1. de usu & habit. Duplex erat olim dominium, Bonitarium & Quiritarium. Qui rem in bonis habebat, ὁ ΧΡΗΣΙΣ: qui rei alicuius nudo Quiritium iure dominus erat κτῆσιον habere dicebatur. Idque ex septimo libro Epistolarum Familiarium Ciceronis est euidentissimum. In eo enim libro quædam extat Marci Curtij ad Ciceronem epistola in cuius principio sic legitur: *Sum enim ὁ ΧΡΗΣΙΣ πῦ τῆς κτῆσις ὅ Ἀττικὸς ὁ ἡμετέρος. Ergo fructus est tuus, mancipium illius.* In epistola sequenti sic respondet  
 † Cicero: *Cuius quando proprium te esse scribis mancipio & nexu, meum autem usu & fructu, contentus isto sum.*

*sum. Id enim cuiusque proprium est, quo quis fruitur atque utitur.* Vfus igitur & fructus *χρήσις* dicitur, mancipium verò & nexus *κτῆσις*. Et hinc quidem opinor intelligimus, quæ fuerit apud Papinianum dubitandi ratio. Quia enim vsus & fructus *χρήσεως* appellatione comprehenditur, quæsitum idcirco fuisse videtur apud Papinianum si pecorum *χρήσις* relictæ sit, puta gregis ouilis ad stercorandum agrum, ceteri eiusdem gregis alteri nominatim excepta, vtrum agni, lana, & lac, & quæ in fructu sunt, ad eum qui *χρήσιν*, an verò ad eum qui *κτῆσιν* habet pertineat. Respondit Papinianus, vsum esse, non etiam fructum relictum. Et ita *χρήσεως* appellatione interdum vsus & fructus, interdum vsus sine fructu comprehenditur. Tunc quidem sub chresi vsus & fructus continentur, quum ceteris non excipitur: quod in alienatione rei mancipi contingit. Hoc enim casu quominus ceteris præstari, hoc est rem emptam mancipio dari postulet is qui chresin habet, nihil quidquam vetat. Quum autem ceteris excipitur, ea tunc eius qui chresin reliquit fuisse videtur intentio, ut vsum rei relictæ nudum sine fructu penes eum manere voluerit, qui *χρήσιν* habet, & eiusdem rei fructum fieri alterius habentis *κτῆσιν*. Cum igitur sic scriberet Vlpianus. *Sed si χρήσις sit relictæ: hæc videntur subaudiri verba debuisse, Ceteri nominatim excepta.* Interpretatio Suidæ quam securus est Alciatus, huic loco non conuenit, nullam enim continet dubitandi rationem. Nam dubitasse veteres de duplici quadam vocis huius significatione, ex verbo *Videndum* satis constat.

## CAPVT XIII.

*Exceptiones pro pactionibus interdum à  
veteribus vsurpari.*

**E**XCEPTIONES non solum appellari solent defensiones quibus actorum excluduntur intentiones, sed interdum pactiones etiam exceptiones significant. Quo sensu excipiendi verbo vsus est Horatius Sermonum lib. 2. Sat. 3.

—— *Mentem nisi litigiosus*

*Exciperet dominus.*

De eo enim loquitur Horatius, qui cum emptore pactus fuerat, mentem mancipij sanam non præstare. Sic excipere seruum sine peculio, visus est eo planè sensu Vlpianus accepisse, quo diceremus, pacisci cum emptore de quodam hæreditario seruo sine peculio vniuersa hæreditate vendita retinendo. cap. 2 §. 10 de hæredit. vel act. vend. Idem Vlpianus de eo disputans qui hæreditate vendita pactus cum emptore fuerat, de retinendis quibusdam ædibus quarum nomine damni infecti promissum erat, sic scripsit: *Si venditor hæreditatis ædes sibi exceperit, quarum nomine damni infecti promissum erat.* dicto cap. 2. §. 11. Denique cum sic in diuinatione scriberet Alconius; *Menius cum domum suam venderet Catoni & Flacco censoribus, ut ibi basilica edificaretur, exceperat ius sibi vnius columnæ: quid aliud quæso sibi voluit, quàm Menium ædes alienantem pactum esse cum censoribus sibi vnius columnæ ius illæsum perpetuò & saluum fore?* Idque Festi illud liquido confirmat *Restibilis ager sit, qui biennio continuo seritur farreo spico, id est, aristato; quod ne fiat, solent qui prædia locant excipere.* Quid enim in hoc loco excipere aliud est quàm pacisci? Et hæc quidem si  
vera

vera sunt, nunc opinor intelligimus; & rectè & verè pactiones illas quibus imminuitur legitima conuentio exceptiones his verbis Vlpianum appellasse: *Adeò autem bona fidei iudiciis exceptiones postea factæ insunt.* cap. 7. §. adeò de pactis. Eoque sensu exceptionis vocabulo vsus est etiam Modestinus in cap. 3. 9. de Act. empti. & præter Modestinum Pomponius in cap. 3. 2. de vsufruct. Proinde videndum est, an rectè vir quidam acutissimus pro *Exceptiones* reponendum esse *Depectiones* apud Vlpianum arbitratus sit in d. §. adeò.

C A P V T XIV.

*Explicatur Cap. XXXI. D. De pœnis.*

**G**ELLIUS auctor est lib. 5. cap. 14. *Androdum consularis cuiusdam viri seruum rei capitalis damnatum cum ad bestias datus esset, & à leone atrocissimo seruatus incolumis, cunctis petentibus dimissum fuisse, & pœna solutum, leonemque ei suffragiis populi donatum.* Hinc colligo, ad bestias damnatos, etiamsi vnâ aut alterâ belluam superassent, necdum tamen pœna solutos fuisse. Et idcirco si Androdus pœna solutus dimissusque fauore populi non fuisset, leone illo atrocissimo educto, alia confestim bellua in conseptum caueæ immissa fuisset. Huc spectat illud Modestini. *Ad bestias damnatos fauore populi præses dimittere non debet: sed si eius roboris vel artificij sint, ut dignè populo Romano exhiberi possint, principem consulere debet.* cap. 31. de pœnis. Sensus enim est, Si is qui ad bestias damnatus est belluam aliquam superauerit, non debet fauore populi illum præses dimittere, hoc est (vt Gellius interpretatur) pœna soluere: sed si constiterit eximijs virib. aut artificio quodam singulari belluam vnâ aut alteram esse

esse superatam, & ob id dignum hunc victorem qui in ludo exhibeatur populo Romano, principem Modestinus ait à præside consulendum esse.

## CAPVT XV.

*Emendatur & explicatur Vlpiani locus, de eo qui equo publico in causa publica transuehitur.*

**T**ESTATUR Liuius lib. 9. à *Q. Fabio Maximo institutum*, ut equites *Idibus Quentilibus* transueherentur. Quod qua ratione accipi debeat, non intellexerunt viri eruditi qui Liuium & qui iura interpretati sunt: Existimantque ad illam equitum censionem Liuium respexisse, quam hunc in modum in Pompeio Plutarchus, & Festus de verb. sig. lib. 3. & 8. descripserunt: Ad censores curuli insidentes in foro, dignitate ornatique insignes singuli equites equum suum manu adducebant, & de stipendijs legitimis interrogati, rationem ijs reddebant: tum si quæ multa equiti irroganda videretur, censionem faciebant, diligentique de curatione equorum inquirebant: & si quem malè curatum inuenirent, non censionem solum, sed *impolitas* etiam faciebant, hoc est equiti æs abnegabant qui equum malè curauerat. Qua de re sic etiam apud Gellium scriptum inueni lib. 4. c. 12. *Item si quis equus Romanus equum habere gracilentum aut parum nitidum visus erat, impolitus notabatur: id verbum significat quasi tu dicas incuria.* Et hæc quidem omnia ex antiquo Imperatoris Claudij numismate quodam euidenter etiam possunt intelligi, in cuius nummi vna parte circa caput Claudij hæc literæ sūt:



T. J. CLAVDIVS CÆSAR.  
AUG. P. M. TR. P. IMP. PP.  
In altera parte effigies censoris curuli

curuli infidentis, ad quem manu equitis equus ducitur, cum hac inscriptione CENSOR. Nummum hunc Hubertus Goltzius antiquitatum restaurator eximius mihi nuper manu sua delineatum exhibuit: eiúsque idcirco partem alteram híc effingendam curavi, ut eximia quoddam in illustranda Romanorum antiquitate nostri Goltzij virtutis specimen his lucubrationibus meis testatum posteris & consignatum relinquam. Cæterum in transuectione equitum nihil huiusmodi fieri adsolet. Quamobrem trabeatos equites Id. Iulij Q. Fabius non censeri, sed transuehi instituit, ut ex Liuió & Valerio probatur. Sic nimirum, ut equites Romani Idib. Quint. ab æde Honoris, equis infidentes & olea coronari in Capitolium transirent. Ita enim Liuium & Valerium expresse interpretatus est Plinius aut, si mauis, Cornelius Nepos in lib. de viris illustribus: vbi de Q. Fabio (quem non Rutilianum, sed Rullianum appellandum esse docent antiqui nummi fastique consulares) ad hunc modum legitur.

*Hic primus instituit ut equites Romani Idib. Quint. ab æde Honoris equis infidentes in Capitolium transirent.* Ex quo loco satis esse perspicuum puto, non censuram equitum instituisse Fabium, sed equitum transuectionem quandam, quæ singulis Idibus Quintilibibus, ordinis totius equestris recognoscendi probandique gratia fieri videtur consueuisse. Nec id mirum, præsertim si addideris de hac eadem transuectione Plinium sensisse, cum sic lib. 15. cap. 4. scriberet: *Olea honorem Romana maiestas. magnam præbuit, turmas equitum Idibus Iuliis ex ea coronando.* Et ad hanc quidem equitum transuectionem omnino etiam visus est Vlpianus respexisse eum qui equo publico transuehiur negans in ius vocari posse, c. 2. de in ius voc. Et idcirco non *In causa publica*, sed *In Capitolium* existimo Vlpianum scripsisse.

&amp;

& in notarum interpretatione lapsum esse Tribonianum. Quum enim notis sic scriptum esset apud Vlpianum, *Qui eq. p. in cap. transuehiur*, ita legisse visus est Tribonianus, *Qui eq. p. in cap. p. transuehiur*, & inde scripsisse. *Qui equo publico in causa publica transuehitur*, cum scribere debuisset, *Qui equo publico in Capitolium transuehitur*. Ut enim his notis *C. A. P.* causa publica, sic illis *C A P.* Capitolium significabatur, quemadmodum partim ex Valerio Probo, partim ex nummis & antiquis inscriptionibus frequenter obseruavi. Et hanc quidem emendationem verissimam esse ex eo constat, quod primus instituerit D. Augustus, ne is qui equo publico in Capitolium transuehitur possit in ius vocari. *Augustus*, inquit Suetonius, *equium turmas frequenter recognouit post longam intercapedinem reducto more transuectionis: sed neque detrahi quenquam in transuehendo ab accusatore passus est, quod fieri solebat*. Igitur antè Augusti tempora *detrahi eques in transuehendo ab accusatore*, hoc est ab actore in ius ex equo trahi & rapi poterat qui transuehebatur. Accusatores in eum cuius nomen apud quæsitores deferebant, nullam habebant manus iniiciendæ potestatem. Proinde quæ hîc de accusatore dicuntur, ea ad quemlibet actorem pertinere † dubium non est. Cicero in Partit. *Sed accusatorem pro omni actore & petitorè appello*. Et idcirco locus hîc pandectarum ex Vlpiani sententia ad equitum transuectionem omnino referendus videtur; quem locum notarum tandem deceptus interpretatione ad eos traxisse visus est Tribonianus, qui reipublicæ causa equo publico proficiscuntur: præsertim eo sensu equum publicum accipi etiam posse non ignorans, quemadmodum in quadam ad Iulianum epistola liquido demonstrat D. Hieronymus. *Iam, inquit, demisso synthemate equus publicus sternebatur, & nobilem iuuenem punicea*



*punicea indutum tunica balt heus ambebat : & tamen ille appposito notario cogebat loqui, quæ velociter edita velox consequeretur manus.* Eoque sensu equum publicum visus est etiam accepisse Cassiodorus Variarum l. 5. *Iustum est, inquit, ut cogatur illa vendere, unde publicum equum malè noscitur onerasse.* Bone Deus, quàm is fallitur qui Vlpiani temporibus equites equo publico vfos non esse constanter asserit ? Inspiciat porro quid tit. 7. in fragmentis ipsemet Vlpianus de equo publico, de lato clauo, deque honoribus similibus annotatum reliquerit.

## CAP V T XVI.

*Quæ dicantur diuisiones, & quid sit apud Paulum ad diuisionem singulorum ciuium legare.*

**P**AULVS ait, quod ad diuisionem singulorum ciuium legatum est, illud ad honorem ciuitatis pertinere, c. 122. de leg. primo. Quæ verba hanc habere sententiam videntur, ut nummorum qui viritim populo diuidendi relinquuntur, legatum, ad honorem pertineat ciuitatis. Et hoc inde potissimum, quod honori veteres duxerint, sibi morientium testamentis aliquid relinqui: c. 11. §. 17. de leg. 3. c. 15. in princ. de lege Corn. de falsis. quemadmodum ex hac inscriptione constat: P O M P O N I V S A T I M E T V S F E C I T S I B I E T S V I S E T H E L V I Æ N E R E I D I C O N I V G I B E N E M E R E N T I E T L I B E R T I S L I B E R T A B V S Q V E E O R V M Q V O S T E S T A M E N T O H O N O R A V I T, P O S T E R I S Q V E E O R V M. Eoque arbitror Tacitum respexisse, cum sic annalium lib. 3. scriberet : *Testamentum eius multo apud vulgum rumore fuit, quia in magnis opibus cum ferme cunctos proceres cum honore nominauisset, Casarem omisit.* Sic honore legati tutores persequi, visus est etiam Vlpianus scripsisse. capitulo

trigesimo

trigesimo sexto de excusat. Hunc autem honorem ciuitati tunc haberi, quum aliqui ciuibus singulis nummi legantur, mirum non est, si consideremus populum ipsum ciuitatem sic esse, vt quod populo fit, id idpsum ciuitati; & quod ciuitati, id etiam fieri populo non obscurè intelligatur. Idque ex Nonio Marcello euidenter potest probari, qui hanc inter urbem & ciuitatem differentiam constituit: *Urbs est edificia, ciuias incola*. Et idcirco *legatum vel fideicommissum ciuibus ciuitatis datum, ciuitati relictum* videri testatur Papinianus capite secundo de reb. dub. Et quod Paulus *ad diuisionem singulorum, ciuium legare*, hoc alio modo *ciuitatibus in distributionem relinquere* dixit Martianus cap. 117. de legat. 1. Quæri potest, hæc diuisio quomodo apud Romanos fieri consueuerit? Respondeo, singulas tribus legitimos suos diuifores habuisse, idque Asconium in hunc Ciceronis locum scripsisse, Act. 2. in C. Verrem: *Unum illud ex hominibus certis, ex quibus omnia comperi, reperiẽbam, fiscos complures cum pecunia Siciliensi a quodam senatore ad equitem Romanum esse translatos: ex his, quasi decem fiscos ad senatorem illum relictos esse comitiorum meorum nomine, diuifores omnium tribuum noctu ad istum vocatos*. Eoque sensu diuifores etiam visus est accepisse idem Cicero quum sic Epist. libro primo ad Atticum scriberet: *Consul autem ille deterioris histronis similis suscepisse negotium dicitur, & domi diuifores habere: sed senatusconsulta duo iam facta sunt odiosa, quod in consulem facta putantur, & Domitio postulante: vnum, vt apud magistratus inquiri liceret: alterum, cuiusmodi diuifores haberent contra rempubl.* His addatur illud Suetonij in Augusto. *C. Octauius pater a principio atatis & re & existimatione magna fuit: vt mirer equidem hunc quoque a nonnullis argentarium, atque etiam inter diuifores operasque campestris proditum.*

*proditum.* Hæc Suetonius, haud dubiè per operas campestrès, eos intelligens qui calatis in campum Martium comitiis aliquo ministerio publico fungebantur. *Diuisores* pecuniam populo viritim diuidebant, singuli in sua tribu, & alio nomine *magistri curiarum* appellantur, vt idem Ascon. auctor est. De quibus sic loquitur in Aulularia Plautinus Euclio:

*Nam noster nostræ qui est magister curia,*

*Diuidere argenti dixit nummos in viros.*

*Id si ego relinquo, ac non peto, omnes illico*

*Me suspicientur credo habere aurum domi.*

*Nam non est verisimile hominem pauperem*

*Pauillum parui facere quin nummum petat.*

Et paulò pòst:

—— *Neque quisquam curialium*

*Venit, neque magister quem diuidere argentum*

*Oportuit.*

De huiusmodi ciuium diuisionibus sentire visus est Cornel. Tacitus Annalium libro primo cùm ita scriberet: *Caterùm Tiberius nomine germanici tricenos plebi sestertios viritim dedit, seque collegam consulatui eius destinauit.* Eoque etiam hæc antiquarum inscriptionum monumenta sunt referenda: STATVAM MERCVR

RII OB HONOREM QVINQ. POSVIT, CVIVS DEDICATIONE DEDIT POPVLO VIRITIM DENARIOS SING. L. D. D. D. Item: HONORE CONTENTVS IMPENDIVM REMISIT, ET DEDICATIONE STATVÆ NV-

MER. COLL. IPSORVM SPORTVL. DEDIT SINGVLIS DENARIOS BINOS: L. D. D. D. Et iterum: QVI OB PROMISS. VENAT. PHE-

TRIS DIVISIT QVINA MIL. NVM. Et sic satis opinor esse perspicuum, quomodo ciuium fieri diuisio apud Romanos soleat: quid item per diui-

K k fiones

C A P V T XVII.

*Quo sensu virgines Vestales capi scripserit Vlpianus,  
& locus A. Gellij restitutus ex  
manuscripto codice.*

**F**LAMINES Diales inaugurari, & Vestales virgi-  
nes capi solere, auctor est in fragmentis Vlpian.  
tit. 10. *In potestate, inquit, parentum esse desinunt, qui Fla-  
mines diales inaugurantur, & quæ virgines Vesta capiun-  
tur.* Idque de virginibus Vestæ testatur etiam in epi-  
stola quadam diuus Ambrosius, sic Valentiniano Au-  
gusto scribens: *Vix septem Vestales capiuntur puella; En  
totus numerus quem insula vittæ capitis, purpuratarum  
vestium murices, pompa lectica ministrorum circumfusa co-  
mitatu, privilegia maxima, lucra ingentia, præscripta de-  
nique pudicitia tempora coëgerunt.* Idem Ambrosius sic  
etiam libro tertio de virginibus scribit: *At certè ipsis  
gentilibus inter aras, & focos venerabilis solet esse virginitas,  
& in quibus nulla meritum est pietas, nulla mentis inte-  
gritas, in iis tamen carnis virginitas prædicatur. A propa-  
nis igitur ceremoniis virgines nemo prohibebit, ab Ecclesia  
Dei virginitas arcebitur? Illic coguntur quod non docentur,  
hic interdiciuntur quod non licet non doceri? illic præmiis re-  
uocantur à nuptiis, hic ad nuptias coartabuntur iniuriis? Il-  
lic violentia fit ut capiantur, hic fiet violentia ne profitean-  
tur?* Hæc diuus Ambrosius. Quibus etiam consenta-  
neum est quod lib. 2. Tacitus in hunc modum de Ti-  
berio scribit: *Post quæ retulit Caesar capiendam virgi-  
nem in locum. Occia, quæ septem & quinquaginta per an-  
nos summa sanctimonia Vestalibus sacris præfederat.* Idem  
libro 15. *Defunctæque, inquit, virgo Vestalis Lelia,*

*in cuius locum Cornelia ex familia Cossorum capta est. De ritu autem Vestalis virginis capiundæ sic scribit Gellius libro 1. cap. 12. De morte rituque capiundæ virginis littera quidem antiquiores non extant, nisi quæ capta prima est, à Numa rege esse captam. Sed Papiam legem inuenimus, quâ cauetur ut pontificis maximi arbitratu virgines è populo viginti legantur, sortitioque in concione ex eo numero fiat, Hæc Gellius. Ex codice autem manuscripto, quem apud Louanienses in Bibliotheca Bussidiana reperi, hanc Papiæ legis sententiam mutilam esse & imperfectam in omnibus impressis exemplaribus animaduerti, addendaque hæc verba: Et cuius virginis ducta erit ut eam pontifex maximus capiat, eaque Vesta fiat. Est igitur ad hunc modum integritati pristinæ restituenda quam Gellius allegat, legis Papiæ sententia: Sed Papiam legem inuenimus, quæ cauetur ut pontificis maximi arbitratu viginti è populo virgines legantur, sortitioque in concione ex eo numero fiat, & cuius virginis ducta erit, ut eam pontifex maximus capiat, eaque Vesta fiat. Et hæc hæctenus.*

## CAPVT XVIII.

*De Triumuiris capitalibus.*

**T**RIVMVIROS capitales constitutos esse scribit Pomponius, qui carceris custodiam haberent, ut quum animaduerti oporteret interuentu eorum fieret, cap. 2. §. 16. de orig. iur. Hæc verba non sic accipere conuenit, quasi vnquam custodes carceris triumviri fuerint, sed ita potius ut curam habuerint custodiæ carceris. Idque satis indicat Liuius; cum sic libro 42. scribit: *Et triumviri carceris latomiarum intentiorem custodiam habere iussi.* Ex eodem autem Liuiio aliisque probatis auctoribus liquidò constat, carnificem carceris custodem

fuisse, non triumuiros capitales. Sic enim scribit libro 6. Liuius: *Eum pati vinctum in carcere, in tenebris obnoxiam carnificis arbitrio ducere animam?* Et Seneca Epist. lib. 2. *Liberiora sunt alimenta carceris, sepositos ad capitale supplicium non tam anguste qui occisurus est pascit.* Et id quidem adeò verum est, vt in carcerem & ad carnificem trahere, vno eodemque sensu frequenter posuerint veteres. Plautus in Rudente:

*Iube illos in urbem ire obuiam ad portum mihi*

*Quos mecum duxi qui hunc ad carnificem trahant.*

Proinde verisimilius est triumuiros carceris custodes non fuisse, sed curam custodiæ carceris habuisse. Idque ex Valerio Maximo satis potest intelligi, qui de singulari & eximio quodam filia erga matrem amore differens libro quinto, cap. 4. triumuiros expressè à carceris custode distinxit. Sic enim scribit; *Sanguinis ingenui mulierem prator apud tribunal suum capitali crimine damnatam, triumuiro in carcere necadam tradidit: quam receptam is qui custodia præerat, misericordia motus, non protinus strangulauit: aditum quoque ad eam filia, sed distigenter excussa, ne quid cibi inferret, dedit existimans futurum vt inedia consumeretur. Cum autem iam dies plures intercederent, secum ipse querens quidnam esset quod tamdiu sustineretur, curiosius observata filia animaduertit illam exerto ubere famem matris lactis sui subsidio lenientem, Quæ tam admirabilis spectaculi nouitas ab ipso ad triumuium, à triumuiro ad prætorem, prætore ad consulum iudicium perlata remissionem pœna impetrauit. Hæc Valerius. Eoque sensu accipiendum etiam est quod idem Valerius libro octauo, cap. 4. hunc in modum scribit: *Fanny seruus Alexander cum in hanc venisset suspicionem C. Fl. equitis Romani occisi, septies tortus pernegauit ei se culpa affinem esse: sed perinde atque confessus, & à iudicibus dampnatus, & à L. Calpurnio triumuiro in crucem actus est.**

est. Id enim sic accipiendum est, quasi dixerit Valerius, non ab ipso triumuiro, sed interuentu L. Calpurnij triumuiroi capitalis à carnifice in crucem Alexandrum hunc actum fuisse. Huius etiam loci est, quod in coniur. Catil. sic scribit Salustius: *Triumuiros, quæ supplicium postulabat, parere iubet.* Auctor est Festus, lege quadam tribunitia exigere etiam sacramenta triumuiros capitales consueuisse. *Sacramentum autem veteres appellabant, inquit idem Festus, quod pœna nomine pendebatur: & quidem duplici ratione, interrogatione nimirum; & contentione.* Qui in huiusmodi pœnas ex legibus senatusve consultis aut constitutionibus, inciderant, quæ lvi pecunia debebant, hi à triumuiris pœnam exigentibus, sacramento interrogari dicebantur. Cæterum sacramento olim contendendi solet, quum de re aliqua incideret controuersia. Tunc enim alter alterum sacramento interdum quingentenario prouocabat hac formula. **Q V A N D O N E G A S T E S A C R A M E N T O Q V I N Q V A G E N A R I O P R O V O C O**; auctore Valerio Probo. Idque etiam Varro testatus est lib. 4. de ling. Lat. Sed quia locus Varronis mendosus est, eum non vt vulgo legitur, sed ita vt à me est restitutus, hîc subiiciam. *Ea pecunia, inquit Varro, quæ in iudicium venit in litibus, sacramentum; à sacro: qui petebat & qui inficiabatur, de aliis rebus vterque quinquagenos asses apud Pontificem deponebat, de aliis rebus, item certum alium & legitimum numerum assium, qui iudicio vicerat suum sacramentum à sacro auferebat, victi ad ararium redibat.* Hactenus Varro. Idque adeò verum est, vt sacramentum in aliis rebus assium quinquaginta fuisse, in aliis quingentorum, inter eos qui iudicio inter se contendebant, etiam Festus admonuerit. Et hæc quum ita sint, non esse nunc admodum obscurum puto, quid sibi voluerit huius tribunitiæ legis

auctor, quam apud Festum de verb. sign. lib. 7. facile mihi persuasit Lucas Fruterius ingenio singulari præditus adolescens, ad hunc modum restituendam esse:

QVICVNQVE POSTHAC PRÆTOR FACTVS ERIT QVI INTER CIVEIS IVS DICET, TRES VIROS CAPITALES POPVLVM ROGATO: IIQVE TRES VIRI CAPITALES QVICVNQVE A POPVLO FACTI ERVNT SACRAMENTA EXIGVNTO IVDICANTOQVE, EODEMQE IVRE SVNT, VT EI EX LEGIBVS PLEBEIQVE SCITIS, EXIGERE, IVDICARE, ESSEQVE OPORTET. Elegans lex tribunitia, eleganterque restituta, per quam triumuiros capitales populum rogare prætor iubetur: illique à populo facti, sacramenta exigebant, & iudicabant, sic nimirum, vt si quid pœnæ nomine ab aliquo dependendum foret, id si non dependeretur, exigerent triumuiiri. Tunc si is à quo sacramentū exigebatur, negaret pœnæ nomine se conueniri posse: iidem triumuiiri non exigebant solum, sed etiam sacramentum, siue de sacramento iudicabant. Fuisse autē huius legis auctorem L. Papirium tribunū plebis Festus contendit. Sanè quendam L. Papirium tribunum fuisse militum testantur Fasti consulares, nullum autem L. Papirium † tribunum plebis. Cicero pro domo sua *Q. Papirium legem tribunitiam rogasse ait, qua vetaret iniussu plebis, adem, terram, agros consecrare.* Fortassis hunc eundem huius nostræ de triumuiris capitalibus legis tribunitiæ auctorem fuisse non malè dixeris. Nec quidem sacramenta duntaxat exigebant, iudicabantque triumuiiri capitales: sed de seruis etiam, de furibus, aliisque vilibus & abiecta conditionis hominibus cognoscebant, & in eos apud columnam Meniam animaduertabant, vt auctor est Afconius. Quò spectat illud Plauti in Aulularia.

*Quid*



— *Quid stolidè clamas?*

*Eu. Quia ad tresuiros iam ego deferam tuum nomen.*

*C. Quamobrem?*

*Eu. Quia cultrum habes. C. Coquum decet. Eu. Quid cominatus es*

*Mihi? C. Istud malè factum arbitror quia non laius fodi.*

Solent qui cum telo hominis occidendi causa ambulant, lege Cornelia teneri, cap. 1. ad l. Cornel. de sic. Et tunc quidem si viles accusandi forent, & improbae conditionis homines, quales esse lenones, fures, coqui, serui, meretrices, & id genus alij existimantur: non apud quaesitorem, sed apud triumuiros capitales eorum nomina deferabantur. Idque ex hoc Plauti loco satis, ni fallor, intelligi potest, praesertim si addideris, sic eundem Plautum in Asinaria scripsisse:

*Ibo ego ad tresuiros, vostraque ibi nomina*

*Faxo erunt capitis.*

In hoc enim loco, quia de iis controuersis quae ingenuo adolescenti cum scorto fuerant disseritur, ideo non apud praetorem, sed apud tresuiros capitales lenae meretricumque nomina se delaturum adolescens minatur.

## C A P V T XIX.

*Consiliatio cap. 81. De furtis cum cap. 4. §. 4.*

*Ad legem Iuliam peculatus.*

**A**IT Papinianus: Ob pecuniam ciuitati subtraham, actione furti, non crimine peculatus tenetur, dicto cap. 81. Contra: Si de re ciuitatis aliquid surripiatur, constitutionibus, inquit Martianus, principum duorum Traiani & Hadriani cauetur peculatus crimen committi, d. §. 4. Pugnam hanc sic compones, vt dicas aliud esse

K k

4

subtrahere

subtrahere ciuitati pecuniam, aliud de re ciuitatis aliquid surripere. Subtrahit curator reipublicæ, qui quum reipublicæ nomine centum & quadraginta recepisset, centum dumtaxat in tabulis accepta fert: surripit, qui rem quæ in vsu populi est, & iure domini ab eo possideretur, aufert clam ex publico, & in vsus priuatos conuertit. Curator qui pecuniam ciuitati subtrahit, siquidem id ignorans fecerit, calculi error retractabitur cap. penult. de administr. rer. ad ciuit. pert. fin. verò per fraudem *furti actione*, non crimine peculatus tenebitur, hoc est in duplum. cap. fin. §. 1. ad tit. Administrationis enim fraudulentæ, non criminis alicuius arguitur. Aliud est si præsidēs aut proconsules alique Romanorum magistratus aliquid ærario subtraxerint. Illi siquidem non furti sed peculatus solent insimulari, eiusq; pœna coerceri cap. 10. Ad leg. Iul. peculat. Nō enim dubito, quin *per tabulas publicas*, eas tabulas quæ à præsidibus in ærarium populi Romani deferrebantur, Martianus intellexerit in d. cap. 10. argum. cap. 8. & cap. 9. §. 2. & 3. d. tit. Certè quia de quæstoribus & præfectis ærarij sic etiam scripsit Tacitus lib. 13. *Dein princeps curam tabularum publicarum à quæstoribus ad præfectos transtulit.*

## C A P V T XX.

*De his qui officij causa in prouinciis agunt, & militant.*

**M**ODESTINVS scribit: *Qui officij causa in prouincia agit vel militat, prædia comparare in eadem prouincia non potest, præterquam si paterna eius à fisco distrahantur* cap. 62. de contrahend. empt. Addit Martianus, *eum qui quid ex officio quod administrat emit, vel per se vel per aliam personam, non tantum rem amittere, sed & in quadruplum conueniri, secundum constitutionem*

tionem diui Seueri & Antonini imperatorum, cap. 46. d. tit. Cur autem hæc tam disertè cauta & sancita fuerint, elegans est à M. Cicerone in Verrina 6. prodita ratio. *Quæ fuit causa*, inquit Cicero, *cur tam diligenter nos in prouinciis ab emptione remouerent? Hæc iudices, quod putabant ereptionem esse, non emptionem, quum venditori suo arbitrato vendere non liceret. In prouinciis intelligebant, si is quis esset cum imperio & potestate, quod apud quemque esset emere vellet, idque ei liceret, fore uti quod quisque vellet, siue esset ventale, siue non esset, quanti vellet auferret.* Hæc Cicero. Similis quoque ratio fuisse videtur, cur is qui in aliqua prouincia officium administrat inde oriundam vel ibi domicilium habentem uxorem ducere non possit: c. 38. de ritu nupt. Ne videlicet eripere magis quàm consensu parentum amicorumque liberrimo uxorem ducere videatur. Sponsalia tamen sic contrahi possunt, ut si post depositum officium mulier nuptias contrahere noluerit, liceat ei hoc facere, arris tantummodo redditis quas acceperat. d. c. 38. & ita Paulus scribit: cuius sententiæ omnino contrarium videtur rescriptum Gratiani, Valentiniani, & Theodosij Imperatorum quod extat sub tit. C. Si rector prouinciæ. In eo enim rescripto expresse traditum est, *ne arras quidem inuitam sponsam quas acceperat, cognoscendam reddere.* Hanc pugnam ut componat interpretes, referre nec opus, nec otium, nec operæpretium est. Tantum illud dicam, ne ipsum quidem Cyrillum Græcum interpretem audiendum esse, qui Pauli responso eos tantum contineri existimat qui officium administrant, Imperatorum verò rescriptum de ipso præside accipiendum esse. Quid quum responderet Modestinus eum qui officij causa in prouincia agit vel militat, prædia comparare in eadem prouincia non potuisse, an quæso officij nomine præsides, proconsules, reliquosque similes magistra-

tus non est complexus? Id si negaueris, obijciam Martiani responsum. Is enim Imperatorum Seueri & Antonini, de ijs qui officij causa in prouincijs militant, constitutione, ipsos etiam Cæsaris procuratores contineri expressè tradidit cap. 46. de contrah. empt. Responso Martiani Hermogenianum subijcio, qui officij causa in prouincijs militantes, præsidem seu procuratorem, vel alium quemlibet interpretatus est, cap. 46. de iure fisci. Proinde quod Paulus de officij causa in prouincijs militante scribit cap. 38. de ritu nupt. id omnino tam ad præsides, proconsules, similesque magistratus, quàm ad reliquos officiales pertinere dubium non est. Quid ergo dicemus? Id certe quod res est: nimirum constitutionem Gratiani, Valentiniani, & Theodosij, hac in parte iuri veteri derogare. Et ita mihi viderur.

*Finis libri secundi Variorum.*

IACOBI



IACOBI RÆVARDI  
IVRISCONSULTI

VARIORVM, SIVE DE  
Iuris ambiguitatibus

LIBER TERTIVS.

CAPVT I.

*Qua nominibus obligatio fieri dicatur, & de signatoribus  
quedam non vulgaria.*



**L**IM, inquit Iustinianus, scriptura fiebat obligatio, qua nominibus fieri dicebatur, qua nomina hodie non sunt in usu. §. 1. Inst. de lit. oblig. cap. 1. de annuis legat. Qualis hæc fuerit quæ nominib. fiebat obligatio, rectè (vt opinor) nulli interpretamur. Eam eleganter, quanquam non absolutè omnino, ex veterum Iurisconsultorum commentarijs Theophilus mihi descripsisse visus est. Ait enim sic apud veteres nominibus fieri solitam obligationem, vt is qui rem aliquam emptionis, locationis, stipulationis, aut simili quouis titulo sibi habebat obligata, maioris securitatis causa tabulas proferret, quibus debitorem ad perscribendam debiti, seu nominis quantitatem & causam veterem hac intentione vrgebat, vt omissa veteris obligationis causa commodior succederet ex litterarum subsignatione civilis debiti persecutio. Solètque huiusmodi obligatio (quod à Theophilo miror esse prætermisum) præsentibus Romæ quidem equitibus

equitibus aliquot aut alijs ornatis viris, in prouincijs  
 verò ipsis duumuiris aut decurionibus tractari, qui  
 literas huiusmodi signabant. Scribit enim expressè Se-  
 neca de benef. lib. 2. *cum nomina fiunt, interponi pararios,  
 signatores aduocari, & chirographum dari. Quidam*, in-  
 quit, *nolunt nomina secum fieri, nec interponi pararios, nec  
 signatores aduocari, nec chirographum dari.* Idem Seneca  
 per tabulas plurium nomina adhibitis vtrinque testi-  
 bus, interpositis pararijs, subsignatione, interrogatio-  
 ne, fieri solere expressius multo testatus est de benefi-  
 cijs lib. 3. cap. 15. *Vtinam*, inquit, *persuadere possemus, ut  
 pecunias creditas tantum à volentibus acciperent: utinam  
 nulla stipulatio emptorem venditori obligaret, nec pacta con-  
 uenta impressis signis custodirentur, fides potius illa serua-  
 ret, & æquum colens animus. Sed necessaria optimis pratu-  
 lerunt, & cogere fidem quam spectare malunt. Adhibentur  
 ab utràque parte testes, ille per tabulas plurium nomina in-  
 terpositis pararijs facit, ille non est interrogazione contentus,  
 nisi rem manu sua tenuit. O turpem humani generis frau-  
 dis ac nequitie publica confessionem: annulis nostris plus  
 quam oculis creditur. In quid isti viri ornati adhibiti sunt?  
 in quid imprimunt signa? Nempè ne ille noget accepisse se  
 quod accepit.* Hæc Seneca. Dubium non est quin de il-  
 la obligatione hîc senserit Seneca, quæ olim fieri no-  
 minibus dicebatur: & nomina tunc fieri interpreta-  
 tur, quum interpositis pararijs, plurium fiunt nomi-  
 na. Sic, ni fallor, ut non solum plurium, qui adhibiti  
 sunt, ornatorum virorum annuli chirographo impri-  
 mantur: verum etiam ut testium signatorumque no-  
 mina in ipsis chirographi tabulis exprimantur. Et sic  
 quidem ea forma fieri apud veteres plurium nomina  
 dicebantur, qua iidem verba fieri dixerunt. Quem-  
 admodum enim verba fieri ab eo dicuntur qui loqui-  
 tur, qui verba profert; sic plurium quoque tunc fieri  
 dice

dicebantur nomina, quum plurium qui adhibebantur testium nominibus chirographum signabatur. Plurium igitur nomina per tabulas fieri non solebant, nisi nominibus obligatio contraheretur: nullamque nominibus vnquam obligationem fuisse contractam est verisimile, in qua per tabulas plurium nomina non fierent. Et ita quidem multum inter se differunt, *nomina facere, & nomina plurium facere*. Qui res alienum contrahit, nomina non plurium sed plura, nomenque non vnus sed vnum facere dicitur. cap. 41. §. si. de fideic. libert. Si tutor, inquit Papinianus, *mandet suscipi vel probari nomen quod fecit, teneri eum mandati*, c. 12. §. 11. Mandati. Hoc est, si tutor mandet debitum quod contraxit suscipi vel probari. Et tunc quidem à nominibus, quæ pro debitis idcirco accipiuntur, quod in tabulis accepti & expensi scribi soleant debitorum nomina, nominum descendit appellatio. Qui nomina plurium per tabulas faciebant, vtrumque testes adhibebant, & *pararios*, hoc est librarios interponebant. *Testes autem erant viri ornatī*, inquit Seneca; nimirum Romæ equites alisque clari nominis & integræ famæ viri; in provincijs, duumviri, decuriones, alisque non ignobiles. His præsentibus sic creditor debitorem suum interrogabat: *Centum illos aureos quos mihi ex causa mutui debes, tu mihi ex promissione, & conventionione litterarum tuarum dabis?* Tunc debitor respondēbat, *Ex conventionione dabo mearum litterarum*. Nec quidem huiusmodi interrogatione contentus erat creditor, inquit Seneca, *nisi rem quoque manū teneret*. Et idcirco tabulas quibus illa interrogationis & responsionis solemnita verba continerentur, certis verbis & certis quibusdam formulis transcribebant pararii, adiectis loco, die, & consule. c. 9. §. 1. de pœn. c. 1. de edend. Huc spectat Plauti illud in Aulularia.

*Nostra*

*Nostra atas non multum fidei gerit,  
Tabula notantur, adsunt testes duodecim,  
Tempus locumque scribit Actuarius:  
Tamen inuenitur rhetor qui factum neget.*

Huic etiam consentaneum est illud Scauolæ: Si librarius in transcribendis stipulationis verbis errasset, nihil nocere quo minus & reus & fideiussor teneatur: cap. 93. de reg. iur. Nec quidem dubito quin per pararium hîc intellexerit eum Seneca, quem Plautus actuarium, Scauola librarium, & Vlpianus tabellionem appellant. Tandem viri ornati, qui erant adhibiti, tabulis transcriptis non signa solum imponebant, sed nomen etiam quisque suum subscribebat. cap. 39. de verb. sig. cap. 22. §. 4. Qui test. fac. po. cap. 4. in fin. de auct. tut. Quomodo autem signari huiusmodi tabulæ debuerint, eleganter docet Iulius Paulus Sent. lib. 5. tit. 25. his verbis: *Amplissimus ordo decreuit, eas tabulas quæ publici vel privati contractus scripturam continent, adhibitis testibus ita signari, ut in summa marginis ad mediam partem perforata triplici lino constringantur, atque imposita supra linum cera signa imprimantur, ut exteriores scriptura fidem interiori seruent: aliter tabula prolata nihil momenti habent.* Hæc Paulus. Fuisse hoc S. C. Neronis factum temporibus in Nerone docet Suetonius. *Aduersus falsarios, inquit, tunc primum repertum, ne tabula nisi pertusa cerâ per foramina traiecto obsignarentur.* Porro qui tabulas signabant, signatores dicebantur. cap. 22. de testibus c. vltim. de le. com. cap. 32. §. 1. de furtis. Tabellæ verò subsignatæ, an syngraphæ, an verò chirographi nomen habuerint, videamus. Seneca visus est eas appellasse chirographa. Inter syngraphas autem & chirographa hanc constituit Pedianus differentiam, quod in chirographis tantum quæ gesta sunt scribi soleant; in syngraphis verò etiam contra fidem veritatis

pactio.



*pactio veniat, & non numerata quoque pecunia, aut non integrè numerata, pro temporaria hominum voluntate scribi soleant more institutòque Græcorum: & ceteræ tabulæ ab vna parte seruari solent, syngraphæ signatæ vtriùsque manu, vtrique parti seruandæ traduntur. Eas igitur de quibus nos tractamus tabulas chirographa rectiùs quàm syngraphas appellabimus: siquidem in obligationibus quæ fieri nominibus dicebantur, ea duntaxat quæ gesta erant, continebantur; quemadmodum ex Seneca & Theophilo probatum est. Proinde verba illa, quæ sic apud eundem Senecam leguntur, *Ille non est interrogatione contentus, nisi rem manu sua tenuit*: sic rectè interpretabimur, vt creditori satis non fuerit, eo quem suprà descripsi modo debitorem interrogasse, nisi *rem*, hoc est obsignatas tabulas manu sua tenuit, siquidem illæ ab vna parte; hoc est ab ipso creditore seruari solebant. Vnde satis esse absurdum videtur, quod Theophilus de scribendo ad eum comminiscitur, quem creditor litterarum obligatione obligatum habere cupiebat. Is enim præsens interrogatus, auctore Seneca, respondebat. Doleo equidem Theophilum in hac præclara antiquitate ex eruditissimis veterum Iurisconsultorum monumentis transcribenda, nullam maiorem curam aut diligentiam adhibuisse. Sunt quidem præclara, sunt egregia quæ ab eo proferuntur, sed mutila, sed imperfecta, & quæ à fide sincera nonnihil aberrant. Cæterùm equites Romanos huiusmodi tabulas signasse, quanquam id ex Seneca, qui tantum viros ornatos requirit, non euincatur: hinc tamen potest intelligi, quòd equites ius haberèt annulorum & quòd prætor equites aliquot certo numero, qui in albo scribebantur, selectos habuerit olim, ex quorum numero in priuatis caussis liberam faciebat litigatoribus iudicem*

iudi

iudicēſve eligendi poteſtatem, quemadmodum ex eodem Seneca cognoscimus de benef. lib. 3. c. 7. & Aul. Gellio lib 14. cap. 2. Et ſic mirum non eſt, quos priuatis controuerſijs dirimendis prætor præfecerat, eoſdem ſignandis etiam obligationibus priuatis operam dediffe. Et hæc quidem Romæ ſic erant in uſu. In prouincijs verò duumuiros, decuriones, aliòſque viros ornatos teſtes vel ſignatores olim ſolitos adhiberi, non inficiabitur qui ſatis quid ſibi voluerit Venuleius intelligit, cum ita ſcriberet: *Curent magiſtratus cuiuſque loci, teſtari volentibus, & ſe ipſos & alios teſtes vel ſignatores præbere, quo faciliùs negotia explicentur, & probatio rerum ſalua ſit.* cap. 22. de teſtibus. Dubium non eſt quin de ea obligatione ſenſerit hîc Venuleius quæ nominibus fieri dicebatur, certè quod in ea contrahentes ſoleant *teſtari*, hoc eſt teſtes adhibere, quo faciliùs *negotia* (hoc eſt contractus, cap. 3. de bon. auct. iud. poſſ. cap. 35. & cap. 52. de cont. empt. cap. 5. §. 1. de oblig. & act.) *explicentur, & probatio rerum ſalua ſit.* Illud præterea otioſum non eſt, quod dixerit Venuleius, *Teſtes vel ſignatores*: quaſi aliqua in prouincijs fieri nomina per tabulas potuerint præſentibus ſolis teſtibus, ſola ſubſcriptione, ſine aliqua ſignatione; quod eſt veriſſimum. Temporibus enim Caij Plinij, nimirum ſub Veſpaſiano, nullos omnino maior pars gentium hominũque, etiam qui degebant ſub imperio Romano, annulos habebat: *non ſignabat tunc Oriens aut Ægyptus, literis contenta ſolis*, vt ſcribit idem Plinius Nat. hiſt. lib. 33. cap. 1. Quia igitur etiam Alexandri temporibus, quibus noſter floruit Venuleius, paſſim ſignandi ratio non ita vigeſbat: idcirco magiſtratus cuiuſque loci præbere ſe, & alios teſtari volentibus teſtes vel ſignatores debuiſſe contendit Venuleius: *Teſtes* quidem ijs in locis in quibus ſignatores erant incogniti;

incogniti; *signatores* verò, vbi in vfu signandi vige-  
bat ratio. Et hanc esse puto vt nouam sic veram huius re-  
sponsi perdifficilis sententiam.

## CAPVT II.

*Explicatur cap. 8. De public. & vectig.*

**S**I *vnus ex pluribus heredibus*, inquit Papinianus,  
*rem munem causa vectigalis surripiat, portiones cate-*  
*ris non auferuntur*, d. cap. 8. Hæc est Florentina lectio.  
Passim pro *munem* in editionibus pandectarum vul-  
garibus *communem* legitur: eamque lectionem pro-  
bant interpretes: ego Florentinam puto verio-  
rem esse. Dubium non est quin res immunes, liberas & ab om-  
ni onere obligationeque vacuas appellauerint veteres.  
Idque ex Saluiano satis potest intelligi, qui sic de pro-  
uidencia Dei libro quarto scribit: *Ecce enim remedia*  
*pridem nonnullis urbibus data quid aliud egerunt quam vt*  
*cunctos diuites immunes redderent, miserorum tributa cū-*  
*mularent; vt illis demerentur vectigalia, istis vt adderen-*  
*tur noua?* Immuribus rebus res munes contrariæ sunt.  
Nam quum sic in Mercatore Plautus scriberet: *Dico*  
*eius pro meritis gratum me ac munem fore*: nonne idem  
est ac si dixisset, pro eius meritis illi me obligatum  
agnosco? Et sic etiam illud esse accipiendum puto, quod  
ita Lucil. apud Non. scribit: *Munifici munisque amicis*  
*nostris videamur viri*. Quamuis sic locum hunc inter-  
pretatus sit Non. vt per viros munes, consentientes vi-  
ros ad ea quæ amici velint, intellexerit. Quamobrem  
quod de *re causa vectigalis muni* scribit Papinianus,  
hoc rectissimè sic interpretabimur: *Si vnus ex pluri-*  
*bus heredibus rem causa vectigalis munem*, hoc est rem  
vectigalis causa fisco obligatam, *surripiat*: ideo *portio-*  
*nes ceteris non auferri*, quod dolus, fraus, & furtum

LI

vnus

vnus ex cohæredibus redundare in aliorum cohæredum perniciem ac detrimentum non sit æquum. Verum furripientis portio non dubium est quin fisco applicetur. Atque ita quidem mihi videtur.

### C A P V T III.

*De geminatis præpositionibus quadam à nemine animaduersa.*

**Q**VI non animaduenterunt tam iurifconsultos, quàm alios auctores interdum præpositiones geminasse, hi pro *In circum*, existimarunt *In circuitum*, reponendum esse apud Macrum, c. 37. de reli. & sumpt. fun. Ego didici ea forma & eadem planè ratione *In circum* scripsisse Macrum, qua aliis in locis *In super*, *In ante*, *ex ante*, *ad ex*, *ab ultra*, *ab ante*, *in coram*, *in palam*, *ab usque*, *ex usque*, *in usque*, scriptum inuenimus. Et idcirco sic Macrum interpretari soleo, quasi ille *In circum* pro *circumquaque* posuerit. Eadem etiam forma dixit Papinianus, *se propter publicam utilitatem, ne inscripta cadauera iacerent, strictam rationem in super habere*, cap. 43. d. tit. *defuncti vindictam in super habere*, cap. 27. de his quæ vt indig. Hoc est eius quod superabundat loco reputare. Et quia id quod abundat, negligere plerunque solemus, idcirco rectissimè Cuiacius *in super habere* positum pro *negligere* arbitratus est. Eoque sensu accipiendum est illud Gellij libro primo, cap. 19. *Tarquinius ore iam serio atque attentiore animo sit, eam constantiam confidentiamque non in super habendam intelligit*. Simili modo, *in super fundum legare*, eo scripsisse videtur Scauola, quo *fundum præceptione hæredi instituto legare* dicimus, cap. 20. de institut. & instrument. legat. Siquidem id quod præcipuum hæredi legatum est, idcirco insuper legatum possit dici, quod illud

illud ultra portionem hereditariam instituto heredi super & saluam sit. Proinde non rectè mihi visus est vir quidam ingeniosissimus hic apud Scauolam *Instructum*, pro *In super*, reposuisse. Et has quidem geminatas prapositiones *In super*, & dictiones huiusmodi, *In super habere*, separatas fuisse non coniunctas, ex Q. Scauola probari potest, quem Gellius libro quarto Noct. Att. cap. 2. ait sic scripsisse: *Hac ego cum Philosophia me dedissem, non in super tamen habui discere*. Et Plautus in Mercatore idipsum etiam liquidò demonstrat, his verbis.

*Neque quisquam hominem conspiciat, donec in naui super.*

Quo in loco *In naui super*, dixisse Plautum puto pro *In superiore naui parte*. Nam qui in parte naui superiore est, is & super & in naui est. Quibus etiam addi potest quod ita Symmachus Epist. lib. 2. scribit: *Hac me atque alia huiusmodi perpulerunt, scribendi munus in super non habere*. Similis est illa prapositionum geminarum ratio, qua in pandectis Vlpianus, & ad Atticum lib. 2. vsus est Cicero. Sic enim apud Vlpianum legimus: *Veniam in ante actum dedit, c. 1. in princip. de fugitiuis*. Et Cicero, *Comitia*, inquit, *Bibulus cum Archilochio edicto in ante diem 15. kal. Nou. distulit*. Et libro tertio. *De Quinto fratre nuntij nobis tristes nec varij venerunt, ex ante diem Non. Iunij usque ad prid. kal. Sept.* Idem Cicero Epistol. famil. libro octauo sic etiam scribit: *Cum magistratum inissent ad ex kal. Mart.* His adde Apuleij illud de Asino libro 10. *Grandi premio vilis acquiritur aliqua, sententia presidis bestiis addicta, que mecum in coram publicam populi caueam frequentaret*. Sic *In palam*, visus est etiam aduersus Constantium Augustum Hilarius scripsisse: *Pugnaremus, inquit, in palam & cum fiducia, contra negantes, contra torquentes, contra iugulantes*.

Dixerunt etiam veteres *Ab ante*, & *Ab ultra*. In quodam enim epitaphio, quod Romæ in ædibus Maseiorum extare dicitur, sic legimus: ET ALIA TABER. AB ULTRA VIC. TRI. AR. Et in epitaphio An. Crestinæ: NE QVIS NOS INQUIETET EX ARCA NOSTRA, NEQVE AB ANTE ALIAM PONAT, AVT COMMVTET. Hæc qui non considerauerunt, intellexisse non videntur quo sensu sic in Eunuchō scripserit Terentius: *Ex Æthiopia est usque hac*. Nec aliò referendum est, quod in hunc modum ad Scapulam Tertul. scribit: *Sed iidem ipsi, qui per genios eorum in pridie usque iurauerant*. Addatur & illud Taciti Annalium libro 15. *Volucres & feras diuersis è terris, & animalia maris Oceano ab usque petiuerat*. Huic etiam † consentaneum est quod sic pro L. Flaccō Cicero scribit: *Qui hac ipsam legationem quam habet, non accepit à suis ciuibus, sed ab usque Tmolo petiuit*. Vulgo legitur, *Sed usque Tymolo petiuit*. HENRICVS autem Stephanus in veteri libro *Ab usque* scriptum obseruauit. Nec dubito quin ea sit germana lectio, præsertim quæ præpositionum antiqua & visitata quadam geminatione mirum in modum confirmatur.

## CAPVT IV.

*Verus intellectus cap. 1. De legat. 1.*

PER omnia, inquit Vlpianus, *exaquata sunt legata fideicommissis* dict. cap. 1. Id qua ratione accipi debeat, viri docti non intelligunt. Et est sanè axioma falsissimum, nisi si ad locum ex quo desumptum est, illud referatur. Quia igitur ex libro Vlpiani ad edictum sexagesimo septimo illud axioma in tractatum legatorum transtulit Tribonianus, & quia in libris ad Sabinum plenissimè de legatis scripsit Vlpianus; videndum

dum est quid idem Vlpianus in libro sexagesimo se-  
 primo ad edictum tractauerit. Certè quantum ex in-  
 dice quem Labitti beneficio nacti sumus, discere po-  
 tui, magnam illius libri partem in interdictis *Quoi le-  
 gatorum, & Quorum bonorum* interpretandis Vlpianum  
 consumpsisse deprehendi. Quum igitur sic pratoris  
 interdictum conceptum esset: *Quod legatorum nomine  
 non ex voluntate haredis occupasti, id restituas haredi:*  
 quumque is qui occupauerat, non legatorum sed fi-  
 deicommissorum nomine se occupasse contenderet,  
 & idcirco interdictum *Quod legatorum* locum non ha-  
 bere, respondisse videtur Vlpianus, *Per omnia exaqua-  
 ta esse legata fideicommissis*: hoc est interdicto *Quod le-  
 gatorum* sic legatorum appellatione fideicommissa cõ-  
 tineri, vt quæ de legatis prator interdixit, eadem quo-  
 que de fideicommissis esse interdicta censeantur, ea  
 nisi fallor ratione, qua *hareditatis appellatione bonorum  
 quoque possessionem contineri* scripsit Paulus, cap. 137.  
 de verborum sign. Illud siquidem sic non accipere  
 conuenit, vt verbo hareditatis bonorum possessio  
 contineatur; verum ita, vt quæ in lege Papia quam  
 tunc quum hæc scriberet Paulus interpretabatur, de  
 hareditate dicebantur, locum etiam aliquem in bo-  
 norum possessione obtinerent.

C A P V T V.

*Emendatur & explicatur Callistrati locus, de  
 magna capitis diminutione.*

C O N S V M I T V R existimatio, inquit Callistra-  
 tus, quoties magna capitis diminutio interuenit, id  
 est, cum libertas admiuitur, veluti cum aqua & igni in-  
 terdicitur, quod in persona deportatorum euenit; vel cum  
 plebeius in opus metalli vel in metallum datur, cap. 5. de

extraord. cognit. Quid sibi velit Callistratus libertatem deportatis adimens, non satis intelligunt viri docti. Si dixeris cum Callistrato, deportatis non civitatem solum, sed libertatem etiam adimi, quid Paulo, quid Iustiniano respondebis, qui eam sic mediæ capitis diminutionis esse contendunt, ut per illam salva libertate, sola amitti civitas possit? §. 1. Instit. d. cap. dim. cap. 5. in princ. cap. ultim. de cap. minut. Proinde sic docti quidam viri Callistratum interpretati sunt, quasi ille de libertate quæ iuris est Quiritium duntaxat senserit: ut sic contēdisse videri possit Callistratus, adimi quidem libertatem deportatis, verum eam tantum quæ iuris est Quiritium; eam verò quæ iuris gentium est, non adimi. Quod in tantum ab intentione iuriconsulti videtur recedere, ut ne de huiusmodi libertatis distinctione, vel somniarit quidem Callistratus. Nam si dixeris sic libertatem accepisse Callistratum, necessum erit ut mihi concedas (quod nunquam concessurus es) aliam quoque libertatem nullam adimi servis pœnæ. Vnam enim libertatem ita interpretatus est Callistratus, ut illam eandem quam servis pœnæ adimit, deportatis quoque adimere videatur. Dicam paucis quidnam de hoc Callistrati responso sentiam. Certè illud mendosum suspicor, & sic esse restituendum, ut pro *Veluti cum*, legamus *Vel utique cum*, hunc in modum: *Consumitur existimatio quoties magna capitis diminutio interuenit, id est, cum libertas adimitur, vel utique cum aqua & igni interdicitur, quod in persona deportatorum euenit: vel cum plebeius in opus metalli, vel in metallum datur. Ut sit sensus magnæ capitis diminutionis tres esse species, vnam qua libertas cum civitate omnino adimitur, quod accidit his qui se patiuntur, aut ad actum gerendum, aut ad pretium participandum venundari: alteram quâ aqua & igni interdicitur,*



terdicitur, hoc est salua libertate ciuitas amittitur: & tertiam denique, qua libertas quidem amittitur cum ciuitate, sed ad tempus; quod his accidit, qui serui pœnæ efficiuntur, cap. 22. cum cap. seq. de pœnis. Sic enim capitis diminutiones partiti sunt veteres, vt alij tres earum species; maximam, mediam, & minimam, alij duas tantum constituerent, magnam & minorem, c. fin. de c. minut. c. 1. §. si filius, de suis & legit. Et qui duas tantum constituunt, sub magna mediam & maximam complectuntur, hîc apud Callistratum: sub minore verò solam minimam. Et ita quidem rectè pro *veluti cum*, mihi videor *vel utique cum* reposuisse. Nam cum veterum more sic scriptum esset *utiq.* pro *utique* deleta tandem postrema litera q, pro *vel utique*, librarij legisse videntur *veluti*. Sanè Accursius pro *veluti* testatur legi *vel* in nonnullis antiquis exemplaribus.

## C A P V T V I.

*Explicatur cap. 39. ff. De iniuriis.*

**A** I T Venuleius: *Vestem sordidam rei nomine in publico habere, capillum nve submittere nulli licet, nisi ita coniunctus sit affinitatè, vt inuitus in reum testimonium dicere cogi non possit, d. cap. 39.* Viderur ad eum motem respexisse Venuleius, quo non reos duntaxat, sed etiam adfines, cognatos, libertos eorum & familiares omnes vestem mutare, capillumque submittere consueuissè, præter Liuium testatus est Plinius Epist. libro septimo. Postquam enim exposuisset Plinius, suum libertum cum minore fratre in eodem lecto quiescentem, sibi visum esse quendam in toro residentem cernere, admoventemque capiti suo cultros, atque etiam ex ipso vertice amputantem capillos hæc verba

L I

4

subiecit:

subiecit : *Nihil notabile secutum , nisi quod non fui reus futurus , si Domitianus sub quo hæc acciderunt , vixisset. Nam in scrinio eius datus à Caro de me libellus inuentus est. Ex quo coniectari potest, quia reis moris est submittere capillum, recisos meorum capillos depulsi quod imminerebat periculi signum fuisse. Hæc Plinius. Liuius libro sexto sic de Manlio scribit: Coniecto in carcerem Manlio, satis constat magnam partem plebis vestem mutasse, multos mortales capillum ac barbam promississe, obuersatamque vestibulo carceris mœstam turbam. Et paulò post: Approbantibus cunctis diem Manlio dicunt. Quod ubi factum est, primo commota plebs est, utique postquam sordidatum reum viderunt, nec cum eo non modo patrum quengnam, sed ne cognatos quidem aut affines, postremò ne fratres quidem A. & T. Manlios, quod ad eum diem nunquam usu venisset, ut in tanto discrimine non & proximi vestem mutarent. Appio Claudio in vincula ducto C. Claudium inimicum Claudiamque omnem gentem sordidatam fuisse. Eoque non dubium est quin respexerit Prudentius contra Symmachum libro primo his versibus.*

*Ipse senatorum meminit clarissimus ordo,  
Qui tunc concreto processit crime, catenis  
Squalens carceris.*

Eoque sensu accipiendum est, quod de veste squalida deque barba dimittenda submittendisque capillis Vlpianus scribit, cap. 15. §. 21. de iniur. Huius etiam moris visus est A. Gellius meminisse, sic de P. Scipione lib. 3. cap. 4. scribens : *Eumque cum esset reus neque non candida veste uti, neque fuisse cultu solito reorum. Porro quam Venuleius vestem sordidam, eam Valerius vestem appellat obsoletam. Sic enim de P. Rutilio scribit libro sexto, cap. 4. Huic voci consentanea illa opera, quod magis ordinum dissensione quam vlla culpa sua reus factus, nec obsoletam vestem induit, nec insignia senatoris deposuit,*

*deposuit, nec supplices ad genua iudicum manus tentendit.* Et ex his quidem locis omnibus satis nunc arbitror intelligi, quidnam sibi voluerit Venuleius nimirum cuius non esse permittendum rei nomine sordidam siue obsoletam vestem in publico habere, capillumve submittere, nisi cognatis tantum & affinibus, iisque proximioribus: cum id antea libertis & cuius ex populo sine fraude liceret: quemadmodum ex Plinio & Liuiio satis est iam probatum.

## CAPVT VII.

*Elegans pandectarum Florentinarum lectio  
defenditur, in cap. 9. De dolo malo.*

**N**ON intelligunt interpretes quid sibi voluerit Ulpianus cum ita scriberet: *Et si seruum pignorum noxa dederis per iudicem, & it absolutus, de dolo teneris si apparuerit, cum pignori datum.* d. cap. 9. §. 3. Haloander pro *& it absolutus*, reposuisse visus est *Et per iudicem sis absolutus*. Taurellus autem sic legit, *Et it Absolutus*, quod idem est ac si dicas, *Et ita absolutus*, coalescente videlicet in vnum extrema antecedentis & prima sequentis dictionis littera, quod in Florentinis pandectis frequenter accidit. Aliquibus emendationibus lectionem puto Florentinam multo sincerioresse, qua non *ita absolutus*, non *sis absolutus*, sed *it absolutus*, expresse continetur, & ad seruum ipsum vocem *Absolutus* referendam esse. Non enim dubito quin eadem ratione serui olim absoluti, ire iussi fuerint, qua condemnati iussu pratoris vel iudicis ducebantur. *Sed, et si seruum ex causa noxali patiatur duci*, inquit Paulus, *defendere videtur.* c. 36. de procurat. Itaque seruus qui condemnatur, duci; qui absoluitur, ire iubetur. Et id quidem duabus fieri rationibus solet, aut per iudicem,

Ll 5

aut

aut iussu prætoris. Per iudicem, accepto, constituto, contestatōque iudicio. cap. 8. in princ. de leg. 3. cap. 28. in fin. de libr. leg. c. 16. Iud. solui Iussu prætoris, antè litis contestationem. Per iudicem, caus̃sa cognita: iussu prætoris, etiam incognita caus̃sa. *Si seruus præsens est, inquit Paulus, dominus abest, nec quisquam seruum defendit, ducendus erit iussu prætoris, sed caus̃sa cognita domino postea dabitur defensio.* cap. 2. §. fin. Si ex nox. caus̃sa. Quod autem per iudicem fit, illud constituto duntaxat iudicio, caus̃sāque cognita fieri consueuisse, docet pro Roscio Comædo eleganter Cicero, *Pecuniā*, inquit, *tibi debebatur certa, quæ nunc petitur per iudicem, in qua legitima partis sponsio facta est.* Eoque sensu accipiendum est illud Plinij Epist. lib. 7. *Si tamen alteram litem per iudicem, alteram, ut ais, ipse finieris, incipies primum istic otio frui.* Hoc est, si alteram litem per iudicem, alteram sine vlllo iudice finieris. Hæc enim duo *Per iudicem*, & *sine iudice* prorsus contraria sunt. capitulo octauo §. 1. cap. 13. & cap. 22. §. 1. Rem ratam hab. cap. penult. Ad l. Iul. de vi priuata. Et idcirco quod Vlpianus de pignorato seruo noxæ per iudicem dato scribit, hoc sic esse intelligendum videtur: Si seruum pignoratū, qui te sciente nec impediēte damnum dederat, noxali iudicio prouocatus, mihi noxæ dare potius quàm litis æstimationem pati malueris; & is seruus idcirco *iussus ire*, hoc est absolutus fuerit, quod esse tibi pignori datus diceretur: simul atque tibi seruum pignori datum esse apparuit, factus actioni de dolo obnoxius es, nimirum quod alienum seruum velut proprium noxæ dans, propriæ litis æstimationem effugere volueris dolo malo: eaque de dolo actione noxalem litis æstimationem à te consequat. cap. 1. de noxalibus actionibus Quo sensu hæc eadem de dolo actio etiam noxalis appellatur, d. §. 3. Nec

Nec est quod quis objiciat eum qui seruum pignori accepit, actione noxali non teneri. cap. 22. §. 1. de noxalib. act. Illud enim de eo est accipiendum, qui ignorans damnum fieri, noxali iudicio prouocatus, alienum seruum aut noxæ dedere, aut eius nomine aliquam litis æstimationem pati non cogitur. Caterum si eo sciente & non impediante, damnum à pignorado seruo datum sit; quominus in solidum qui seruum accepit pignori rectè conueniatur, profectò nihil esse in causa videtur. cap. 2. in princ de nox. act.

## CAPUT VIII.

*Potueritne hæres quod furtum antea factum esset, rectè furti agere.*

**H**ÆREDEM, inquit Vlpianus, furti agere posse, hæc què constat. Executio enim quorundam delictorum hæredibus data est. capit. 1. de priuat. delict. An autem diu antè Vlpiani tempora istud constiterit, hoc est usu receptum fuerit, incertum est. Quanquam Ciceronis tempore inter alias controuersi dubique iuris clausulas, & hanc quoque relata fuisse dubium non sit. Sic enim ad Trebatium scribit Cicero Epistol. fam. † lib. 7. *Illuſeras heri inter ſcyphos quod dixeram controuerſiam eſſe, poſſetne hæres quod furtum antea factum eſſet, rectè furti agere. Itaque eſſi domum benè potus ſeròque redieram, tamen id caput ubi hæc controuerſia eſt notari, & deſcriptum tibi miſi, ut ſcires, id quod tu neminem ſenſiſſe dicebas, S. Ælium, M. Maniliam, M. Brutum ſenſiſſe. Ego tamen Scauola & Teſta aſſentior.* Hæc Cicero. Velim profectò quid Ælius, Manilius, & Brutus contra Scauolam Teſtamque ſenſerint Cicero expoſuiſſet. Suspicio eos exiſtimari hæredem furti rectè agere, illudque Scauolam & Teſtam negaſſe. Certè propter hæc

hæc Ciceronis verba, *Quod tu neminem sensisse aiebas.* Videtur enim Trebarius, an quod furtum antea factum esset, rectè potuerit hæres furti agere, interrogatus respondisse, id neminem sensisse: & ita cum Scævola negasse hæredem rectè furti agere. Quæ tamen sententia Vlpiani tempore non erat in usu.

## CAPV T IX.

*Emendatur cap. 17. C. de solut.*

**H**ABEANT veteres suas accepti & expensi tabulas, in quarum vna partè notari expensa solent, & in altera continebatur acceptorum ratio. De quibus tabulis scribit ad hunc modum Seneca de benef. lib. 4. *Apud me istæ expensorum acceptorumque rationes dispunguntur. Ego quid cui debeam scio; aliis post longam diem repono, aliis in antecessum, aut prout occasio, & rei privata mea facultas tulit.* Si rationes expensi cum accepti rationibus quadrarent & pares essent, tunc *pariari & paria fieri* dicebant veteres. cap. 40. de statulib. c. 5. §. 10. de iur. im. c. 4. §. 1. de manumiss. Seneca Epist. lib. 17. *Quotidie cum vitæ paria faciamus.* Eoque arbitrator respexisse Terentium, quum sic in Phormione Dauum loquentem faceret.

*Lectum est, conueniet numerus quantum debui.*

Sensus enim est: Legi meas accepti tabulas, & cum ijs nummorum hîc numerus æqualem paræmque faciet expensi rationem tuam. Hinc etiam intelligimus, si pariare nihil aliud sit quàm paria facere, hoc est paræm cum tabulis expensi, sui creditoris accepti rationem reddere; consequi rectè videri, tunc etiam dici posse obligationem pariatam, cum satis abundè creditori factum est. cap. 67. §. 5. de condict. indeb. Idque etiam ex Seneca probatur, qui sic lib. 11. epist. scribit: *An is*  
qui

qui profuit nobis si postea nocuit paria fecerit, & nos debito solueris. Igitur solutione pariatur obligatio. Et hoc nimirum illud est, quod Diocletianus & Maximianus Imperatores hunc in modum Cassio scribunt: *Manifesti iuris est, tam alio pro debitore solvente, quam rebus pro numerata pecunia consentiente creditore datis, tolli pariatam obligationem.* cap. 17. C. de solut. Quo in loco malè passim *paratam* legitur, pro *pariatam*. Et hæc quidem cum non considerarent audaculi quidam, *Comparatam* pro *paratam* visi sunt reponere voluisse. Tertullianus verborum iuris admodum studiosus, pariandi verbo etiam interdum usus est. Sic enim lib. 4. aduersus Marcionem scribit: *Si nec in alium spectant, quam cui per omnia pariauerint.* Et lib. 5. *Non rapinam,* inquit, *existimauit pariri deo.* Sic nempè vertit illud D. Pauli ad Philippenses cap. 2. *ἐχ ἀφ' αὐτῶν ἡγούσατο τὸ ἐπ' ἰσῶν θεῷ* quod alij reddunt, *Æqualem esse deo.*

## C A P V T X.

*De nominibus Antoninorum, & veris eorum differentiis.*

**A**NTONINVS à senatu Pius est cognominatus, inquit Iulius Capitolinus, *vel quod socerum fessam atatem manu præsente senatu lenauerit, vel quod eos quos per malam valetudinem Hadrianus occidi iusserat, reseruauit.* Hic quum annos viginti quatuor imperasset, morbo periit, anno ætatis suæ septuagesimo, & quasi adolescens desideratus est. Eiúsque singulari virtute & incredibili quadam pietate factum est, ut ad quamplurimos imperij successores, nullo licet sanguinis vinculo iunctos, nomen Antonini velut hæreditarium transfret. Quo nomine etiam Imperatores quosdam prænominis cognominisque loco usos esse ex diuersis

diuerſis antiquitatum monumentis conſtat. Siqui-  
dem poſt obitum Antonini Pij fuiſſe nomen Antoninorum  
tam amabile teſtis eſt Ælius Lampridius, vt qui eo nomi-  
ne non vteretur, mereri non videretur imperium. Vnde  
etiam nonnulli & Seuerum, & Pertinacem, & Iulia-  
num, Antoninorum prænominibus honorandos pu-  
tant. Vnde poſtea duos Gordianos patrem & filium,  
Antoninos etiam cognominatōs falſo traditum eſt.  
Non enim Antonini, ſed Antonij, vt ex numiſmati-  
bus conſtat, dicebantur Gordiani. Sed aliud eſt, in-  
quit Lampridius, quum prænomen adſciſcitur, aliud quum  
ipſum nomen imponitur. Nam Pius verum nomen Anto-  
nini habuit cognomen Pij. Marcus verum nomen Veriſſi-  
mi habuit; ſed hoc ſublato atque abolito, non prænomen  
Antonini ſed nomen accepit. Commodum autem Marcus  
Antoninum appellauit, atque ita in publicum edidit diem  
natalis ſui. Iam Caracallam Baſſianum, Antoninum ap-  
pellatum ſatis conſtat, vel ſomnij cauſſa quod Seuerus vi-  
derat, quum ſibi Antoninum ſucceſſorem prædictum ſen-  
ſiſſet. Anno demum 13. Antoninum dixit, quando ei  
Imperatoriam dicitur addidiſſe poteſtatem. Hæc Lam-  
pridius adiiciens inſuper, Getam & Diadumenianum,  
Antoninos etiam appellatōs fuiſſe. Videamus de ijs Im-  
peratoribus ſingulis qui nomen Antonini habue-  
runt. De alijs enim qui Antoninorum aut prænomi-  
ne aut cognomine ſunt appellati diſſerere, huius nec  
loci eſt nec inſtituti. Primum locum inter Antoni-  
nos, omnes occupat Antoninus Pius: qui quum ad-  
huc priuatus eſſet, Titus Aurelius Boionius Anto-  
ninus appellabatur. Adoptatus ab Hadriano Impe-  
ratore, nomen patris adoptiui more maiorum aſ-  
ſumpſit, & Titus Ælius Antoninus appellatus eſt.  
Poſt obitum eiufdem patris appellari patris cognomi-  
ne etiam voluit, & Titus Ælius Hadrianus Antoninus  
Pius



Pius dictus est. Idque ex antiquissimis æreis & argenteis quibusdam numismatibus quæ apud Laurinos inveniuntur, verissimum apparet. Ex quibus vnum vidi effigiem huius Antonini in vna parte cum hac inscriptione continens: IMP. T. ÆLIVS CÆS. HADRIANVS ANTONINVS, Eiúsque pars altera dextris duabus inter duas spicas caduceum comprimantibus imperij Antonini concordiam, pacem, & fertilitatem designabat, cum hac inscriptione: AV G. PIVS P. M. TR P. COS. II. Hoc est. *Imperator Titus Ælius Caesar Hadrianus Antoninus Augustus Pius pontifex maximus tribunitia potestate consul secundum.* Hoc tit. vsus est Iustinus Martyr quum Antonino Pio pro Christianis librum offerret. In prudentum responsis interdum sed rariùs Imperatorem hunc appellatum esse Antoninum Pium obseruavi: sæpiùs autem D. Pium, & interdum Titum Antoninum. Et certè D. Pij tam frequens occurrit mentio, vt meritò exemplis abstinendum sit. Nec desunt auctoritates quibus confirmari potest hunc Antoninum interdum Titum Antoninum vocari. c. 32. de adopt. c. 5. de his qui not. inf. c. 45. de minor. c. 5. vt legat. no. c. 11. Ad municipal. Est etiam vbi D. Titus hîc idem Imperator appellatus inuenitur. cap. 1. §. 2. de iure fisci. Et hîc etiam ille Antoninus est, qui in rescriptis quibusdam cum D. Hadriano patre suo iungitur. cap. 1. §. 3. de quæstion. cap. 24. §. fin. de fideicom. libert. *Hic Antoninus ea conditione ab Hadriano fuerat adoptatus, vt sibi adoptaret Marcum Antoninum fratris uxoris sue filium, & L. Verum, Ælij Veri qui ab Hadriano adoptatus fuerat, filium; qui postea Verus Antoninus est dictus.* auctore Capitolino. Et hac quidem adoptione tandem euenit, vt defuncto Antonino Pio in imperium succederet M. Antoninus Philosophus. Et quia

quum

quum adoptatus esset Marcus ab Antonino Pio, tunc primum si Capitolino credimus, pro Annio Aurelius coepit vocari, idcirco dubium non videtur quin sit emendanda capitis primi C. de petit. hæred. hæc inscriptio: M. ÆLIVS ANTONINVS A. AVGVRI NO PROCONSVL I AFRICÆ. Certissimum enim est, legendum esse M. AVRELIVS ANTONINVS AVG. Marcum enim Antonium Ælium vnquam appellatum fuisse, nullis auctoribus idoneis euinci potest. Quòd si me rogites, cur pro M. non reponam T. vt sic legatur: TITVS ÆLIVS ANTONINVS, & ad D. Pium hæc constitutio referatur, dicam, quominus id fiat, expressa quædam ipsius constitutionis verba in causa esse, quibus D. Hadrianum eiusdem constitutionis auctor auum suum appellat. Quia igitur auum M. Antonini constat Hadrianum fuisse, quis quæso dubitabit, quin MARCVS AVRELIVS pro M. MARCVS ÆLIVS in hac epigraphe reponendū sit? Idque ex hac inscriptione redditur evidentissimū. S. P. Q. R. IMP. CÆS. DIVI ANTONINI F. DIVI VERI PARTH. MAX. FIL. DIVI HADRIANI NEP. DIVI TRAIANI PARTH. PRONEP. DIVI NERVÆ ABNEP. M. AVRELIO ANTONINO AVG. GERMAN. SARM. PONTIF. MAX. TRIB. POT. XXX. IMP. VIII. COS. III. P. P. QVOD OMNES OMNIVN ANTE SE MAXIMORVM IMPERATORVM GLORIAS SVPERGRESSVS BELLICOSISSIMIS GENTIBVS DELETIS ATQVE SVBACTIS. In hac inscriptione pro *Divi Veri Parth. fil.* legendum est, *Divi Veri Parthici fratri.* Idque his verbis satis indicat Callistratus: D. Marcus cum fratre suo pro sua humanitate hanc rem temperavit, cap. 3 i. de lege Cor. de fals. M. Aurelius Antoninus

ninus Philosophus in prudentum responsis vix alia, quàm diui Marci appellatione ab Antoninis reliquis discernitur. Et quia post excessum diui Pij à senatu coactus regimen publicum capere, fratrem, sibi participem in imperio designavit, quem Lucium Aurelium Verum Commodum appellavit, idcirco nequaquam obscurum est hunc diuum Marcum eundem illum Antoninum esse qui cum Vero in iure ciuili plerunque citari solet hunc in modum : *Imperatores Antoninus & Verus Augusti rescripserunt.* Et hi quidem Imperatores illi sunt, qui diui fratres appellantur, & quibus imperantibus primum duos Augustos Romanum imperium habere cœpit. Post Veri obitum quum solus aliquandiu Marcus Antonius rempublicam tenuisset, filium suum Commodum Antoninum Imperij consortem fecit. Idque ex Papiniano, Macro, aliisque iurisconsultis probari euidentissimè potest. Sic enim legimus apud Papinianum. *Imperator Marcus Antoninus & Commodus filius rescripserunt*, capite 38. §. 4. Ad legem Iuliam, de adult. Et apud Macrum : *Diuus Marcus & Commodus rescripserunt*, capite 32. dicto titulo. Tandem mortuo patre solus imperauit Commodus Antoninus. Hic in antiquis nummorum ac marmorum inscriptionibus Marcus Commodus Antoninus, & quandoque Lucius Ælius Aurelius Commodus Antoninus appellatus fuisse videtur. Eumque non Antoninum, sed aut Imperatorem Commodum, aut diuum Commodum in responsis suis ferè semper appellat Iurisconsulti. Nepefinæ hanc olim inscriptionem extitisse testatur Petrus Appianus : L. AVRELIO COMMODO VICTORI IUVENES NEPESINI DIANENSES ÆRE CONIATO. Auctor est idem Appianus, in castro sancti Angeli hanc quoque inscriptionem reperiri : IMP.

M m

CÆSA

CÆSARI D. MARCI ANTONINI PII GERMANICI PARTH. FILIO DIVI PII NEPOTI, DIVI HADRIANI PRONEPOTI, DIVI TRAIANI PARTHICI ABNEPOTI, DIVI NERVÆ ABNEPOTI, L. ÆLIO AVRELIO COMMODO AVG. SARMATICO GERM. MAX. BRITANNICO, PONTIF. MAX. TRIB. POT. XXVIII. IMP. VIII. COS. VIII. PATRI PATRIÆ. Post hunc factus est Imperator P. Helvius Pertinax. Eiusque vnica duntaxat in vniuerso Iustiniani Cæsaris Codice inuenitur constitutio, quæ sic mendosè inscripta est: IMP. ÆLIUS PERTINAX AVG. ATILIO. Legendum enim esse, IMP. HELVIVS PERTINAX, ex quibusdam antiquis numismatibus constat, in quibus non Ælium sed Helvium appellatum esse hunc pertinacem euidenter expressum est hunc in modum: IMP. CÆSAR P. HELV. PERTINAX AVG. Item: IMP. C. P. HELVIVS PERTINAX AVG. Et quem Latini Helvium, eum Græci ἡλωύιον appellant. Idque ex alio quodam nummo Græco satis intelligi potest, cuius inscriptio talis est, ΑΤΤ. ΚΑΙΣ. ΠΟΥΒ. ΗΛΟΥΤΙΟΣ ΠΕΡΤΙΝΑΞ ΣΕΒ. Huius Pertinacis meminit etiam Callistratus, cum non Ælium, sed Elvium in pandectis Florentinis rectè appellans. *Demonstratur variè, inquit, nec abscisè numerum liberorum ad excusationem municipalium munerum prodesse ex rescriptis diui Eluij Pertinacis, cap. 2. §. 2. de iure immunit. Imperator P. Helvius Pertinax, mensibus vix dum in imperio sex absolutis, ab auaris quibusdam prætorianis interfectus, Seuerum militum suffragiis successorem habuit. Hic Seuerus filium suum Bassianum Caracallam imperij consortem fecit, & M. Seuerum Antoninum, inquit Herodianus, appellauit. Locus hic Herodian. mēdosus est,*

si modò auctor ipse non errauerit. In eo enim pro Se-  
uero reponendus est Aurelius Imp. enim Seuerum fi-  
lium suum non Marcum Seuerum, sed Marcum Aure-  
lium Antoninum appellasse ex infinitis marmorum  
numismatumque monumentis est manifestius quàm  
ut doceri exemplis necessum sit. Ait etiam Spartianus  
idcirco *Imperatorem Seuerum filium suum M. Aurelium  
Antoninum appellari voluisse, ut ille hoc medio in M An-  
tonini familiam transfret.* Idque nec Ausonius quidem  
visus est ignorasse, sic de Caracalla scribens:

*Dissimilis virtute patri, & multò magis illi*

*Cuius adoptiuo nomine te perhibes.*

Hi sunt Imperatores illi qui sic coniungi solent : *Im-  
peratores Seuerus & Antoninus rescripserunt.* Et rectè qui-  
dè est à viro clarissimo Antonio Augustino reprehен-  
sus Gallia suæ decus & ornamentum Gulielmus Bu-  
dæus, qui M. Antonini fratrem non Verum duntaxat,  
sed & Seuerum & Commodum, & Antoninum appel-  
lari arbitratus est. Siquidem Seuerum *Antonini Ma-  
gni*, hoc est Bassiani Caracallæ patrem, & Commo-  
dum M. Antonini fuisse filium dilucidè probatum  
est. Ad Imperatorem Seuerum eiusque filium M. Au-  
relium Antoninum hæc referenda sunt Iurisconsul-  
torum verba : *Imperator noster cum patre rescripsit, cap. 9.  
§. 2. de iur. dot. cap. 6. §. 2. de muneribus & honoribus.  
Rescriptio Imperatoris nostri & diui patris eius continetur,  
cap. 6. §. 2. de pollicit. Constitutum est ab Imperatore no-  
stro, & diuo Seuero. cap. 12. §. 10. de capt. & postlim. re-  
uerf. Diuus Magnus Antoninus cum patre rescripsit, c. 11.  
§. 3. de muneribus & honoribus, cap. 5. de veteranis.  
Rescriptum Imperatoris Antonini & diui patris eius, ca-  
pite 9. de captiuis & postlimin. reuerf. Idque Imperator  
Antoninus cum diuo patre significauit, cap. 6. de excus. Ex  
epistola Imperatoris nostri & D. Seueri, c. 7. de suspect. tut.*

M in 2

Imperator

*Imperator Antoninus cum diuo Seuero*, cap. 1. §. 2. de susp. tut. Hic idem Seuerus aliquando etiam Pertinax appellatus est, quemadmodum ex eius numismate quodam intelligimus, cuius hæc est inscriptio: L. SEPT. SEVERVS PERTINAX AVG. P. M. TR. P. XI. Et idcirco ad diuum Seuerum, eiusque filium M. Aurelium Antoninum hæc Modestini verba esse referenda non dubitavi: *Diuus Antoninus & Pertinax rescripserunt*, cap. 12. de fideic. lib. Nunc admonendi sumus, qua ratione Caracalla ab Antoninis reliquis discerni appellatione potuerit. Et constat quidem diuersis, postquam relati inter duos essent nominibus appellatos fuisse Antoninos. Sic nimirum vt Antoninus Pius, omnium Antoninorum princeps, diuus Pius vocaretur; M. Antoninus Philosophus, dius Marcus; Antoninus verò Commodus, diuus Commodus; Caracalla deniquè, diuus Antoninus. Hanc autem Antoninorum diuersam appellationem diligenter obseruasse visi sunt iurisperiti, ne qua ex promiscua Antoninorum appellatione confusio suboriretur. Vocatur etiam *Caracalla* nonnunquam *Imperator Antoninus Augustus*: cap. fin. de senat. cap. 4. de offic. procons. cap. 3. de tutelis. Interdum etiam *magnus Antoninus*: c. fin. de veteranis: cap. fin. de public. & vectig. cap. vltim. C. ad l. Iul. maiest. In Vlpiani responsis sic ferè semper appellari solet: *Antoninus Augustus noster*, cap. 42. de fideicom. lib. cap. 1. ad S. C. Orfit. *Imperator noster*, & sic deinceps, Ad Caracallam etiam referenda sunt. *Antoninus Augustus Pius noster*. cap. 42. de fideicom. lib. quæ verba malè à quibusdam ad Antoninum Pium trahuntur. Hoc enim cognomen Caracallæ à senatu idcirco delatum est, quod eos quos iniuste occidi iusserat, postea dimitteret. Et ita plerique sentiunt, à quibus dissentire non est religio.

Proinde

Proinde rectius opinor dici posse, hoc cognomen *Pius* huic Antonino fuisse cum posteris *maioribusque suis*, (hoc est, patre & auo) semper familiare. Idque hæc inscriptio manifestum facit: IMP. CÆS. DIVI ANTONINI MAGNI PII F. DIVI SEVERI PII NEPOS M. AVRELIVS SEVERVS ALEXANDER PIVS AVG. PONT. MAX. TRIB. POT. IIII. COS. P. P. RESTITVIT. Et in antiquis nummis sic appellatum Caracallam inuenio: M. AVRELIVS ANTONINVS PIVS AVG. BRIT. Caterum occiso Caracalla Macrinus percussor eius imperium adeptus filium suum Cæsarem fecit. Hic Macrinus non rectè Opilius appellatur. Eum enim Opelium fuisse nominatum testantur numismata, in quibus sic de Macrino legimus. M. OPEL. SEVER. MACRINVS AVG. PONT. MAX. TRIB. POT. COS. P. P. Filium etiam Macrini malè Diadumenum vocari ex hoc numismate constat: M. OPEL. ANTONINVS DIADVMENIANVS. Superato tandem Opelio Macrino, & à Varij Elagabali militibus vnà cum filio Diadumeniano interempto, in ipsum Elagabalum collatum est imperium. Quodnam verum fuerit matris Elagabali nomen ignorant pluri. Ex numismatibus, quorū mihi copiam Hubertus Goltzius fecit, Soæmiam fuisse appellatam Elagabali matrem euidentissimè deprehendi. Sic enim in iis scriptum inueni: IVLIA SOÆMIAS AVGVSTA. Et hic quidem Elagabalus Imperator salutatus. Antonini etiam nomen sibi consensu senatus asciuit, vel in argumentum generis, vel quod id nomen vsque adeò charum esse cognouerat gentibus, vt etiam paricida Bassianus causa nominis amaretur. Esse autem hunc Imperatorem non Heliogabalum, sed Elagabelum appellatum ex fide antiquorum numismatum constat.

Nummum enim vidi, qui ab vna parte veram Antonini Elagabali exhibebat imaginem, cum hac inscriptione: IMP. ANTONINVS PIVS AVG. Altera parte eiusdem Imperatoris effigies exprimebatur, habitu sacerdotis veste indui barbara, quali vsus esse Syros sacerdotes Dio scribit. Ea sic erat composita, vt quum esset accincta corpori sacerdotis medio, & ad talos vsque demissa, non impediret quominus omnium conspectui tibiæ, pectus, & brachia sacerdotis nuda exponerentur. Sacerdos dextra patellam libatoriam supra foculum, sinistra verò nescio quid à palmarum stolonibus non longè diuersum tenebat, cum hac inscriptione: SACERDOS DEI SOLIS ELAGAB. Posterio rem hanc nummi partem quam Huberti Goltzj beneficio nactus sum, vt huic capiti delineatam infererem, auctor fuit vir doctissimus mihiq; amicissimus Guido Laurinus: eamque sic interpretatus est, vt mihi planè persuaserit, ELAGAB. integram esse dictionem, barbaram tamen, neque legendum esse SACERDOS DEI



SOLIS ELAGABALI. Idem Laurinus videndum esse rectè monuit, an non apud Macrobiū in eo loco error sit, in quo de variis Solis nominibus disseritur, Sat. lib. 1. cap. 22. *Accipe*, inquit Macrobius, *quid Assyrij de solis potentia opinentur. Deo enim, quem summum maximumque venerantur, ADAD nomen dederunt.* Videndum inquam monuit Laurinus, an non rectiùs legeretur AGAB, pro ADAD. Cæterum qui Antoninum hunc Heliogabalum vocant, eò defendi videtur, quòd Græci ἡλιον Solem appellarent Sed errant. Non enim ab hoc nomine Græco, sed ab Elagab, quod Deum Solem Hebræis sonat Elagabalus dictus est. Et hæc quidem



quidem hætenus de nominibus Antoninorum. In quibus explicandis si quid observatione curiosa sim consecutus, id magna ex parte eruditissimo clarissimoque Guidoni Laurino lubens acceptum refero.

## CAPVT XI.

*De iis qui quæstus causa in certamen descendunt, & propter præmium in scenam prodeunt.*

**A**IT Vlpianus: Eos qui quæstus causa in certamen descendunt, & omnes propter præmium in scenam prodeuntes, famulos esse, Pegasus & Nerva filius responderunt, capite 2. in fine, de his qui notant. infam. In scenam prodire solent cum suis scenicis editores, eamque quam à Poëta redemerant comædiam, aut tragædiam, sine aliquo præmio exhiberi per scenicos curabant populo. Scenicos autem operas suas editoribus certo statutoque præmio locare consuevisse, testatur Capitolinus, sic de M. Antonino Philosopho scribens: *Temperavi etiam scenicas donationes, iubens ut quinque aureos scenici acciperent: ita tamen ut nullus editor decem aureos egrederetur.* Et idcirco quod de iis scribit Vlpianus, qui propter præmium in scenam prodeunt, hoc ad scenicos solos, non autem ad ipsos editores referendum videtur. Errant etiam qui hæc inscriptionum Terentij comædiis præpositarum verba de scenicis accipienda putant; **EGERVNT L. AMBIVIVS TURPIO, L. ATILIVS PRÆNESTIVS. EGIT AMBIVIVS TURPIO. EGERE L. ATILIVS PRÆNESTIVS, MINVTIVS PROTIVS.** Hæc enim verba de Solis editoribus accipi debere, vel hinc potest intelligi, quod nulla vnquam comædia personis duabus fuerit exhibita: qua in re lapsus est Ælius Donatus. *Egerunt* igitur, hoc est agi fecerunt,

vel sumptibus suis ediderunt L. Atilius Prænестinus & L. Ambuius Turpio. Et hæc de scenicis. Agonistis autem & gladiatoribus solent etiam certa præmia designari. De quibus aduersus Gnosticos sic differit Tertullianus: *Sed quantum illi & cruores & vibices negotiantur intendis; coronas scilicet, & gloriam, & dotes, priuilegia publica, stipendia ciuica, imaginem, statuas & qualem potest præstare sæculum de fama æternitatem, de memoria resurrectionem.* Et hæc erant præmia quæ liberis hominibus dabantur. Idem Tertullianus in libro de spectaculis, qualia gladiatoribus seruis dari præmia consueuerint, explicat eleganter his verbis: *Et qui insigniori cuique homicida leonem poscit, idem gladiator atroci petat rudem, & pileum præmium conferat.* Igitur propter præmium in certamen, non autem in scenam prodiri sine infamia solet. Eaque mihi ratio videtur cur non ita scripserit Vlpianus: *Eos qui præmij causa in certamen descendunt*: sed ita potius: *Eos qui quæstus causa*; hoc est, qui operas suas locarunt. Et idcirco quum Cicero ni à quodam quæstore, homine impio ac nefario, cui nomen Balbus erat, gladiatorem quendam in ludo defossum & viuum combustum fuisse scriberet Asinius Pollio, vt scelus exaggeraret, eundem gladiatorem adiecit bis gratis depugnasse. *Fadium*, inquit Pollio, *quendam militem Pompeianum, quia quum depressus in ludum bis gratis depugnasset, auctore se nolebat, & ad populum confugerat, primum Gallos equites immisit in populum (coniecti enim sunt lapides in eum cum arriperetur Fadius) deinde abstractum defodit in ludo, & viuum combussit.* Epistolam hanc apud Ciceronem inuenies Epist. famil. libro decimo. Nunc videndum est, cur is qui suas in artem scenicam locauit operas, neque in scenam prodit, effugiat infamiæ notam; quum is qui operas suas vt cum bestiis depugnaret, locauit, etiam si non

non pugnaverit, nihilominus tamen infamis fiat c. 3. de his qui not. inf. c. 1. §. 5. de postul. Et suspicor quidem diuersitatis hanc reddi rationem posse, vt dicamus in arte ludicra factum ipsum ad infamiam requiri, non etiam propositum: in eo autem qui pugnat cum bestiis, non tam factum quam positum. Cum bestiis enim pugnant Imperatores & milites, suæ virtutis specimen præbentes. Proinde qui quæstus non virtutis causa vitam suam prostituit, & in summum discrimen adducit, quamuis cum bestiis non pugnaverit, nihilominus ob propositum turpe infamis efficitur. Et ita huic quæstioni apud Photium satisfacit Theodorus Balsamon, meo quidem iudicio rectissime.

## C A P V T XII.

### *De custodia reorum.*

**C**USTODIA reorum alia publica est, alia militaris, alia libera, alia fideiussoribus commissa: Publica custodia carcer publicus est. Militaris, cum reus militi custodiendis traditur. De custodia fideiussoribus commissa, sic scribit Symmachus epist. lib. 1. *Statui vt Felix vadibus qui Fulgentio non essent cogniti, traderetur.* Cæterum libera tunc appellari custodia solet, quum præses aut proconsul in prouincijs, vel consul Romæ sibi, aut alicui magistratui, senatorive reum committit, Id enim fieri solere, docet eleganter Tacitus Annal. lib. 5. *Et quia incusabatur, inquit, facile toleratus, exilium, delecta Lesbo insula nobili, & amœna, retrahitur in urbem, custoditurque domibus magistratuum.* Eoque pertinet quod in Coniurat. Catil. sic scribit Sallustius: *Senatus decreuit uti abdicato magistratu Lentulus itemque ceteri in liberis custodiis haberentur.* Itaque Lentulus P. Lentulo Spintheri, qui tum adilis erat, Cethe-

gus *Q. Cornificio, Statilius C. Cafari, Gabinius M. Crasso, Ceparius* (nam & is paulò antè ex fuga retractus erat) *Cn. Terentio* senatori traduntur. Nec aliò respexisse visus est *Sidonius Apollinaris*, *Epist. lib. 1. de quodam Aruando* ad hunc modum scribens. *In Capitolio custodiebatur à Fluvio Afellio hospite, comite sacrarum largitionum, qui adhuc in eo semisumantem prefectura nuper extorta dignitatem venerabatur.* Et hoc nimirum illud est, quod sic *Vlpianus* scribit : *De custodia reorum proconsul æstimare solet, utrum in carcerem recipienda sit persona, an militi tradenda, vel fideiussoribus committenda, vel etiam sibi.* c. 1. de cust. reor. Cæterum hanc custodiarum diuersitatem antè eorum confessionem obseruari dūtaxat consueuisse, ex *Venuleio Saturnino* constat, qui *reum confessum donec de eo pronuntietur in vincula publica conijciendum esse*, lib. 2. de publicis iudicijs testatus est. c. 5. d. tit. Auctor est etiam expressè *Scauola*, *reum confessum, ob solam confessionem conijci in vincula consueuisse*, c. 4. circa finem, *Ad l. Iul. maiest.* Igitur antè confessionem æstimare proconsul solet, an militi, fideiussoribus, vel sibi committenda reatus tempore persona sit. Post confessionem verò huiusmodi nullus est deliberationi locus, etiamsi publica, quæ in reatu est, persona fuerit. Idque dilucidè satis demonstrat *Apollinaris*, qui de eodem illo *Aruando*, quem in Capitolio ante confessionem *Flauio Afellio* custodiendum fuisse traditum dixerat, confessio hunc in modum scribit : *Confestim privilegiis gemina prefectura, quam per quinquennium repetitis fascibus rexerat, exauctoratus, & plebeiæ non additis sed redditus, publico carceri adiudicatus est.* Huic planè consentaneum est quod scripsit *Hexameron lib. 3. D. Ambrosius*, *preconum clamore, clarum honoribus, ac potestatibus prominentem virum in carcerem rapi.* Verba eius hæc sunt : *Est etiam qui dudum libertate affluens copiarum,*

*piarum, liberalitatis fama per ora volitans singulorum, clarus honoribus, praeiunctis potestatibus, tribunalibus celsus, solio sublimis, beatus populis aestimatus, dum praekonum clamore deducitur, subita conuersione in eum carcerem rapitur, quo alios ipse detruserat, & inter reos suos imminens poena deflet arumnam. Porro in nonnullis prouincijs fuisse morem ut per publicos seruos rei custodirentur, auctor est Imperator Traianus, qui sic Plinio scribit: Perseueremus in ea consuetudine qua isti prouincia est, ut per publicos seruos custodiamur.*

CAPVT XIII.

*Defenditur lectio Florentina de fusionibus  
fisco praestandis.*

**A**IT Vlpianus: Solent & fisco fusiones praestare. c. 27. §. 3. de usufr. Hæc verba nemo est qui non iudicet mendosa esse in Florentinis pandectis, rectiusque legi in editionibus alijs *functiones*. Quibus ut non assentiar, in causa est D. Ambrosius, qui sic in Apologia Dauidis c. 8. scribit: *Et in lege habes, quia Iubilans dicitur numerus quinquaginta annorum recursus, celebrabilis admodum, quo debita vacuantur, confirmantur Hebraeorum libertates, possessionum refusiones.* Hæc Ambrosius. Non enim dubito qui fusiones eo sensu acceperit Vlpianus, quo in hoc loco de possessionum refusionibus scripsit D. Ambrosius. Easque arbitror alio nomine *intributiones* nominari. c. 22. §. 2. Ad municipal. Et pro *indictionibus* interdum *fusiones* posuisse veteres, primus omnium aduertit Iac. Cuiacius, ex cap. 6. C. Th. de indulgent. debet.

CAPVT

## CAPVT XIV.

*De plus petentibus.*

**E**O s qui plus petebant, olim caussa cecidisse nemo dubitat. §. si quis agens, Instit. de act. Id autem an duodecim tabulis contineatur, disputant plerique. Ut credam non duodecim tabulis sed prætoris edicto plus petendo caussa veteres cecidisse, facit Seneca; qui de puerilibus sophismatibus disputans, sic scribit Epist. lib. 6. cap. 49. *Pudet dicere contra fortunam militaturisque porrigant tela, quemadmodum illos subornent. Hac ad summum bonum itur, ad istud Philosophia sunt nigra; & turpes infamesque ad album sedentibus exceptiones. Quid enim aliud agitis, quum eam quem interrogatis scientes in fraudem inducitis, quam ut formula cecidisse videatur: Sed quemadmodum illum prætor sic hoc Philosophia in integrum restituit.* Hæc Seneca. Ex hoc loco probari liquidò potest, fuisse in albo prætoris scriptum, ut is qui non quemadmodum oportet egisset, qualis est qui plus petit, caussa caderet. Exceptiones enim, quas idè infames quod captiosæ sint, appellat Seneca huc referendas esse indicant dilucidè hæc subsequencia verba, *Quid enim aliud agitis?* Eòque etiam referri potest illud Plauti in Mostel.

—— *Nihilo plus peto. T R.*

*Velim hercle ut uno nummo plus petas.*

Igitur edicto prætoris non lege duodecim tabularum; item exceptionis auxilio, non ipso iure plus petentes olim caussa, quasi non quemadmodum oportebat, agentes, videri possunt cecidisse, certè quia sic etiam auctor ad Herennium Rhetoricorum lib. 1. scribit; *Hac partitio legitima constitutionis his de causis raro venit in iudicium, quod in priuata actione exceptiones prætorie fiunt;*

*fiunt, & causa cadit is qui non quemadmodum oportet egerit.* Eoque referendum puto quod de creditore quodam Papinianus scribit, qui à debitore culpa sua causa ceciderat. c. 95. §. 9. de solut. Hoc iure vfos esse Romanos Pauli temporibus, ipse Paulus satis indicat Sent. lib. 1. tit. 10. & lib. 2. tit. 5. Eodem tempore floruit Callistratus auctore Spartiano. Quamobrem mirari satis nequeo, qua ratione *plus petentes aliquid sentire damni* scripserit Callistratus, quum certo certius sit, eo tempore vniuersam causam, si in integrum restituendi non viderentur, plus petendo actores perdidisse. Dicam quod sentio. Testatur Tribonianus, ius istud antiquum Zenonis & Iustiniani constitutionibus coarctatum fuisse. d. §. si quis agens, in fine. Eoque referendum puto quod sic scribit Callistratus: *Est autem interrogatio nunc necessaria, quum in personam sit actio, & ita si certum petetur: ne dam ignorat actor qua ex parte aduersarius defuncto heres extiterit, interdum plus petendo aliquid damni sentiat.* cap. 1. de interrogat. Non enim dubito quin sic scripserit Callistratus; *Interdum plus petendo causa cadat.* Et pro *causa cadat*, Tribonianus, *Aliquid damni sentiat*, idcirco visus est reposuisse, quod ius illud quo plus petendo amitti causa solebat, non nihil mutatum esset Zenonis & Iustiniani constitutionibus.

C A P V T X V.

*Ad ellipses substantiuorum animaduersio singularis.*

**P**RIMVS libri quinquagesimi Pandectarum titulus sic inscribitur: **A D M V N I C I P A L E M.** Qui nō animaduertunt, figuris grammaticorū vfos plerūque Iurisconsultos esse, hi quidnam sibi veller hęc inscriptio non intellexerunt, eamque sic emendare

dare conantur, *Ad municipales*. Sed frustra. *ἐλλειπτικῶς* enim *Ad municipale* scriptum est pro eo quod est *ad legem municipale*: cuius legis meminit Vlpianus c. 25. *Ad municipal*. Et sanè Ellipses huiusmodi substantiuorum, admodum veteribus familiares sunt. Quum enim sic scriberet in Mostel. Plautus: *Antiquum obtines hoc tuum, tardus ut sis*: & in Andria Teren. *Crito antiquum obtines*: admonuit Donatus id *ἐλλειπτικῶς* positum videri posse, quasi poëtæ subaudiri *morem* vel *ingenium* voluerint. Et hanc quidem Donati interpretationem probabilem esse ex eo constat, quod sic in Hecyra scripsit Terent.

—— *At tu Eccestor morem antiquum atque ingenium obtines.*

Huius etiam loci est illud eiusdem Terentij in Eunuc.

—— *Non cognosco vestrum tam superbum.*

*ἐλλειπτικῶς* enim *animum*, *morem*, *ingenium*, aut *institutum* hîc subaudiri rectè censet idem Donatus. Eadem figura lex Julia repetundarum nomen obtinet. De pecunijs enim repetundis, alijsque rebus vi, dolo, fraudibus, per Romanos magistratus focijs populi Romani ablaris huiusmodi lege sociali tractari solet. Nec etiâ nouum est per *Duodecim ἐλλειπτικῶς* duodecim tabulas exaudiri. *Discebamur pueri duodecim*, inquit Cicero, *ut carmen necessarium*, quas iam nemo discit. Sic comes priuatarum nonnunquam is appellari solet, quem alij rerum priuatarum comitem dicunt. Et quum de publicis iudicijs Marrianus, Venuleius, Macer, Marcellus, & Mæcianus scriberent, libros se scribere Publicorum *ἐλλειπτικῶς* professi sunt. Quumque de veteribus tabernis scriberet in Curculione Plautus, vsus est hac eadem figura, his verbis:

*Sub veteribus ibi sunt qui dant quique accipiunt fœnore.*  
Denique inscriptio quædam apud Mazochium vetus  
extat,



extat, quæ sic habet: IN SECUNDO CONSVLATV REXIT DECVRIAS DVAS VIATORIA ET LICTORIA CONSVLARES. In hac inscriptione per viatoriam & lictoriam ἐλευπ/ικὼς exaudiri comitiuam omnino suspicor. Et quia ex ijs qui exercitui præerant, nonnullos insignibus consularibus vsos esse Vlpianus scribit c.2. in princ. de his qui not. inf. certè de huiusmodi præfectis hanc inscriptionem antiquam accipi posse fortassis non malè dixeris. Per viatoriam enim & lictoriam comitiuam, lictores & viatores *præfecti alicuius comites*, hoc est apparitores consulares, intelligi posse videntur.

CAPVT XVI.

*De vigesima rerum venditarum locus pandectarum explicatur.*

**Q**VVM scriberet Martianus, non aliter testamento rei alicuius alienationem vetari posse, quam si testatores certis personis consulentes eiusmodi voluntatem significarent, hæc verba subiecit: Sed hac neque creditoribus neque fisco fraudi esse: cap. 114. §. 11. de legat. 1. Quæ verba an de vigesima hæreditatum debeant accipi, idcirco dubitari potest, quod nihil prorsus in hac vigesima interfit fisci, posse vel non posse legatam rem alienari. Cuius tamen alia ratione plurimum interest, eius rei quæ alienari potest, alienationem prohiberi. Solet enim vigesima rerum venditarum ad fiscum pertinere. Idque probari ex Plinio potest, qui sic libr. 7. Epistol. scribit: *Tu quidem honestissime, quod tam impensè & rogas & exigis, ut accipi iubeam à te pretium agrorum, non ex septingentis millibus, quanti illos à liberto meo; sed ex nongentis, quanti à publicanis partem vigesimam emisti.* Et idcirco quæ creditoribus fraudi non sunt, ea nec per consequens fraudi esse fisco possunt.

Eadem

Earum enim rerum quas creditores distrahunt , partem vigesimam consequitur fiscus. De qua vigesima intelligi posse, nisi plurimum fallor, hic Martiani locus omnino videtur.

## C A P V T X V I I .

*Quæ dicatur ætior annona.*

**C**ENSORES, inquit Festus, dicti sunt, quod rem suam quisque tanti solitus sit æstimare, quantum ille censuerant. Auctor est etiam Suetonius, annonam macelli senatus arbitratu quotannis temperari Tiberium voluisse. Liuius quoque dispensationem annonæ penes adiles fuisse ait. Sic enim lib. 10. scribit: Caritas etiam annonæ sollicitam ciuitatem habuit: ventumque ad inopiam ultimum foret (ut scripsere quibus adilem fuisse eo anno Fabium Maximum placet) ni eius cura, qualis in bellicis rebus multis tempestatibus fuerat, talis domum in annonæ dispensatione, preparando ac conuehendo frumento fuisset. Huic etiam consentaneum est quod sic Plinius scribit lib. 14. cap. 14. P. Licinius Crassus, & L. Caesar censes anno urbis condita 675. edixerunt, ne quis vinum Græcum Aminæumque octonis assibus aris singula quadrantalibus venderet. Nec aliò refertur potest quod ab eodem Plinio sic etiam lib. 13. capite 13. scriptum inuenimus: Factumque iam Tiberio principe inopia chartæ, ut è senatu darentur arbitri dispensandi. Idem Plinius lib. 33. cap. 7. auctor est, in vendendo minio pretium lege statutum fuisse, ne modum excederet 70. in libras. Et sic quidem liberum olim fuisse non videtur res suas tanti negotiatoribus æstimare, quanti vellent, sed quantum magistratus censuerat: eaque censio, hoc est æstimatio, annona fori de ijs rebus dicebatur, quæ ad annonam pertinebant. Quæ de re scribit eleganter

ter apud Terentium Donatus explicans illud Dauī in Phormione, *scisti uti foro. Secundum illos negotiatores*, inquit, *qui ante locum commercij non praescribunt, quanti vendant quae aduehant; sed secundum annonam fori quam deprehenderint, consilium de vendendis & non vendendis mercibus sumunt.* In hoc loco pro praescribunt, malim legere proscribunt. Certè quia sic in Paneg. Plinius scribit: *Circumfertur sub nomine Caesaris tabula ingens rerum venalium.* Sensus igitur est, peregrinos mercatores quibus datum est ius commercij, non statim quum ad locum commercij ventum est, pretium aduectarum mercium in loco commercij proscribere, hoc est publice legendum proponere, sed tandiu illud reticere donec *annonam fori*, hoc est, æstimationem magistratus probè cognitam haberent, tunc primum de vendendis & non vendendis mercibus aduectis consilium sumpturi. Sic annonam visus est etiam Martianus accepisse quum ita scriberet: *Non debere cogi decuriones vilius praestare frumentum ciuibz suis quàm annona exigit diui Fratres rescripserunt, & aliis quoque constitutionibus principalibus id cautum est.* cap. 8. ad municipal. Hinc etiam intelligimus quid sibi voluerit Hermogenianus, *arctioris annona populi Romani, census fraudati, & falsa moneta criminis reos dominos detegere seruis permisum esse* scribens, capitulo quarto de iudic. cap. 1. de l. Iul. de annona. Sensus enim est, negotiatorem annonam fori magistratus arbitratu temperatam, fraudantem, eam videlicet comprimendo, *arctioris annonæ reum etiam à seruis propriis argui posse.* Sed apud quem magistratum? Certè aut apud vrbi praefectum, qui curam habebat carnis, vt iusto pretio venderetur, cap. 1. §. 5. de offic. praef. vrb. aut apud praefectum annonæ, si is extra ordinem constitutus esset, cap. 13. de accus. aut denique apud ædiles. Sic enim

N n

scribit

scribit Apuleius, de asino libro primo. *Nam & lixas, & virgas, & habitum prorsus magistratui congruentem in te video. Annonam curamus ait, & adilem gerimus, & si quid obsonare cupis, utique commodabimus.* Et paulò post: *At, has quisquillas quanti parasti? Vix, inquam, piscatori extorsimus accipere viginti denarios. Quo audito, statim arrepta dextra postliminio me in forum cupedinis reducens, à quo, inquit, istorum nugamenta hac comparasti? Demonstro seniculum qui in angulo sedebat. Quem confestim pro adilitatis imperio asperrima voce increpans: Iam iam, inquit, nec amicis quidem nostris, vel omnino ullis hospitibus parciis? quid tam magnis pretiis pisces friuolos indicatis, & florem Thessalia regionis instar solitudinis ac scopuli edulium caritate deducitis? Sed non impune, iam enim faxo scies quemadmodum sub meo magisterio mali debeant coerceri.* Et profusa in medium sportula, iubet officialem suum in super pisces ascendere, & pedibus suis eos obterere. Hæc Apuleius. Eoque etiam spectat quod sic Liuius lib. 10. scribit: *Eodem anno ab adilibus curulibus, qui eos ludos fecerunt, damnatis aliquot pecuariis, via à Martis silice ad bouillas perstrata est.* Nunc videndum est quid sibi voluerit Papinianus, quum ita scriberet: *Ideo condemnatus quod arctiorem annonam adilitatis tempore præbuit, frumentaria pecunia debitor non videtur, & ideo compensationem habebit,* capitulo decimo septimo de compensat. Moris erat ut ob annonæ caritatem curator à magistratibus extra ordinem comparando frumento constitueretur, cap. 21. in princip. Ad munic. Eoque Festi illud referendum est: *Qui rei frumentaria prepositi sunt, curatores dicuntur:* quod malè ad frumenti dispensationem plerique referunt. Curator Romæ senatus auctoritate comparando frumento prepositus, certam ex ærario publico nummorum quantitatem accipiebat, qua fieri redemptio frumenti posset. Et idcirco

circo si quam in redemptione fraudem fecisset ærario, maiorem puta quàm in rem frumentariam consumpta esset pecuniam in publicas tabulas dolo malo expensam referens, frumentariæ pecuniæ debitor erat, eoque nomine peculatus lege tenebatur, quæ lex compensationem omnem impediēbat dicto cap. 17. & c. 10. Ad L. Iul. pec. Obseruari etiam solet, ut frumenti curatoris opera redempti dispensatio ædilibus curulibus certo statutoque arbitrarij senatus pretio committeretur. Idque licet ex Liuiio & Suetonio satis in hoc capite probatum sit, admonendi tamen sumus & Plinium quoque libro decimo quinto, cap. 1. tradidisse. Sic enim scribit *Ex mox anno D C. LXXX. M. Seruius T. filius ædilis curulis olei denas libras singulis assibus prestitit populo Romano per totum annum.* Illud igitur quæsitum est apud Papinianum, an uti compensatione ædilis possit, qui tempore ædilitatis suæ arctiorem annonam præbuit, hoc est, qui in annonæ dispensatione pretium auctoritate senatus constitutum excessit & auxit, eoque nomine condemnatus est. Nec quidem dubito, quin per annonæ præbitionem, dispensationem annonæ intellexerit Papinianus, ea profecto ratione, quâ præbenda locare, & quid præbendum conducere dixerunt veteres.

C A P V T XVIII.

*Quæ fuerit de Pyrrhi captiuis App. Claudij sententia.*

**A**IT Vlpianus: Appius denique Claudius cæcus consiliis publicis iniererat, & in senatu seuerissimam dixi sententiam de Pyrrhi captiuis, cap. 1. §. 4. de postul. Addidisse hæc verba videntur inepti quidam interpretes, *Non recipiendis.* Quæ verba licet in contextum passim irrepperint, à Florentino tamen archetypæ rectè

N n 2 absunt.

ablunt. Quænam autem illa fuerit de Pyrrhi captiuis Appij Claudij sententia seuerissima, docet Eutropius libro secundo. *Romani*, inquit, *captiuos omnes quos Pyrrhus reddiderat, infames haberi iusserunt, quod armati capti fuissent: nec ante eos ad veterem statum reuerti, quam Sabinorum hostium occisorum spolia retulissent.* Hanc autem Appij Claudij sententiâ idcirco suspicor fuisse quod ea seuerissima sit, & senatus auctoritate confirmata; quò solo nomine laudari virorum præclarorum apud Romanos sententiæ solent, c. 12. in princ. de accusat. Ex hoc Eutropij loco probari etiam liquidò potest de non recipiendis Pyrrhi captiuis nequaquam censuisse Appium Claudium; sed de iis quos Pyrrhus reddiderat, & senatus receperat, quod armati capti essent, puniendis. Eundem Appium de Pyrrho etiam in urbem non recipiendo tulisse sententiâ scribit Pomponius, cap. 1. §. 18. de orig. iur. De qua sententia, quod plurimâ sint ab aliis annotata, non est cur hîc amplius differatur, nisi addideris, hanc quoque Appij sententiâ senatum secutum esse. Idque epitomator Liuij indicat expressè cum ita de Appio Claudio scribit libro decimo tertio *Et sententia sua tenuit, ut id Pyrrho negaretur* Hoc est, obtinuit Appius sententiâ suâ ut societatem cum rege Pyrrho populus Romanus non iniret. Sic enim quod de Pyrrho in urbem non recipiendo passim apud historicos obuium est, accipiendum esse; docet Suetonius sic in Tiberio scribens: *Appius Cæcus societatem cum rege Pyrrho, ut parum salubrem, iniri dissuasit.* Idq; etiam ex Cicerone probatur, qui ad hunc modum in Catone scribit: *Quum sententia sentans inclinaret ad pacem cum Pyrrho fœdusque faciendum, non dubitauit illa dicere, quæ versibus persecutus est Ennius:*

*Quo sese mentes, rectè quæ stare solebant  
Antehac, dementes sese flexère via?*

Hæc

Hæc Cicero : apud quem nonnulli pro *Via*, legisse videntur *Raina*, quod an rectum sit illi viderint.

## C A P V T X I X.

*Emendatur Callistrati locus, cap. 27. Depœnis.*

**A**P V D Callistratum in d. cap. 27. emendanda sunt hæc verba, *Qui capitale admiserrunt*, in Florentinis pandectis : legendumque, *Qui capital admiserrunt*, non, vt quidam emendant, *Qui capitale quid*, *Qui capitale crimen*. Vfus est hac voce eo in loco idem Callistratus, in quo de agrariis C. Iulij Cæsaris & Neruæ legibus differuit. cap. 3. de ter. mot. quemadmodum ex Florentinis pandectis constat. Quid? An non capital admittere scripsit etiam Arrius Menander? cap. 6. de iure milit. *Est autem capital*, auctore Festo, *facinus quod capitis pœna luitur*. Plautus in Menech.

*Nunquam Ædepol fugiet, tametsi capital feceris.*

Et in Mercatore:

*Mulier alienata est abste CH. Eutyche capital facis.*

*EV. Qui? CH. Quia equalem & sodalem cinem liberum enecas.*

*EV. Ne dijsirint. CH. Demisisti gladium in gulam, iam cadam.*

Quibus addi poterit illud Lucilij apud Nonium : *Facile deridemur, scimus capital esse irascier*. Eadem forma puto veteres dixisse *virginal*, *feminal*, *puteal*, & sic deinceps. Sic enim alibi scribit Prudentius : *Intactum ab omni crimine virginal*. Et Apuleius in Apologia prima : *Sed enim, inquit, feminal nullo pacto reperiens munder dicere, ad mea scripta confugit* Et idcirco iis assentiri nequeo, qui pro *Capitale*, dictum per Apocopen *Capital* existimant.

N n 3

C A P V T

## CAPVT XX.

*An soli prættores Romæ, & in prouinciis præfides  
soli de libertate iudicauerint.*

**Q**VIBVS DAM esse persuasum animaduerti, prætores Romæ, & in prouinciis præfides, in causis liberalibus iudices olim non dedisse. Falsam esse persuasionem hanc, intelligi ex Plauto euidenter potest. Extant enim apud Plautum in Rudente versiculi tres, quibus Labrax leno de abiudicata per recuperatores à se Palæstra ad hunc modum conqueritur:

*Quis me est mortalium miserior qui uiuit alter hodie,  
Quem modo damnavit ad recuperatores Pleusidippus?  
Abiudicata à me est Palæstra: perditus sum.*

Per recuperatores autem intelligi datos iudices, ex eodem Plauto constat, qui sic in Bachidibus scripsit:

*Postquam quidem prætor recuperatores dedit,  
Dammatus demum vi coactus reddidit  
Ducentos & mille Philippum.*

Nec id quidem Plauti duntaxat, sed aliorum etiam grauissimorum auctorum testimoniis liquidò confirmatur. Si enim in Vespasiano scribit Suetonius: *Flauiam Domitillam duxit uxorem, Statily Capella equitis Romani Sabracensis ex Africa delegatam olim, latinaque conditionis: sed mox ingenuam & ciuem Romanam recuperatorio iudicio pronuntiatam patre asserente Flauio Liberali Ferentini genito; nec quicquam amplius quàm quaestorio scriba.* Quo quidem in loco iudicium recuperatorium sic accipi debere, ut illud ad datos iudices referatur, satis ex Valerio Probo doceri potest. Veteris enim formulæ cuiusdam meminit in libello de litteris antiquis Probus, quæ sic habet: *Quanti ea res erit, tanta pecunia iudicium recuperatorium dabo: testibusque publicis*



*blicè duntaxat decem denuntiandi potestatem faciam.* Vlpianus quoque iudicem qui de libertate cognoscebat, non certo aliquo speciali, quale prætoris, præsidii aut proconsulis est, sed generali quodam iudicis cognoscentis appellauit nomine, his verbis: *Apud eum qui de libertate cogniturus est*, cap. 7. §. fin. de lib. causa. cap. 34. de statulib. *Iudex qui de libertate cognoscit*, cap. 41. de lib. caus. Quæ res etiam argumento est, non præsidem, non prætorem solum, qui certi erant, sed etiam datum iudicem, qui erat incertus, de libertate iudicasse. Rursus si ad cognitionem prætoriam omnem libertatis controuersiam sic pertinuisse contenderis, ut de illis suo iure semper cognoscere prætor, & iudicare debuerit; quâ ratione, vel à quo ad iudicem mitti eundem litigatores apud Vlpianum potuerunt? cap. 8. de lib. caus. Prætorem enim ut actionem dedisse, sic etiam ad iudicem litigatores misisse, auctor est Caius, cap. 9. de lib. caus. Denique præsidem vel prætorem super status causa cognoscere non potuisse, ex quodam Imperatorum Seueri & Antonini rescripto constat, cap. 1. C. de ord. cognit. Et quamuis porro inficiari non possim talem fuisse libertatis fauorem ut maiores habere iudices deberet, idque Paulum scripsisse, cap. 32. §. 6. de recept. arbitr. tamen Paulum non ad iudices maiores illos, qui de causis maioribus iudicabant, qualem olim Romæ prætorem fuisse, & in prouinciis præsidem, vel proconsulem summam admonuimus, de præiudiciis lib. 2. sed ad eos iudices respexisse, qui ipsi arbitris compromissariis maiores erant, satis ex eius responso coniecimus. Noluit enim Paulus ad dirimendam liberalem controuersiam arbitrum compromisso recipi. Certè quod causa libertatis maior esset, quàm quæ huiusmodi necessitati subiceretur; ut siue æquum siue iniquum arbitrium esset,

ei parere necessum foret. *Fuisse autem arbitrorum duo genera* Proculus ait; *unum huiusmodi, ut siue æquum siue iniquum esset, ei parere necessum foret: quod tunc observabatur, cum ex compromisso ad arbitrum itum esset, alterum eiusmodi, ut ad boni viri arbitrium deberet redigi, cap. 76. pro socio.* Ad prius illud arbitrorum genus expressè visus est respexisse Paulus, nimirum quòd fauor libertatis maior esset quàm ut periculo pœnæ sapiùs seuissimo magnum per huiusmodi arbitrium libertati fieret præiudicium. Dicebanturque respectu huiusmodi arbitrorum iudices dati *maiores*, quòd hi quamdiu iurisdictionem habebant, quamvis alioqui nihil haberent proprium, priuati tamen non essent, sed cum potestate, cap. 78. de iudiciis, quum illi contra priuati priuatam semper obtinerent ferendæ sententiæ auctoritatem. Et idcirco omnem sententiæ vim & effectum, arbitri compromisso recepti pronuntiatio non habebat, cap. 13. §. ex compromisso, de his qui not. inf. Adde maiores & minores causas necessariam ex argumenti subiecti qualitate interpretationem olim  
 † semper accepisse: ut apud Ciceronem de orat. libro primo. *Tu mihi cum in circulo decipiari aduersarij stipulationiuncula*, inquit Cicero, & *cum obsignes tabulas clientis tui, quibus id sit scriptum quo ille capiatur; ego tibi ullam causam maiorem committendam putem?* Sensus est; si in stipulatione & in clientis tui tabularum obsignatione decipiaris, ego ne tibi causam aliquam hac stipulationiuncula, & huiusmodi tabularum obsignatione maiorem committendam putem? Simili modo, *de liberali causa*, inquit Paulus, *compromisso facto, rectè non compelletur arbiter sententiam dicere; quia fauor libertatis est, ut maiores habere iudices debeat.* Hoc est, fauor libertatis est, ut iudices arbitris compromisso receptis maiores habere debeat. Et ita quidem ex his locis  
 omni

omnibus esse satis perspicuum puto, non prætorem solum, aut præsidem, sed datos etiam iudices, de causis liberalibus ijs temporibus iudicasse, quibus in usu formularum erat conceptio. Porro Diocletianus ordinariam in prouincijs primus sustulit dandi iudicis facultatem, voluitque eos qui iure imperij quo præditi erant, iudices ordinariè in causis minoribus dabant, *extra ordinem* iudices duntaxat dare; hoc est, negotijs nimis impeditis. cap. 2. C. de pæd. iudicib. Cùmque præsidēs antea in causis liberalibus iudices dederant, voluit huiusmodi causas sic ab ipsijs præsidibus cognosci, sic iudicari, vt ne extra ordinem quidem dari iudices pateretur, dict. cap. 2. Et quamuis idem Diocletianus solere super libertatis quæstionibus iudicare præsidēs prouinciarum expressè referat, cap. 7. C. ne de statu def. ex eo tamen probari non potest, antè eius tempora de libertate solos præsidēs iudicasse, nullòque dare iudices potuisse. Idem enim iam dudum à se statutum scribit, vt ingenuitatis causæ à rectore prouinciæ examinarentur. cap. 5. C. vbi causa status. Ergo quandoquidem à se profectum testetur Diocletianus, vt per ipsosmet præsidēs liberales causæ iudicarentur; antea per datos iudices eas fuisse disceptatas, fateri omnino necessum est. Et hæc quidem sic in prouincijs obseruabantur. Romæ verò diu post Diocletianum Imperator Constantinus primus liberalium causarum disceptationem soli prætori iniunxisse visus est. *Pratori, inquit, defertur hæc iurisdictio sancientibus nobis, vt liberale negotium ipse disceptor examinet.* cap. 1. C. de offic. præt. Quia enim antè Constantinum non prætor solum, sed iudex etiam datus de libertate iudicauerat Romæ, ideò dixit *Sancientibus nobis.* Nec quidem nos moueat, quod Imperator Alexander, cuius scrinij magister consiliarius, & tu-

tor fuit Vlpianus causſæ liberalis cognitionem expreſſè videatur iniunxiſſe præſidi ſoli, his verbis: *iuxta ius ordinarium præſidem pete, qui cognita priùs liberali cauſſa, ex euentu iudicij liberalis, quid de crimine ſtatueri debeat, non dubitabit.* c. 1. C. de ord. cognit. Et alio loco. *Ante liberalis cauſſa ſuo ordine agi debet, cognitionem ſuam præſide præbente.* c. 2. dict. tit. Duo enim hæc Alexandri reſcripta ad regulam illam de præiudicijs referenda ſunt; qua traditum eſt, *per minorem cauſſam maiori cognitioni præiudicium fieri non poſſe, maioremque quæſtionem minorem ad ſe cauſſam trahere,* c. 54. de iudic. Hanc igitur regulam ſecutus Alexander, quamvis eius temporibus liberales cauſſæ inter maiores non referrentur, ſic vt per datos iudices expediri non poſſent; nihilominus tamen quia maius iudicium & minus ſimul concurrebant, voluit ad maiorem cauſſam iuxta ordinarij iuris diſpoſitionem minorem quæſtionem trahi. c. 3. C. de iudicijs. Sic quidem vt iure magiſtratus de crimine præſides cognoſcerent, & extra ordinem de libertate iudicarent. Semper enim ad maiorem cauſſam ſic quæſtio minor trahebatur, vt iudex qui iure magiſtratus de cauſſa maiore cognoſcebat, de minore quæſtione quamvis iudicare vix ſoleret, nihilominus propter cauſſæ coniunctionem de minore etiam ſtatus controuerſia in præiudicijs iudicaret. Id quod à nobis dilucidè probatum eſt de præiudicijs lib. 2. capite ſeptimo.

*Finis libri tertij Variorum.*

IACOBI



IACOBI RÆVARDI  
IVRISCONSULTI

VARIORVM, SIVE DE  
Iuris ambiguitatibus

LIBER QVARTVS.

CAPVT I.

*Emendatur & explicatur conuentionum ab Vlpiano  
tradita diuifio , cap. 5. De pactis.*



V A M Vlpianus conuentionum tradi-  
didit diuifionem in d. cap. 5. eam vitio  
nulli obnoxiam effe, facile demonftra-  
bimus, fi prius quod eius refponfo sub-  
effe fufpicamur mendum fufuleri-  
mus. Itaque quum fic fcripiffet Vlpianus; *Conuentio-  
num tres funt fpecies, aut enim ex publica cauffa fiunt, aut  
priuata, aut legitima*, fic illud à librarijs malè tranfcri-  
ptum fuit: *Conuentionum tres funt fpecies, Aut enim ex  
publica cauffa fiunt, aut priuata priuata aut legitima*. vt fic,  
quod cuius facile inter fcribendum accidit bis ex-  
preffa videri poffit dictio *Priuata*, quæ femel tantum  
fcribi debuerat. Confirmat hanc coniecturam Flo-  
rentina pandectarum editio, omnium longè castiga-  
tiffima, in qua eadem illa quam delendam effe fufpi-  
camur, dictio *priuata* duabus ftellulis intercluditur.  
Quibus haud dubiè ea folent intercludi, quæ quum  
in ipfo archetypo defiderarentur, poftèa per libra-  
rium quendam addita fuerunt, & ob id fuperflua, ac  
fæpè

sapè minus idonea possunt censerì. Hæc non considerantes qui caput istud interpretati sunt, sic illud interpunctionibus iniustis diuiserunt, vt rotam Vlpiani sententiam penitus subuerterint, hunc in modum: *Conuentionum autem tres sunt species: aut enim ex publica causa fiunt aut priuata: priuata aut legitima, aut iuris gentium.* Non enim ea est Vlpiani sententia, vt conuentionem priuatam velit in legitimam & iuris gentium conuentionem distribuere; verùm conuentionem publicam tam esse posse contendit legitimam, quàm priuata esse legitima potest. Conuentionum igitur tres sunt species, aut enim ex publica causa fiunt, aut priuata, aut legitima. Ius autem gentium non admittit vllum conuentionum finem aut modum, sed simpliciter qui conueniunt, quomodocunque conueniant, iure quidem conueniunt, sed gentium. Omnes igitur conuentiones, siue publicæ, siue priuatae, siue denique legitimæ sint, iuris continuo gentium sunt. Quod si ita est, erit igitur consequens, eundem qui tres esse dixit conuentionum species, tres esse iuris gentium conuentionum species affirmare. Ergo an est adeò absurdum, si tres esse duntaxat conuentionum species contendens Vlpianus, non plures quàm tres expresse-rit: publicam nimirum, priuatam, & legitimam? Quod enim de iuris gentium conuentione in eodem responso subiicitur, hoc si non Triboniani, saltem quin inepti alicuius interpretis sit dubium non est. Proinde Francisci Connani minimè subscribendum est opinioni, existimantis eius esse conditionis publicas conuentiones, & debere suis viribus sic valere, vt eas ad iuris gentium vel ciuilis regulas nequaquam dirigi necessum sit. Sed velim Connano, qui immaturo certè studiosis omnibus ereptus est fato liceret respondere, an gentium ius suas habeat conuentiones aut numero

numero

numero aut certis & expressis speciebus definitas. Negaret opinor, nec aliquam vellet manifestæ veritati sciens prudens fraudem facere. Igitur si conventiones iuris sunt gentium, nec vllum exprefferit idem ius conventionum aut finem aut modum; nosne ijs & finem & modum audebimus statuere? Si dixeris iure gentium conventiones esse omnes introductas, exceptis quibusdam quæ iure civili introductæ sunt, idque per Hermogenianum probaveris cap. 5. de iust. & iure: eam esse Hermogeniani sententiam, ut contendat conventiones aliquas esse civiles quæ iuris gentium non sunt, constantissimè negabo. Id enim absurdum, ridiculum & ineptum est. *Obligaciones*, non contractus, non conventiones *iure gentium* scribit Hermogenianus *esse institutas, exceptis quibusdam quæ iure civili introductæ sunt*. Omnes ergo conventiones iuris gentium sunt, sed ex ijs quædam obligaciones producunt iure gentium ad agendum efficaces, quædam *ex sui quidem natura* actiones non producunt, hoc est quatenus sunt iuris gentium, sed civili iure confirmatæ, ad actiones profunt. cap. 5. & 6. de pactis. Emptio, venditio, locatio, conductio, societas, depositum, & cæteri similes contractus, non civili tantum sed etiam gentium iure obligaciones & actiones pariunt. Si enim à peregrino cuius aut peregrinus emisset aliquid, Romæ à prætore peregrino ex empto & vendito dabatur actio non quidem civili, sed gentium iure. At stipulatio quia civilis erat, inter solos ciues ad actionem proficiebat, quamvis alioqui stipulatio iuris etiam gentium esset. Proinde si à peregrino peregrinus aliquid stipulatus esset, quia huiusmodi stipulatio quatenus iuris gentium est, actionem non producit; ex stipulatu actionem alter aduersus alterum apud prætorem peregrinum postulans non audiebatur.

diebatur. Verùm si peregrinus creditor peregrino debitori suo stipulatione remississet debitum, quamuis inter eos ex stipulatu actio non consisteret, ex stipulatu tamen exceptio utilis erat, non quidem civili, sed gentium iure. cap. 8. in fin. de accept. Atque hoc illud est quod scripsit Vlpianus, *iuris gentium conuentiones quasdam actiones parere, quasdam exceptiones.* capite 7. in princip. De pactis. Et ita quidem omnes conuentiones quamuis iuris gentium sint, ex ijs tamen quædam obligationes ad agendum iure gentium efficaces producunt, quædam nisi ciuitatis alicuius expressa lege ad actionem prosint, gentium iure ad exceptiones duntaxat proficiunt. Et eam esse non dubito vt nouam sic veram sententiam d. cap. 5. de iust. & iure, quam nec Tribonianus quidem probè videtur assecutus esse, malè per obligationes apud Hermogenianum contractus intelligens, §. Ius autem gentium. Instit. de iure nat. gent. & civili. Quid igitur impedit, quominus publicas quoque conuentiones iuris esse gentium fateamur? Nec quidem iuris duntaxat gentium conuentio publica est, sed etiam legitima esse potest, puta, si ea in foro aut in comitio auctore senatu cum populo ex lege duodecim tabularum solemniter tractaretur. Publicam autem conuentionem quæ legitima non erat, conuentionem definit Vlpianus quæ fit per pacem, quoties inter se duces belli quædam paciscuntur. d. c. 5. de pactis. Haloander restituit *per principem.* In Florentinis pandectis *per pacem* legitur. Florentinam lectionem puto veriorē esse, & sic intelligendam: *Publica conuentio est quæ fit per pacem*, hoc est, per tot dierum inducias, quot utrūque inter se exercitus pactioni obseruandas præscribit, quoties duces belli, hoc est exercitus vtriūque, quædam paciscuntur. Sic enim pacem hoc in loco accipi posse; fati-



fatis ex hac induciarum à Varrone tradita definitione manifestum est : *Inducia sunt pax castrensis , paucorum dierum* , ut est apud Gellium lib. i. cap. 25. Cui etiam consentaneum est in Terent. illud Donati : *Inducia sunt pax in paucos dies , vel quod in diem dentur , vel quod in dies otium praebeant*. Nunc quæro : si publicam huiusmodi conventionem iuris esse gentium negaveris , quo iure dices hostem cum hoste pacisci ? Civile ? quis est obsecro qui non didicit , peregrinum Romanis legibus solutum esse ? Igitur si hostis iure civili cum hoste non paciscitur , quo iure pactum huiusmodi dices subsistere ? Nonne iure naturæ ? nonne iure gentium ? Dices iure publico. Nunc audio : sed quæro an aliquod esse ius publicum potest , quod aut civile aut gentium non est ? Ius fœderis percutiendi , pacisque tractandæ publicum esse , in hoc responso testatur Ulpianus. Proinde si probavero ius istud publicum ex iure gentium substantiam capere , an dubitabis , obsecro , publicum ius , iuris esse gentium posses ? Audi quid de iure gentium scripserit Isidorus Etymolog. lib. 5. *Ius gentium* , inquit , *est sedium occupatio , munio , bella , captivitates , servitutes , postliminia , fœdera , paces , inducia , legatorum non violandorum religio , & quæ sequuntur*. Et hæc quidem si vera sunt , duces igitur belli quum inter se paciscuntur , pacisci iure gentium rectè dicuntur. Idque etiam probari posse ex Livio videtur , qui sic lib. 9. scribit : *Hoc fide , hoc fœderibus , hoc fœcialibus ceremoniis dignum erat , ut tu quidem quod petisti , per pactionem habeas , tot cines incolumes : ego pacem quam hosti tibi remittendo pactus sum , non habeam ; Hoc in A. Corneli , hoc vos fœciales iuris gentibus dicitis ?* Et sic quidem satis arbitror manifestum esse , conventionem publicam ex iure gentium substantiam capere , quamvis alter apertè sentiat Tribonian. Nec sanè ,

ut eo vnde digressus sum reuertar, per duces belli alios quàm superioris iuris Imperatores esse hîc apud Vlpianum intelligendos, ex illa pactiōe Gallica, cuius lib. 5. meminit idem Liuius satis apparet. Nam antequam appensum esset mille pondo auri pretium, quo liberati ab obsidione Gallica ex eadem pactiōe fuissent Romani, ni per Camillum steterisset, interueniens dictator Camillus, cum exercitu, auferri aurum de medijs & Gallos submoueri iubebat. Cùm illi renitentes pactos sese dicerent, negat pactiōem eam ratam esse, quæ postquam ipse dictator creatus esset, iniussu suo ab inferioris iuris magistratu facta esset. Cæterùm dictatori, alijsve belli ducibus, de rebus alijs cum hostibus pacisci quàm de ijs quæ populum non tenerent, nequaquam iniussu populi fuisse liberum, idem expressè tradidit Liuius libro 10. *Hoc*, inquit, *prælio fracta iterum Hetruscorum vires, & pacto annuo stipendio, & duum mensium frumento permissum ab dictatore, ut de pace legatos mitterent Romam: pax negata, inducia biennij data.* Igitur quod dixit Vlpianus publicam conuentiōem esse, quoties duces belli quædam inter se paciscuntur; eam pactiōem publicam intelligere debemus quæ populum non obligat, cuiusmodi est pactum de annuo stipendio, & duorum mensium frumento. Verùm de pace idcirco legatos Romam mitti iussit dictator, quod ea conuentio non publica solùm esse posset, sic ut per solos belli duces posset tractari; sed etiam quod ea debuerit olim antè legem regiam esse legitima, hoc est ex præscripto legum decemviralium, in comitio, in foro, aut etiam in Capitolio, cum populo auctore senatu tractari. Nam cùm apud Liuium pacem Caudinam, quam cum Samnitibus iniussu populi & sine auctoritate senatus Aulus Posthumius consul fecerat, idcirco ratam esse idem Posthumius

mius

mius negaret, quia iniussu populi facta esset (nimirum quod iniussu populi quicquam sanciri, non poterat quod populum teneret, ut refert Liuius libro nono) videtur Posthumius legem aliquā in medium attulisse, qua quicquid iniussu populi, quod populum teneat à magistratu aut ab Imperatore factum erat, non esset ratum. Eam legem omnino fit mihi verisimile fuisse decemviralem. Pacta quædam esse quæ legibus obseruanda sunt, scribens auctor ad Herennium libro secundo subiecit : *Rem ubi pagunt, oratione pagunt.* Constat certè orationes haberi ad populum foro vel in comitio, aut etiam pro rostris olim consueuisse. Proinde hæc quæ apud eundem auctorem ex lege, ni fallor, duodecim tabularum subsequuntur verba : **I N C O M I T I O A V T I N F O R O A N T E M E R I D I E M C A V S S A M C O N I I C I T O;** ad legitimas cōuentiones, non quidem priuatas, (in iis enim nec loci nec rationis haberi solet ratio) sed ad publicas esse referenda existimaui, & ad eam legem omnino pertinere, quā de iniusta pace Caudina Aulus Posthumius promulgasse visus est. Ut ita quidem pax, fœdera, induciæ, & si quæ sunt alia quæ ex legum præscripto publicam requirunt pactionem, oratione soleant cum hostium legatis, in foro aut in comitio ante meridiem auctore populo tractari. Idque eo verisimilius est, quod sic libro quadragesimo tertio scripserit expressè Liuius: *Et forsitan obtinuissent consules, ni Quintus Martius Rex & C. Atinius Labeo tribuni plebis se intercessuros dixissent, ni prius ipsi ad plebem tulissent, vellent, iuberentne cum rege Philippo pacem esse?* Ea rogatio in Capitolio ad plebem lata est, omnes quinque & triginta tribus uti rogata insserunt. Huic etiam consentaneum est, quod idem Liuius sic libro 47. scribit : *Cui rata ista pax erit, quam sine consule, non ex auctoritate senatus, non inssu populi Romani*

*peregerimus? Quæro enim, pace per te facta, rediturusne exemplo in Italiam sis, classem exercitumque deducturus, an expectaturus quid de ea re consuli placeat, quid senatus censeat, quid populus inbeat?* Hæc Lilius. Eoque sensu accipienda sunt hæc verba: *Rem ubi pagunt, oratione pagunt*: quæ ad consuetudinem potius & antiquam cum hostibus paciscendi auctore populo rationem debent referri, quàm ad legem aliquam decemvira-lem. Verùm hæc verba *In comitio aut in foro ante meridiem causam coniciit*. puto esse ex duodecim tabulis, & decemviros in fœdere percutiendo, pace induciisve tractandis, in foro comitiove *causam coniciit*, hoc est summatim exponi populo ante meridiem voluisse. Eaque interpretatio vel hinc videri verisimilior potest, quod scripserit in Problemata. Plutarchus, *magistratus Romanos post meridiem fœdus facere non consuevisse*. Auctor est etiam Suetonius, fœdus in foro percuti solemnem quadam ratione olim solere. Sic enim de Claudio scribit: *Cum regibus fœdus in foro icit, porca casa, & vetere fœcialium præfatione adhibita*. Et hanc quidem legitimam conventionem si iuris esse gentium negaueris, iterum quæro quoniam iure populus Romanus confictos hostes peregrinosque teneat? Adde *legitimam conventionem* eam Vlpianum definiuisse *quæ lege aliqua confirmatur*, cap. 6. de pactis. Ex hac enim definitione constat evidentissimè, legitimas conventiones non civilis tantum, sed iuris etiam gentium esse. Nam si illæ, demum appellari conventiones legitimæ possint, quæ lege aliqua confirmantur, necessum igitur est huiusmodi conventiones ante etiam quam aliqua lege confirmarentur, conventiones fuisse. Quales autem conventiones eas fuisse dices? nonne iuris gentium? Proinde quis tam est quæso stupidus, ut non intelligat, legi-

tinas

rimas conuentiones, non publicas solùm, quales sunt de quibus hìc agitur, sed priuatas etiam cuius generis est stipulatio, iuris tam gentium quàm ciuilis esse? Conuentiones igitur omnes iuris gentium sunt. Porro qui hanc legis decemuiralis particulam, quam modò sumus interpretati, cum ea cuius meminit Gellius libro 16. capite 2. coniunxerunt, videant hi ne cœlum terræ miscuerint.

## C A P V T I I.

*Cur à pratoribus decreta Latine debuerint interponi, emendatumque Arcadij, & Honorij rescriptum.*

**D**E C R E T A, inquit Triphon. à pratoribus Latine interponi debent cap 48. de re iudicata. Triphoninum ita visus est Accursius interpretari, vt existimauerit inter Latinos duntaxat caput istud locum habuisse, sed errat. Tam inter Græcos, quàm inter Latinos, imò in ipsa Græcia & Asia locum huic responso fuisse, facile intelligimus, si considerauerimus eadē ratione decreta prætores Latine interposuisse, quæ magistratus populi Romani Græcis nunquam nisi Latine responsa dedisse, refert Valerius Max. lib. 2. cap. 1. Partim videlicet vt Latinæ vocis honos per omnes gentes venerabilior diffunderetur, partim etiā ne vlla re toga pallio subiiceretur. Decretum autem generis non esse, omnem omnino prætoris sub se continens pronuntiationem, in Verrina sexta euidenter demonstrat Cicero. Cum, inquit, ad prætorem in ius adissemus, excogitat sanè diligenter & cautè quid decernat: nam antequam verbum facerem, de sella surrexit, atque abiit. Id ipsum etiam ex Valerio probari potest, qui sic lib. 8. cap 7. de P. Crasso scribit: *Quæ res maximum & sociorum*

amorem consiliauit, qua quis eorum lingua apud tribunal eius postulauerat, eadem decreta reddenti. Siue igitur iudicem det siue in bona mittat, siue sententiam ferat, decernere prætor semper dicitur. Et quia non nisi Latinè pro tribunali pronuntiare quicquam prætores, præsides aut proconsules poterant, iis idcirco adesse solent interpretes, qui decretum Latinè prolatum Græcis aliisque litigatoribus barbaris explicarent. De quibus interpretibus scribit Cicero in Verrina quinta. *Aulus Valentinus*, inquit, est in Sicilia interpret, quo iste interprete non ad linguam Græcam, sed ad furta & flagitia uti solebat. Et in Verrina sexta: Cum Valentio eius interpreti. epistola Agrigenti allata esset, casu signum iste animaduertit in cretula. Idem Cicero sic etiam de lib. libro quinto scribit: *Quemadmodum in senatu semper est aliquis qui interpretem postulat; sic isti nobis cum interprete audiendi sunt.* Et hæc quidem in solis Romanorum iudicum decretis obseruata sunt. In proscriptionibus verò & superindictionibus, non æquè Testis est enim Vlpianus *proscriptiones litteris tam Græcis quàm Latinis secundum loci consuetudinem fieri solitas*, cap. 11. §. 2. de instit. act. Et superindici etiam Græcè à lictoribus potuisse, docet apertè Iulianus, c. 13. in fin. de iureiurando. Nec mirum; siquidem non à ciuibus duntaxat Romanis, sed etiam à Græcis aliisque barbaris hominibus fieri & superindictiones & proscriptiones poterant, sine aliquo Romanæ maiestatis præiudicio. Quia igitur decreta de quibus hîc agitur, ea sunt, quæ non à municipalibus, sed à Romanis magistratibus, prætoribus nimirum, præsidibus, & proconsulibus duntaxat interponebantur, quorum est in omnibus imperij Romani maiestatem conseruare, diligentérque provide-  
re ne quid respublica detrimenti capiat. ne qua re toga pallio subiiciatur: idcirco audiendi non sunt, qui

ex superindictionibus, proscriptionibus, & magistratum municipalium sententiis, praesidium, proconsulum, praetorumque decreta metiuntur. Quae decreta nisi causa cognita interponi non solebant, & ideo si quid Graecè extra cognitionem causae pro tribunali pronuntiaretur, non erat cur ob id reprehendi praeses deberet. Idque Gordianus rescripsit, cap. 17. C. Ex quibus causis infam. irogat. Quod autem Romae à magistratibus decreta, Latine debuerint interponi, & ab iisdem Latine responsa dari, non tam mirum est, quam quod eadem in Graecia Graecè interponi aut dari non potuerint, adeo certè ut propterea reprehensum à Metello se fuisse in Verrina sexta expressè testatus sit Cicero, † quod Syracusano magistratui Graecè locutus esset. *Aut indignum facinus esse, inquit Cicero, quod ego in senatu Graeco verba fecissem, quod quidem apud Graecos Graecè locutus essem, id ferri nullo modo posse.* Nec id sanè cuiquam videbitur mirum, praesertim non ignoranti, quid sibi voluerit Suetonius sic in Augusto scribens: *Sed & ceteros continuos dies inter varia munuscula, togas insuper & pallia distribuit, lege proposita, ut Romani Graeco, Graeci Romano habitu & sermone uterentur.* Et hic quidem Latini sermonis honor tam venerabilis, non Romae solum sed etiam in Asia & tota Graecia observatus olim constantissimè videtur, donec tandem à Iuliano Asiae quodam proconsule persuasi Arcadius & Honorius Imperatores, iudices tam Graeca quam Latina lingua sententias proferre expresso quodam rescripto paterentur, capite duodecimo C. de sentent. & interlocutionibus omn. iudic. Quod quidem rescriptum verborum transpositione vitiosum, sic esse videtur restituendum: *Iudices tam Graeca quam Latina lingua sententias proferre possunt.* Malè passim legitur *Tam Latina quam Graeca lingua.* In Graecia enim Latine duntaxat

ante istorum Imperatorum tempora proferri sententia poterat.

### C A P V T III.

*Sub pellibus, quid sit apud Celsum & Labeonem.*

**Q**VÆSITVM est quid Celsus his verbis voluerit : *Labeo ait originem fuisse suppellectilis ; quod olim his qui in legationem proficiscerentur, locari solerent quæ sub pellibus usu forent capitulo septimo de supellect. legat.* Parua quæstio, sed tamen quæstio. Ad quam responderi poterit, tentoria exercitus Romani ex pellibus fieri consuevisse. Idque lib. secundo testatur Valerius capite secundo. Sic enim scribit : *Decreuerunt ut ex iis qui equo meruerant, pedium numero militarent; qui pedites fuerant, in funditorum auxilia transcriberentur, neve quis eorum in castra tenderet, neve locum extra assignatum vallo aut fossa cingeret, neve tentorium ex pellibus haberet.* Igitur *sub pellibus* nihil aliud est, quàm *sub tentoriis*. Idque probari etiàm ex Tacito potest, qui sic Annalium lib. 13. scribit : *Retenusque omnis exercitus sub pellibus, quamvis hyeme sæva adeò, ut obducta glacie nisi effossa humus tentoriis locum non præberet.* Et lib. 14. *Contractus deinde, inquit, omnis exercitus, sub pellibus habitus est, ad reliqua belli perpetrenda.*

### C A P V T IV.

*Quid ab ærario fiscus differat.*

**P**OPVLVS Romanus suum habuit ærarium, habuit & princeps ærarium suum. Ærarium populi, ærarium Saturni dicitur: principis ærarium, fiscus vocatur. Patrimonium populi Romani in ærarium Saturni, principis in fiscum deferabatur. Et hac ratione,  
res



res quæ in usu publico sunt, ab iis quæ sunt in patrimonio fisci, visus est Papinianus distinxisse cap. 72. in fine. de contrah. empt. Rursus damnatorum bona aut publicari aut confiscari solent: publicabantur, quæ venalia publicè proscripta, in populi Romani ærarium sectione redigebantur, confiscabantur, quæ ad priuatam principis utilitatem referebantur. Hæc ærarij & fisci differentiam obseruasse visus est Plinius, cum ita scriberet: *At fortasse non eadem seueritate fiscum qua ærarium cohibes: immo tanto maiore, quanto plus tibi licere de tuo quam de publico credis.* Eoque spectat Suetonij illud in Augusto. *Quantum militum sub signis ubique esset, quantum pecunie in ærario & fisci, & vectigaliorum residuis.* Et Tacitus Annal. lib. 5. *Bona, inquit, Seiani ablata ærario, ut in fiscum cogerentur.* Scribit sic etiam in Hadriano Ælius Spartianus: *Damnatorum bona in fiscum priuatum redigi vetuit, omni summa in ærario publico recepta.* Auctor est etiam Vlpianus res fiscales quasi proprias, & priuatas principis fuisse. cap. 2. §. 2. ne quid in loc. pub. Id ipsum confirmat Seneca, de benef. lib. 7. *Cæsar, inquit, omnia habet, fiscus eius priuata tantum, ac sua; & vniuersa in imperio eius sunt, in patrimonio propria.* Et hinc quidem obscurum esse non videtur, qua ratione locum fiscalem à publico loco separet Vlpianus cap. 3. §. 8. de iure fisci. Dubium enim non est, quin per fiscalem, proprium ratione imperij, & priuatum principis: per publicum autem, populi Romani alicuius ciuitatis locum intellexerit. Hinc etiam intelligimus, rectam esse capitis primi D. de bon. damnat. hanc in Florentinis pandectis epigraphen; **CALLISTRATVS LIBRO PRIMO, DE IURE FISCI, ET POPULI:** & eius quidem fisci, ad imperium principis; ius verò populi, ad ærarium Saturni referendum esse. Quasi in effectum sic scripsisset

Callistratus: *De iure fisci & ararij*: Nec moueor iudicis Florentini auctoritate. Eum enim deprauatum nonnullis in locis & imperfectum esse, alij docuerunt. Inscriptionem hanc eiusque interpretationem nostram confirmat Ælius Lampridius in Alexandro. *Leges*, inquit, *de iure populi & fisci moderatas & infinitas sanxit*. Eoque pertinet Valsatij Callicani illud in Auidio Cassio: *Senatus illum hostem appellauit, bonaque eius proscripsit, quæ Antoninus in priuatum ararium congeri noluit: quare senatu præcipiente in ararium publicum sunt relata*. Porro hæc antiqua ararij & fisci differentia frequenter confunditur. Res enim quæ confiscantur, redigi in ararium; & quæ in ararium rediguntur, confiscari promiscuè sæpius dicuntur. Quo sensu pro publico ararij thesauro, *fiscum veteres dixisse*, scribit etiam Aconius. Nec alio sensu *fiscum accepisse* visus est Paulus, cum ita scriberet: *Publicatis bonis, quicquid postea acquiritur, non sequitur fiscum*, cap. 22. §. 5. Mandati. Huc spectat illud Sexti Rufi: *Cyprus famosa diuitiis, paupertatem populi Romani, ut occuparetur sollicitauit, eam rex fœderatus regebat; sed tanta fuit penuria ararij Romani, & tam ingens fama opum Cypriarum, ut lege lata Cyprus confiscari iuberetur*.

## CAP V T V.

*Emendatur Vlpiani locus.*

**A**IT Vlpianus: *Exemplo rescissoria actionis etiam exceptio ei qui reipublica causa abfuit, competit, forte si res ab eo possessionem nactus vindicetur*, capite vigesimo octauo §. 5. Ex quibus causis maiores. Sensus loci huius euidentissimus est. Voluisse enim videtur Vlpianus, eum cuius reipublicæ causa absentis res est vsucapta, duabus vsucapionem infringere rationibus posse,

posse, nimirum aut actionis aut exceptionis medio. Certum est absentiam reipubl. causâ non impedire quominus ipso iure res absentis vsucapi possit. Proinde vsucapta re, quia nullus vindicationi, nullus restat conditioni, aut in integrum restitutioni locus, & tamen iusta vsucapionis rescindendâ causâ videtur non deesse; concedere idcirco solet ei qui reipublicâ causâ abfuit, actionem prætor, qua vsucapio rescinderetur, vt pote prætorio iure inualida, eâque actio rescissoria dicebatur. Verum si quo casu veterem nactus esset vsucapiæ rei possessionem is qui reipublicâ causâ abfuerat, exemplo actionis rescissoriæ, sic exceptionis auxilio tutus erat, vt ei qui vsuceperat, rem vsucaptam vindicanti, restituere non cogeretur, sed posita & probata absentix reipublicâ causâ præscriptione, tam rescindebatur exceptionis huiusmodi medio vsucapio, quàm si quæ eius rei nomine instituta esset actio rescissoria. Et hæc quidem certissima sunt. Nunc admonendi sumus pro *Possessionem nacto*, in nonnullis antiquis, & in ipsis etiam Noricis exemplaribus expresse legi, *possessionemve nacto*. Quæ lectio esse mihi videtur verissima, præsertim si puncto adiecto sic emendetur, *possessionemve nacto*. Non enim dubito quin sic scripserit Vlpian. & *Veterem* hac nota *VE*. significauerit. Sic igitur legendum est, *fortè si res ab eo possessionem veterem nacto vindicetur. d. §. 5*. Haud dubiè per veterem eam possessionem intelligit Vlpianus, quam is qui reipublicâ causâ abfuerat, ipso iure per vsucapionem amiserat. Et ita mihi videtur.

C A P V T VI.

*Verus intellectus L. Transigere, C. De transact.*

**H**VIVS rescripti facilis erit sententia, si consideremus olim nonnulla fuisse capitalia iudicia,

O o 5

quæ

quæ principaliter publicam haberent executionem, quædam verò in quibus principaliter de re familiari agebatur. Illud etiam obseruandum est, ex quibus caussis publica sunt iudicia, ex ijs non esse nos prohibendos, quominus & priuato agamus. Et quia hoc tunc duntaxat verum esse contendit Vlpianus, cum non de ea re agitur, quæ publicam principaliter executionem requirit, c. 7. §. 1. de iniur. intelligere mihi propemodum videor, quid sibi Diocletianus & Maximianus Imperatores voluerint, cum ita scriberent: *Transigere vel pacisci de crimine capitali, excepto adulterio, prohibitum non est.* cap. 18. C. de transact. Non enim dubito, quin de ijs capitalibus criminibus Imperatores consulti fuerint, quæ principaliter publicam non habent executionem, sed extra ordinem, cap. si. de public. delict. Vt sic de huiusmodi criminibus transigere vel pacisci, cuius eadem ratione videri possit liberum fuisse, qua de furto, de membro rupto, de osse fracto, deque alijs id genus maleficijs veteri iure pactioni, transactioni, & compensationi locus fuit. Igitur quotiescunque ex ijs caussis priuato iudicio agitur, ex quibus etiam publica sunt iudicia, toties & pactum & transactio de crimine capitali admitti debent, quæ contra admittenda non sunt in ijs capitalibus caussis ex quibus priuato iudicio experiri permissum non est. Quis enim credat, in caussis publicis transigere vel pacisci cum accusatore, cum quæsitore, aut denique cum iudicibus aliquo modo reis de crimine capitali permissum fuisse? Qua de re scribit eleganter Tertullianus in lib. de fuga in persecut. *Tu autem, inquit, pro eo pacisceris cum delatore, vel milite, vel furunculo aliquo præfide, sub tunica, & sinu, quod aiunt, furiuo, quem coram toto mundo Christus emit, immo & manumisit.* Et pauld post: *Paulus quidem, cum Felix præses pecuniam acceptu-*

rum se pro eo à discipulis sperasset, de quo & ipse in secreto tractavit cum ipso, neque ipse pro se, neque discipuli pro eo numeraverunt. His non ineleganter adiungi potest illud Terentij in Phorm.

*Soli sumus nunc hic inquam, ego dic quid velis dari*

*Tibi in manum ut herus his desistat libris.*

In quem locum Donatus, *Datur*, inquit, *ei in manum qui separatim accipit, sine arbitro aut interprete; ut praevicator, ut index corruptus.* Ex quibus locis liquidò constat, accusatoribus, quaestoribus, iudicibusque in aliquibus causis etiam capitalibus cum reis pacisci liberum non fuisse. Et idcirco non esse eos audiendos puto, qui rescriptum istud sic interpretantur, quasi voluerint Imperatores, reos qui de crimine capitali cum iudicibus aut accusatoribus paciscuntur, impunè pacisci, impunè transigere. Id enim falsissimum esse, ex Paulo constat, cap. 21. de lege Cornel. de falsis Et quia adulterium, quod inter crimina capitalia numeratur, ad mariti solius videtur læsionem, vindictamque pertinere, & sic per consequens publicam principaliter executionem non requirere; idcirco an de adulterio æquè pacisci liceat, atque de alijs capitalibus causis, quæ principaliter publicam non habent executionem, consulti Imperatores rescripserunt transigere vel pacisci de crimine capitali excepto adulterio prohibitum non esse. d. c. 18. Nimirum quod non solum contaminationi vxoris indignari maritus debeat, (cap. 1. §. 2. Ad leg. Iul. de adult.) sed etiam quod iniquum sit, commodum alicuius pactionis vindictæ domus suæ maritum præponere. cap. 11. §. 3. d. tit. Et hac de causa vxorem in adulterio deprehensam dimittere maritus etiam cogitur; quam si retinuerit, lenocinij arguitur, eiusque pœna coërcetur, cap. 29. d. tit. Adulterium est publicum iudicium & capitale, sanguinis  
tamen

tamen pœnam non ingerens, quemadmodum ex subiectis apparebit. Reus de adulterio transigens, non falsi arguitur, vt in alijs quæ sanguinis pœnam non ingerunt publicis iudicijs fieri solet, sed pro victo & confesso habetur. cap. vlt. de præuariat. Qua de causa, quod iidem Imperatores adiiciunt, *in alijs publicis iudicijs, quæ sanguinis pœnam non ingerunt transigere non licere citra falsi accusationem*; hoc respectu publicorum quæ adulterij causa exercentur iudiciorum additum videtur. Vt sit sensus: de adulterio, cuius condemnatio nullam sanguinis pœnam ingerit, transigere reo non licet, citra criminis conuicti pœnam: in alijs publicis iudicijs, quæ sanguinis pœnam non ingerunt, qui transigit, citra falsi accusationem non transigit. Et ita quidem in publicis omnibus ijs iudicijs, quæ sanguinis pœnam non ingerunt, excepto solo adulterio, citra falsi accusationem transigere non licet. Idque ad eos mihi spectare videtur, qui accusatores, quæsitores, aut etiam iudices ipsos pacto præmio corrumpunt, cap. 21. de leg. Corn. de fals. c. 4. 29. & 34. de iure fisci. quemadmodum satis indicant hæc verba. *In publicis iudicijs.* Quibus verbis haud dubiè tempus illud denotatur, quo publica exercentur iudicia. Et idcirco notandum est diligenter, diuersa esse, de crimine capitali, & in iudicijs publicis pacisci. Transigere enim de crimine capitali vel pacisci prohibitum non est, quoties de eo iudicijs non quidem publicis sed priuatis agitur: siquidem in publicis iudicijs nullus est transactioni, nullus pactiōi locus de crimine capitali. Proinde quis non eos videat errare plurimum, qui hîc per crimen capitale, capitale iudicium intelligunt? Igitur quamuis de crimine capitali, excepto adulterio, cum eo qui passam iniuriam priuato iudicio potest vindicare, transigere, vel pacisci prohibitum non sit, in publicis

blicis tamen iudicijs, hoc est, eo tempore quo publicum de capitali crimine institutum iudicium est, nullus cum reo relictus est accusatori, quæitori, aut iudicibus de capitali crimine paciscendi vel transigendi locus. Eoque pertinet Ciceronis illud *Act. 3 in C. Verrem: Scelus est accipere ab reo, quanto magis ab accusatore? quanto etiam sceleratius ab utroque?* Nec aliter quidem hæc verba, *Citra falsi accusationem*. esse accipienda, quam ut hi qui in publicis huiusmodi causis paciscuntur, falsi crimen siue accusationem incurrant, docuit rectissime Brissotius. Idem Brissotius elegans & eruditus interpres, hæc verba, *Transigere, vel pacisci de crimine capitali, excepto adulterio, prohibitum non est*; idem Tribonianus esse contendit, quod in numerum capitalium criminum non veniat adulterium, cuius pœna ex Constantini demum constitutione facta est capitalis. Non rectè. Certè, quia sic Apuleius de asino l. 9. scribit: *Ac ne iuris quidem severitate, lege de adulteriis ad discrimen vocabo capitis tam venustum atque pulchellum.* Huic etiam consentaneum est quod sic Arnobius adversus gentes lib. 4. scribit: *Ad libidinem homines proni, atque ad voluptatum blanditias naturæ infirmitate proclives, adulteria tamen legibus vindicant, & capitalibus afficiunt eos pœnis, quos in aliena comprehenderit fœdera genialis se lectuli expugnatione iecisse.* Pœna igitur adulterij capitalis fuit etiam antè tempora Constantini; quo imperante, adulterij pœna ex capitali facta primum est pœna sanguinis. c. 30. C. Ad leg. Iul. de adult. Eoque spectat quod sic D. Hieronymus Sabiniano diacono scribit: *Non tibi illa nunc replico, quod plures virgines stuprasse narreris. quod à te nobilium violata matrimonia publico cesa sint gladio, quod per lupanaria impurus & bellus cucurristi.*

CAPVT

## CAPVT VII.

*Quid sit apud Vlpianum, Circa stationes se oculiare.*

**S**TATIO locus fuisse videtur, in quem certis temporibus certum genus hominum contrahitur. Sic stationem visus est accepisse Plinius Epistolæ. lib. 1. *Plerique, inquit, in stationibus sedent, tempusque audiendi fabulis conterunt, ac subinde sibi nuntiari iubent, an iam recitator intrauerit, an dixerit præstationem.* Sic etiam accipi voluit stationem Gellius, cum ita scriberet, lib. 13. cap. 13. *Quæsitum esse memini, in plerisque Roma stationibus ius publicè docentium ac respondentium, an quæstor populi Romani in ius vocari posset.* Huiusmodi loca in foro Romano fuisse testis est P. Victor, qui sub octaua regione, quæ Forum Romanum dicitur, in libello de regionibus vrbs, Senaculum Aureum, & Stationes municipiorum complexus est: per Senaculum Aureum antiquam senatorum stationem intelligens, de qua scribit ad hunc modum Valerius lib. 2. cap. 1. *Sed ut à luxu perditis moribus ad seuerissima maiorum instituta transgrediar, ante à senatus assiduam stationem eò loci peragebat, qui hodie quoque Senaculum appellatur: nec expectabat ut edicto contraheretur, sed inde citatus protinus in curiam veniebat.* Stationes autem municipiorum in foro fuisse, præter P. Victorem expressè testatus est Plinius, sic de arbore quadam, cui Lotos nomen est, differens lib. 16. cap. 44. *Radices eius in forum usque Caesaris per stationes municipiorum penetrant.* Valerius Maximus in eodem iam dicto capite sic etiam scripsit: *Quocirca iuvenes senatus die utique aliquem ex patribus conscriptis aut propinquum aut paternum amicum ad curiam deducebant, affixique valuis expectabant donec reddendi officio fungerentur: qua quidem voluntaria statione, & corpora*



*corpora & animos ad publica officia sustinenda impigre roborabant. Et ita quidem fuisse videntur in Romano foro diuersæ stationes, quales esse probauimus municipiorum, senatorum, & iuuenum in curiam patres deducendum, deque huiusmodi stationibus illud accipiendum puto, quod sic Vlpianus scribit: Denique eum quoque qui in foro eodem agat, si circa columnas aut stationes se occultet, videri latitare veteres responderunt, cap. 7.*

§.6. Quibus ex caus. in poss. cat. Sensus enim est, eum etiam dicendum latitare, qui licet in eodem foro sit, effugit tamen aduersarij sui conspectum: quod fieri solet, circa columnas aut stationes se occultando. Circa columnas se occultant, qui post columnas aut statuas fugiunt; circa stationes verò, qui se tempore conuentus, municipiorum, senatorum, iuuenum, alijsve si quæ sunt, stationibus adiungunt aut immiscent, ut hoc medio conspectum fugiant aduersariorum. Quod facile fieri potuisse, satis ex D. Ambrosio constat, qui sic in Sermone 25. scribit: *Denique stationes vocantur, quod stantes & commorantes in eis, inimicos insidiantes repellamus.* Et sic quidem qui circulis hominum incerto quodam loco stantium ac commorantium immiscent sese, hi rectè occultare se circa stationes dicuntur. Eoque etiam referri potest quod sic Iuuenalis Sat. 11. scribit:

——— *Omnis*

*Conuictus, therma, stationes, omne theatrum*

*De Rutilo.*

Pet stationes enim haud dubiè huiusmodi circulos intellexit Iuuenalis.

CAPVT

## CAPVT VIII.

*De tribunatu numerorum, emendaturque cap.  
vlt. C. De testam. milit.*

**A**CTOR est Iustinianus antiquis legibus pupillis permissum fuisse, si tribunatum numerorum merebantur, ultimum elogium conficere. d. cap. vlt. Exponendum est quis dicatur numerorum tribunatus; eoque cognito, facile mendosum hunc Iustiniani locum deprehendemus. Legiones fuisse sub C. Iulio Cæsare triginta videntur in Romana republ. quarum diuersa signa expressit eleganter ex numismatibus antiquissimis in eo libro Hubertus Goltzius, quem de C. Iulio Cæsare fecit. Vnaquæque legio decem habebat cohortes. Primam cohortem miliariam fuisse testatur Vegetius; in quam censu, genere, litteris, forma, virtute pollentes milites mittebantur. Reliquæ cohortes, inquit idem Vegetius, prout principi placuisset, à tribunis vel à prepositis regebantur. Illud etiam constat, cohortes alio nomine numeros appellari. Sic enim in libro 1. historiæ tripartitæ ex Sozomeno scriptum inueni: *Ex illo autem Romanorum cohortes, quæ nunc numeri nuncupantur, singule fecerunt tabernaculum proprium.* Legiones etiam interdum numeri dicuntur. cap. 14. de re milit. Eoque sensu numeros accepisse visus est Vlpianus. Si quis, inquit, militum ex alio numero translatus sit in alium, quamvis & hinc sit exemptus, & illo nondum venerit, tamen poterit iure militari testari, cap. vnic. de bon. poss. ex test. milit. Hoc est, si quis militum de vna legione in aliam translatus sit. Interdum à legionibus separantur numeri. cap. 13. in princ. C. de re milit. Proinde quis est qui non intelligat quem tribunatum appellat numerorum Iustinianus, eum tribunatum militum à Vegetio

tio nuncupari? Igitur qui tribunus est numerorum, is idem militum tribunus est, hoc est, alicui Romanorum cohorti aut legioni præpositus. Cohortes enim tribunos suos habuisse, docet Plinius epist. libro tertio. *Stillonium Priscum, inquit, qui tribunus cohortis sub Classico fuerat, accusauimus.* Legiones etiam tribunos habuisse, ex Marcello constat, qui sic scripsit. *Titius priusquam tribunus legionis factus esset testamentum fecit, capite 25. de test. milit.* Et quandoquidem tribunorum huiusmodi, armorum scientia, virtute corporis, morumque honestate conspicuorum, sollicitudinem per hanc laudari industriam referat expressè Vegetius, *cum miles veste nitidus, armis bene munitus & fulgens, exercitij usu & disciplina eruditus incedit;* quis credat militarem tribunatus huiusmodi dignitatem à Romanis principibus, in pupillos vnquam collatam fuisse? Ideoque locum hunc Iustiniani sic esse emendandum existimaui, vt pro *Tribunatum numerorum* legamus *In tribunatu numerorum*, hoc est, sub tribuno militum. Ea nimirum ratione & forma loquendi, qua *In officio tui culminis merendi licentiam habere* præfecto cuidam prætorio scripsit imperator Constantinus cap. fin. C. de cast. pec. milit. Erroris originem ad verborum refero transpositiones. Cum enim non rectè scripserant hunc in modum librarij: *Tribunatu in numerorum*, pro *In tribunatu numerorum*, profectò ex *Tribunatu in*, factum videri potest verbum illud *Tribunatum*, quod in vulgari editione passim extat. Similis error apud Tryphoninum etiam deprehensus est, in cap. pen. circa princ. de bon. possess. contr. tab. In eo enim loco *Effectum*, pro *in effectu*, perperam scriptum obseruauit Cuiacius. Et sanè in huiusmodi verborum transpositiones incuria librarios typographosque interdum lapsos esse, illud Tertulliani, de pudicitia, liquidò demon-

strat: *Quis permittit homini, quæ donare Deo reservanda sunt?* Dubium enim non est, quin sic emendandus sit hic locus: *Quis permittit homini donare, quæ Deo reservanda sunt?* Et huiusmodi quidem emendationem vera huius rescripti sententia postulat. Nam illud idem omnino visus est in hoc loco Iustinianus voluisse, quod apud Vlpianum his verbis expressum legimus: *Ex eo tempore quis inre militari incipit posse testari, ex quo in numeros relatus est, cap. 42. de testament. milit.* Hoc est, ex quo in aliquam cohortem receptus est. Tunc enim in numeros referri milites solent, siue ut ait Iustinianus, *in tribunatu numerorum mereri*. Pupillum autem pubertati proximum in numeros referri potuisse, auctor est libro primo Vegetius, cap. 4. *Si antiqua, inquit, consuetudo servanda est, incipientem pubertatem ad delectum cogendam nullus ignorat.* Huic etiam consentaneum est quod sic Plinius Epistolarum libro octavo scribit: *Inde adolescentuli statim castrensibus stipendiis imbuebantur, ut imperare parendo, duces agere dum sequuntur assuescerent.* Et idcirco quod Iustinianus de pupillo scribit, qui in tribunatu numerorum meretur, illud ad incipientem pubertatem quæ ad delectum cogi potest, omnino referendum videtur.

## C A P V T IX.

*Quæ fuerit vindicta manumittendi ratio.*

**M**ANUMISSIO, inquit Hermogenianus, *prolietores hodie domino tacente expediri solet, & verba solemnina licet non dicantur, tamen ut dicta accipiuntur, cap. 23. de manumif. vind.* Quæ fuerint hæc solemnina verba ignorant interpretes. Ego didici *vindicta apud veteres sic manumissionem fieri consuevisse, ut domi-*  
*nes*

nus apud prætorem, vel consulem Roma, & in provinciis apud præsidem aut proconsulem, serui quem vindicta manumitti volebat caput, aut aliud membrum tenens, hac verba solemnia pronuntiaret, HUNC HOMINEM LIBERVM ESSE VOLO, & emittebat eum à manu, auctore Festo, de verb. sig. lib. 11. Tunc prætor vindicta, eiusdem serui qui manumittendus erat, capiti imposita, hac uti formula solebat: AIO TE LIBERVM MORE QVIRITIVM. Et licet hac formula famulus esset iugo laxatus herili; ut utar Claudiani verbis; tamen ad lictorem, per quam expediri manumissionem solere testis est Hermogenianus, prætor conuersus, hac quoque videtur solemnia verba pronuntiasse, SECUNDVM SVAM CAVSSAM SICVTI DIXI, ECCE TIBI VINDICTA. Tunc à prætore accepta vindicta, caput serui visus est etiam lictor percussisse, faciem palma tergumque festuca verberasse. Idque factis ex Iuuenali constat. Sic enim Sat. 5. scribit:

———Pulsandum vertice raso

Præbebis quandoque caput, nec dura timebis

Flagra pati.

Et hæc quidem tres formulæ, illa fuisse solemnia verba videntur, quorum meminit Hermogenianus. Valerius Probus in libello de litteris antiquis postremam hanc formulam recenset: eique proximam ex manuscripto auctoris cuiusdam incerti De verbis iuris antiquissimo libello, quem habeo, desumpsi. In quo sic de vindicta scriptum inueni: Vindicta est modus manumittendi, dicta hoc nomine, à Vindice Vincelliorum seruo, qui coniurationem dominorum suorum contra rempublicam detexit, & ideo apud consilium donatus est libertate. Modus manumittendi dicitur vindicta. Secundum verò quosdam à vindicta virga prætoris hoc nomen tractum est, quam imponebat capiti illius, qui manumittendus

erat , hæc solemnia proferens verba : AIO TE LIBERUM MORE QVIRITIVM. Hactenus ille. Porro simulatque peracta esset huiusmodi manumissio , statim in acta nomen manumissi referebatur , adiecta manumissionis causa. Certè quia sic in Adelphis scripsit Terentius.

—— *Ædepol hodie mea quidem sententia*

*Iudico Syrum fieri esse equum liberum. M. Istunc liberum?*

*Quodnam ob factum?*

In hunc enim locum ad hæc verba , *Quodnam ob factum*, sic scribit Donatus : *Iure; adscribi enim causas manumissionis in iure formula est.* Nomen autem manumissi in acta referri olim consuevisse , Plautus auctor est qui sic in *Perfa* scribit:

—— *Dic bona fide , iam libera est?*

*D O. I, i ad prætorem , exequire , siquidem credere non vis mihi.*

*Libera est inquam , ecquid audis?*

Idem Plautus , quod vindictam dicunt iurisperiti , illud appellasse festucam visus est , in *Milite glorioso*, his verbis:

*Quid ea ingenua , an festuca facta , serua an libera est?*

*P A. Vah , egone ut ad te libertina esse auderem inter-*  
*nuntius.*

Et idcirco rectius à virga prætoris , quàm à Vindice Vitelliorum seruo , appellatam esse vindictam putò.

## C A P V T X.

*Qui puberes , & quid habitus corporis sit , insignisque*  
*Triboniani error demonstratur.*

**P**VBERTATEM veteres non solum ex annis , sed etiam ex habitu corporis æstimari voluisse , refert Iustinianus §. 1. Institut. Quibus mod. tut. fi.  
Habitu

Habituque corporis ad obscenam quandam indagacionem referens Accursius, auctores Iustinianum & Paulum laudat. Paulus certè huiusmodi interpretationem nequaquam admittit. Agit enim de eo qui ex habitu corporis maior est declaratus. Haud dubiè per habitum corporis, non indagacionem aliquam inhonestam, sed vniuersi corporis dispositionem figuram ac formam intelligens. Iustinianus verò tam est huius Accursianæ opinionis manifestus auctor, vt tantus tanti Imperatoris error excusari, aut diutius dissimulari nequeat, *Nostra*, inquit, *maiestas dignum esse castitate nostrorum temporum existimans, bene putauit, quod in fæminis, etiam antiquis impudicum visum est, hoc est inspectionem habitudinis corporis, hoc etiam ad masculos extendere*, dict. §. 1. & cap. vltim. C. quando tut. vel curat. Profectò quotquot sunt qui puberes definiuerunt auctores veteres, nusquam huiusmodi improbitatis meminerunt: sed puberes, vel ex corporis habitu, vel ex certo annorum numero, vel ex utroque iudicandos responderunt. Non per habitum corporis inhonestam aliquam inspectionem, vt sibi suoque Iustiniano rudi & illiterato principi persuasit Tribonianus; sed cum Cicerone & Liuiio, vniuersi corporis formam, figuram, ac dispositionem, siue aliquam corporis totius ad liberorum procreationem natura prorsus idoneam, commoditatem intelligentes. Cicero pro †

*Cœl. Quintus Metellus cum floreret integerrima etate, optimo habitu, maximis viribus, ereptus est ciuitati; Liuius libro quarto. Obsita erat squalore vestis, fædior corporis habitus, pallore ac macie perempti. Puberem, inquit Vlpianus, Cassiani eum esse dicunt, qui habitu corporis pubes apparet, hoc est, qui generare potest. Quasi dicat Vlpianus, is ex Cassianorum sententia pubes appellandus est, cuius vniuersa corporis dispositio satis ad libero-*

rum procreationem facile videri cuius potest idonea. *Proculeij autem eum dicebant esse puberem, qui quatuordecim annos expleuerat. Verum Priscus in quem utrumque concurrat, & habitus corporis, & annorum numerus, puberem definiuit.* Et hæc quidem sic in fragmen. referens Vlpianus, cuius olim obtinuerit sententia non expressit. Sanè receptam fuisse Proculeiorum sententiam non obscurè docuit Tertullianus, in libro de virg. veland. *Tempus, inquit, etiam ethnici obseruant, ut ex lege natura iura sua aetatibus reddat. Nam foeminas quidem duodecim annis, masculos verò à duobus ampliùs, ad negotia mittunt; pubertatem in annis non sponsalibus, aut nuptiis decernentes.* Ex quo loco manifesto constat, Proculeiorum sententiam in vsum olim fuisse receptam. Illi enim *in annis pubertatem, non sponsalibus, aut nuptiis decernebant*; hoc est, ex annorum numero, non ex habitu corporis puberem iudicabant. Cæterum si Tertulliani auctoritate non moueris, inspicie Macrobius, in Somnium Scipionis libro primo, qui te docebit, *tutelam pueris post bis septem annos, quasi virile iam robur habentibus absolui, deque ea foeminas propter votorum festinationem maturius biennio legibus liberari.* Idem Macrobius, sic etiam Saturnal. libro septimo, cap. 7. scribit: *Secundum iura publica duodecimus annus in foemina, & quartus decimus in puero definiuit pubertatis aetatem.* Nec quidem Tertulliani duntaxat & Macrobij auctoritatibus nostra hæc confirmatur opinio, sed expressis etiam Vlpiani verbis. *Moribus enim introductum esse, ait Vlpianus, ut quis liberis impuberibus testamentum facere possit, donec masculi ad quatuordecim annos peruenerint, femina ad duodecim, cap. 2. de vulg. & pupil.* Adde masculos anno decimo quarto, etiamsi generare non possent, ipso tamen facto puberes olim fuisse declaratos. Solent enim masculis ad annum vsque decimum



decimum quartum comæ nutriri. Idque clarissimè testatur sic Martialis.

*Et pedagogo non iubente, lasciui*

*Parere gaudent villico capillati.*

Tempore verò pubertatis, hoc est statim elapso quatuordecim annorum spatio, comæ in signum pubertatis pueris præcidebantur. Auctorem meum Porphyri-  
onem in Horatium laudo, qui nunquam defugere auctoritatem poterit. Idque etiam satis indicat idem Martialis Epig. libro sexto his versibus:

*Hic iacet in tumulo raptus puerilibus annis*

*Pantagathus domini cura dolorque sui.*

*Vix tangente vagos ferro refecare capillos*

*Doctus, & hirsutas excoluisse genas.*

Eoque etiam spectat quod sic Persius in Sat. 3. scribit:

—— *Quibus indetonsa iuuentus*

*Inuigilat filiquis, & grandi pasta polenta.*

Impuberes haud dubiè *indetonsam* appellans *iuuentutem*. Scribit etiam in Virgilium Iulius Sabinus, *aris alicuius Dei detonsas tempore pubertatis comas fuisse consecratas*. Itaque ante Iustiniani tempora ex solo annorum numero, nulla habitus corporis habita ratione (vt de inhonesta indagatione, quæ planè commentitia est, taceam) puberes definiebantur. Intellego pro-  
pmodum vnde in istud indagationis inhonestæ commentum Tribonianus inciderit. Audierat, opinor, voluisse Platonem *conuenientiam ætatis ad nuptias, per iudicem nudos omnino mares, nudasque ad pubem usque fœ-  
minas inspicientem, definiri*. Hinc cum in iuriconsultorum libris habitum corporis legerat, continuo non dubitauit, quin eadem illa quam Plato excogitauerat, inspectio habitudinis corporis inhonesta, obseruari à prudentibus iuris præcipiatur. Equidem testor ingenuè, & affirmo, nullis mihi rationibus persuaderi

P p 4 posse,

posse, tantam improbitatem Romanos vnquam, vel  
conniuentibus oculis in sua republica tolerasse.

## C A P V T X I.

*De vera sententia cap. i. C. De custod. reorum.*

**I**MPERATOR Constantinus ad Florentium rationalem sic scripsit : *In quacunque causa reo exhibito, siue accusator existat, siue cum publica sollicitudinis cura produxerit, statim debet questio fieri, ut noxius puniatur, innocens absoluator, c. i. in princ. C. de custod. reorum.* Cessante videlicet praua consuetudine, per quam reos carceri immittebant curiosi & stationarij, cap. i. C. de curios. Quænam hîc dicatur publicæ sollicitudinis cura, & quid ea differat ab accusatore, & questio statim quomodo soleat fieri, nec docent nec didicerunt interpretes. Accusatoris nomen & ad speciem & ad genus trahi solet. Nam genere quodam omnes qui sceleris alicuius apud magistratus aliquem insimulant, accusatores appellantur. Quo sensu accusatorem tunc esse appellandum puto, cum neminem dicimus sine accusatore damnandum esse, cap. 6. §. 2. de muner. & honor. Eoque pertinet quod in actis Apost. legimus, *Romanis morem non esse hominem vllum ad necem condemnare, priusquam reus presentes habuisset accusatores, & locum sui contra criminationes defendendi obtinuisset.* Adde illud Ambrosij ad Syagrium: *Si leges publicas interrogemus, accusatorem exigunt.* Idque etiam in quadam de Auidio Cassio, D. Marci epistola expressum inuenimus, apud Vulcatium Gallicanum: *Adde, inquit D. Marcus, quod non possumus reum facere, quem nullus accusat.* Alio modo accusator appellatur, qui proprio nomine subscripto accusationem libello delatam sustinet. De quo scribit sic Apuleius in  
Apolo

Apologia secunda: *Vbi illud libelli vestri atrox principium, nomine priuigni mei formatum, Hunc ego domine Maxime reum apud te facere institui? Et de huiusmodi quidem accusatore accipienda sunt hæc Constantini verba, Siue accusator existat. Quod autem de publicæ sollicitudinis cura subiicit idem Imperator, illud mihi ad militarem illam stationem spectare videtur, de qua sic in Apologetico scribit Tertullian. Latronibus inuestigandis per vniuersas prouincias militaris statio sortitur. Hos milites irenarchas interdum, & stationarios appellari, ab alijs est obseruatum. Eosque etiam curiosos à publicæ sollicitudinis cura in lib. de fuga in persecut. Tertullianum appellasse, argumento cap. i. C. de curiosis, non malè dixeris. Verba Tertulliani hæc sunt: Nescio dolendum an erubescendum sit, cum in matricibus beneficiariorum & curiosorum, inter tabernarios & lanios & fures balnearum & aleones & lenones, Christiani quoque vectigales continentur. Quod autem de quæstione subiicit Constantinus, illud ad antiquam eamque publicam habédæ quæstionis rationem pertinet, qua ipsius Constantini tempore reus sub metu imminentium tormentorum pendens, interrogari. examinari, & accusari coram populo solebat, & quilibet accusare volens audiebatur, statimque reus aut noxiùs puniebatur, aut innocens absoluebatur. Quem morem euidenter expressit Opatius Afer aduersus Parmenianum lib. i. his verbis: Tunc Constantinus ad Cacilianum proconsulem scripsit, ut remotis necessitatibus publicis, de vita Felicis Autumnitani publicè quaereretur. Inductus est Claudius Saturianus curator reipublicæ, qui fuit tempore persecutionis in ciuitate Felicis: & curator presentis tunc temporis, quando causa flagitabatur, Callidius Gratianus: & magistratus Alsius Cacilianus: sed & superstitionarius perductus, & Ingentius scribe publicus. Pependit sub metu*

*imminentium tormentorum, Responſis omnium nihil tale inuentum eſt, quod vitam Felicis Episcopi ſordidare potuiſſet. Habentur volumina actorum in quibus continentur preſentium nomina, Claudij Saturiani curatoris, & Cæciliani magiſtratus, & ſuperſtationarij, & ſcribe Ingentij, & Solonis officialis publici ipſius temporis. Poſt quorum reſponſa à ſupra memorato proconſule, hæc pars ſententiæ dicta eſt: Felicem autem religioſum Episcopum liberum eſſe ab exactione instrumentorum deiſcorum manifeſtum eſt, cum nemo in eum aliquid probare potuerit, quod religioſiſſimas ſcripturas prodiderit. Haecenus Optatus. Huius etiam ſententiæ & quæſtionis meminit D. Auguſtinus aduerſus Creſconium Grammaticum lib. 3. Et ad hunc quidem habendæ coram populo quæſtionis morem non dubito quin in hoc cap. i. de cuſtod. reor. reſpexerit omnino Conſtantine. Cuius etiam meminiffe viſus eſt Hilarius, cum ſic ad Conſtantium Auguſtum ſcriberet: Sacerdotes carceribus continentur, plebs in cuſtodiam catenati ordinis conſtricta diſponitur, virgines nudantur ad pœnam, ſacrata Deo corpora publico expoſita conſpectui, ad fructum ſpectaculi & quæſtionis aptantur.*

## C A P V T XII.

*Quæ dicatur materfamilias.*

**N**O V V M non eſt, vt pro ratione temporis verborum ampliuntur, coarctentur, & interdum mutantur ſignificationes. De mutatione illud conſtat, quos veteres dicebant perduelles, eos nunc hoſtes appellari, & perduellionis nomen ad aliam quandam, eamque certam criminis ſpeciem tranſlatum eſſe. *Hoſtis*, inquit Feſtus, apud antiquos peregrinus dicebatur; & qui nunc hoſtis, perduellis. Decemviri

cemuiri *venditionem* omnem appellabant *alienationem*; & *pacisci* generis loco vñ sunt; quæ verba ad speciem traxerunt postea prætores & Iurisconsulti. Auctor est etiam Festus, *emere* quod nunc est mercari, pro *sumere* antiquos accepisse. Et ita verbum quod latissimum erat, in angustam interdum significationem coëgerunt. Contra, *matrisfamilias* vocabulum ex angustissima significatione in vñum latissimum tandem prorupit. Nam si Nonio credimus, *eam duntaxat uxorem dicebant veteres matremfamilias, quæ sæpius peperisset*. Quo sensu matremfamilias definiuit etiam Festus, *Materfamilia*, inquit, *non antè dicebatur, quàm vir eius paterfamilia dictus esset*. Nec possunt hoc nomine plures in una familia præter unam appellari. Sed nec vidua hoc nomine, nec quæ sine filijs est, appellari potest. Ciceronis tempore hac voce *Materfamilias* latius paululum vsus est populus Romanus: omnesque fœminas quæ in manum conuenerant, matresfamilias appellabant, etiam antequam peperissent, etiamsi in parentum essent potestate. Hinc illa coëmptionis antiqua formula, **VIS MIHI ESSE MATERFAMILIAS?** Id ipsum testatur expressè Cicero in *Topicis*: *Genus*,<sup>T</sup> inquit, *est uxor, eius dua forma; una matrumfamilias, hæ sunt quæ in manum conuenerunt; altera earum quæ tantummodo uxores habentur*. Eoque arbitror Gellium respexisse libr. 18. cap. 6. cùm ait *matremfamilias appellatam esse eam solam, quæ in mariti manu mancipioque aut in eius, in cuius maritus manu mancipioque esset: quoniam non in matrimonium tantum, sed in familiam quoque mariti, & in sui heredis locum venisset*. Denique Iurisconsulti non speciei ampliùs, sed generis loco *matrisfamilias* vocabulo vñ sunt. Illi enim genere quodam, non in manus solùm conuentiones, aut natales,

natales, sed honestatem etiam matremfamilias facere definiuerunt. cap. 3. in fine, de lib. exhib. cap. 15. §. 11. de iniurijs. cap. 46 §. 1. & cap. 195. §. 1. de verbor. sign. Adeò quidem, ut viduas, libertasque patronorum concubinas, puellas quæ sui iuris sunt, & omnes notæ auctoritatis fœminas etiam matresfamilias appellarent. cap. 41. de ritu nupt. c. 4. de his qui sunt sui. c. 30. §. 1. c. 34. Solut. matr. cap. 3. in fin. de lib. exhib. Idque nec Tertullian. quidem visus est ignorasse, cum sic in lib. de virginib. veland. scriberet: *Materfamilia vocatur licet virgo, & paterfamilia licet inuestis*. Proinde quis est qui non intelligat quàm hi inconsultè & iniquè fecerint, qui Nonium, Festum, Gellium, & ipsum etiam Ciceronem ignorantia lapsu notare non verentur?

## CAPUT XIII.

*Quale fuerit iudicium de moribus, quod esse sublatum Iustinianus voluit.*

**A**VCTOR est Asconius Pedianus regendis moribus ciuitatis quinto quoque anno censores creari solitos, qui prorsus ciues sic notabant, ut qui senator esset eiceretur senatu; qui eques Romanus, equum publicum perderet; qui plebeius, in Ceritum tabulas referretur. Idem Asconius, apud censores de moribus accusari, & viriisque censoris sententia ciues Romanos solere condemnari, in Orat. Ciceronis contra Pisonem testatus est. Idque præter Asconium tradidit etiam expressè auctor ad Herennium Rhetoricorum lib. 2. Si nihil, inquit, eorum fieri poterit, utatur extrema defensione, & dicat non se de moribus eius apud Censores, sed de criminibus aduersariorum apud iudices dicere. Donatus etiam sic in Terent. scribit. *Censores morum alienorum habent summum arbitrium*. Refert M. Varro de ling. Lat. libr. 5. *prætorium ius ad legem*

legem & censorium iudicium ad æquum tunc æstimari, cum de voluntate eius, qui filiam desponderat, controuersia est. Qui sponderat, inquit Varro, despondisse dicebatur, quod de sponte eius, id est voluntate exierat. Non enim si nolebat dabat quod sponsu erat obligatus. Nam in comædiis vides dici, Sponden' tuam gnatam filio vxorem meo: quod tum & prætorium ius ad legem, & censorium iudicium ad æquum æstimabatur. Ex quo loco satis intelligi potest, ad iudicium censorium sponsalitijs etiam quæstiones pertinuisse, sic nimirum, vt is qui ex desponsationis causâ conueniebatur, olim aut ad prætorem aut ad censores duceretur. Ad censores quidem, vt de eius moribus improbis cognosceretur, qui desponsatam puellam, domum vxorem duci non partiebatur: ad prætorem verò, vt ex sponsu is idem conueniretur. Si is qui sponderat, non serio sed animo potiùs iocandi apud censores diceret se filiam despondisse, censorium iudicium ad æquum sic æstimabatur, vt de eius qui desponderat, animo diligenter inquire-  
ætur: eoque probè perspecto, quod æquitas suaderet, adhibita interdum censuræ nota statueretur. Quòd si non apud censores, sed in iure apud prætorem is qui desponderat, ex sponsu conuentus, animò duntaxat iocandi diceret se despondisse; si prætorium ius ad legem æstimabatur, vt addita huiusmodi exceptione, Si non iocandi animo sponderis, ex sponsu daretur actio. Hinc propemodum intelligere mihi nunc videor, quid sibi voluerit A. Gellius libr. 4. cap. 20. cum ita scriberet: *Censor agebat de vxoribus solenne iusiurandum. Verba hac erant ita concepta: ET TV EX ANIMI TVI SENTENTIA VXOREM HABES?* Ex hoc enim loco posse liquidò probari videtur, non de quæstionibus duntaxat sponsalitijs, sed de maritorum etiam & vxorum moribus, censores cognouisse. Idque

Idque in ea Oratione quam de dote scripsit, testatur etiam M. Cato. *Vir*, inquit, *cum diuortium fecit, mulieri iudex pro censore est*. Quibus consentaneum etiam est, quod sic Cicero de Orat. lib. 2. scribit. *Ridicule etiam illud L. Portius Nasica censori Catoni, cum ille, Ex tui animi sententia tu uxorem habes? Non hercule, inquit, ex animi tui sententia*. Solemne iusiurandum arbitror Gellium appellare iuramentum quod annis singulis, à maritatis ciuibus Rom. singulis, de vxoribus earumque moribus exigebatur. Sic enim *solemne iusiurandum* accipi posse, auctor est Tacitus Annal. lib. 16. *Quin & illa, inquit, obiecitabat, principio anni vitare Tra-seam sole mne iusiurandum, nuncupationibus vororum non adesse, quamuis Quindecimuirali sacerdotio praditum*. Eoque sensu *solemnia munera, & sole mnia patrimoniorum onera* dixerunt etiam Iurisconsulti. cap. 12. §. pen. de administ. tut. cap. 2. de veteranis. Cum autem sole mne iuramentum istud exigebatur, tunc si *ex animi* • *sententia uxorem se non habere*, aut, *uxori iussisse propter eius mores prauos res suas sibi habere*, censoribus responderet maritus, videtur ad iudicium censorium etiam pertinuisse, de moribus vxoris inquirere, cognoscere, & si res ita postulare videretur, pronuntiare, imò etiam vxores coërcere. Eoque visus est respexisse Paulus, qui de pacto dotali differens, ait *conueniri non posse ne de moribus agatur, ne publica coërcitio priuata pactione tollatur*. cap. 5. de pactis dot. Haud dubiè per *publicam coërcitionem* censorium iudicium intelligens. De quo iudicio accipiendum etiam videtur quod sic Papinianus scribit: *Viro & uxore mores inuicem accusantibus, causam repudij dedisse utrumque pronuntiatum est*. c. 39. Solut. mat. Et sic quidem satis esse perspicuum puto, de vxorum maritorumque moribus olim apud censores litigari consueuisse. An autem statò, an verò sole mni



solemni tempore iudicium istud consueuerit exerceri, antiquiores litteræ non declarant, etiamsi de iuramento solempni scripserit expressè Gellius. Ceterum quis fuerit iudicij de moribus effectus, optimè explicat in frag. Vlpianus tit. 6. *Morum*, inquit, *nomine grauiorum quidem sexta retinentur, leuiorum autem octaua*: grauiores mores sunt adulteria; leuiiores omnes reliqui. Eoque referri potest cap. 47. ff. Sol. matr. & c. 1. §. fin. ad l. Iul. de adult. Igitur si moribus vxoris diuortium factum esse à censoribus pronuntiaretur, tunc maritus sextam aut octauam dotis partem tanquam dissidij pœnam retinebat: cap. 8. de capt. & post. reuers. sin contra mariti moribus accidisset, vt à marito diuerteret ad amicos vxor, quominus pari ratione rerum propter nuptias donatarum certam aliquam partem vxor consequeretur, nihil mihi videtur obstitisse. Si autem viro & vxore mores inuicem accusantibus, vtrûmque causam dedisse repudij pronuntiarent censores, nec ex mariti bonis vxor, nec ex bonis vxoris maritus quicquam consequebatur. d. cap. 39. Esse autem iudicium de moribus personale, nec hæredi nec in hæredem tribui, auctor est Constantinus, qui sic scripsit: *De moribus actio ultra personam extendi non potest, nec in hæredem habetur, nec tribuetur hæredi*. cap. C. Th. de incest. nupt. Et ex his quidem omnibus, satis esse perspicuum puto, quo sensu accipiendus sit hîc titulus, *De repudiis*, & iudicio de moribus sublato, qui extat in Codicis Iustiniani Cæsaris lib. 5.

CAPVT

## CAPVT XIV.

*Notatur Iustiniani constitutio, de tempore dirimendis  
civilibus controuersis præfinito.*

**M**VLTA Tribonianum suo principi Iustiniano velut auctori primo adscribere non dubitasse, quæ tamen multo antè Iustinianum tempore ab alijs principibus iurisque conditoribus statuta fuerant, manifestissimis aliquot argumentis est à nobis sæpiùs demonstratum. Huius etiam generis est quod ait Tribonianus, *Iustinianum dirimendis civilibus controuersis, ne lites fiant immortales, viteque humana excedant modum, triennium præfinituisse.* cap. 11. in princ. C. de iudicijs. Hoc enim iure antè Iustinianum vsos fuisse ciues Romanos, omnesque populos qui sub Romano degebant imperio, testis euidentissimus est Sidonius Apollinaris. Sic enim Epist. lib. 8. scribit: *Per ipsum ferè tempus, vt decemuiraliter loquar, lex de prescriptione triennij fuerat proquiritata. Cuius peremptoriis abolita rubricis, lis omnis in sextum tracta quinquennium terminabatur. Hanc intra Gallias antè nescitam primus, quem loquimur, orator indidit prosecutionibus, edidit tribunalibus, prodidit partibus, addidit titulis, frequente conuentu, raro cedente, paucis sententiis, multis laudibus.* Hæc Sidonius. Si dixeris ius antiquum abolitum desuetudine, rursus à Iustiniano restitutum fuisse in statum pristinum, id esse verum constantissimè negabo, tum quod sic non scribat Iustinianus quasi ius abolitum velit restituere, tum etiam quod Sidonius Apollinaris sub Anthemio, Leone, & Zenone Imperatoribus vixerit; quibus temporibus ius illud quod Iustiniano, tanquam eius auctori primo & inuentori tribuitur, erat in vsu. Et quia Zenoni successit in imperio Iustinus Iustiniani

Iustiniani pater, idcirco etiam ius illud, quod erat in usu Zenone imperante, statim Iustiniano imperium adepto, sic in desuetudinem abiisse non est verisimile, ut tandem noua aliqua Iustiniani opus haberet dispositione.

## C A P V T X V.

*Ad L. 15. ff. De iureiurando.*

**P**A V L V S scribit, ad egregias personas domum mitti oportere ad iurandum, dicto cap. 15. Pauli responsum istud sic esse intelligendum, ut in publicis iudiciis ad egregias potentia dignitatēque personas, testimonij causa prator, hoc est, quæsitior ipse domum mitteretur, qui personas huiusmodi iuratas domi interrogaret, apertè testatus est Cornelius Tacitus, Annal. libro secundo. *Ceterum Vrgulania*, inquit, *potentia adeo nimia ciuitati fuit, ut testis in causa quadam venire dedigneretur. Missus est prator qui domi interrogaret: cum virgines Vestales in foro & in iudicio audiri quoties testimonium dicerent, vetus mos fuerit.*

## C A P V T X V I.

*De iustis vxoribus, & iniustis.*

**V**X O R alia iusta est, alia iniusta, capite 13. §. 1. Ad l. Iul. de adult. Iusta est quæ in manum viri conuenit, usu, farre, aut coëmptionem: iniusta quam sola consuetudo vxorem facit, & cum qua ius esse conubij leges non patiuntur. De hac duplici vxorum specie sic scribit in Topicis Cicero: *Genus est vxor; eius duæ formæ, una matrumfamilias, hæ sunt quæ in manum conuenerunt; altera earum quæ tantummodo vxores habentur.* Quem locum interpretans Boëtius, *malè usu vxores*

Q 9

ad

*ad alteram hanc vxorum speciem retulit , quæ tantummodo uxores habentur.* Ait enim Cicero vxores omnes quæ in manus cōuenerunt, ad priorem speciem referendas esse. Idem Cicero, non farre aut cōemptionem duntaxat, sed vsu etiam in manum conueniri expresse testatus est pro L.Flacco, his verbis: *In manum, inquit , conuenerat. Nunc audi ; sed quero virum vsu , an cōemptione?* Proinde non est dubium quin aliò apud Ciceronem referenda sit illa vxorum species , quæ matrefamilias non erant, nimirum ad vxores iniustas. Qui ciuem Romanam vitiauerat , aut eam indotatam ducere , aut si hoc recusaret , capitis argui consuevit , nec intererat filiusne familias esset, an paterfamilias. Idque in Adelphis testatur expresse Terentius, his versibus:

— *Fero alia flagitia ad te ingentia*

*Boni illius a tolerantis. M. Ecce autem. D. Noua,*

*Capitalia. M. Ohe iam. D. Nescis qui vir sit. M. Scio.*

*D. Abstulte ! tu de psalteria me putas agere,*

*Hoc peccatum est in virginem ciuem : M. Scio.*

Et paulò pòst:

*Puer natus est. M. Dij bone vortant. D. Virgo nihil habet.*

*M. Audini. D. Et ducenda indotata est. M. Scilicet.*

Idipsum testatus est etiam in Aulularia Plautus , cùm Lyconidem adolescentem, qui Euctionis filiam vitiauerat, sic loquentem introducit:

*Quin tu eam inuenies, inquam. meam esse oportere Euclio.* Eoque visus est respexisse Martianus, sic de eo qui cùm ingenua muliere consuetudinem habet differens : *Sed necesse est ei, vel uxorem eam habere, vel hoc recusantem stuprum cum ea committere, c. 3. de concu.* Et hoc nimirum illud est, quod sic Modestinus scribit : *In libera mulieris consuetudine, non concubinatus , sed nuptia intelligenda sunt, cap. 24. de ritu nupt.* Igitur ciuem Romanam honesta

nestæ vitæ & ingenuam vitiatam, is qui vitiauit, sola consuetudine, sine aliqua in manus conuentione, vxorem nanciscitur. Quam si domum ducere noluerit, stupri arguitur, eiusque pœna coërcetur, c. 34. Ad L. Iul. de adult. Donatus in Terent. *Ducenda*, inquit, *est indotata nisi damnandus sit Æschinus*. Eaque vxor ideo iniusta dicebatur, quòd non rite domum per aliquam in manus conuentionem ducta esset. Per quam conuentionem si tandem duceretur, fieri ex iniusta vxor iusta solebat. Quo sensu matremfamilias visus est accepisse Terent. in Adelphis, cùm ita scriberet:

*Meretrix, materfamilias, erit una in domo?*

Per meretricem psaltriam intelligens; Ctesiphonis amicam; & per matremfamilias. ciuem illam virginē, quam Æschinus vitiauerat, postea patris consensu iure ritēque domum ducturus erat. Iniustæ etiam vxores sunt, quæ duci legibus prohibentur, veluti si famosam quis vxorem duxerit, aut libertinam senator, licet lege Iulia & Papia huiusmodi prohibita sint nuptiæ, tamen contractæ non dissoluuntur: sed hac pœna qui nuptias huiusmodi contrahunt plectuntur, vt nec iustam vxorem habeant, nec procreent liberos iustos, sed spurios. Idque satis indicat in fragmentis Vlpianus, tit. 16. *Aliquando*, inquit, *nihil inter se capiunt vir & vxor, id est si contra legem Iuliam & Papiam Popæam contraxerint matrimonium. Verbi gratia, si famosam quis vxorem duxerit, aut libertinam senator*. Ecce, docet expressè Vlpianus contra legem Iuliam & Papiam posse matrimonium, siue ( vt idem Vlpianus capite 10. de cond. & dem. scribit ) *nuptiale iugum contrahi*, licet matrimonium illud iustum legitimūque non sit, & per hoc nihil capere vir ex vxoris, & vxor ex mariti bonis testamento potuerit, cap. 1. Vndè vir & vxor. An igitur solui necessario debuisse, & ad mortem

alterutrius durare huiusmodi matrimonium dicemus non potuisse? Sanè Cic. huiusmodi matrimonia dissolui sub hoc prætextu non consueuisse, quòd essent legibus contraria, his verbis docet in Top. *Si mulier cum fuisset nupta cum eo qui cum connubij ius non esset, nuntium remisit; quoniam qui nati sunt patrem non sequuntur, pro liberis manere nihil oportet.* Sensus enim est si quo casu diuortium inter eos factum sit, qui matrimonium contra leges contraxerunt, quia *patrem liberi non sequuntur*, hoc est, quia liberi spurij sunt, pro liberis manere nihil oportet. Huc etiam arbitror Celsum respexisse cum ita scriberet: *Cum legitima nuptia facta sunt, patrem liberi sequuntur*, capite 19. de statu hom. Vult enim Celsus liberos ex iustis nuptiis procreatos patrem, ex iniustis matrem tanquam spurios & vulgò quæritos sequi. Proinde quod Vlpianus ait *libertinam uxorem quam senator duxit, quandiu maritus in ordine senatorio est, uxorem non esse, sed amissa dignitate uxorem esse incipere*, cap. 27. de ritu nupt. hoc sic esse intelligendum videtur, ut iusta vxor non sit libertina quam senator duxit, eamque esse iustam incipere simul atque senatoria dignitas deposita est, cap. 1. Vndè vir & vxor. Et sic quidem vxoris nomen interdum accipi posse, Ambrosius ignorasse non videtur, ad hunc modum in serm. 65 scribens: *Mulier igitur tua, si talibus moribus prædita est ut mereatur consortium, mereatur & nomen vxoris, præsta concubina tua libertatem & nomen vxoris, ne tu adulter sis potius quam maritus.* In hoc enim loco per nomen vxoris, iustam haud dubiè vxorem intelligit Ambrosius, eam nimirum ratione, qua nuptias contra l. Iul. & Papiam contractas, nuptias non esse Paulus & Modestinus scribunt, c. 15. & 42. de ritu nupt. Paulum enim & Modestinum de iustis nuptiis sensisse, dubium non est. Et sic quidem satis esse manifestum

festum puto nuptiarum vxorúmque nomine interdum iustas, interdum iniustas contineri: eademque ratione matrimonium pro argumenti subiecti qualitate interdum vt iustum, interdum vt iniustum accipiendum esse in responsis prudentum, ex Vlpiano constat, cap. 17. rer. amot. Idque mirum in modum confirmatur alio quodam Vlpiani responso. *Si senatori, inquit Vlpian. indulgentia principis fuerit permissum libertinam iustam vxorem habere, potest iusta vxor esse*, cap. 31. de rit. nupt. Ecce, non ait Vlp. si indulgentia principis fuerit senatori permissum libertinam vxorem habere, sed libertinam habere *iustam vxorem*: hoc est, si senatori eam, quam contra legem Iuliam & Papiam vxorem duxit, libertinam permiserit princeps loco vxoris iustæ habere; hac indulgentia principis, vxor quæ iniusta fuerat, iniusta esse desinit, & iusta efficitur. Igitur ex iniusta hic apud Vlpianum iustam facere dicitur senatoris vxorem indulgentia principis. Et idcirco quod Iustinianus *apud Vlpianum quaesitum esse ait si libertinam quis vxorem habeat, deinde senator fiat, an soluiatur matrimonium, quia lex Papia inter senatores & libertas stare conubia non patitur*, cap. fin. C. de nuptiis: id illius hominis aridum commentum est, qui nec Papiæ legis, nec Vlpiani intencionem probè satis videtur assecutus: nempe Triboniani Quia enim lege Papia senatores libertinas vxores ducere prohibentur, & quia sic scripserat ad eandem legem Vlpianus, *Quamuis inter vxor non sit*, cap. 27. de ritu nupt. hæc Vlpiani verba non magis intelligens quàm Papiæ legis intencionem, in eum errorem incidisse visus est idem Tribonianus, vt existimauerit huiusmodi matrimonia quòd non essent legitima, dissolui consueuille: idque sibi & legem Papiam & Vlpianum eius interpretem voluisse. Illius interim responsi omnino immemor, quod in titulum

Ad municipalem, ex libro primo Callistrati de cognitionibus, à librariis suis translatum est. Ait enim expressè Callistratus, *mulieres quæ in matrimonium se dederunt non legitimæ, non ibi muneribus fungendas, unde mariti earum, sed unde ipsæ ortæ sunt, cap. 37.* Ad municipal. Ex quo loco (ut de iis taceam quorum supra meminimus) euidenter etiam intelligi potest, matrimonium contra leges contractum, dissolui non cõsueuisse, arg. cap. vltim. de leg. 1. cap. 2. de his quæ ut indig. Ideoque non de soluendo matrimonio quicquam apud Vlpianum fuisse quæsitum puto, sed potius *an connubium esse desinat*, hoc est, an vxor illa quam iustè & legitimè ante senatoriam dignitatem maritus duxerat, iusta vxor viro in ordinem senatorium adlecto esse desinat, & iniusta fiat. Sic enim accipiendum esse cap. 27. de ritu nupt. demonstraui, ex quo capite omnino fit mihi verisimile, in hunc errorem Tribonianum incidisse. Leges etiam ciuem Romanum Romanam ciuem minorem duodecim annis, latinam aut peregrinam, vel eam quæ dedititiarum numero est, ducere, ciuemque Romanam latino, peregrino, aut deditio nubere verabant. Et quamuis connubium inter huiusmodi personas esse non possit, matrimonium tamen non prohibetur, cap. 13. §. 6. Ad l. Iul. de adult. l. 24. in fine d. tit. Sed quia matrimonium illud iustum non est, idcirco liberi in patris non sunt potestate, vxor inter iniustas vxores numeratur, & quasi ab indignis ea quæ donata sunt, ablata fisco vindicantur, c. 32. in fin. de do. int. vir. & vxor. Delinquent enim hi, qui prohibitas nuptias contrahunt, cap. vltim. de leg. 1. cap. 2. de his quæ ut indig. auf. Idque etiam ex Vlp. tit. 5. & 7. dilucidè probari potest. Ad iniustas vxores illæ etiam vxores referendæ sunt, quas sine parentum consensu filij familias ducunt. Idque mihi voluisse visus est Paulus

lus



lus Sent. libro secundo tit. 19. cum ita scriberet. *Eorum qui in potestate patris sunt, sine voluntate eius matrimonia iure non contrahuntur, sed contracta non solvantur.* Dixit Paulus, *Iure non contrahuntur*, pro eo quod est, nec usu, nec farre, neque coemptione. Is enim tribus duntaxat modis olim iure, & ut utar Tertulliani verbo, *rite*, vel (ut Tryphoninus loquitur) *civiliter* contrahi matrimonia solent, cap. 28. §. 3. in fine de lib. & post. Tertull. libro secundo ad uxorem: *Nam nec in terris, inquit, filij sine consensu patrum rite & iure nubent. Sed contracta, inquit Paulus, non solvuntur.* Quæ res efficit ut fœminæ, quas sine patrum consensu filij familias ducunt, inter uxores iniustas numerentur. Cur autem contracta non solvantur, consuetudo in causa est. Nam si is qui cum ingenua muliere consuetudinem habet, etiam si in patris sit potestate, stupri cogatur quæstionem pati, si vitiatam ciuem postquam abusus est domum non duxerit; quanto magis filius familias, eam quam sine patris consensu duxit uxorem, in matrimonio retinere cogendus est? Idque mihi visus est Paulus voluisse, cum ita scriberet: *Contemplatio enim publicæ utilitatis, privatorum commodis præfertur*: hoc est, patriæ potestati, cap. 1. §. 3. de lib. exhib. Utile siquidem publicè est, vitiatas virgines ingenuas, à suis vitiatoribus etiam iniustis domum uxores duci. Porro iniusta huiusmodi uxor, iusta fieri per subsequentem in manus conventionem potest, consensu parentum interueniente. Idque ex Apuleio constat libro sexto de asino aureo. Cum enim dixisset Apuleius, *Veneri Cupidinis nuptias in villa sine testibus patre non consentiente factas, legitimas non videri*, statim subiecit, *iniustas huiusmodi nuptias factas esse per in manus conventionem iustas*, sic Iouem loquentem introducens: *Iam faxo nuptias non impares, sed legitimas & iuri civili congruas.* Hæc etiam verba

Qq 4

subiiciens:

subiiciens: *Sic ecce Psyche conuenit in manum Cupidinis.*  
 Et hoc nimirum illud est quod Iulianus ita scribit:  
*Nuptia inter easdem personas, nisi volentibus parentibus re-*  
*nouata iusta non habentur,* c. 18. de ritu nupt. Sensus enim  
 est, nuptias sine consensu parentum contractas non  
 aliter inter easdem personas pro iustis haberi, quàm si  
 volentibus parentibus per in manus conuentionem  
 essent renouatæ. Nunc videndum est, de quibus vxori-  
 bus iniustis accipi debeat, quod sic Vlpianus scribit:  
*Planè siue iusta vxor fuit, siue iniusta, accusationem institue-*  
*re vir poterit:* c. 13. §. 1. Ad l. Iul. de adult. Vxores quæ vsu  
 habebantur iniustas appellari non potuisse, ex Cicero-  
 ne demonstratum est. Proinde ad omnes illas, de qui-  
 bus hoc capite locuti sumus, iniustas vxores non du-  
 bito quin hoc responsum Vlpiani referendū sit. Quod  
 quidem responsum sic est accipiendum, vt dicamus  
 nihil aliud Vlpianum voluisse quàm maritum posse  
 accusare vxorem, non iustam solum, sed etiam iniu-  
 stam: iustam quidem iure mariti, iniustam verò non  
 mariti, sed extranei iure, d. c. 13. §. 2. Interpretationem  
 hanc nostram confirmat Sextus Cæcilius, quam ait  
 Vlpianus scripsisse, *legem Iuliam de adulteriis ad omnia*  
*matrimonia pertinere:* hoc est, omnes vxores posse à suis  
 maritis aduterij accusari, non autem omnes vxores à  
 suis maritis iure mariti accusandas esse. Et hæc qui-  
 dem omnia quæ à nemine sunt animaduersa, esse di-  
 gna quæ cognoscantur, & certissima puto.

## C A P V T X V I I.

*De comitibus matrumfamilias & matronarum.*

**M**C R I S fuisse, vt sine comite materfamilias,  
 aut matrona non prodiret in publicum, & id-  
 circo non leuem iniuriam eisdem fieri ab iis qui co-  
 mites earum abducunt, testatur Vlpianus, c. 15. §. 11.  
 & 12.

& 12. c. 10. & 9. de iniurijs. Ad quem morem respexisse visus est Plaut. in Amphytruoue, vbi Alcumenam sic loquentem facit:

*Valeas, tibi habeas res tuas, reddas meas:*

*Iuben' ire mihi comites? IV. Sanames? AL. Si non iubes*

*Ibo egomet, comitem pudicitiam duxero.*

De his comitibus sic loquitur D. Hieronymus in epistola, quam ad Furiam Romanam nobilémque viduam scripsit: *Noli ad publicum subinde procedere, & spadonum exercitum praeuare viduarum circumferri libertate.* Et paulò post: *Nec procurator calami stratus, nec formosus collectaneus, nec candidulus, & rubicundus affecla adhaereat lateri tuo.* Idem Hieronymus in alia quadam epistola, de institutione filiae differens, quam pia mater Christo & virginitati consecrauerat, sic Letæ scribit: *Placeat ei comes non compta, neque formosa, atque lasciuia, qua liquido gutture carmen dulce moduletur; sed grauis, pallens, sordidata, subtristis.* Addatur illud eiusdem Hieronymi, ad Demetriadem virginem: *Graues foeminae, & maxima viduae ac virgines, tibi comites eligantur, quarum probata est conuersatio, sermo moderatus, sancta verecundia.* Et paulò post: *Mores enim & studia dominarum, plerumque ex ancillarum & comitum moribus indicantur.*

## C A P V T XVIII.

*Verus intellectus L. Ob as alienum, C. De obligat. & actionib.*

**S**VBLATA de nexis lege decemvitali, non omnino debitores creditoribus addici desierunt. Fuit enim in usu addictio quædam volutaria, qua se in voluntariam seruitutem tamdiu addici debitores patiebantur, donec suis creditoribus satisfecissent. Idque testatus est expresse Varro, sic de ling. Lat. lib. 6. scribens:

Qq 5

Liber

*Liber homo qui suas operas pro pecunia quam debeat, dat, dum solueret, nexus vocatur, ut ab ære oberatus. Deque huiusmodi addictione omnino sentire visus est Dio- clerianus, cum ita scriberet: Ob æs alienum seruire liberos creditoribus iura compelli non patiuntur. c. 12. C. de obl. & act. Inuiti ergo creditoribus debitores seruire non coguntur, sed rectè inuiti in carcerem detrahuntur. c. 1. C. qui bon. ced. poss. Et sic pœnam carceris voluntaria seruitute effugere, si vellent, poterant. De qua pœna scribit ad hunc modum in libro de Tobia D. Ambrosius: Offeritur pecunia creditori; vix inquit hac soluit usuram: caput debes. Reddit exhausto patrimonio capitis reus, & imminuto accipit fœnore, accipit inducias tristiores bellicis, quasi post biduum praliaturus. In bello enim victoria incerta, hic certa inopia: illic se chypeo tegit, hic nudus occurrit: illic lorica pectus includit, hic totus carcere includitur: illic manus telis onerat arma sagittis, hic ære vacuas offert vinculis alligandas, Ducitur plerumque vièrque captiuus. Huic etiam consentaneum est quod idem Ambrosius sic Offic. lib. 1. scribit: Grandis culpa est, si te sciente fidelis egeat, si scias eum sine sumptu esse fame laborare, & non adiuvet: si sit in carcere, & pœnis & suppliciis propter debitum aliquod instus excrucietur. Eoque arbitror Licinium etiam Rufinum respexisse, cum ita scriberet: Si victum vel stratum inferri iudicato non patiatur, villis in eum pœnalis actio danda, vel, ut quidam putant, iniuriarum cum eo agi poterit. c. 34. de re iudicat. Sensus enim est, eum pœnali vel iniuriarum actione teneri, qui non patitur ad debitorem suum condemnatum & in carcerem detrusum, victum vel stratum inferri. Aut igitur iudicati in voluntariam sese conijcere debebant seruitutem, aut certè hoc recusantes squalores pœnæque carceris, si iudicatæ pecuniæ non satisfarent, perferre ac pati. Idque præter Ambrosium, testatus est etiam expressè*  
*Valer.*

Valer. sic de Tiberio Graccho lib.4. scribens : *Cum ex professo inimicitias cum Africano & Asiatico Scipionibus gereret , & Asiaticus indicata pecunia satisfacere non posset , atque ideo à consule in vincula publica duci iussus esset , appellassetque collegium tribunorum , nullo volente intercedere secessit à collegis* Eoque tacitè arbitror Vlpianum respexisse , c. 16. in fin. de acceptil.

C A P V T X I X.

*Indicatur Triboniani facinus quoddam & explicatur Vlpiani locus perdifficilis.*

**O**LIM duobus modis solet rem venditam venditor emptoris facere mancipatione , & in iure cessione ; quemadmodum in eo capite demonstratum est , quod de mancipationibus , libello ad leges duodecim tabularum singulari nuper inseruimus . Si res emptoris non esset facta . hoc est nec data mancipio , nec in iure cessa , nec vsucapta ; in bonis quidem iure gentium emptoris erat , iure verò Quiritiū manebat venditoris . Antiquitatem hanc sustulit Iustinianus , & nuda traditione rem venditam , aut alio modo alienatam , emptoris alteriusve cuiusvis acquisite fieri voluit , sine aliquo mancipationis aut in iure cessionis medio . Hæc cum ita sint , nunc propemodum intelligimus quid sentiendum sit de quodam Vlpiani responso , in quo sic scriptum est : *Qui vendidit , necesse non habet fundum emptoris facere , ut cogitur qui fundum stipulanti sponpondit .* c. 25. de contr. empt. Quia enim Vlpiani seculo in vsu mancipationem & in iure cessionem fuisse certissimum est , idcirco dubium etiam non videtur , quin ita scripserit Vlpianus . *Qui vendidit , necesse habet fundum emptoris facere , ut cogitur qui fundū stipulanti sponpondit .* Hoc est , venditor fundū mancipio dare , aut co  
emptori

emptori in iure cedere compelli potest. Hoc enim est fundum emptoris facere. Cæterum Tribonianus non ignorans Iustinianum antiqua rerum Mancipi & nec Mancipi sublata differentia, transferri nuda traditione rerum Mancipi dominia voluisse, negationem adiecit, & sic scripsit : *Qui vendidit, necesse non habet, &c.* Nihil reprehendo. Iustinianus enim eam dedit Triboniano in prudentum responsis digerendis auctoritatem, ut illud omne quod Pandectis inclusum est, ad sui temporis rationem accommodari voluerit. Negligentiam tamen Triboniani vehementer accuso, quod vnica negatione contentus non potius sic scripserit : *Qui fundum vendidit, necesse non habet fundum emptoris facere, ut nec cogitur qui fundum stipulanti spondit.* Non enim magis stipulanti promissus quam venditus fundus, Mancipatione aut in iure cessione, sublata rerum Mancipi & nec Mancipi antiqua differentia, fieri emptoris debuit.

## CAPUT XX.

*Verus intellectus L. Cum vir nubit, C. Ad legem Iul. de adul.*

**N**ON satis constat quid Imperatores Constantius & Constans sibi voluerint, cum sic scriberent: *Cum vir nubit, in fœmina viros paritura quid cupiatur, ubi sexus perdidit locum, ubi scelus est id quod non proficit scire, ubi Venus mutatur in alteram formam, ubi amor quaritur, nec videtur? lubemus insurgere leges, armari iura gladio ultore, ut exquisitis pœnis subdantur infames, qui sunt, vel qui futuri sunt rei.* d. l. Cum vir nubit. Hanc constitutionem Accursius ad eos traxisse videtur, qui muliebria patiebantur. Quæ quidem interpretatio, licet reiicienda omnino non sit, verbis tamen & Imperatorum intentioni non satisfacit. Proinde quod ex ijs  
qui

quī muliebria patiebantur, nonnulli habitum, vultum, & incessum muliebrem sic olim fingerent, ut sub falsa quadam muliebri specie, viris viri impudenter nuberent; dubium non est quin de ijs solis Imperatores hīc senserint, de quibus lib. 7. de providentia Dei, scribit ad hunc modum Saluianus. Massiliensis Episcopus: *Quis credere aut audire etiam possit, conuerisse in muliebrem tolerantiam viros non usum suum tantum atque naturam, sed etiam vultum, incessum, habitum, & totum quicquid penitus aut in sexu est, aut in usu viri? adeo versa in diuersum omnia erant, ut cum viris nihil magis pudori esse debeat, quam si muliebri aliquid habere videantur illic nihil viris quibusdam turpius videretur, quam si in aliquo viri viderentur.* Et id quidem adeo verum fuisse testatus est paulo post idem Saluianus, ut impuri huiusmodi & scelerati viri, sumentes habitum gradumque fingentes muliebrem, fœmineis tegminum illigamentis etiam capita velarent; haud dubiè quo sub fœmineo habitu, & velamento, viri viris securius nuberent. Cum, inquit Saluianus, *muliebrem habitum viri sumerent, & magis muliebrem gradum fingerent, cum indicia quadam monstruosa impuritatis sibi inneclerent, & fœmineis tegminum illigamentis capita velarent, atque hoc publicè in ciuitate Romana, vrbe illic summa & celeberrima: quid aliud quam imperij dedecus erat, ut in medio reipublicæ sinu execrandissimum nefas palam liceret admitti?* Quo in loco videndum est an non pro monstruosa omnino menstruosa legendum sit. Et magis est, nisi me decipit coniectura, ut legi sic debeat. Quasi dixerit Saluianus, non eos solū habitum, formam & incessum muliebrem assumpsisse, sed etiam indicia quadam menstruosa impuritatis sibi innexuisse. Et hæc quidem cum ita sint, nunc opinor intelligimus, quid in hoc rescripto, quod ad populum Romanum dirigebatur, sibi voluerint Impera

Impera

Imperatores. Nimirum si vir ita nubat viro, ut non vir sed fœmina viro nubere videatur, eo qui virum ducit fraudem non ignorante, volūt Imperatores in utrūque gladio animaduerti. Hæc autem verba: *In fœmina viros paritura quid cupiatur, ubi sexus perdidit locū*, vitiosa esse, & sic restituēda puto: *Cū vir nubit ut fœmina viris paritura, quid cupiatur, ubi sexus perdidit locum?* & sic intelligenda; Cū vir nubit ut fœmina viris paritura, cur ibi quæritur sexus ubi sexus perdidit locum? Cū vir nubit ut fœmina, huiusmodi scelus est *cuiusmodi scire non proficit*, inquit Imperatores; credo quia sexus perdidit locum. Cū vir nubit ut fœmina, Venus mutatur in alteram formam. Quomodo? Ita nimirum, ut vir sub falsa muliebri siue venerea forma delitescat. Denique cū vir nubit ut fœmina, amor quæritur, & ille qui quæritur amor non videtur. Quæritur enim ab impuro marito abominanda quædam in virum libido viri; & quia sub forma muliebri libido huiusmodi, cū vir ut fœmina nubit, occultatur, idē ille qui quæritur amor non videtur. Nec sanē dubito, quin ad hanc constitutionem tunc etiam respexerit Saluianus, cū potestatem arguebat, quod scelus istud sciens pateretur perpetrari. *Potestas quippe magna*, inquit, *& potentissima, quæ inhibere scelus maximum potest, quasi probat debere fieri, si sciens patitur perpetrari. In cuius enim manu est ut prohibeat; iubet agi, si non prohibet admit- ti.* Et ita quidem in manu fuisse videtur præfecti urbis, præsidis, & proconsulis, ex hac constitutione antè tempora Saluiani dudum edita, in illos viros gladio animaduertere, qui ut fœminæ viris nubebant. Eamque deinde animaduersionem neglectam suis temporibus à potestatibus fuisse, conqueritur optimus Saluianus.

*Finis libri quarti Variorum.*

IACOBI





IACOBI RÆVARDI  
IVRISCONSULTI

VARIORVM, SIVE DE  
Iuris ambiguitatibus

LIBER QVINTVS.

CAPVT I.

*De veris agnationum cognationumque differentiis.*

**S**ANGVINEM à genere expers se distinguit  
 Liuius lib. 1. *Ne, inquit, grauarentur homines  
 cum hominibus sanguinem & genus miscere.* Per  
 sanguinem haud dubiè naturalem, & per genus ciui-  
 lem originem intelligens. Omnis siquidem origo, vel  
 est sanguinis, quæ ex solo naturali iure constat; vel  
 est sanguinis & generis simul, quæ tam ciuili quàm  
 naturali iure confirmatur; vel est denique generis  
 tantum, quam sola ciuilis agnouit ratio: cap. 4. §. 2. de  
 gradibus. Diuiditur autem iure ciuili sanguinis con-  
 iunctio in gentem & in genus. Gens genus continet,  
 non contra genus gentem. Genus enim ad ciuile  
 principium cuiusque gentis trahitur, & in linea dire-  
 cta versari duntaxat videtur, sic quidem vt eius appel-  
 latione agnati non comprehendantur. Idque ex anti-  
 qua cuiusdam inscriptionis particula potest euiden-  
 ter animaduerti, quæ sic de hortis legatis scriptum con-  
 tinet: **EXCEPITQVE NE QVIS EOS VEN-**  
**DERET, SED PER GENVS IPSORVM POS-**  
**SESSIO CVRRERET, VEL PER ATNATOS**  
**VEL**

VEL MANVMISSOS. Ex quo loco probari videtur inter solos ascendentes & descendentes generis appellationi locum fuisse. Idque notatio nominis mirum in modum confirmat. Cum enim genus à genendo, quod veteribus idem cum gignendo est, appellatum sit, quis dubitabit quin hi solum, à quibus nos sumus, & qui à nobis sunt geniti, generis comprehendantur appellatione? Gens autem quanquam ad principium etiam cuiusque generationis rectamque cognationis lineam, siue, ut ait Cornelius Fronto, *ad seriem maiorum* pertineat; ad agnatos tamen gentilesque referri nihilominus potest. Hanc generis gentisque differentiam ignorasse non videtur Papinianus, qui sic de probationibus scribit cap. 1. *Quoties queretur genus an gentem, quis haberet, nec ne, cum probare oportet.* Sic genus accepisse visus est etiam Symmachus Epist. lib. 2. *Genus eius, inquit, senatorium est, mens ac modestia; origine sua ac stirpe nobilior.* Haud dubiè senatorium genus originem appellans senatoriam. Et id quidem tunc semper verum est, cum propriè quid genus sit, inspicimus. Abusiue enim & impropriè pro gente generis nomen plerumque veteres usurpassè, certius est quàm ut doceri necessum sit. Gens diuiditur in stirpes. Stirpes alio modo appellantur familiae, alio domus, cap. pen. §. si. de cont. tab. bo. pos. c. 17. de testib. Catullus in Epithalamio.

*Nullaquit sine te domus*

*Liberos dare, nec parens*

*Stirpe dicier, & potest*

*Te volente.*

Sic Liuius filium appellat *virilem stirpem* lib. 1. *Breni,* inquit, *stirps quoque virilis ex nouo matrimonio fuit, cui Ascanium parentes dixerè nomen.* Et paulò post: *Pulso fratre, Amulius regnat, addit sceleri scelus, stirpem fratris virilem*

rilem interimit. Addatur Arnobij illud aduersus gentes lib. 1. *Non dulcissimas procreant liberorum stirpes? Pro stirpe domum* etiam veteres dixisse, ex Salustio constat, qui sic in Catil. scribit: *Postremo capius amore Aureliæ Orestilla, cuius præter formam nihil unquam bonus laudauit, quod ea nubere illi dubitabat, timens priuignum adulterum atate, pro cerò creditur, necato filio, vacuam domum scelestis nuptiis fecisse.* In stirpes diuiditur hæreditas, §. cum filius, Inst. de hæredit. quæ ab intest. def. non quæ in gentes, sed quæ in domos, in diuersas gentis vnius familias diuiditur. Itaque nulla potest esse gens sine stirpe, vt nec stirps sine gente, aut genere. Habebat etiam gens quælibet multas & varias domos siue stirpes, tot nimirum quot erant in vnaquaque gente patres familias: quælibet verò stirps vnā duntaxat gentem. Ideoque potest quis ex eadem gente esse, etiam si ex eadem domo non sit; sed contra ex eadem domo siue stirpe quis esse non potest, nisi etiam ex eadem gente, siue genere sit. Eoque referendum est quod de controuersia inter Marcellos & Claudios scribit ad hunc modum Cicer. de orat. libro primo. *Quid? quæ de re inter Marcellos & Claudios patricios centumviri iudicauerunt, cum Marcelli ab liberi filio stirpe, Claudij patricij eiusdem hominis hæreditatem gente ad se rediisse dicerent, nonne in ea causa fuit oratoribus de toto stirpis & gentilitatis iure dicendum?* Sensus enim est, Claudij non plebeij, sed patricij (erant enim alij plebeij, alij patricij, auctore in vita Tiberij Suetonio) huiusmodi hæreditatem gente ad se pertinere contendebant, Marcellis contra non gente solum, sed etiam stirpe eandem hæreditatem suam esse sedulo proponentibus, id cum negarent Claudij, exorta fuit de stirpis & gentilitatis iure inter Claudios patricios & Marcellos controuersia. Sic nimirum vt si stirpe hæredes

R r

se

se probarent Marcelli, in successione Claudis præferrentur, sin minus, de gente disputatio tractaretur. Idque sic non accipere convenit, quasi Claudis & Marcellis huiusmodi liberti filius aliquo cognationis agnationisve iungatur vinculo; sed ita potius ut Claudij & Marcelli de patroni familia videantur inter se contendisse. Videlicet ad eum modum, ut si patronus ex una dum viveret cum Marcellis stirpe, ex una domo provenisset, tunc Claudis in hac successione Marcelli sine aliqua controuersia præferrentur, sin verò gente solum tam Claudis quam Marcellis cognatus esset idem patronus, tunc utique Claudiorumne an Marcellorum domus siue stirps in hac gente patroni familiæ proximior esset, diligenter inquirebatur: Et si quidem stirpe Marcelli Claudis essent familiæ patroni proximiores, illi hæreditatem obtinerent; sin contra Marcellis Claudij, tunc Claudij hæredes essent. Cæterum familiæ appellatio variè accepta est, nam & in res & in personas deducitur. *Refertur etiam, inquit Vlpianus, familiæ appellatio ad corporis cuiusdam significationem, quod, aut iure proprio ipsorum, aut communi uniuersæ cognationis continetur.* Iure proprio familiam dicimus plures personas quæ sunt sub unius potestate; iure verò communi omnes agnatos, cap. 195. de verb. sign. Idque etiam expressè testatur est Festus; *Familia, inquit, antea in liberis hominibus dicebatur, quorum dux & princeps generis, vocatur paterfamilias: unde familiæ nobilium Pompiliorum, Valeriorum, Corneliorum.* Quo etiam sensu familiam accepisse visus est Apuleius in Apologia secunda. *Domus eius, inquit, tota leonina, tota familia contaminata.* Haud dubiè per domum, stirpem; & per familiam gentem intelligens. Est igitur una familia, ad quam omnes stirpes referuntur, & illa gentis nomine appellari consuevit, sunt etiam aliæ quæ

quæ ex stirpibus constant. Quot enim vnus gentis diuersæ stirpes sunt, totidem diuersæ eiusdem gentis familiæ sunt. Idque liquidò demonstrat in Nerone Suetonius, *Ex gente Domitia, inquit, duæ familiæ claruerunt, Cilunorum & Anobarborum.* Et hinc quidem intelligimus, quid sibi voluerit Vlpianus cùm ita scriberet: *Nam etsi patrefamilias mortuo singuli singulas familias habent: tamen omnes qui sub vnus potestate fuerunt, rectè eiusdem familiæ appellabuntur, qui ex eadem domo & gente proditi sunt.* d. c. 195. Sensus enim est, quamuis duce & principe generis mortuo singuli qui in eius potestate fuerunt separatas & proprias domos, stirpes, siue familias habeant; quia tamen ex eadem domo & gente proditi sunt, rectè eiusdem familiæ appellabuntur. Ex quo loco manifestò constat, non ad cognomen solum, vt existimauit doctissimus Sigonius, sed ad nomen etiam, hoc est tam ad gentem quàm ad stirpem referri familiam posse. Omnes igitur qui eiusdem nominis sunt, eiusdem quoq; familiæ sunt, non stirpium, sed gentis siue generis respectu, respectu verò stirpium quot diuersæ stirpes sunt, tot diuersæ familiæ sunt, non quidem nomine, sed cognomine. Idque mihi voluisse visus est Suetonius cùm sic de Galba scriberet: *Imagines & elogium vniuersi generis exequi longum est, familia breuiter attingam. Qui primus Sulpitiorum cognomen Galba tulit, cur aut undè traxerit ambigitur.* Huic etiam consentaneum est quod idem Suetonius sic in Tiberio de Claudio Druso scribit: *Drusus hostium dice Druso cominus trucidato, sibi posterisque suis cognomen inuenit.* Discedit autem omnis familia patrefamilias mortuo in liberos, consanguineos, & agnatos. Liberi, omnes descendentes appellantur, cap. 220. de verbor. sign. cap. vltim. in princ. de bonis damnat. *Consanguinei*, fratres & sorores ex eodem patre, vt scribit Vlp.

in frag. tit. 26. *Agnati autem sunt*, auctore eodem Vlpiano, *cognati virilis sexus per mares descendentes eiusdem familiae*. Vel, ut eos alio loco idem Vlpianus definiuit, *agnati sunt*, *cognati virilis sexus ab eodem orti*, cap. 2. de suis & legit. Decemuiri consanguineorum nomen non agnoscunt. Liberos enim appellant suos hæredes; consanguineos verò, & omnes qui ex latere per virilem sexum coniunguntur, communi nomine agnatos vocat, his verbis: **AST SI INTESTATUS MORITUR, QVOI SVVS HÆRES NEC EXTABIT, AGNATUS PROXIMVS FAMILIAM HABET**: ut est apud Vlpianum dicto tit. 25. Consanguineos igitur expressè ab agnatis separarunt Iurisconsulti in d. cap. 2. quos agnatorum nomine hac in lege decemuiri complexi sunt. Porro agnati inde nomen habere videntur, quod iure civili non in domo nati sint patrisfamilias (in ea enim liberi qui sunt in potestate duntaxat nascuntur) sed quod familiae adnascantur; sicut agnum existimauit inde appellatum Varro, *quod pecori ouilo agnatus esset*. Et est quidem agnationis nomen ciuile, ut familiae, gentis & generis; cognationis autem sanguinis nomen est, & naturale, quod interdum in nomen agnationis transit. Cognati dicuntur, quasi simul nati, quasi ex vno nati, quasi commune nascendi initium habentes, cap. 1. in princip. vnde legit. *Et idcirco agnati*, inquit Modestinus, *& cognati in hoc differunt*, *ut in cognatis, etiam agnati contineantur*, *in agnatis non utique & cognati*: Verbi gratia: Patris frater, id est *patruus*, agnatus est & cognatus; matris frater, id est *auunculus*, cognatus est, agnatus non est, c. 5. vnde legit Ideò patruus cognatus est & agnatus, quia non sanguinis solùm, sed etiam generis ratione inter fratris sui, hoc est mei patris, familiares mecum numeratur. Auunculus autem non agnatus

est, sed cognatus duntaxat, quia mihi non generis sed sanguinis tantum ratione coniunctus est. Et hoc inde potissimum quod fœminæ consideratione quadam generis gentisque ciuili, propriam nullam ducant familiam. Per in manus enim conuentionem vnà cum marito familia, vnà domo concluduntur. Idque ex Labeone Antistio dilucidè probari potest. Auctor est enim libro decimo tertio capitulo decimo Aulus Gellius, Labeonem in quarto ad edictum libro sic scripsisse: *Soror appellata est; quod quasi seorsum nascitur separaturque ab ea domo in qua nata est, & in aliam familiam transgreditur.* Huic etiam consentaneum est, quod ibi. 18. cap. 6. scripserit idem Gellius, *matrem familias non in matrimonium tantum, sed in familiam quoque mariti, & in sui hæredis locum venire.* Si fœminæ familiam haberent propriam, hoc est, si muliebris sexus non minùs inter familiæ duces, quàm sexus virilis posset numerari; consequens esset, omnem domum ex duabus constare familiis diuersis, vnà quidem patrisfamilias ex virili sexu, altera verò matrisfamilias ex sexu fœmineo; & eadem ratione matris frater, id est *auunculus*, mihi esset agnatus, respectu familiæ maternæ, qua patruus agnatus est, respectu paternæ familiæ. Quia igitur fœminæ per in manus conuentionem in mariti familiam omni modo transeunt, ideo receptum etiam est vt nec auunculus agnatus, nec liberi ex iustis nuptiis nati matris, sed patrisfamiliam sequerentur. Qua etiam solent de causa fœminæ, nec suos hæredes habent, nec agnatos, præter consanguineos, auctore Vlpian. tit. 26. Inst. libro secundo, tit. 9. & Paulo, cap. 4. §. 2. de bon. pos. cont. tabul. Siquidem sui & agnati sine familia appellari nulli possint. Adeò quidem vt vbi nulli, vel sui, vel agnati sunt, ibi nulla esse familia possit; & contra, vbi nulla familia, ibi nulli, vel sui, vel agnati sunt.

sunt. Et ob id ad fœminas, vltra consanguineorū gradum legitima hæreditas, qualis suorum & agnatorum est, non pertinebat: quamvis contra ipsarum hereditates ad masculos propinquos agnationis conditione pervenirent, d. tit. 9. Nimirum quia, licet familiam nullam, & idcirco, nec suos, nec agnatos fœminæ præter consanguineos haberent, hoc est, familiæ duces, aut principes appellari non possent, erant tamen de aliqua familia; ea nimirum à qua per in manus conventionem in mariti familiam transgredientes separabantur: ideo rectè agnati, qui eiusdem familiæ erant agnationis iure legitimam fœminarum, ut tutelam sic hæreditatem agnoscebant. Eoque visus est Terentius in Andria respexisse, sic Critonem de Chryside loquentem introducens.

*Eius morte ea ad me lege redierunt bonâ.*

Donatus enim sic hunc locum interpretatur: *Hic ins tractavit dicens, Redierunt; quia in familiam redeunt si non est hæres de proximo, aut ex testamento.* Quasi dicat Donatus: Mulier cum suis bonis per in manus cōventionem ex ea familia in qua nata est in familiam mariti transgreditur: siq; intestato, aut sine liberis decesserit, eius bona ex familia mariti ad paternam rursus familiam, vnde exierant, redeunt. Nec aliò referendum est quod idem Terentius ad hunc modum in Hecyra scribit:

*Interea in Imbro moritur cognatus senex*

*Horum, ea ad hos redibat lege hæreditas.*

Per cognatum enim hoc in loco si non Lacheris, saltem Pamphili consobrinum intelligit expressè Terentius; hoc est amitæ Pamphili filium; quæ amita per in manus conventionem ex Pamphili eiusque maiorum familia in familiam mariti vnà cum bonis suis transgressa fuerat. Ut igitur amitæ, sic etiam eius filij, hoc est *consobrini* sine liberis, aut intestato mortui  
bona



bona ad eam vndè exierant familiam redeunt. Et hæc quidem omnia verissima sunt, eo nihil obstante quod sic Vlpian. ait: *fœmina possunt, vel consanguineos, vel agnatos habere*; cap. 2. §. 1. Vndè legit. Sensus enim est, fœminas consanguineos, vel agnatos habere legitimos hæredes posse, ea ratione qua liberti patronos suos hæredes legitimos habent. Superest, vt de obscura quadam agnatorum differentia nunc disseramus. Agnati dicuntur, vel natiuitate, vel adoptione. Nam qui adoptabatur, iisdem fiebat agnatus quibus pater eius adoptiuus fuerat, & legitimam eorum hæreditatem habebat, vel ipsi eius, cap. 2. §. 2. de suis & legit. Natiuitate verò agnati fiunt duobus modis: vno, qui per virilis sexus cognationem viuo patrifamilias coniunguntur: altero, qui patre mortuo nati sunt, quos appellant communi nomine *posthumos suos*. Filius qui viuo patre natus est, agnatus dici non potest, in recta enim linea versatur cum agnati ex latere domum duntaxat attingant, cap. 7. Si tab. test. Ideoque gnatus, vel filius dicebatur, non agnatus. At *posthumus suus*, filius dici non potest; nullus enim est filius sine patre, vt nec pater sine filio. Quia tamen patrefamilias mortuo eius familia omnino non extinguitur; ideo qui filius esse non poterat, agnatus efficitur, cap. 3. de iniust. rupt. & irrit. test. & *patri* (hoc est, paternæ familiæ) *agnasce* dicitur. Illud igitur quæsitum est, an hîc agnatus appellari proximus, & cum suis hæredibus numerari possit. Et posse quidem respondit Pomponius his verbis: *Filius patri agnatus, proximus est*, cap. 12. de suis & legit. Et hoc nimirum illud est quod hunc in modum Cicero scribit, de oratore lib. 1. *Num quis eo testamento, quod paterfamilias ante fecit quam ei filius natus est, hæreditatem peti?* Nemo, quia constat *agnasce*ndo rumpi testamentum. Recentiores quidam cum hæc non considerarent,

addere huic Pomponij responso negationem contra omnium exemplarium fidem, non dubitarunt. Non rectè. Vult enim Pomponius filium patri agnatum, hoc est post patris mortem natum, testamentum rumpere, & hæredem patris proximum esse. Et sic non Pomponius solùm, sed etiam pro Cecinna Cicero *posthumum suum* appellat: Cui, inquit, *filius agnatus sit, eius testamentum non esse ruptum indica*: Ecce non agnatum solùm, sed agnatum patri cum Pomponio posthumum appellat Cicero. Nec alio sensu proximiores ex agnatis sui dicuntur, cap. 10. §. 1. de gradibus, *sui hæredes agnascuntur*, cap. 3. §. fin. de lib. agnosc. Siquidem ex agnatis omnibus nulli sunt iis agnatis proximiores, qui patri agnasci dicuntur, hoc est *posthumis suis*. Nec est quod quis obiiciat, *quam ut liberi repudiant bonorum possessionem sui hæredes, eandem illos quasi legitimos habere incipere*, & per consequens rectè inter agnatos etiam suos hæredes posse numerari, idque Vlpianum sibi voluisse, cap. 2. in princip. Vndè legit. Illius enim responsi sententia est, liberos duplici iure ad parentum intestatorum hæreditates admitti, nimirum, vel suo, & legitimo iure simul, vel legitimo solo. Proinde si à suo iure recesserint, quod fieri repudiando solet, superest illis *ius legitimum*: quo iure præferri rursus cæteris legitimis, hoc est agnatis, in repudiata successione consueverunt, non suo quidem, hoc est proprio, siue innato iure, sed *iure legitimo*, cap. ultim. in princip. de bon. dam. Liberi igitur sui hæredes sunt & legitimi simul, non agnati; agnati autem legitimi sunt, non sui iis exceptis qui patri agnasci dicuntur. Sui enim, aut nascuntur, aut agnascuntur, cap. 1. §. 8. in fin. cap. 3. §. fi. de lib. agnos. cap. 8. de iniusto rupto, & irrito test. De his omnibus malè disserunt & sentiunt alij.

## CAPVT

CAPVT II.

*Quid sit gratiam iurisiurandi facere, in L. Labeo  
etiam, ff. de iureiurando.*

**G**RATIA iurisiurandi solet aut ad delatum & susceptum, aut ad præstitum iusiurandum referri. Qui iusiurandum remittit, *gratiam iurisiurandi facere* dicitur. c. 6. de iureiur. Qui præstiti iurisiurandi religionem aliquem liberat, is etiam *iurisiurandi gratiam facit*. cap. 38. in princ. Ad municipal. Remittens iusiurandum, non aliter gratiam facere intelligitur, quam si leferente se aduersarius iurare paratus suspiciat iusiurandum. d. cap. 6. Eaque res efficit, ut huiusmodi gratia iurisiurandi nec absenti, multoque minus ignorantieri possit. Nam quomodo ab ignorante suscipi iusiurandum, aut quo modo ignorans esset paratus actore referente ad iurandum potest? Et idcirco nequaquam ideo ambiguum debet, quin pessimè de iurisiurandi elati remissione Pomponium acceperint interpretes, Labeonis sententiam ad hunc modum referentem: *Labeo etiam absenti & ignorantieri iurisiurandi gratiam fieri posse respondit: sed & per epistolam gratia iurisiurandi fieri potest*. c. 41. de iureiur. Proinde non delati susceptique, sed præstiti iurisiurandi absenti & ignorantieri gratiam fieri potuisse, est verisimilius, idque sibi Pomponium & Labeonem voluisse. Dici non potest iam id ipsum Plauti auctoritate confirmetur. Postquam enim apud Plautum in Rudente, iureiurando: Veneris aram conceptis verbis præstito talentum genti magnum Gripe promississet Labrax leno, hanc summam Dæmones lenoni à seruo suo piscatore Gripe remitti volens, his verbis usus est:

*Res soluta est Gripe, ego habeo. G R. at ego me mauolo.*

R r 5.

D Æ.

*D. Æ. Nihil hercle hîc tibi est, ne tu speres, iurisiurandi volo*

*Gratiam facias.*

Ex quo loco euidenter apparet, cùm id quod iuramento promissum est ultro, siue (vt hîc apud Plautum) pactione aliqua remittitur, tunc etiam iurisiurandi gratiam fieri. Sic iurisiurandi gratiam visus est etiam accepisse Suetonius ad hunc modum de Tiberio scribens: *Equiti Romano iurisiurandi gratiam fecit, uxorem in stupro generi compertam dimitteret, quam se nunquam repudiaturum ante iurauerat.* Quod igitur Pomponius & Labeo de iurisiurandi gratia scribunt in d. c. 41. hoc sic videtur accipiendum quasi dixerint, id quod iureiurando promissum est, absenti ignorantique & per epistolam remitti posse.

### C A P V T I I I.

*Quæ dicatur feralis pestis in rescripto quodam Imperatoris Constantini.*

**N**ON satis constat, quid per feralem pestem Constantinus intellexerit, cùm sic de maleficijs scriberet: *Hos (quoniam natura peregrini sint) feralis pestis assumat.* cap. 6. C. de maleficis. Festus auctor est, *feralia diis manibus sacra festa, à ferendis epulis, vel à feriendis pecudibus esse appellata.* Scribit etiam Varro, *Feralia ab inferis & ferendo appellata esse, quod ferant tunc epulas ad sepulchrum, quibus ius est ibi parentare.* Indèque officium quod mortuis impenditur, *ferale dici*, testis est Apuleius de asino lib. 1. *Vox, inquit, persolutis feralibus officiis luctu & mœrore deformata.* Hinc etiam cineres exusti cadaueris, & urnas in quibus cineres recondebantur, *ferales*, appellatas esse Tacitus tradidit. Sic enim Annalium lib. 2. scribit: *Tunc ferales reliquias sinu ferret, incerta ultionis,*

ultionis, anxia sui. Et lib. 3. *Postquam duobus cum liberis feralem urnam tenens egressa naui defixit oculos.* Habitum illum, quo deos deasve manes apparere persuasum erat, etiam *feralem vestem* veteres appellasse, ex eodem Tacito constat, qui sic lib. 13. scribit. *In modum furiarum, veste ferali, criminibus deiectis faces praeferbant.* Eoque sensu feralem pestem hoc in loco accessisse Constantinum est verisimile. Voluit enim maleficos dijs manibus consecrari. Sed quomodo? Sic nimirum ut eiusmodi pestis siue interitus eos absumat, cuiusmodi feraliorum tempore pecudes & in officijs feralibus cadauera mortuorum, cum in ignem posita sunt, absumuntur. Indéque poena maleficorum dicta *feralis pestis* eo modo videri potest, quo *feralem urnam, reliquias vestesque ferales, & ferale deliquae officium* esse appellatum docuimus. Et sic quidem nihil aliud voluisse visus est Constantinus, quam maleficos igne consumendos esse. Et quia de dijs manibus quibus *feralia* sacrabantur accitis arte magica percutus fuerat Constantinus, idcirco ferali peste potius quam igne dixit huiusmodi homines absumendos esse. Nimirum ut his verbis malefici iisdem dijs consecrari intelligerentur, quos artibus suis euocantes sapientius, ut erat opinio, inquietauerant. Pestis igitur feralis, ille dici hoc loco interitus debet, quo dijs manibus consecratur; sicut *officium ferele* dicitur, quod iisdem dijs exhibetur, cum homini mortuo iusta fiunt. Quamvis interim non ignorem, de supremo quouis supplicio interdum etiam pestem feralem accipi posse. Certè quia sic in Octavio tribit M. Minutius Felix: *Et hominem summo supplicio cinore punitum, & crucis ligna feralia, eorum carceras fabulatur.* Pro morte autem siue interitu pestem veteres posuisse non ignorat, qui *pestiferum fulgur.* Festum

obserua

obseruauit definiuisse, quo mors exiliūve significari solent. Cicero quoque perniciem, siue interitum reipublicæ frequenter *pestem* appellat.

## CAPUT IV.

*Ad L. inuiti, ff. De testibus.*

**I**NTER eos qui testimonium non dicunt inuiti, is quoque numeratur, qui quid exercitui præbendum conduxit. c. 19. de test. Hæc est Florentina lectio; quam qui sic emendarunt, *Qui exercitui præbenda conduxit*, dici non potest quàm id inconsideratè fecerint. Quali verò vnus redemptor exercitui Romano ijs quæ necessitatis sunt præbendis sufficiat. Certè hi non animaduertent multum locationem à conductione præbendorum differre. Vnus siquidem præbenda locat, plures præbenda conducunt: ædilis præbenda locat, iuxta Plauri illud in Mercat.

*Præbenda adiles locauere, inde petito.*

Redemptores non præbenda, sed aliquid exercitui præbendum singuli conducunt; nimirum, hi vestimenta, illi frumentum, tertius aliquis, vinum; & sic deinceps. Idque adeò verum est, vt hæc Vlpiani verba, *Qui quid exercitui præbendum conduxit*, ex ipsa redemptorum definitionis formula, omnino possint repetita videri. Redemptores enim ad hunc modum definiuit Festus: *Redemptores propria & antiqua consuetudine dicebantur, qui, quum publicè faciendum quid aut præbendum conduxerant, effecerantque, tum demum pecunias accipiebant: nam antiquitus emere pro accipere ponebatur. At hi nunc dicuntur redemptores, qui quid conduxerant præbendum vtendūque.* Hæc Festus. Ideoque si passim apud Vlpianum *præbenda* legeretur, omnibus auctor essem vt quid *præbendum* reponerent. Quamuis inter-

rim

im non ignorem redemptores etiam interdum recte  
lioi praebanda conducere. Quod tunc accidere solet,  
quum certum quoddam negotiatorum genus omnia,  
quæ belli usus postulabat, exercitui praebanda condu-  
cerat. Idque ex Livio constat, qui sic de publicanis  
scribit lib. 44. *In eandem diem frumentum, & cetera quæ  
belli usus postulabant, praebanda publicani se conducturos  
confessi sunt.*

## CAPUT V.

*Quid sit per salutem suam, quid item per Iovem iurare,  
atque inibi de vero sensu c. 3. De iureiurando.*

IN deferendo iureiurando ea solet apud veteres ob-  
servari ratio, ut is qui iusiurandum deferbat, quo-  
modo illud præstari vellent, simul exprimeret. Et tunc  
videm interdum conceptio delati iusiurandi arbi-  
rio iurantis relinquebatur, interdum certa erat & so-  
lemnis, interdum denique verbis certis iusiurandum  
ab eo qui deferbat, concipiebatur. Si quis aduersario  
per salutem suam iurare specialiter, hoc est nomina-  
tim iuberet, tunc in arbitrio iurantis erat, nulla quippe  
certa huiusmodi iusiurandi prolata formula, iura-  
mentum concipere. Hunc videlicet in modum *Iupi-  
ter mihi iratus sit*; vel sic, *Ita mihi deos velim propitios.*  
Conceptis verbis ita iurari solet, ut is qui iusiurandum  
deferbat, verbis quibus iurari vellent, præiret. Eius-  
que iusiurandi extat apud Plautum in Rudente ele-  
gans formula. Cæterum si nec verbis conceptis, nec  
aliud aliquod specialiter aduersario delatum esset iusi-  
urandum, sed dictum simpliciter, *Iura per Iovem*, tunc  
fixata & solemni quadam *Iovem lapidem iurandi* for-  
mula utebantur Romani. Auctor est enim libro 10.  
testis, *iuratuos per Iovem lapidem silicem tenuisse, hac  
solemnitate*

*solemnia verba dicemēs ; SI SCIENS FALLO, TVM ME DIESPITER, SALVA VRBE ARCEQVE, BONIS EIICIAT, VT EGO HVNC LAPIDEM.* De quo iureiurando visus est sentire Plinius, sic in Panegyrico scribens : *Quinetiam sedens præbuit iusiurandum, & ille iuravit, & expressit, explanavitque verba, quibus caput suum, domum suam, si scienter sefellisset, deorum ira consecraret.* Qui autem sic iurabant, eos † dici *Iouem lapidem* iurare testatur Cicero : sic enim Trebatio scribit, Epist. lib. 7. *Quomodo autem tibi placebit Iouem lapidem iurare, cum scias Iouem iratum esse nemini posse ?* Probari id etiam ex Gellio potest, qui sic de Phauorino Noct. Attica. lib. 1. cap. 21. scribit : *Sed enim cum Phauorino Higini commentarium legissem, eaque ei statim duplicata esset insolentia & insuauitas amaroris, Iouem lapidem, inquit (quod sanctissimum iusiurandum est habitum) paratus sum ego iurare, Virgilium hoc non scripsisse.* Illudque iusiurandum tanta fuit apud Romanos auctoritatis, vt quoties per Iouem quis iurare iuberetur, statim ad illud etiam in theatris ipsis ludorum tempore confugeretur. Idque euidenter ex eodem Ciceronis Epistolarum libro septimo potest † intelligi. Sic enim de ludis differens scribit Cicer. *Delicia verò tue noster Æsopus eiusmodi fuit, vt ei desinere per omnes homines liceret. Is iurare cum cœpisset, vox eum defecit in eo loco, SI SCIENS FALLO.* Et ita per Iouem iurare nihil aliud fuisse videtur veteribus; quam Iouem lapidem iurare. Intelligi id etiam ex Plauto potest in Aulularia. Cùm enim Strophilus Lycônidi adolescenti iusiurandum ad hunc modum detulisset, *Iura per Iouem & inter cætera respondisset Lycônides, Sed me cito expedi sis,* subiecit Strophilus, *Hem simplicem tibi.* Tunc accepto filice iurans per Iouem hac formula vsus est Lycon.



*Si te ego sciens fallo, ita me eijciat Diespiter  
Bonis, salua vrbe & arce, vt ego hunc lapidem.*  
ec cùm ita sint, nunc videor mihi intelligere quid-  
m Vlpianus sibi voluerit, cùm ita scriberet: *Qui per  
uitem suam iurat, licet per Deum iurare videatur (respectu  
m diuini numinis ita iurat,) attamen si non ita speciali-  
iusiurandum ei delatum est, iurasse non videtur, & ideo  
integro solemmiter iurandum erit. cap. 33. de iureiuran-  
. Sentus enim est, si sic delatum tibi fuerit iusiuran-  
m, Iura per Iouem, & tu per salutem tuam ita iura-  
ris, Ita mihi Iouem velim proprium: Iupiter mihi iu-  
rasset: quamuis per Iouem iurare videaris, attamen  
is qui iusiurandum tibi detulit, intentioni non sa-  
facis. His enim verbis, Iura per Iouem, ea est (quem-  
modum ex superioribus constat) deferentis in-  
tatio; vt Iouem velit lapidem iurari. Nec aliter per  
utem suam reo iurare permittitur, quàm si ab acto-  
specialiter, id est, nòminatim his verbis, Iura per  
utem tuam, ei delatum esset iusiurandum. cap. 5. in  
inc. dict. tit. Qua de causa, si iussus per Iouem iurare  
r salutem suam iurauerit, iurasse non videtur, & ideo ex  
egro iurandum erit, inquit Vlpianus; hoc est, ad so-  
nnem vsitatamque Iouem Lapidem iurandi formu-  
n confugiendum. De qua formula etiam Paulum  
ntire à Cuiacio & Russardo Iurisconsultis doctissi-  
is est obseruatum in c. 26. de iureiurand. Ausim di-  
re in fine capituli tertij, de iureiurando, sic apud Vl-  
anum etiam scriptum fuisse; *Ceterum si ego detuli, vt  
r Iouem iurares, eaque verba ad hanc formulam om-  
no referenda videri. Et certè Iouis nomen vt ethni-  
um, Christianeque religioni aduersarium, ex pruden-  
m responsis sustulisse Tribonianum, & eius loco  
ei verbum posuisse, ex eo potest euidenter intelligi,  
od in iisdem responsis, crucis nomen in furcam  
idem**

idem Tribonianus omnino mutauerit. Quæ res efficit, ut quoties in prudentum responsis Dei occurrat mentio, verbum illud ex prudentum mentione ad Iouem semper referendum videatur. Igitur pro deum iurare nihil esse aliud in illis responsis ex intentione prudentum potest, quàm iurare per Iouem; hoc est *Iouem lapidem iurare*. Et ita mihi viderur.

# C A P V T VI.

*Quæ dicantur ambitiosa decreta: & expenditur explicaturque Ulpiani locus perdifficilis.*

**H**ONORIS ambitus dici coeptus est, inquit Festus, à circumuendo supplicandoque. Est igitur ambire, supplicare. Ambibant autem Romani, aut captantes populi suffragia, aut iudicum implorantes misericordiam. Indèque tam hi qui fauorem & gratiam iudicum, quàm illi magistratum captabant, appellari solent *ambitiosi*. Certè quia sic etiam in Terent. scripsit Donatus: *Magnarum rerum desiderium & appetitus ambitio dicitur*. Ouidius de Ponto lib. 3.

*Sed tamen hoc factis adiunge prioribus unum,*

*Pro nostris ut sis ambitiosa malis.*

Hinc intelligimus quænam dici *ambitiosa decreta* possint. Nimirum tam quæ gratis, quàm ea quæ accepta mercede contra ius & æquum in alicuius fauorem à iudicibus interponuntur. cap. 65. §. 2. ad S C. Treb. Sic *ambitiosas sententias* accepisse videri potest in Domitiano Suetonius. *Ambitiosas*, inquit, *centumviro- rum sententias rescidit*. Eoque sensu *ambitiosa decurionum decreta* visus est etiam Ulpianus accepisse cum ita scriberet: *Ambitiosa decreta decurionum rescindi debent, siue aliquem debitorem dimiserint, siue largiti sint proinde ut solent,*

*solent, siue decreuerint de publico alicui vel pradia, vel ades, vel certam quantitatem præstari*, capitulo quarto de decret. ab ord. fac. Difficilis est hic locus. Quoniam enim pertinent hæc verba, *proinde ut solent*, nisi dixeris *proinde* idem esse quod *propterea*, hoc est propter dimissionem debitoris. Idque, licet durum sit, tamen non reprehendo. Quamuis interim non ignorem huius responsi sententiam reddi facillimam posse, leui correctione adhibita, hunc in modum: *Siue largiti sint pro indemnitate ut solent*, facile siquidem mihi persuadeo sic apud Vlpianum scriptum fuisse. *Siue largiti sint pro ind. ut solent*, hoc est, pro indemnitate. Idque non considerans Tribonianus, cum *pro indemnitate* scribere debuisset, *proinde* reposuisse videri potest. Sensus enim huius responsi est, siue aliquem reipublicæ debitorem gratis, *siue largiti pro indemnitate*, hoc est largitionibus acceptis, dimiserint decuriones, siue de publico alicui ades, pradia, aut certam quantitatem præstari decreuerint, huiusmodi decreta ambitiosa esse, & ob id rescindi debere. Non enim in potestate decurionum est, aliquem reipublicæ debitorem dimittere, alicui pradia, aut quantitatem certam decernere. Idque ex Plinio euidentissimum est. Cum enim de mandatis quibus eiusmodi donationes vetantur, disseruisset Epistolarum libro decimo Plinius, sic rescripsit ad eundem Plinium Imperator Traianus: *Sicut largitiones ex publico fieri mandata prohibent, ita ne multorum securitas subruatur factas ante aliquantum temporis retractari, æque in irritum vindicari non oportet.* Moris erat, ut hi qui in prouincias à senatu Romano, aut ab Imperatore, aliisve potatibus sublimibus legati mittebantur, honorarentur exciperenturque sumptu publico liberalius, daris muneribus, quemadmodum ex Sidonio probari potest,

S s.

test,

test, qui sic libro quinto Epist. scribit: *Hi sunt, qui in-  
 uident tunicatis otia, stipendia paludaris, viatica veredariis,  
 mercatoribus nundinas, munuscula legatis.* Qua sola de  
 caussa nouas interdum indiçtiones decernebant decu-  
 riones. Et tunc quidem municipes illi, qui gratia &  
 fauore quodam singulari, aut etiam largitionibus in-  
 demnitatem decurionum decretis consequebantur,  
*ambitiosi*; & decreta quibus indemnitates huiusmodi  
 continebantur *ambitiosa* dicebantur. Eoq; referendum  
 est, quod de prouidentia Dei libro quinto. Saluianus  
 Massiliensis Episcopus ad hunc modum scribit: *Ve-  
 niunt plerumque noui nuntij nouarum epistolarum à sum-  
 mis sublimitatibus missi, qui commendantur illustribus  
 paucis, ad exitia plurimorum. Decernuntur his noua mune-  
 ra, decernuntur noua indiçtiones, decernunt potentes quod  
 soluant pauperes, decernit gratia diuitum quod perdat tur-  
 ba miserorum, ipsi enim in nullo sentiunt quod decernunt.  
 Sed non possunt, inquires, non honorari, & liberalius accipi,  
 qui fuerint à maioribus missi. Estote erga vos diuites primi  
 in conferendo, qui estis primi in decernendo.* Hæc Saluia-  
 nus. Si me rogaueris, cur non potius pro immunitate  
 quàm pro indemnitate hîc apud Vlpianum esse repo-  
 nendum teneam, respondeo immunitatem ius quod-  
 dam perpetuum significare. Nam qui tributis nullis  
 grauantur, hi verè immunes sunt. Ambros. Epist. libro  
 quinto. *Si necessitates temporum, & extraordinaria incu-  
 buerint exactiones germana tua beneficio tuo, & dispendio  
 Lati immunis erit.* Suetonius in Augusto: *Et Liviæ pro  
 quodam tributario Gallo roganti, ciuitatem negauit, immu-  
 nitatem obtulit, affirmans se facilius passurum fisco detrahi  
 aliquid, quàm ciuitatis Romanae uulgari honorem.* De in-  
 demnitate autem iis cautum videri potest, quibus ad-  
 uersus aliquod imminens futurumve damnum abun-  
 dè prospectum est, c. 8. de magist. conueniend. quod iis  
 accidere

accidere solet, qui decreta obtinuerant ambitiosa. Erat enim moris, ut eorum qui statis indictionum temporibus tributa non penderent, bona proscriberentur, & publicè venum irent, cap. 9. de rescind. vend. Et idcirco debitores qui ab eiusmodi proscriptione, tributa non soluentes, ambitiosis decurionū aliquibus decretis tuti erant; rectè indemnes esse, & indemnitate, aut gratia, aut largitionibus redemisse dicebantur. Idq; mirum in modum eiusdem Saluiani confirmatur auctoritate. Sic enim in eodem illo, quem modo laudavi, de prouid. Dei lib. 8. scribit: *Iam verò illud quale, quàm sauum, ex hac ipsa impietate descendens, quàm alienum à barbaris, quàm familiare Romanis quod se inuicem exactiōe proscribunt? immò non inuicem: nam hoc tolerabilius fermè esset, si pateretur quisque quod faceret: illud est grauius, quod plurimi proscribuntur à paucis, quibus exactio publica peculiaris est praeda, qui fiscali debiti titulos faciunt quasi priuatos: & hoc non summi tantum, sed pene infimi, non iudices solum, sed etiam iudicibus obsequemes. Quae enim sunt non urbes, sed etiam municipia atque vici, ubi non quot curiales fuerint, tot tyranni sint? Hec Saluianus. Eoque respexisse D. Ambrosium suspicor, cum in serm. 7. scriberet. *Igitur quod Caesar praecipit ferendum est, quod Imperator indicit, tolerandum est: sed fit intolerabile cum illud praeda exactiōis accumulat. Et haec quidem sic obseruari solent, si modò hi qui tributa non soluebant, haberent bona. Alioqui enim suppliciis ad soluenda tributa compellebantur. Idque omnium optimè docet idem Ambrosius in Sermone 39. Et contra, inquit, semper tristis est & mœstus qui tributa dissoluit. Nec immerito tristis est, qui ad solutionem non dilectione adducitur, sed terrore constringitur. Christi enim debitor laetus, Caesaris tristis est: quia hunc ad soluendum amor cogit, illum poena compellit: hic praeiis prouocatur, ille suppliciis coarctatur.**

## CAPVT VII.

*De Superindictionibus.*

**O**BSERVATVM est. causas pœnarum quibus plectuntur rei condemnati, olim populo exponi solitas, quæ expositio *superindictio* dicebatur, cap. 8. §. 5. de iureiur., cap. 16. C. Ex quibus caus. inf. irrog. Eâ superindictio, vel fieri titulis solet, vel præconis elogio. Suetonius in Domitiano: *Patres familias quod Thracem mirmilloni parem munerario imparem dixerat, detractum è spectaculis in arenam eam obiecit, cum hoc titulo, Impiè locutus parmularius.* Et in Caligula: *Roma inquit, publico epulo seruum, ob detractam lectis argentæ laminam, carnifici confestim tradidit, ut manibus abscissis, atque ante pectus è collo pendentibus, præcedente titulo, qui causam pœna indicaret, per cœtus epulantium circumduceretur.* Atque ita superindicti titulis solet. Cæterum præconis elogio superindicti tunc dicebatur, cum præco publicè causam supplici proclamaret. Spartian. in Severo: *Fustibus eum sub elogio eiusdem præconis cecidit. Legatum populi Romani homo, plebeius temere amplecti noli.* Lampridius in Alexan. *Accusari eum Alexander iussit, probatisque per testes omnibus; & quibus præsentibus quid accepisset, & quibus audientibus quid promississet, in foro transitorio ad stipitem illum ligari præcepit, & fumo appposito, quem ex stipulis & humidis lignis fieri iusserat, necavit, præcone dicente; Fumo punitur, qui fumum vendidit.* Quibus addendum etiam est, quod sic diuus Ambrosius in Sermone nonagesimo scribit; *Ad hæc insauus iudex iussit eam expoliari, & nudam ad lupanar duci sub voce præconis dicentis, Agnem sacrilegam virginem, diis blasphemiam inferentem, scorium lupanaribus datam.* Et hanc quidem superindictæ antiquam rationem Atheniensibus

nienſibus videntur Romani acceptam tuliffe. Suidas enim auctor eſt , quum Athenienſes quidam Apollinem contemnerent, & in eius ſano ventrem exonerarent , Piſiſtratum id facinus capite ſancientem cul-  
des coſtituiſſe, & quem illi deprehenderant, eum vin-  
ctum iuſſiſſe in via flagris cædi, præcone proclamante;  
ΟΔ' ΑΝΗΡ ΚΟΛΑΣΘΕΙΣ ΑΠΟΘΑΝΕΙΤΑΙ,  
ΟΤΙ ΟΛΙΓΩΡΕΙ ΤΟΤ ΓΡΑΜΜΑΤΟΣ.

C A P V T V I I I.

*Iudices olim in leges iurare ſolitos , & quid ſit apud  
Horatium Puteal Libonis.*

**I** V D I C E S olim iurare ſolitos ex Cicerone conſtat. †  
Sic enim Act. 1. in Verrem ſcribit. *Hoc factum eſſe in  
hac ciuitate , cùm ſenatorius ordo iudicaret , ut diſcoloribus  
ſignis iuratorum hominum ſententia notarentur. In quem  
locum Aſconſus, Iuratorum hominum, inquit , iudicum,  
qui in leges antequam iudicarent, iurare conſueuerāt. Idem  
Aſcon. celebrata reiectione, & ſortitione perfectā, iudices in  
leges iuraſſe , ut obſtriçti religione iudicarent , alio loco te-  
ſtatus eſt ; addiditque prætorem non iuraſſe , Ciceronis †  
auctoritate motus, qui ſic in eadē actione prima de M.  
Metello ſcribit : Nunc tamen in eo animo ſum, ut eo iudice  
quam prætore hanc rem transigi malim ; & iurato ſuam,  
quam iniurato aliorum ſententias committere. Nimirum  
quia ſi iudex eſſet Metellus, tabellam iudiciariam iu-  
ratus acciperet; ſin prætor, iniuratus tabellās omnium  
iudicum haberet in poteſtate. Eoque pertinet quod  
ad hunc modum de Tiberio ſcripſit Annalium libro  
primo Tacitus : Ad quod exarſit adeo , ut rupta taciturni-  
tate proclamaret , ſe quoque in eā cauſa laturum ſenten-  
tiam palam & iuratum. Et de huiusmodi quidem iu-  
ramento viſus eſt ſentire Iuſtinianus , cùm ita ſcribe-*

ret : Cui enim non est cognitum antiquos iudices non aliter iudicalem calculum accepisse , nisi prius sacramentum præstitissent , omni modo se cum veritate & legum observatione iudicium esse disposituros ? cap.vltim.in princip.C. de iudiciis. Sanè iuramentum istud ad aram præstari solitum,ex Symmacho & diuo Ambrosio probari liquiddò potest. Cùm enim Gratianus Imperator , aram ad quam iurari solebat,eueriti & complanari iussisset,huius aræ Symmachus ab Imperatoribus Valentiniano, Theodosio , & Arcadio restitutionem obnixè postulans, sic libro primo Epist.scripsit : *Vbi in leges vestras & verba iurabimus ? qua religione mens falsa terrebitur, ne in testimoniis mentiarur; Omnia quidem Deo plena sunt, nec ullus perfidis tutus est locus. Sed plurimum valet ad metum delinquendi, etiam præsentia religionis urgeri. Illa ara concordiam tenet omnium. Illa ara fidem conuenit singulorum; neque aliud magis auctoritatem facit sententiis nostris,quàm quod omnia iuratus ordo decernit.* Hæc Symmachus,diuus autem Ambrosi.simul atque huius aræ ab Imperatoribus restitutionem intellexit vehemèter Symmachum cum suis postulare, id ne fieret, impedire sedulo conatus est,Imperatori Valentiniano ad hunc modum scribens: *Si hodie gentilis, aliquis Imperator, quod absit, aram statueret simulachris, & eo conuenire cogeret Christianos,ut sacrificantibus interessent, ut oppleret anhelitus, & ora fidelium cinis ex ara, fauilla de sacrilegio, fumus ex busto, & in ea curia sententiam diceret ubi iurari ad aram simulachri, in sententiam cogerentur ( propterea enim interpretantur aram locatam, ut eius sacramento, ut ipsi putant, unusquisque conuentus consuleret in medium ) cum curia maiore iam Christianorum numero sit referta, persecutionem esse crederet Christianus, qui cogeretur tali optione ad senatum venire : quod fit plerunque : nam etiam iniuriis conuenire coguntur. Te igitur Imperatore Christiani*



*aram iurare cogentur? Quid est iurare, nisi eius quem stare fidei tue praesidem, diuinam potentiam confiteri? Imperatore hoc petitur, & postulatur, ut aram iubeas euari, sumptum sacrificiis prophanis dari? Sed hoc non potest sine sacrilegio decerni. Unde rogo te, ne id decernas, atuas, vel in huiusmodi decreta subscribas. Hac Amrosius. Cæterum hanc aram, si non Puteal Libonis appellari, saltem in locum euerſi Putealiſ olim pollini, aut Mercurio (lyris enim exornabatur) conſecrari reſtitutam, & victoriæ poſtea conſecram fuiſſe, diuerſis vt credam coniecturis adducor. Puteal enim Libonis ara fuiſſe videtur in comitio, in gradibus ad læuam curiæ ſita, in quam iurari ſolebat. De quo Puteali ſenſiſſe Plautum ſuſpicoꝝ cū ſic in Curcul. ſcriberet.*

*Qui periurum conuenire vult hominem, mitto in comitium.*

Hoc eſt, ad Puteal Libonis. Dictumque Puteal à puteo, in quo Accij Nauij nouacula cum cote deſoſſa iuerat. Qua de re ſic ſcribit Liuius lib. i. *Statua Accij capite velato, quo in loco res acta eſt, in comitio in gradibus poſita ad læuam curiæ fuit. Cotem quoque eodem loco itam fuiſſe memorant, vt eſſet ad poſteros miraculi eius monumentum. Ab hoc autem cotis & nouacula puteo, Puteal nomen accepiſſe teſtis eſt Cicero li. i. de diuinat. Cotem autem illam, inquit Cic. & nouaclam deſoſſam in comitio ſupraque impoſitam Puteal accepinus. Et Puteal illud Libonis fuiſſe Puteal, Sextus Rufus in libro de regionibus vrbis ſatis oſtendit, cū in octaua regione, quæ forum Romanum dicitur inter ſenaculum aureum & comitium, Puteal Libonis expreſſè collocat hunc in modum: *Senaculum aureum: Puteal Libonis: Comitium.* Porro aram fuiſſe Libonis Puteal, non domum, non tribunal, vt quibuſdam*

cruditis viris esse persuasum intelligo, ex antiquissimis Laurinorum & Huberti Goltzij quibusdam numismatibus animaduerti : in quibus sub aræ forma coronis longis citharisque exornata L. Scribonij Libonis



Puteal co quidem hîc delineatum vides modo continetur. Inter cetera quæ mihi exhibita fuerunt numismata, duo reperi, quorum alterum in anteriore parte sic inscriptum erat ; B O N. E V E N T. hoc est, *bonus euentus*, alterum sic ; C O N C O R D I A.

Et quia Symmachus aram quam restitui postular, concordiam tenere omnium expressè scribit, idcirco aram illam cuius Symmachus & Ambrosius meminerunt, aut Puteal fuisse Libonis est verisimile, aut eius certè tandem euersti, in iureiurando religiosè suscipiendo, locum occupasse. Siquidem Puteal Libonis ad concordiam & euentum bonum in nummis illis expressè refertur : hoc est ad iudicium concordiam, sententiarumque euentum bonum. Ea nimirum formula, qua *sententiarum euentus vendere* scripsit Iulius Paulus, sentent. libro quinto, tit. 2 §. in fine, cap. 1 §. 24. de iniuriis. Quo sensu Puteal Libonis visus est Horatius accepisse, in epistola ad Mæcenatem tertia, Epist. libro primo.

— Forum Putealque Libonis

*Mandabo fidei.*

Quia enim iudices iurare, ut obstricti religione iudicarent, consueuerant, videntur electi iudices ante quam iudicaturi curiam ingrederentur, ad Libonis Puteal, quod ad leuam curiæ in gradibus situm erat, iuraturi declinasse, & inde iureiurando ad aram soléniter præstito, curiam ingredi consueuisse. Eoque arbitror

Hora

Horatium respexisse, dum forum Putealque Libonis mandat *siccis*, hoc est sobrijs & ieiunis hominibus. Quasi dicat, sint illi sobrij, abstineant illi à luxu & crapula, qui iudices sortiti ad Puteal Libonis in leges iuraturi sese conferunt. Meminit Epistol. lib. 4. Plinius, cuiusdam Senatusconsulti, quo qui negotij aliquid haberent, iurare debebant *nihil se ob aduocationem cuiquam dedisse*: idque etiã cautum fuisse lege Cincia, nemini dubium est. Et aduocatos etiam iurasse, *nihil se ob aduocationem accepisse*, non est obscurum, si consideremus, quid sibi voluerit Horatius Sermonum lib. 2. Sat. 6. cum ita scriberet.

——— *Ante secundam*

*Roscius orabat sibi adesses ad Puteal cras.*

Sensus enim est, Roscius causam dicturus, te aduocatum postulat. Et quia iurare in aram cum aduocatis suis litigatores solent, hi quidem, nihil se dedisse, cauisse aut promississe, illi verò, sese nihil accepisse ob aduocationem, idcirco dixit Horatius, Roscium orasse aduocatum suum, ut sibi adesset *ad Puteal Libonis*, hoc est ad aram illam, in quam huiusmodi iusiurandum solet præstari. Et ita hos duos Horatij locos esse accipiendos omni ausim asseueratione contendere. Alioquin ijs idonea quænam esse potest subiecta sententia? aut quidnam ara illa, quæ Libonis Puteal appellatur, cum curia, cum foro, aut cum iudicijs haberet commune? Nunc videndum est, quidnam sibi Persius voluerit cum ita scriberet Satyr. 4.

——— *Viso si palles improbe numo,*

*Si facis in penem quicquid tibi venit amarum,*

*Si Puteal multa cautus vibice flagellas,*

*Nequicquam bibulas populo donaueris auros.*

Sensus est, frustra candidatus te populo commendas, si avarus es, si adulter es, si periurus es. *Nec quicquam*

S s 5

populo

*populo donaueris aures bibulas*, hoc est, quæ tui commendationem sic possint imbibere, vt eius in comitijs velit populus meminisse. Et sic quidem *Puteal multa vibice flagellare*, nihil esse aliud videtur, quàm peierare. Eos qui *in aram iurabant*, aram iurantes tenuisse, † testis est pro L. Flacco his verbis Cicero: *Ergo is, cui, si aram tenens iuraret, crederet nemo; per epistolam, quod volet, iniuratus probabit*. Ideoque si is qui in aram iurabat, peieraret; sic illi diuo ad cuius aram iurabat, iniuriam facere existimabatur, vt non tangere, sed flagellare potius multa vibice suo periurio aram diceretur. Aram igitur tangit, qui ex animi sui sententia iurat, aram flagellat, qui peierat. Eoque referendum etiam est illud Ouidij:

*Si Puteal lanumque timet, celerésque calendas.*  
Versum enim hunc de eo debitore esse accipiendum puto, qui peierare timens, occursum fugit creditorum, celerésque vsurarum calendas detestatur.

## C A P V T IX.

*Iteratarum dictionum observatio singularis.*

**A**N VLLIS, quod sciam, interpretibus est animaduersum, iterari interrupto sermone per hypostigmen dictiones interdum consueuisse. Idque elegantiae potius quàm vitio auctores veteres tribuisse, exemplis aliquot manifestum faciam. Apud Vlpianum sic scriptum inuenio: *Non tamen si incantauit, si imprecatus est, si, vt vulgari verbo impostorum utar, si exorcizauit.* cap. 1. in princ. de extraordin. cognit. Idem Vlpianus sic etiam scribit: *Interdum tamen, et si scientia noceat, tamen restitutio facienda est.* cap. 5. quod falso tur. Et alijs locis. *Interdum tamen, et si Senatusconsulto locus sit, tamen in aliam datur actio.* cap. 7. §. 7. de S. C. Maced.

*Interdum*

*interdum tamen, etsi non sint coniuncti, tamen ususfructus legatus alteri accrescit*, cap. 1. §. 2. de usufruct. accresc. Nec id etiam visus est neglexisse Cicero, cum sic ad Plancium scriberet: *Sed tamen etsi antea scripsi, qua existimavi scribi oportere, tamen hoc tempore breuiter commendandum putavi*. Et his quidem exemplis quinque Ioannes Castellius, vir doctissimus, inhiq; amicissimus, omnium primus obseruauit illud etiam recte adungi posse, quod in Eunuchi prologo sic apud Terentium legitur:

*Habeo alia multa, qua nunc condonabitur,*

*Qua proferentur post si perget ladere,*

*Ita ut facere instituit.*

Et hæc sanè Castellij nostri coniectura, eo videri probabilior potest, quod sic etiam Celsus de repositis nummis scripserit: *At eos quos quis repositos habet, ut quidam bellis civilibus factitassent, eos legato contineri*. c. 79. de legat. 3. Hæc cum non considerarent iuris quidam interpretes doctissimi, persuadere conari sunt vnica dictione *Tamen si* veteres pro *quamuis* interdum vfos esse. Quibus ego ut non assentiar, cum ijs alioqui plurimum tribuam, certè hæc facit iteratarum dictio- num singularis obseruatio.

## C A P V T X.

*De pœnis iniuste prouocantium, & qua dicatur praiudicialis multa.*

**Q**VI iudicio inter se contendebant, hi inuicem se sacramento interdum quingentenario, interdum quinquagenario prouocabant. Nam qui pe- tebat & qui inficiabatur, de alijs rebus utrque quin- gentos asses, de alijs item certum alium & legiti- mum numerum assium apud pontificem siue adiunum, hoc

hoc est in æde sacra deponebat. Qui autem iudicio vicerat, is suum sacramentum ex loco sacro auferrebat, victi ad ærarium redibat, quemadmodum à Festo & Varrone traditum est. Rursus, si ab huiusmodi iudicio is qui victus erat, prouocaret, *sponsionem faciebat*, *Ni inistè prouocasset*: eaque sponsione ab ea parte quæ succubuerat, certus solet assium numerus deponi, quem is qui iudicio vicerat, si prouocatum ab aduersario suo iniuste videretur, auferrebat. Quod si deponere nihil vellet appellator, saltem de certa æris pœna, ex die acceptorum Apostolorum intra diem quintum idoneè cauere datis fideiussoribus cogebatur; quamvis interim expeditius esse scripserit Iul. Paulus, *pœnam ipsam, hoc est certū numerum assium, aut quid aliud pro pœna deponere, quàm de pœna præstanda cauere*. Et ita quidem inter se differre videntur cautio & sponsio. Sponsio enim rectè fieri sine cautione potest, cautio verò sine sponsione non rectè pœnis iniuste prouocantium applicatur. Nam si paratus esset appellator pœnam deponere, quamvis ea sine sponsione deponi non potuerit, nulla tamen opus erat cautione, nullisque tabulis. Idque sibi visus est Paulus voluisse cum ita scriberet Sententiarum lib. 5. tit. 33. *Cum à pluribus sententiis prouocatur, singula cautiones exigende sunt, & de singulis pœnis spondendum*. Cæterum hanc sponsionum & cautionum antiquam obseruationem visi sunt primi sustulisse Imperatores Diocletianus & Maximianus cap. 6. in fin. C. de appellationibus. Et tunc quidem in locum cautionis sponsionisque ea videtur indicenda prouocantibus multæ ratio successisse, de qua Gratianus, Valentinianus, & Theodosius ita scribunt: *Prouocantibus multas, nisi ex nostris non decretis patimur imponi*. c. quadragesimo tertio C. Theodosiano de appellationibus. Sensus enim est, non

non litigatorum amplius arbitrio statuendas esse iniuste prouocantium pœnas, sed maiorum, qui de appellationibus cognoscunt, iudicum decretis. Solent tam ad ipsos Imperatores, quàm ad præfectos prætorio, præsidēs, aut proconsules ab inferioribus iudicibus appellationes fieri. Et idcirco in hoc rescripto quod ad ducem Ægypti dirigitur, hæc verba, *Ex nostris decretis*, sic accipienda sunt, ut ea de iudicialibus, non autem de aliquibus imperialibus principum decretis intelligi debeant. Igitur *ex nostris decretis*, hoc est, ex maiorum de appellationibus cognoscentium iudicum decretis pœnæ prouocantibus imponi debent. Et ita quidem abolita fuisse videtur de pœnis iniuste prouocantium cauendi & spondendi vetus ratio, inque eius locum hæc multæ iudicum decretis prouocantibus indicendæ auctoritas successisse. Hæc cum ita se habeant, nunc etiam mihi in mentem venit, eandem hanc *multam* posteriores Imperatores, aliósque Latinos auctores, *præiudicialem* appellasse: mirum *rem iudicatam* rectè *præiudicium* dici non ignorantēs. Sic enim *præiudicium* accepisse videntur iidem illi quorum iam meminī Imperatores. *Obiecta*, inquit, *appellatione, etiamsi à præiudicio interposita dicatur, vel ad nos vel ad cognitorem sacri auditorij solemniter causa mittatur.* cap. 44. Cod. Theodosia, de appellationibus. Sensus enim est, non à nominatione duntaxat, aut alijs grauioribus decretis, sed etiam à *præiudicio*, hoc est à re iudicata, appellari & principes & prætorio præfectos posse. Et hanc quidem huius rescripti interpretationem nostram mirum in modum confirmat Cassiodorus, sic lib. 4. Variarum scribens: *Vir spectabilis Liberius dolenda nobis aditione suggestit, coniungemus in vestro iudicio contra iuris ordinem pragrauatam. Quod si ita est, remotis præiudiciis apud arbitros, quos par-*

*tiunt*

*tium consensus elegerit, te imminente, causa legibus audiat-  
tur. Hæc Cassiodorus. Est enim in hoc loco aliud ni-  
hil, Remotis præiudiciis, quàm nulla prorsus rerum prius  
iudicatarum habita ratione. Igitur præiudicium nihil aliud  
interdum est, quàm res prius iudicata. Indèque multam  
decretis iudicum prouocantibus impositam appella-  
ri præiudicalem aut præiudicii multam consueuisse est  
verisimile, quod ea propter præiudicium, hoc est rem  
prius iustè rectèque iudicatam, & temere audacia fu-  
roris appellatam indiceretur. Quo sensu iudiciaria au-  
ditoritate præiudicialis multa excipere & sustinere iacturam,  
scripserunt Imperatores cap. 50. & 65. C. Th. de appellat.  
Et hanc quidem præiudicialis multæ interpretatio-  
nem confirmat Symmachus, sic Theodosio Augusto  
scribens, epist. lib. 1. *Nec officium partibus defuit, ad mul-  
tam præiudicii suggerendam.* Et in epist. 37. eiusdem li-  
bri primi: *Tunc, inquit, auditorij sacri index, rectoris affa-  
ru super appellatione est consultus, & præiudicalem multam  
statuit prouocationibus inferendam.* Et paulò pòst in ea-  
dem epistola: *Nam & vir spectabilis decessor meus, quum  
multam didicisset exactam, quam decreto sacri auditorij ap-  
pellatio præiudicialis agnouerat, statuit causam criminis ad  
se debere transferri.* Idem Symmachus multam hanc ad  
ærarium pertinuisse, in eadem epistola expresse testa-  
tur, his verbis: *Sed cum & tempus reparationis esset emen-  
sum, & pœnam probationis aut expectaret aut sumpsisset  
ararium, pronuntiaui cognitionem sacri esse iudicii.* Et hæc  
de pœnis iniustè prouocantium.*

## CAP V T XI.

*Quæ sint vela regia.*

**P**ROHIBENT Theodosius & Valentinianus  
Imperatores, ne quis priuatus vela regia suspendat.  
cap. 2.



cap. 2. C. Vt nemo priuatus. Si me rogaueris quæ vela dicantur regia, respondebo, vela purpurea, auro pretiosisque lapillis & gemmis prætexta, quibus Imperatores, alique reges, & summi principes in suis palatijs vi consueuerunt. Sic vela regia visus est Tertullianus accepisse, in libr. de habitu muliebri. *Sed & parietes, inquit, Tyriis & hyacinthinis, & illis regis velis, quæ vos operose resoluta transfiguratis, pro pictura abutuntur: vilior est apud eos purpura quam rubrica.* Haud dubie per vela regia, purpurea vela intelligens. Idque ex Plinio euidenter potest intelligi. Sic enim Nat. hist. l. 19. cap. 1. scribit. *Velo purpureo ad Actium cum M. Antonio Cleopatra venit, eodemque effugit; hoc fuit Imperatoria navis insigne.* In hoc enim loco per velum purpureum, regium velum siue Imperatorium intellexit omnino Plinius. Hæc vela alio nomine appellata fuisse videntur *aulæa Attalica*. De quibus lib. 9. cap. 1. sic scribit Valerius Maximus: *Quidenim sibi voluit princeps suorum temporum Metellus Pius, tunc cum in Hispania adueniens suos ab hospitibus aris & thure excipi patiebatur, cum Attalicis aulæis contactos parietes lato animo intuebatur?* Ex quo loco aulæa Attalica fuisse vela pretiosissima constat, quibus ipsi etiam reges utebantur. Et idcirco non satis intelligo an rectè scripserit Nonius Marcellus, *aulæa genus esse vestis peregrine*: hunc proferens ex libro tertio, de vita populi Romani Varonis locum; *Ex hereditate Attalica aulæa, Chlamides, palla aurea.* Fortassis rectius esse genus veli peregrini, & quidem pretiosissimi, aulæa Attalica scripssisset Nonius. Habebant autem veteres quadam vela ornamentis, quadam instrumentis loco. capite 12. §. 11. de instrum. & instit. legat. Et quia ipsos reges summosque principes in ornamentis sic imitari homines quidam priuati non verebantur, ut in redimendis pretio

pretiosissimis quibûsque tabulis tam sculpris quàm pictis, velisque etiam regijs, sumptus enormes profunderent, quibus plerique prodigalitate nimia ad extremam redigebantur necessitatem, vtile visum fuit Theodosio prohibere, *ne quis priuatus vela regia suspendat*; hoc est, ne quis priuatus regijs velis parietes suos exornet, sed aulaeis vulgaribus contentus sit. Et huic quidem interpretationi nostræ omnino consentaneum est, quod sic ad Marcellam scripsit D. Ambrosius, Epistolarum lib. 5. *Illic nuntiatum est mihi comperto, quod ad Portianam basilicam de palatio decanos misissent, ut vela suspenderent.* Nam per huiusmodi vela cortinas intelligi regias, expressè testatur idem Ambrosius. Sic enim de velis ijsdem sentiens in eadem epistola scribit: *Dum hac tracto, suggestum est mihi cortinas regias esse collectas.* Et paulò post: *Postea verò quàm cognoueram cortinas regias inde sublatas.* Ecce, quæ modò vela dixerat, ea nunc cortinas regias Ambrosius appellat: Haud dubiè per vela regia, cortinas regias, & per regias cortinas vela regia intelligens.

## C A P V T XII.

*De iure publico.*

† C O N S E C R A T I O N E M iuris fuisse publici testatur expressè Cicero pro domo sua: *Dico, inquit, apud Pontifices, augures adsunt, versor in medio iure publico.* Vlpianus cùm publicum ius definirer, *ius illud esse publicum dixit, quod ad statum Rei Romanæ spectat.* cap. 1. §. 1. de iustitia & iure. Quo in loco malè legitur *Rei Romanæ*, legendum enim esse, *Reip. Romanæ*, ipsa publici iuris definitio postulat. In his autem quæ ad statum reipublicæ Romanæ spectabant, adhibitos olim antè legem regiam augures interdum & pontifices.

pontifices fuisse, populúmque in comitium vocari consuevisse, si quid Deo rite consecrandum esset si qui sacerdotes, si qui magistratus creandi, neminem tam mediocriter in historiis versatum puto, ut id ignoret. Proinde quonam iure tunc magistratus sacerdotesque crearentur, & consecrationes fierent, si quis interrogaret, nonne diceres iure publico? At postea quàm populus omne ius, omnemque potestatem suam in principem transtulit, quale ius in principem fuisse translatum dices? nonne ius populi? nonne ius publicum? Quid est enim aliud ius publicum, quàm ius populi? Quamobrem quis est qui non intelligat, publicum ius lege regia sublatum esse, & ob id nulla illius iuris in iure ciuili nostro extare vestigia? Sanè cum Aristonem peritissimum & priuati iuris & publici, partemque iuris publici, ius senatorium esse scriberet Plinius Epistolarum lib. 8. indicans ius publicum, ciuique partem senatorium lege regia prorsus abolitum esse, hæc verba subiecit: *Priorum temporum seruitus, ut aliarum optimarum artium, sic etiam iuris senatorij obliuionem quandam & ignorationem induxit. Quotus enim quisque tam patiens, ut velit discedere quod in usu non sit habiturus?* Nec aliò mihi visus est Iuuenalis respexisso Sat. 10. sic de populo Romano scribens.

—— *Nam qui dabat olim*

*Imperium, fasces, legiones, & omnia, nunc se*

*Continet, atque duas tantum res anxius optat,*

*Pana & Circenses.*

Idque considerans Vlpianus, *ius publicum in sacris, sacerdotibus, & magistratibus constituisse* ait, non autem, ut malè in omnibus exemplaribus, solis Florentinis exceptis legi videmus, consistere, d. §. 1. per *sacra*, non sacrificia, sed dedicationes, & consecrationes; per *sacerdotes*, solemnes eorum sortitiones, apprehensiones,

T t

inaugu

inaugurationes, electionesque; & per magistratū comitia consularia, prætoria, tribunitia, adilitia sic deinceps, intelligens. In iis enim omnibus populum ius olim constituit. Eoque iure sublato, primo loca publica dedicabat, non populus, cap. 9. de re. iur. Apud principem lege curiata præsentem populum rogationes fiebant, quæ antea calatis comitiis auctoritate populi peragi etiam sine auctoritate principis publico solebant, teste Gellio Noc. Attic. libro quinti cap. 19. Caio, cap. 2. de adopt. & Cicerone pro de. sua. Et certè apud principem arrogationes duobus fieri modis consueuisse, suo loco demonstrabitur, quidem lege curiata, altero lege regia. Lege curiata præsentem conuocatoque populo, lege regia, per rescriptum sine præsentia populi. Idque hinc euidentissimum est, quod fœminæ, quas lege curiata arrogari populus negat Gellius, regia lege arrogantur rectè per principis rescriptum, c. 21. de adopt. Eadem lege regia populus non populus sacerdotes faciebat. Qua de re scribit ad hunc modum Plinius Epist. libro quarto. *Gratularis mihi quod acceperim auguratum. Iure gratularis mihi, quod grauissimi principis iudicium in minoribus rebus consequi pulchrum est.* Idem Plin. Imperatori Traiano sic etiam scribit Epist. libro 10. *Rogo dignitatem quam me prouexit indulgentia tua, vel auguratum, vel pretemuiratum, quia vacat, adicere digneris.* Magistratus quoque principem creasse, non ex Modestino solum cap. 1. de leg. Iul. amb. sed etiam ex eodem Plinio constat, qui libro quarto Epist. scribit: *Ut nouissimus a Nerone factus est consul, ita postremus ex omnibus quos consules fecerat, decessit.* Illud nunc reliquum est, ut inspiciamus quo sensu scripserit Papinianus, *testamentum factionem non priuati, sed publici iuris esse*, cap. 3. de test. fac. pos. Olim testamenti factio iuris idcirco fuit publica

pu

publici videtur, quod testamenta, non minùs quàm magistratus, sacerdotes, consecrationes, adoptionesque, calatis comitiis *publica*, hoc est populi Romani, opus haberent auctoritate. At postea quàm sublato iure publico calatis comitiis testamenta condi desisissent, & priuato iure per *as* & *libram* sic conderentur, vt ne principalis quidem in iis interponeretur auctoritas, dubium non videtur, quin testamenti factio omnino publici iuris esse desierit: præsertim si rectè Theophilus ait, *cum primum per as & libram condi cæperant testamenta, tunc longo tempore antiqua illa calatis comitiis, & in procinctu testamentorum genera in desuetudinem abiisse*. Erat igitur non publici, sed *priuati iuris* testamenti factio tempore Papiniani, hoc est iuris ciuilis, habita videlicet consideratione antiquæ cuiusdam publici priuatique iuris differentia, lege regia prorsus abolita. Ad quam differentiam Papinianum suspicor respexisse; & sic notis scripsisse. *Testamenti factio non P. sed P. l. est*. Hoc est testamenti factio non publici, sed priuati iuris est. Et idcirco, aut notis deceptum esse Tribonianum verisimile est, qui publici non priuati iuris testamenti factionem esse contendit, aut certè eius librarios verborum transpositione, quod fieri frequenter solet turpissimè lapsos, aut denique calatis comitiis, quod mihi non viderur, etiam Papiniani tempore fieri testamenta consueuisse. Nec iis assentior, qui Accursium secuti, testamenti factionem sic apud Papinianum interpretantur quasi Papinianus contenderit, ius testamentorum faciendorum tribui iure publico & legibus. Nihil enim aliud apud Papinianum quæritur quàm testamenti factio, non quo iure cuiquam tribuatur, sed *cuius iuris sit*; hoc est, quo iure fiant testamenta, publico ne an priuato publicè ne an priuatim: sicut quærimus *magistratum creatio*,

*consecratio, aut adoptio, cuius iuris sit*, hoc est, quo iure creentur magistratus, res consecrentur, adoptiones fiant. Est igitur privati iuris, non publici testamenti factio. Et licet legibus ea tribui rectè dicatur, malè tamen vitioseque habito alicuius privati iuris respectu, tribui publico iure eadem existimatur. Lege enim regia ius publicum penitus sublatum, in principem constat translatum esse, & per consequens omnem abolitam publici priuatique iuris antiquam differentiam. Igitur non publico, sed *ciuili*, hoc est, priuato iure tribui faciendi testamenti ius & potestas solet. Et hoc quidem toties dicer dum est, quoties priuato iuri publicum ius opponitur, quod ante legem regiam fieri perpetuò solebat. At postquam lex esset lata regia, quod ante eam legem priuatum dicebatur, hoc tunc & esse & appellari ius publicum cœpit. Quo sensu ius publicum accepisse visus est Papinianus, in cap. 15. §. 2. Ad legem Falcid. Et cum *ius publicum priuatorum pactis mutari non posse* scriberet idem Papinianus, cap. 38. de pactis: non dubium est, quin *priuatum*, hoc est ciuile ius, per *publicum* intellexerit. Atque hæc quidem hactenus de iure publico: de quo pessimè disserunt & sentiunt omnes alij.

## CAPVT XIII.

*Responsum quoddam Martiani integrum non videri, & illud quomodo restitui possit obiter demonstratum.*

**E**X hoc *quasitum est*, inquit Martianus, *si ancilla prægnans manumissa sit, deinde ancilla postea facta, aut expulsa ciuitate, pepererit, liberum an seruum pariat: & tamen rectius probatum est, liberum nasci, & sufficere ei, qui in ventre est, liberam matrem vel medio tempore habuisse,*  
cap. 5.

cap. 5. §. 3. de statu hom. Qui locum hunc interpretantur, sedulo conantur ostendere quomodo fœmina ciuitate expulsa libertatem perdat. Et quia deportatione libertas non adimitur, quæ deportatio expulsionis quædam species est; nonnulli idcirco de libertate quæ iuris duntaxat Quiritium est, hunc locum esse accipiendum contenderunt. Sed falluntur. Vnam enim eandemque libertatem ancillis iisque fœminis quæ expulsa sunt ciuitate, visus est ademisse Martianus. Et idcirco mihi planè persuasum habeo, locum hunc imperfectum esse, & sic restituendum: *Ex hoc quasitum est, si ancilla prœgnans manumissa sit, deinde ancilla postea facta, aut expulsa ciuitate pepererit, liberum an seruum, ciuem an peregrinum pariat: & tamen rectius probatum est liberum & ciuem nasci, & sufficere ei qui in ventre est, liberam matrem, vel ciuem medio tempore habuisse.* Et hanc quidem restitutionem nostram vera huius responsi sententia omnino postulat. Dux enim hîc à Martino proponuntur quæstiones diuersæ; vna quidem, de eo qui ex ancilla medio tempore libera natus est, altera verò de eo qui nascitur ex peregrina, quæ ciuis Romana etiam medio tempore fuit. Et ad vtramque quæstionem hanc visus est Martianus respondisse, liberum non seruum ex ancilla huiusmodi, & ciuem non peregrinum ex huiusmodi peregrina procreari; cap. 18. de statu hom. cap. 6. §. 2. de hered. instit. cap. 2. §. 1. ad S. C. Tertull. Cur autem hæc verba, *Ciuem an peregrinum*, & alia his similia deleta fuerint, illud fortassis in causâ fuisse existimari potest, quod veteres peregrinitatis controuersias abolitas esse sibi persuasum Tribonianus habuerit. Eumque non reprehenderem, si hæc quoque verba, *Aut expulsa ciuitate*, deleri fecisset. Iis enim retentis & deletis aliis, dici non potest quàm sint omnia in hoc responso perturbata,

T t 3      quàm



quàm absurda, ne dicam inepta. Ipse Tribonianus sententiam hanc meam vehementer confirmat. Hic enim eundem Martiani locum, iisdem planè verbis sub titulo de ingenuis, institutionum libro primo ferens, hæc verba, *Aut expulsa ciuitate*, sciens prout omisit. Quod sanè non fecisset, si ad aliam illam quæ ab eodem Martiano tractabatur, peregriniorum controuersiam, ea verba pertinere, tandem absque ulla editisque pandectis, cum iam institutionibus componendis operam daret, non animaduertisset. igitur in hoc responso delenda sunt hæc verba, *expulsa ciuitate*, vel certè illa, quæ superius posuimus delenda. Et ita mihi videtur.

## CAPUT XIII.

*De ludis Circensibus explicantur leges  
quadam obscuriores.*

**T**HEODORVS Balsamon Synodi quæ fuit in Trullo canonem interpretans 24. auctor est, quod *pulum Circenses ludos exhibuisse expensis propriis, domos, equos, stabula, & reditus habuisse pro curriculis huiusmodi celebrandis.* Idque sibi voluisse visus est Vlpianus, dum inter publica ciuilia munera, equorum Circensium spectacula referret, cap. 1. De muneribus. Quod planè consentaneum est, quod ad hunc modum in ista sancti Hilarionis scribit diuus Hieronymus: *Secundum Italicum eiusdem oppidi municeps aduersus Gazem duumuirum Marne idolo deditum, Circenses equos curriebat. Hoc siquidem in Romanis urbibus iam inde sentitur à Romulo, ut propter felicem Sabinarum raptum ipso quasi consiliorum Deo, quadrigæ septeno currant cunctu, & equos partis aduersa fregisse victoria sit. Hic sentitur amulo suo habente maleficium, qui daemoniacis quibusdam*



nam imprecationibus, & huius impediret equos, & illius incitaret ad cursum, venit ad beatum Hilarionem, & non tam aduersarium ledi, quàm se defendi obsecrauit. Ineptum visum est venerando seni in huiusmodi nugis orationem perdere. Cum subrideret & diceret: Cur enim non magis equorum pretium pro salute animæ tuæ pauperibus erogas? Ille respondit functionem esse publicam, & hoc non tam se malle quàm cogi: nec posse hominem Christianum uti magicis artibus, sed à seruo Christi potius auxilium petere, maxime contra Gazenses aduersarios Dei, & non tam sibi quàm Ecclesiæ Christi insultantes. Rogatus ergo à fratribus qui aderant, scyphum fictilem, quo bibere consueuerat, aqua iussit impleri, eique tradi. Quem cum accepisset Italicus, & stabulum, & equos, & aurigam suum rhedam, carcerumque repagula aspersit. Mira vulgi expectatio. Nam & aduersarius hoc ipsum irridens, diffamauerat, & fautores Italici certam victoriam pollicentes, exultabant. Igitur dato signo, hi aduolant, isti præpediuntur, sub horum currû rota feruent, illi præteruolentium terga vix cernunt: clamor sit vulgi nimius, ita ut ethnici quoque ipsi concrepârent, Marnas victus à Christo est. Hæc diuus Hieronymus. Ex quo loco illud etiam videtur intelligi, quod sic de agitatoribus maleficum audientibus Valentinianus, Theodosius & Arcadius Imperatores scribunt: Quod si quisquam ex agitatoribus contra hoc interdictum venire tentauerit, ultimum supplicium non euadat. cap. fin. C. de malefic. Dubium enim non est, quin de iis agitatoribus senserint Imperatores, quos maleficum audientes, dæmoniacis quibusdam imprecationibus aduersariorum equos impediuisse, & suos ad cursum incitasse, scribit D. Hieronymus. Id enim agitadores facere interdum consueuisse, non Hieronymus solum, sed Arnobius etiam expressè testatus est, aduersus gentes lib. 1. sic de maleficis scribens:

*Quis enim hos nesciat, aut sine clauibus referare qua clausa sunt, aut ora silentio vincere, aut in curriculis equos debilitare, incitare, tardare? Eoque pertinet quod ita Cassiodorus Variarum libro tertio scribit: Suscepit partem populi protinus inclinatam, & quos ipse fecerat tristes, laborauit iterum reddere latiores, modo agitadores arte superans, modo equorum velocitate transcendens: Frequentia palmarum eum dici faciebant maleficum. Illud etiam obseruari solet, vt agitadores, omnesque alij qui satis deseruiunt certaminibus, ignominiosi non habeantur, c. 4. in princip. de his qui not. inf. quamuis scripserit in libro de spectaculis expresse Tertullianus, eos ignominia damnari solitos. De iis enim solis sentire Tertullianum arbitror, qui quæstus causa in certamen prodeunt. Huiusmodi siquidem homines notari infamia consueuisse, nec ipsemet inficias ire Vlpianus potest. Eos, inquit Vlpianus, qui quæstus causa in certamina descendunt, & omnes propter premium in scenam prodeuntes famosos esse Pegasus & Nerva filius responderunt: capite 2. in fine, de his qui not. inf. Haud dubie certaminum appellatione, Circensia etiam certamina intelligens. In huiusmodi enim certamina quæstus causa nonnullos olim descendisse, satis indicat idem Vlpianus, cum ita scribit: Equitij quoque legato usu videndum ne & domare possit, & ad vehendum sub ingo uti: sed & si forte auriga fuit, cui usus equorum relictus est, non puto eum Circensibus his usurum; quia quasi locare eos videtur. Sed si testator sciens eum huius esse instituti & vite reliquit, videtur etiam de hoc usu sensisse, cap. 12. §. 3. De usu & habit. Sensus enim est, si auriga, qui in certamen quæstus causa solet descendere, usus equitij fuerit legatus aurigam illum equis huiusmodi in Circensi certamine hac sola de causa uti non posse, quod ipse suam operam locans, equos etiam quodam*

quodammodo videatur locare, quodque is cui rei aliquis relictus est usus, ipse quidem uti ea re possit; sed non utique alteri eam locare, aut commodare. Et id quidem tunc demum verum esse ait Vlpianus, si testator ignoret eum huius esse instituti, & vitæ, cui reliquit usum equitij. Nam si sciret testator, & sciens equitij legauerit usum aurigæ, de hoc usu videtur etiam sensisse. d. §. 3. Et hæc hactenus de Circensibus ludis; de quibus si plura quis desideret, inueniet Tertulliani de spectaculis librum singularem, in quo tam perspicue de omnibus spectaculorum generibus discribitur; ut prolixioribus commentarijs ea res vix ullis indigeat. Est etiam in 3. lib. Variarum Cassiodori epistol. quædam Theodorici ad Faustum, in qua plenissime Circensis totius certaminis ratio explicatur.

C A P V T X V.

*Quæ sint inimicitia capitales.*

**S**OLENT veteres, si quæ graues inter eos incidere simultates, amicitiam solemnem quadam ratione renuntiare, & inimicitias præsentibus supersticijs profiteri. Quem morem euidenter visus est Suetonius expressisse in vita Claudij, cum scriberet, *Germanicum Pisoni amicitiam renuntiassse*. Verba Suetonij hæc sunt: *Ac ne tunc quidem ultra progressus, quam ut & amicitiam ei renuntiaret, mandarétque domesticis ultionem, si quid sibi accideret*. Ad huc morem videtur etiam Valerius Maximus respexisse, lib. 4. *Ait enim Tiberium Gracchum tribunum plebis inimicitias ex professo cum Africano & Asiatico Scipionibus gessisse*. Idem Valerius in eodem sic de Metello Macedonico scribit: *Acerri-  
mè cum Scipione Africano Macedonicus dissenserat, eorum-  
que ab emulatione virtutis profecta contentio ad graues te-*

T r s

*statúsque*

*statâsque inimicitias progressa fuerat. Nec ic quoque visus est Sidonius Apollinaris ignorasse, qui sic Epist. lib. 7. scribit: Inimicitias honeste exerceat, tarde credit, celeriter deponit. Cicero etiam auctor est, inimicitias olim denuntiari solitas. Sic enim pro Lucio Flacco scribit: Etenim cum à clarissimis viris iustissimas inimicitias sæpè cum benè meritis ciuibus depositas esse vidissem, non sum arbitratus quenquam amicum reipublicæ, posteaquam L. Flacci amor in patriam perspectus est, novas huic inimicitias nulla accepta iniuria denuntiaturum. His addatur sic etiam lib. 9. Epist. Senecam scripissse: Inimicitias mihi denuntias, si quicquam ex his quæ quotidie facio, ignoraueris. Et de ira lib. 3. Hortensius, inquit, simultates tibi indiceret, & Cicero, si derideres crimina eius, inimicus esset. Et hæc quidem cum ita sint; nunc mihi videor intelligere, quales inimicitias appellauerint Iurisconsulti capitales. cap. 18. in fin. de procurat. cap. 15. de recept. arbitr. cap. 6. de excusat. c. 3. §. 9. de administ. vel transfer. leg. cap. 9. de his quæ vt indign. §. Item si propter. Instit. de excus. Eas nimirum, quas alter alteri testato denuntiauerat. Certè quia sanguinem & vindictam spirabant ex professo, indèque capitales appellatæ videri omnino possunt. Nec aliud mihi voluisse visus est Seneca, cum sic de ira libr. 3. scriberet: Quid inuat tanquam in æternum genitos iras indicare, & breuissimam iracundiam dissipare?*

## CAPUT XVI.

*Explicatur Titulus 17. Libri secundi Codicis Iustiniani Caesaris.*

**E**X T A T in secundo libro Codicis Iustiniani Cæsaris huiusmodi titulus, *Vt nemini liceat sine iudicis auctoritate signa rebus imponere alienis.* Hic titulus præter

præter insignem quam præ se fert obscuritatem mendosus est. Quorsum enim illud *Alienis* ? Sanè in antiquis exemplaribus non *Alienis*, sed *quas alius detinet*, expressè scriptum inuenimus in hac epigraphæ, eaque mihi lectio visa est probabilior. Sub hoc enim titulo duæ ponuntur diuersorum principum constitutiones & in utrâque non de rebus alienis, sed de ijs mobilibus rebus controuersis agi videtur, *quas alius detinet*, hoc est, quæ aut apud iudicem ipsum, aut apud sequentem, aut etiam in æde apud ædituum custodiæ causa deponuntur. Idque significare videntur hæc verba; *Rebus quas alius detinet: rebus quas alius tenebat: rebus & fructibus apud te constitutis*. Huiusmodi rebus imponi signa noluerunt Imperatores, hoc est annulis signa imprimi. Idque Festi auctoritate confirmatur, quem sic scripsisse accepimus: *Signare significat modò scribere, modò annulo signa imprimere, modò pecora signis notare*. Huic etiam illud consentaneum est, quod ad hunc modum de asino libr. 10. scribit Apuleius: *Sed ne fortè aliquis inquam istorum, quos offers, aureorum nequam vel adulter reperiatur, in hoc ipso sacculo conditos eos annulo tuo pranoia, donec altero de nummulario presente comprobentur: sic inductus signauit pecuniam*. Et paulò post: *Donec iussu magistratum ministeria publica contrectatis nequissimi serui manibus, annulum ferreum deprehensum cum signo sacculi conferunt*. Adde, moris olim fuisse ut res quisque suas etiam minutissimas annulo signaret. Idque testatus est expressè Plinius Nat. hist. lib. 33. cap. 1. sic enim scribit: *Quæ fuit illa priscorum vita, qualis innocentia, in qua nihil signabatur? At nunc cibi quoque & potus vindicantur annulo à rapinis*. Eoque non dubium est quin Valerius respexerit lib. 7. capit. 9. de M. Popilio ita scribens: *Unum etiam de multis qui assidebant, ultimo complexu & osculo dignum indicauit, semperque*

*semperque annulos quoque suos ei tradidit; ut elicit ne quid ex ea hereditate, quam non erat aditurus, auiteret. Quibus etiam non incommode addi potest, quod de clauibus & annulis maiori natu filiae traditus scribit Papinianus. cap. 77. §. 21. de leg. 2. Et ex his euidem locis omnibus satis arbitror intelligi posse, sic imponi rebus litigiosis signa Imperatores vetuisse, ut nullos ex litigatoribus rebus controuersis custodia: sequestrationisve causa depositis, sine iudicis auctoritate, signa imponere tanquam proprijs paterentur. De rebus autem litigiosis in hoc titulo tractari ex his verbis probari potest, *Anie sententiam*; & ex illis, *Ut amotis his, causis que ex officio tibi infertur, terminetur*. Cur autem passi non sint Imperatores huiusmodi rebus imponi signa, hac proferri ratio potest, nimirum quod signa rebus duntaxat proprijs potuerint imponi; quarum numero non posse res litigiosas comprehendi, tam palam est, ut huius rei causa nullius Iuriconsulti schola intranda sit. Porro de his qui titulos prædijs suis vel alienis imponunt, scripturus fauente Deo sum alio loco, titulum illum, quem huc referendum plerique somniant nouo veroque sensu explicaturus.*

## CAPUT XVII.

*Quo sensu scripserit Celsus, Pecuniam sine peculio fragilem esse.*

**I**GNORANT interpretes quid sibi voluerit Celsus cum ita scriberet: *His verbis, Qua ibi mobilia mea erunt, do lego, nummos ibi repositos ut mutui darentur, non esse legatos Proculus ait; at eos, quos praesidij causa repositos habent, ut quidam bellis civilibus fecissent, eos legato contineri; & audisse se rusticos senes ita dicentes; Pecuniam sine peculio*



*peculio fragilem esse: peculium appellātes, quod praesidij causa seponeretur. c. 79. de legat. 3. Varro scribit, de lingua Latina lib. 4. praesidium esse dictum, quia extra castra praesidebant in aliquo loco, quo tutior regio esset. Sine, ut Festus definit, praesidium est, quod utilitate & salute alicuius, auxilij gratia praepositur. Sunt ergo milites praesidarii qui utilitate & salute totius exercitus, extra castra praesidebant, hoc est, qui castris auxilij gratia praeponebantur: Hinc deinde factum videri potest, ut pro exercitu praesidium veteres interdum posuerint per Senecdochen. c. 5. in prin. de cap. & postl. Et sic quod reponitur praesidij causa, recte exercitus causa dici repositum potest. Nam cum ad Attic. scriberet Cic. Italiam totam armis praesidiisque teneri, an non per praesidia suadendo xixas exercitus intellexit? Vlp auctor est, ob transitum exercitus conferri quid a rusticis ex fructibus olim solitum. cap. 27. §. de usus. Proinde quis hinc non intelligit, quid sibi Celsus & Proculus voluerint, cum pecuniam sine peculio scriberent esse fragilem? Peculium est, inquiunt illi, quod praesidij, hoc est exercitus transiens causa seponitur: siquidem tunc ex fructibus sic conferre solent rustici, ut aut certam praestarent fructuum portionem, aut eam certarum nummorum quantitate redimerent. Proinde qui boni esse patresfamilias volebant, hi seponebant certam pecuniae summam, qua huiusmodi fieri, ut saepe bellis civilibus contingebat, fructuum redemptio posset. Et quod ita sepositum erat, appellant rustici *peculium suum*. Fortassis ea ratione qua servile peculium nomen accepit. Quemadmodum enim hac potissimum ratione peculium sedulo conuasant servi, ut tandem se peculio suo redimant ex servitute; sic rustici, ut militibus debitam redimerent fructuum portionem praesidij causa seponebant nummos aliquot. Sine qua sepositione omnis eorum pecunia tam fragilis erat, ut*

ea exercitu transeunte plerumque tota prædigeretur. Possit etiam hunc locum sic intelligi, ut præsidij causa dicatur id seponi, quod militum metu absconditur, partim fortassis ex prauis militum moribus, partim etiam ex his Celsi verbis, *Ut quidam bellis civilibus factitassent*, obscurum quibusdam non videtur. Sed magis arridet interpretatio prior. Certè quia causam præsidij ad præsidij metum trahere durum est.

## CAPUT XVIII.

*Emendatur, & explicatur Cap. Vltimum,  
D. De in integ. restituit.*

**E**XISTIMO apud Macrum pro *Contra rem publicam* omnino legendum esse, non *Contra rem iudicatam*, sed *Contra rem publicatam*, in d. c. ult. Quasi ita scriptum fuerit, *Contra rem public.* quod tam rem publicatam quàm rempublicam significat, ut sit sensus, non solum minori viginti quinque annis, & maiori causa reipublicæ absenti contra rem iudicatam succurri, sed etiam *contra rem publicatam* hoc est etiam post rei iudicatæ executionem, nimirum cum iam à creditoribus res addicta publicatur, hoc est venalis proferbitur. Id enim quod publicè propositum erat venale, siue ad publicam ararij, siue ad priuatam spectaret alicuius commoditatem, publicari propriè dicebatur, c. ii. §. i. in fine, quod vi aut clam. Quo sensu *edictis publicare* in libro *Aduersus Constantium* Augustum scribit Hilarius. *Vel detracta templis, inquit, vel publicata edictis, vel exacta pœnis Deo ingeris.* Et id quidem adeò verum est, ut etiam illi qui proscribebantur, publicari dicerentur, quemadmodum ex Tert. & Suet. constar. Sic enim in lib. de fuga in persecutione scribit Tertulianus: *Publicaris inquit, bonum tibi est, qui enim non publicatur*



*blificatur in hominibus, publicatur in Deo.* Et Suetonius in Claudio: *Libertinos, qui se pro equitibus Romanis agerent, publicauit.* Eoque etiam pertinet illud Lampridij in Alexandro *Mulieres infames, quarum infinitum numerum deprehenderat, publicari iussit, exoletis omnibus deportatis.* Est igitur *publicare* proscribere, est etiam proclamare. Quod enim à præcone proclamatur, id rectè *publicari* etiam dicitur. Res quæ ad ararium deferrebantur, simul atque *edictis* essent *publicate*, apud ararium interdum auersione, plerumque sectione distrahebantur. Quod qua ratione accipiendum sit, alio loco demonstratum est. Hac autem verba, *Cognita scilicet causa*, sic etiam accipienda puto, quasi contenderit Maccæ, *cognitione*, hoc est extra ordinem minori, & *appellationis* medio, hoc est ordinatio iure maiori in hac specie succurri. c. 17. & 42. de minoribus. Ea, nisi fallor ratione, qua sic apud Suetonium in vita Claudij scriptum inuenimus: *Alium interpellatum ab aduersariis de propria lite, negantemque cognitionis rem, sed ordinarij iuris esse, agere causam confestim apud se coëgit.*

## CAPVT XIX.

*Quid sit apud Vlpianum, Extra ordinem ferias indicare.*

**F**ERIAS indici & proclamari consueuisse auctor est M. Varro. Sic enim de lingua Latina libro 5. scribit: *In Tusculanis sacris est, vinum nouum ne vehatur in urbem antè quàm vinalia kalemur.* A quibus autem fuerint olim feriæ proclamatæ, idem Varro in eodem libro his verbis manifestum facit: *Rex cum ferias menstruas Nonis Februariis edicit, hunc diem februatum appellant.* Et paulò pòst: *Harum rerum vestigia apparent in sacris Nonalibus in arce: quod tunc ferias primas menstruas quæ futura sint eo mense, rex prædicit.* Ex quibus  
locis

locis satis perspicuum est , regem sacrificulum singulorum mensium ferias proclamasse. Videlicet (vt Arnobius aduersus gentes lib.7.scribit)hunc in modum: *Lauatio Deum matris est hodie: Iouis epulum cras est: Æsculapij geritur, celebraturque vindemia: Lectisternium Cereris erit Idibus proximis: Telluris natalis est.* Prætorem etiam ferias, quæ Compitalia dicebantur, more maiorum verbis olim solemnibus, concepisse, Gellius lib.10.cap.24.& Macrobius lib.1. Sat.cap.4.auctores sunt. Postquam enim modo die quinti, modo die quinte veteres dixisse docuissent, ad demonstrandam hanc veterum consuetudinem conferre plurimum addiderunt, hac solemnia verba, quibus more maiorum Compitalia prætor concipere solet: **DIE NONI POST CALENDAS IANVARIAS QVIRITIBVS COMPITALIA ERVNT.** Nec quidem Compitalitias duntaxat, sed etiam ferias omnes conceptiuas, & imperatiuas indicare prætorem consueuisse, ex eodem Macrobio & Suetonio probari potest. Sic enim in Claudio scribit Suetonius: *Observauitque sedulo, vt quoties terra in vrbe monisset, ferias aduocata concione prætor in vrbe indiceret.* Et Macrobius; *Feriarum, inquit, publicarum genera sunt quatuor. Aut enim statiuæ sunt, aut conceptiuæ, aut imperatiuæ, aut nundinæ. Et sunt statiuæ vniuersi populi communes, certis & constitutis diebus ac mensibus, & in Fastis statis obseruationibus annotatæ: in quibus præcipuè seruantur Agonalia, Carmentalia, Lupercalia. Conceptiuæ sunt quæ quotannis à magistratibus vel sacerdotibus concipiuntur, in dies vel certos vel etiam incertos: vt sunt Latina, Paganalia, Sementina, Compitalia. Imperatiuæ sunt, quas consules vel prætores pro arbitrio potestatis indicunt. Nundinæ sunt paganorum, id est, rusticorum, quibus conueniunt negotiis propriis vel mercibus prouisuri.* Hæc Macrobius Saturnal.lib.1.cap.16. Indicebat igitur ferias prætor, indicebat

dicebat etiam ferias rex sacrificulus : Hic quidem sacrorum rite peragendorum, ille vero solius à forensibus negotiis vacationis gratia. Quæ cum ita sint, non esse nunc admodum obscurum puto quid sibi voluerit Vlpianus cum ita scriberet : *Si feria extra ordinem sint indicta, ob res putà prospere gestas, vel in honorem principis, & propterea magistratus ius nō dixerit; C. Cassius nominatim edicebat restitutum se, quia per prætorem videtur factum. Solennium enim feriarum rationem haberi non debere, quia prospicere eas potuerit & debuerit actor, ne in eas incidat.* cap. 26. §. 5. Ex quib. caus. maior. Sensus enim est, si prætor extra ordinem ferias indixerit, & per hoc exempta actori sit actio temporalis, quod eo die magistratus *ius non dixerit*, hoc est quod dies ille nefastus fuerit, actionem eiusmodi restituendam esse, quod non per actorem, sed per prætorem qui extra ordinem ferias indixit, actio exempta sit. Et quia huiusmodi feriæ, *quas imperatiuas appellant*, non possunt prospici; ideo etiam omni carere culpa videtur actor. quod utique non fieret, si *solennibus*, hoc est stativis feriis actio exempta foret. Huiusmodi enim feriæ, statis observationibus in albo fastorum annotatæ, facile potuerunt sine aliqua inactione ab actore prævideri. Et ita satis esse perspicuum puto, quid sit apud Vlpianum *extra ordinem ferias indicere*.

## C A P V T X X.

*De ordinariis, vicariis, & mediastinis servis.*

**A**DIVERSIS ministeriis & servilibus officiis, diuersa olim nomina habebant servi. Aut enim erant ordinarij, aut erant vicarij, aut denique media-

V u

stini.

stini. Et ex ordinariis quidem seruis alij actores  
 bantur, alij silentarij, alij atrienses, alij procuratores,  
 alij dispensatores, alij tabularij. Inter vicarios  
 numerari possunt, ostiarij, ministratores, sym-  
 niaci, cubicularij, histriones, focarij, coci, lecti-  
 cursores, palestritę, balneatores, capfarij. Ad han-  
 uorum differentiam in Paradoxis visus est respo-  
 † Cicero, in quodam deprauatissimo loco, quem ego  
 restituendum censeo: *Atque ut in magna familia*  
*alij lautiores, ut sibi videtur serui, sed tamē serui: sic in ci-*  
*te, atrienses ac pari stultitia sunt, quos signa, quos tabulae,*  
*calatū argentiū, quos Corinthia opera, quos aedificia mag-*  
*nimio opere delectant. At sumus, inquit, principes ci-*  
*tis. Vos vero ne conseruorum quidē vestrorum principes*  
*Sed ut in familia, qui tergunt, qui ungūt, qui verrūt, qui*  
*gunt, nō honestissimum locum seruitutis tenent: sic in ciuitate*  
*qui se istarum rerū cupiditatibus dederunt, ipsius ci-*  
*tis locum pene infimum obtinēt. Hęc Cic. legitur pa-*  
*Atrienses ac tu pari stultitia sunt. Ego vero sic lo-*  
 hunc restituo, ut contendam desiderari hęc verba  
 in ciuitate, & pro *Ac tu*, omnino *Achi*, legendum  
 Vtitur enim Cicero quadam ad priuatorum fam-  
 ciuitatis collatione. Cum igitur sic scriberet, *ut in magna familia, &c.* nonne subsequi necessari-  
 buit, *Sic in ciuitate*? Quid? An non id liquido de-  
 strant hęc subsequētia verba? *Sed ut in familia*  
*tergunt, qui ungunt, &c. sic in ciuitate, &c.* Cæterum  
 fuerint ordinarij, vicarij, & mediaستي serui, no-  
 ris constat. In manuscripto meo de verborum  
 significatione antiquissimo libello sic scriptum  
 ni. *Seruus ordinarius est, qui aliis seruis prapositus est: ser-*  
*vicarius est, qui seruo subministrat ordinario: seruus me-*  
*stinus est, qui medium gerit actum, nec inter ordinarios*  
*nos, nec inter vicarios, sed medius inter hos & illos con-*

*randus est. Auctor est Vlpianus, ordinarios seruos sub se vicarios habuisse, iisque velut dominos sic imperasse ut vicarij essent cum suis peculiis in peculio ordinariorum. cap. 6. 7. & 17. de pecul. cap. 5. in princ. de tribut. act. indeque vicarios seruos peculiare nuncupatos esse, passim traditum est. cap. 3. §. miles. de suis & legit. cap. 21. de peculio legato. Vnde etiam perspicuum est, quo sensu scripserit apud eundem Vlpianum Pomponius, eum qui in seruitute pecuniaria mancipia proposita habuit, infamia notari post libertatem. cap. 4. §. 1. in fine. de his qui not. infam. Dubium enim non est, quin de seruis ordinariis, vicaria mancipia sua propositentibus, senserit in hoc loco Pomponius. Inter ordinarios seruos, actores, procuratores, dispensatores, & silentarios esse referendos, ex Saluiano didici, qui lib. 4. de prouidentia Dei, sic de ordinariis & vicariis seruis scribit: *Ad fugam seruos non miserie tantum, sed etiam supplicia compellunt. Pauent quippe actores, pauent silentarios, pauent procuratores, prope est ut inter istos omnes nullorum minus serui sint, quam dominorum suorum: ab omnibus caduntur, ab omnibus conteruntur. Quid amplius dici potest? Multi seruorum ad dominos fugiunt, dum conseruos timent. Vnde illorum fugam non tam ad eos debemus referre qui fugiunt, quam ad eos qui fugere compellunt. Vm patiuntur infelicissimi, famulari optant & fugere coguntur, discedere à seruitio dominorum suorum omnino nolunt, & conseruorum suorum crudelitate non permittuntur ut seruiant. Mendaces quoque esse dicuntur, ad mendacium nihilominus atrocitate presentis supplicij coarctantur. Siquidem dum tormentis se volunt eximere, mentiuntur. Quid autem mirum, si positis in metu seruus, mentiri mauult, quam flagellari? Hæc Saluianus. Quib. addi non incommode potest, quod sic de Nerone scribit Suetonius: *Mox tribus urbanas ad sacramentum citauit, ac nullo idoneo respon-***



676 IACOB. RÆVARD. TOM. I.  
dente, certum dominis seruorum numerum indixit. Ne  
ex tota cuiusque familia probatissimos, ne dispensator  
quidem aut amanuensibus exceptis, recepit. Seruus cu-  
rum omnium summa imminet, & earum admini-  
stratio commissa est, actor dicitur. de quo sic Colum-  
lib. 1. de re rustica, scribit: *Ita fit, ut & actor & famulus*  
*peccent.* Et paulo post: *Idemque actori præcipiendum est*  
*conuictum cum domestico, multoque minus cum extero*  
*beat.* De seruo actore visus est etiam sentire Plautus  
cum sic in Asinaria scriberet:

*Nam si sciet noster senex fidem non esse huic habitam*  
*Succenscat, quoi omnium rerum ipsius summam crederet.*  
Eoque respexit Apuleius de asino aureo lib. 8. *Se-*  
*quidam, inquit, cui cunctam familia tutelam dominus*  
*miserat suus, quique possessionem illam maximam in qua*  
*uerteramus villicabat, habens ex eodem famulatio confer-*  
*coniugam, libera cuiusdam extrarieque mulieris flagrantem*  
*cupidine.* Ab actore differt procurator, differt et  
dispensator. Procuratori supellectilem & cellam  
credi consueuisse, auctor est lib. 3. de prouid. Dei  
uianus, sic enim scribit: *Sicut serui hominum diuitem*  
*aut procuratores, quibus vel supellectilis copiosa, vel cella*  
*opulenta creduntur, fideles absque dubio dici non queunt.*  
*res traditas deuorarent; sic profecto etiam Christiani homines*  
*fideles non sunt, si bona sibi a Deo assignata corrumpere*  
*procuratorem accepisse visus est Vlpianus: Seneca*  
*consuit, inquit, ne fugitiui admittantur in saltus, neque*  
*regantur à villicis, vel procuratoribus possessorum.* capit. 1.  
primo in princip. de seruis fugit. Dispensatoris  
tem officium fuisse videtur, seruis reliquis vsu  
quædam per canonem certum stipendia, certos  
frumenti modios in mensem præstare. cap. 88. §.  
de leg. 3. capit. ult. §. 3. de verb. obligat. Idque ex  
dem Saluiano, Terentio, & Donato satis potest  
telli

telligi. Sakiianus enim libro quarto de prouidentia Dei sic scribit : *Ac primum serui , si fures sunt , ad furandum forsitan egestate coguntur ; quia etiam si iis stipendia usitata prestentur , consuetudini hac magis quam sufficientia satisfaciunt , & ita implent canonem , ut non expleant satietatem.* Eoque pertinet quod sic Terentius in Phormione scribit :

*Quod ille vnciatim vix de demenso suo  
Suum defraudans genium compar sit miser,  
Id illa vniuersum abripiet.*

In quem locum Donatus , *Serui , inquit , quaternos modios accipiebant frumenti in mensem , & id demensum dicebatur , utrum à mense , an à metiundo , incertum est.* Idque euidenter etiam probari ex Plauto potest in Stichos , qui sic Antiphonem seruos suos alloquentem introducit.

*Vos meministis quot calendis petere demensum cibum ,  
Qui minus meministis quod opus sit facto facere in  
adibus.*

In hoc enim loco *quot calendis* , pro *quot mensibus* positum est ; hoc est *in menses singulos* . capit. 12. §. 2. quand. dies leg. ced. Hinc etiam intelligimus quid sit apud Vlpianum *cibaria mandare* , in frag. tit. 12. *Pro herede gerit* , inquit Vlpianus , *qui rebus hereditariis tanquam dominus vititur , veluti qui actionem rerum hereditariarum facit , aut seruis hereditariis cibaria mandat.* Sensus enim est , qui dispensatori familiæ testatoris iubet seruis hereditariis *dare cibaria* , hoc est canonem consuetum siue demensum , eum per hoc pro herede gerere. Hæc de seruis ordinariis. De mediastinis seruis & vicariis nunc dicendum est : Cum hunc in modum scriberet Vlpianus : *Etenim multum interest qualis seruus sit , bone frugi , ordinarius dispensator , an vero vulgaris , vel mediastinus , an qualis qualis* , cap. 15. §. 3 1. de iniuriis . tres haud

dubiè visus est seruorum differentias posuisse, sic quidem vt alios contenderit ordinarios esse, alios vulgares siue vicarios, alios denique mediastinos. per mediastinos intelligens qui nec inter ordinarios, nec inter vicarios referebantur. §. pœna autem. Inst. de iniur. quamuis aliter Porphyrio & Acron in hunc Horatii versum de mediastinis sentiant:

*Cum mediastinus tacito pede rura petebat.*

Rectius profecto à Nonio Marcello *non balnearum duntaxat, sed ædium quoque ministri & curatores, mediastini definiuntur*, hoc est, vt mihi quidem videtur, qui curam habebant sarctorum tectorum. Curatores igitur & ministri ædium nec vicarij sunt, nec ordinarij, sed tertiam quandam seruorum constituunt differentiam, & mediastini, quasi inter ordinarios & vicarios medij, nuncupantur. Et hoc quidem verum omnino est, si nullos huiusmodi serui sub se vicarios habeant. Si enim haberent vicarios, non amplius mediastini, sed ordinarij dicebantur. Idque sibi visus est Vlpianus voluisse cum atrienses inter mediastinos referret. capitulo primo, §. 4. nautæ, caupones. De iis haud dubiè atriensibus sentiens, qui nullos in peculio seruos habebant. Et sic quidem omnes illi serui inter mediastinos referendi sunt, qui nullos sub se vicarios habent. Quo sensu Modestinus accepisse etiam mediastinum videri potest, capitulo vlt. de op. ser. Inter vulgares, siue vicarios seruos, topiarij, pastores, saltuarij, ostiarij, dietarij, numerandi sunt, quorum meminit Vlpianus capitulo octauo & duodecimo, §. 22. de inst. & instructo legat. De ostiariorum officio scribit ad hunc modum eleganter Saluianus de prouidentia Dei libro tertio. *Siquidem intra ianuas non modo illustrium portarum, sed etiam presidum, aut prepositorum, non omnes passim intrare presumunt, nisi quos aut index vocauerit,*